

Namo tassa bhagavato arahato sammāsambuddhassa

Khuddakanikāye

Nettipakaraṇa-aṭṭhakathā

Ganthārambhakathā

Mahākāruṇikaṃ **nāthaṃ**, ñeyyasāgarapāraguṃ;
Vande nipuṇagambhīra-vicitranayadesanaṃ.

Vijjācaraṇasampannā, yena niyyanti lokato;
Vande tamuttamaṃ **dhammaṃ**, sammāsambuddhapūjitaṃ.

Sīlādiguṇasampanno, ʃhito maggaphalesu yo;
Vande **ariyasaṅghaṃ** taṃ, puññakkhettaṃ anuttaraṃ.

Vandanājanitaṃ puññaṃ, iti yaṃ ratanattaye;
Hatantarāyo sabbattha, hutvāhaṃ tassa tejasā.

ʃhitiṃ ākaṅkhamānena, ciraṃ saddhammanettiyā;
Dhammarakkhitanāmena, therena abhiyācito.

Padumuttaranāthassa, pādamūle pavattitaṃ;
Passatā abhinīhāraṃ, sampattaṃ yassa matthakaṃ.

Saṃkhittaṃ vibhajantānaṃ, eso aggoti tādinaṃ;
ʃhapito etadaggasmiṃ, yo mahāsāvakuttamo.

Chalabhiñño vasippatto, pabhinnapaṭisambhido;
Mahākaccāyano thero, sambuddhena pasaṃsito.

Tena yā bhāsitaṃ netti, satthārā anumoditā;
Sāsanassa sadāyattā, navaṅgassatthavaṇṇanā.

Tassā gambhīrañāṇehi, ogāhetabbabhāvato;
Kiñcāpi dukkarā kātuṃ, atthasaṃvaṇṇanā mayā.

Saha saṃvaṇṇanaṃ yasmā, dharate satthusāsanāṃ;
Pubbācariyasihānaṃ, tiṭṭhateva vinicchayo.

Tasmā tamupanissāya, ogāhetvāna pañcapi;
Nikāye peṭakenāpi, saṃsanditvā yathābalaṃ.

Suvisuddhamasaṃkiṇṇaṃ, nipuṇatthavinicchayaṃ;
Mahāvihāravāsīnaṃ, samayaṃ avilomayaṃ.

Pamādalekhaṃ vajjetvā, pālīṃ sammā niyojayaṃ;
Upadesaṃ vibhāvento, karissāmatthavaṇṇanaṃ.

Iti atthaṃ asaṅkiṇṇaṃ, **nettippakaraṇassa** me;
Vibhajantassa sakkaccaṃ, nisāmayatha sādhavoti.

Tattha kenaṭṭhena netti? Saddhammanayanaṭṭhena **netti**. Yathā hi taṇhā satte kāmādibhavaṃ nayatīti “bhavanetī”ti vuccati, evamayampi veneyyasatte ariyadhammaṃ nayatīti saddhammanayanaṭṭhena “netti”ti vuccati. Atha vā nayanti tāyāti **netti**. Nettippakaraṇena hi karaṇabhūtena dhammakathikā veneyyasatte dassanamaggaṃ nayanti sampāpentīti, nīyanti vā ettha etasmiṃ pakaraṇe adhiṭṭhānabhūte patiṭṭhāpetvā veneyyā nibbānaṃ sampāpiyantīti **netti**. Na hi nettiupadesasannissayena vinā aviparītasuttatthāvabodho sambhavati. Tathā hi vuttaṃ – “tasmā nibbāyitukāmenā”tiādi. Sabbāpi hi suttassa atthasaṃvaṇṇanā nettiupadesāyattā, netti ca suttappabhavā, suttam sammāsambuddhappabhavanti.

Sā panāyaṃ netti pakaraṇaparicchedato tippabhedā hāranayapaṭṭhānānaṃ vasena. Paṭhamañhi hāravacāro, tato nayavicāro, pacchā paṭṭhānavicāroti. Pāḷivavatthānato pana saṅgahavāravibhāgavāravasena duvidhā. Sabbāpi hi netti saṅgahavāro vibhāgavāroti vāradvayameva hoti.

Tattha **saṅgahavāro** ādito pañcahi gāthāhi paricchinnō. Sabbo hi pakaraṇattho “yaṃ loko pūjayate”tiādīhi pañcahi gāthāhi apariggahito nāma natthi. Nanu cettha paṭṭhānaṃ asaṅgahitanti? Nayidamevaṃ daṭṭhabbaṃ, mūlapadaggahaṇena paṭṭhānassa saṅgahitattā. Tathā hi vakkhati – “aṭṭhārasa mūlapadā kuhiṃ daṭṭhabbā sāsanaapaṭṭhāne”ti. Mūlapadapaṭṭhānāni hi atthanayasankhāratikā viya aññaṃaññaṃ saṅgahitāni.

Vibhāgavāro pana uddesaniddesapaṭiniddesavasena tividho. Tesu “tattha katame soḷasa hārā”ti ārabhitvā yāva “bhavanti aṭṭhārasa padāni”ti ayaṃ uddesavāro. “Assādādīnavatā”ti ārabhitvā yāva “tettiṃsā ettikā netti”ti ayaṃ niddesavāro. Paṭiniddesavāro pana hāravibhaṅgavāro hārasampātavāro nayasamuṭṭhānavāro sāsanaapaṭṭhānavāroti catubbidho. Tesu “tattha katamo desanāhāro”ti ārabhitvā yāva “ayaṃ pahānena samāropanā”ti ayaṃ hāravibhaṅgavāro. Tattha “katamo desanāhārasampāto”ti ārabhitvā yāva “anupādīsēsā ca nibbānadhātū”ti ayaṃ hārasampātavāro. Etthāha – hāravibhaṅgahārasampātavārānaṃ kiṃ nānākaraṇanti? Vuccate – yattha anekehipi udāharaṇasuttehi eko hāro niddisīyati, ayaṃ hāravibhaṅgavāro. Yattha pana ekasmiṃ sutte aneke hārā sampatanti, ayaṃ hārasampātavāro. Vuttañhetam **peṭake** –

“Yattha ca sabbe hārā, sampatamānā nayanti suttattham;
Byañjanavidhiputhuttā, sā bhūmī hārasampāto”ti.

Nayasamuṭṭhānasāsanaapaṭṭhānavāravibhāgo pākaṭo eva. Sāsanaapaṭṭhānavāro pana saṅgahavāre viya uddesaniddesavāresupi na sarūpato uddhaṭoti. Etthāha – “idaṃ nettippakaraṇaṃ mahāsāvaka bhāsitaṃ, bhagavatā anumodita”nti ca kathametaṃ viññāyatīti? Pāḷito eva. Na hi pāḷito aññaṃ pamāṇataraṃ atthi. Yā hi catūhi mahāpadesehi aviruddhā pāḷi, sā pamāṇaṃ. Tathā hi agarahitāya ācariyaparamparāya peṭakopadeso viya idaṃ nettippakaraṇaṃ ābhataṃ. Yadi evaṃ kasmāssa nidānaṃ na vuttaṃ. Sāvaka bhāsītānampi hi **subhasutta-** (dī. ni. 1.444 ādayo) **anaṅgaṇasutta-** (ma. ni. 1.57 ādayo) **kaccāyanasamyuttā**dīnaṃ nidānaṃ bhāsītanti? Nayidaṃ ekantikam. Sāvaka bhāsītānaṃ buddhabhāsītānampi hi ekaccānaṃ paṭisambhidāmagganiddesādīnaṃ dhammapadabuddhavaṃsādīnaṃca nidānaṃ na bhāsitaṃ, na ca tāvatā tāni appamāṇaṃ, evamidhāpi daṭṭhabbaṃ.

Nidānaṃca nāma suttavinayānaṃ dhammabhaṅḍāgārikaupālittherādīhi mahāsāvakeveva bhāsitaṃ, idaṃca mahāsāvaka bhāsitaṃ, theram muñcitvā anaññaṃvisayattā imissā vicāraṇāyāti kimetena nidānagavesanena, atthoyevettha gavesitabbo, yo pāḷiyā aviruddhoti. Atha vā pāḷiyā atthasaṃvaṇṇanābhāvato na imassa pakaraṇassa viṣuṃ nidānavacanakkiccam atthi, paṭisambhidāmagganiddesādīnaṃ viyāti daṭṭhabbaṃ.

Idāni etasmiṃ pakaraṇe nānappakāraḥkosallatthaṃ ayaṃ vibhāgo veditabbo – sabbameva cetam pakaraṇaṃ sāsanapariyēṭṭhibhāvato ekavidhaṃ, tathā ariyamaggasampādanato vimuttirasato ca. Byañjanatthavicārabhāvato duvidhaṃ, tathā saṅgahavibhāgabhāvato dhammavinayatthasaṃvaṇṇanato lokiyalokuttaratthasaṅgahaṇato rūpārūpadhammapariggāhakato lakkhaṇalakkhiyabhāvato pavattinivattivacanato sabhāgavisabhāganiddesato sādharmaṇāsādhāraṇadharmavibhāgato ca.

Tividhaṃ puggalattayaniddesato tividhakalyāṇavibhāgato pariññattayakathanato pahānattayūpadesato sikkhattayasāṅgahaṇato tividhasaṃkilesavisodhanato mūlagītiānugītisaṅgītibhedato piṭakattayatthasaṃvaṇṇanato hāranayapaṭṭhānappabhedato ca.

Catubbidhaṃ catuppaṭṭisambhidāvisayato catunayadesanato dhammatthadesanāpaṭivedhagambhīrabhāvato ca. Pañcavidhaṃ abhiññeyyādidhammavibhāgato pañcakkhandhaniddesato pañcagatiparicchedato pañcanikāyatthavivaraṇato ca. Chabbidhaṃ chaḷārammaṇavibhāgato chaajjhattikabāhirāyatanavibhāgato ca. Sattavidhaṃ sattaviññāṇaṭṭhitiparicchedato. Navavidhaṃ suttādinavaṅganiddesato. Cuddasavidhaṃ suttādhiṭṭhānavibhāgato. Soḷasavidhaṃ aṭṭhavīsatividhaṅca sāsanapaṭṭhānappabhedato. Caturāsītisahassavidhaṃ caturāsītisahassadhammakhandhavicārabhāvatoṭiādinā nayena pakaraṇavibhāgo veditabbo.

Tattha **sāsanapariyēṭṭhibhāvato**ti sakalaṃ nettippakaraṇaṃ sikkhattayasāṅgahassa navaṅgassa satthūsāsanassa atthasaṃvaṇṇanābhāvato. **Ariyamaggasampādanato**ti dassanabhūmibhāvanābhūmisampādanato. **Vimuttirasato**ti sāsanassa amatapariyosānattā vuttaṃ. **Byañjanatthavicārabhāvato**ti hārabyañjanapadakammanayānaṃ byañjanavicāratā atthapadaatthanayānaṃ atthavicāratā vuttaṃ. **Saṅgahavibhāgabhāvo** parato āvi bhavissati. **Dhammavinayatthasaṃvaṇṇanato**ti sakalassāpi pariyattisāsanassa dhammavinayabhāvato vuttaṃ. **Lakkhaṇalakkhiyabhāvato**ti nettivacanassa lakkhaṇattā udāharaṇasuttānaṅca lakkhiyattā vuttaṃ. **Sabhāgavisabhāganiddesato**ti samānajātiyā dhammā sabhāgā, paṭipakkhā visabhāgā, taṃvicārabhāvatoṭi attho. **Sādhāraṇāsādhāraṇadharmavibhāgato**ti pahānekaṭṭhasahajekaṭṭhatādisāmaññena ye dhammā yesaṃ dhammānaṃ nānavatthādinā sādharmaṇā tabbidhuratāya asādhāraṇā ca, taṃvibhāgato duvidhanti attho.

Puggalattayaniddesatoti ugghaṭṭitaññuādi puggalattayaniddesato. **Tividhakalyāṇavibhāgato**ti ādikalyāṇādivibhāgato. **Mūlagītiānugītisaṅgītibhedato**ti paṭhamaṃ vacanaṃ mūlagīti, vuttasseva atthassa saṅgahagāthā anugīti, taṃtaṃsuttatthayojanavasena vippakiṇṇassa pakaraṇassa saṅgāyanaṃ saṅgīti, sā therassa parato pavattitāti veditabbā, eṭṭasaṃ tissannaṃ bhedato tividhanti attho. **Pañcakkhandhaniddesato**ti rūpādipañcakkhandhasīlādipañcadhammakhandhaniddesato pañcavidhanti attho. **Suttādhiṭṭhānavibhāgato**ti lobhadosaṃmohānaṃ alobhadosaṃmohānaṃ kāyavacīmanokammānaṃ saddhādipañcindriyānaṅca vasena cuddasavidhassa suttādhiṭṭhānassa vibhāgavacanato cuddasavidhanti attho. Sesam suviññeyyanti na papañcitam.

1. Saṅgahavāraṇaṇā

Evam anekabhedavibhatte nettippakaraṇe yadidaṃ vuttaṃ “saṅgahavibhāgavāraṇasena duvidha”nti, tattha saṅgahavāro ādi. Tassāpi “**yaṃ loko pūjayate**”ti ayaṃ gāthā ādi. Tattha **yanti** aniyamato upayoganiddeso, tassa “tassā”ti iminā niyamaṇaṃ veditabbaṃ. **Lokoti** kattuniddeso. **Pūjayate**ti kiriyāniddeso. **Salokapāloti** kattuvisesanaṃ. **Sadāti** kālaniddeso. **Namassati cāti** upacayena kiriyāniddeso. **Tassāti** sāminiddeso. **Etanti** paccattaniddeso. **Sāsanavaranti** paccattaniddesena niddiṭṭhadhammanidassanaṃ. **Vidūhīti** karaṇavacanena kattuniddeso. **Ñeyyanti** kammavācakaṭṭhāniddeso. **Naravarassāti** “tassā”ti niyamevā dassitassa sarūpato dassanaṃ.

Tattha lokiyanti ettha puññāpuññāni tabbipāko cāti **loko**, pajā, sattanikāyoti attho. Loka-saddo hi

jātisaddatāya sāmāññavasena niravasesato satte saṅgaṇhāti. Kiñcāpi hi lokasaddo saṅkhārabhājanepi diṭṭhappayo, pūjanakiriyaogyabhūtatāvasena pana sattalokavacano eva idha gahitoti daṭṭhabbaṃ. **Pūjayateti** mānayaṭi, apacāyatīti attho.

Lokaṃ pālentīti lokapālā, cattāro mahārājāno. Lokiyā pana indayamavarūṇakuverā lokapālāti vadanti. Saha lokapālehīti **salokapālo**, ‘loko’ti iminā tulyādhikaraṇaṃ. Atha vā issariyādhīpaccena taṃtaṃsattalokassa pālanato rakkhaṇato khattiyacatumahārājasakkasuyāmasantusitasunimmitaparanimmitavasavattimahābrahmādayo lokapālā. Tehi saha taṃtaṃsattanikāyo salokapālo lokoti vutto. Atha vā ‘dveme, bhikkhave, sukkā dhammā lokaṃ pālentī’ti (a. ni. 2.9; itivu. 42) vacanato hirottappadhammā lokapālā. Tehi samannāgato loko **salokapālo**. Hirottappasampannā hi pāpagarahino sappurisā dhammacchandavantatāya bhagavati pūjanamakkāraparā hontīti.

Sadāti sabbakālaṃ rattiñceva divā ca, **sadāti** vā bhagavato dharamānakāle tato parañca. Atha vā **sadāti** abhinīhārato paṭṭhāya yāva sāsananantaradhānā, tato parampi vā. Mahābhīnīhārato paṭṭhāya hi mahābodhisattā bodhiyā niyatatāya buddhaṅkurabhūtā sadevakassa lokassa pūjanīyā ceva vandanīyā ca hontī. Yathāha bhagavā sumedhabhūto –

‘Dīpaṅkaro lokavidū, āhūtīnaṃ paṭiggaho;
Mama kammaṃ pakittetvā, dakkhiṇaṃ pādumuddhari.

‘Ye tatthāsuṃ jinaputtā, padakkhiṇamakamsu maṃ;
Devā manussā asurā ca, abhivādetvāna pakkamu’nti. (bu. vaṃ. 2.75-76);

Namassati cāti keci kesañci pūjāsakkārādīni karontāpi tesam apākaṭaḡuṇatāya namakkāraṃ na karontī, na evaṃ bhagavato, yathābhūtaabbhuggatakittisaddatāya pana bhagavantaṃ sadevako loko pūjayati ceva namassati cāti attho. ‘Sadā naramanusso’ti keci paṭhanti, taṃ na sundaraṃ. **Tassāti** yaṃ sadevako loko pūjayati ceva namassati ca, tassa. **Etanti** idāni vattabbaṃ buddhiyaṃ viparivattamaṇaṃ sāmāññena dasseti. **Sāsanavaranti** taṃ sarūpato dasseti. Tattha diṭṭhadhammikasamparāyikaparamatthehi yathārahaṃ satte sāsati vineti etenāti sāsanaṃ, tadeva ekantaniyyānaṭṭhena anaññasādhāraṇaḡuṇatāya ca uttamaṭṭhena taṃtaṃabhīpatthitasamiddhihetutāya paṇḡitehi varitabbato vā varaṃ, sāsanaṃeva varanti **sāsanavaraṃ**. **Vidūhīti** yathāsabhāvato kammakammaphalāni kusalādibhede ca dhamme vidantīti vidū, paṇḡitamanussā, tehi. **Ñātabbaṃ**, **ñāṇamarahatīti** vā **ñeyyaṃ**. **Naravarassāti** purisavarassa, aggaḡuggalassāti attho.

Idaṃ vuttaṃ hoti – yo anaññasādhāraṇamahākaraṇāsabbaññūtaññāḡadīḡuṇavisayogena sadevakena lokena pūjanīyo namassanīyo ca bhagavā arahaṃ sammāsambuddho, tassa loke uttamapuggalassa etaṃ idāni amhehi vibhajitabbahāranayapaṭṭhānavicāraṇavisayabhūtaṃ sāsanaṃ ādikalyāṇatāḡadīḡuṇasampattiyā varaṃ aggaṃ uttamaṃ nipuṇaṇāḡagocarātāya paṇḡitavedanīyamevāti. Bhagavato hi vacanaṃ ekagāthāmatampi saccapaṭiccasamuppādakhandhāyatanadhātindriyasatipaṭṭhānādisabhāvadhammaniddhāraṇakkhamatāya soḡasaḡhārapañcanayasoloḡasaṭṭhāvīsatividhapaṭṭhānavicārayogyabhāvena ca paramagambhīraṃ atthato agādhapāraṃ saḡhasukhumaññāvisayamevāti. Tenevāha – ‘paññavantassāyaṃ dhammo, nāyaṃ dhammo duppaññassā’ti (dī. ni. 3.358; a. ni. 8.30). Atha vā bhagavato sāsanaṃ pariññākkamena lakkhaṇāvabodhapaṭṭipattiyā suññatamukhādīhi ogāhitabbattā aviññūnaṃ supinantenapi na visayo hotīti āha – ‘**vidūhi ñeyya**’nti. Tathā ca vuttaṃ – ‘etu viññū puriso’tiādi.

Apare pana ‘taṃ tassa sāsanaṃ’nti paṭhanti, tesam matena yaṃ-saddo sāsana-saddena samānādhikaraṇoti daṭṭhabbo. Idaṃ vuttaṃ hoti yaṃ sāsanaṃ salokapālo loko pūjayati namassati ca, taṃ sāsanaṃ vidūhi ñātabbanti. Imasmiñca naye lokapāla-saddena bhagavāpi vuccati. Bhagavā hi lokagatāyakattā nipariyāyena lokapālo, tasmā ‘tassā’ti lokapālassa satthunoti attho. Salokapāloti

cettha lokapāla-saddo guṇībhūtopi satthuvisayattā sāsana-saddāpekkhatāya sāmibhāvena sambandhīvisesabhūto padhānabhūto viya paṭiniddesaṃ arahatīti.

Kathaṃ pana sayamaṃ dhammassāmī bhagavā dhammaṃ pūjayatīti? Nāyaṃ virodho. Dhammagaruno hi buddhā bhagavanto, te sabbakālaṃ dhammaṃ apacāyamānāva viharantīti. Vuttañhetamaṃ – “yamañnāhaṃ yvāyaṃ dhammo mayā abhisambuddho, tameva dhammaṃ sakkatvā garuṃ katvā upanissāya vihareyya”nti (saṃ. ni. 1.173; a. ni. 4.21).

Api ca bhagavato dhammapūjanā sattasattāhappaṭipattiādīhi dīpetabbā. Dhammassāmīti ca dhammena sadevakassa lokassa sāmīti attho, na dhammassa sāmīti. Evampi namassatīti vacanaṃ na yujjati. Na hi bhagavā kañci namassatīti, esopi niddoso. Na hi namassatīti padassa namakkāraṃ karotīti ayameva attho, atha kho garukaraṇena tanninno tappono tappabbhāroti ayampi attho labbhati. Bhagavā ca dhammagarutāya sabbakālaṃ dhammaninnaṇapabbhārabhāvena viharatīti. Ayañca attho “yena sudama svāhaṃ niccakappaṃ viharāmī”ti (ma. ni. 1.387) evamādīhi suttapadehi dīpetabbo. “Vidūhi neyya”ntipi pāṭho, tassa paṇḍitehi saparasantānesu netabbaṃ pāpetabbanti attho. Tattha attasantāne pāpanaṃ bujjhanaṃ, parasantāne bodhananti daṭṭhabbaṃ.

Evamaṃ bhagavato sadevakassa lokassa pūjanīyavandanīyabhāvo aggapuggalabhāvo ca vuccamāno guṇavisitṭhataṃ dīpeti, sā ca guṇavisitṭhatā mahābodhiyā veditabbā. Āsavakkhayañānapadaṭṭhānañhi sabbaññutaññānaṃ sabbaññutaññānapadaṭṭhānañca āsavakkhayañānaṃ “mahābodhi”ti vuccati. Sā aviparītadhammadesanato tathāgate suppatitṭhitāti viññāyati. Na hi savāsananiravasesakilesappahānaṃ anāvaraṇaṇānañca vinā tādisī dhammadesanā sambhavati. Iccassa catuvesārajjayogo. Tena dasabalachaasādhāraṇaṇānaṭṭhārasaveṇikabuddhadhammādisakalasabbaññugūṇapāripūrī pakāsītā hoti. Etādisī ca guṇavibhūti mahākaraṇāpubbaṅgamaṃ abhinīhārasampattiṃ purassaraṃ katvā sampāditaṃ samattiṃsapāramisañkhātaṃ puññañāṇasambhāramantarena na upalabbhatīti hetusampadāpi atthato vibhāvītā hotīti evamaṃ bhagavato tīsupi avatthāsu sabbasattānaṃ ekantahitappaṭilābhahetubhūta ādimajjhapariyosānakalyāṇā niravasesā buddhaguṇā imāya gāthāya pakāsītāti veditabbaṃ.

Dutiyanaye pana yasmā sikkhattayaṅgamaṃ saphalaṃ ariyamaggasāsanaṃ tassa ārammaṇabhūtañca amatadhātuṃ tadadhigamūpāyañca pubbhāgapaṭipattisāsanaṃ tadatthaparidīpanañca pariyattisāsanaṃ yathārahaṃ saccābhisamayavasena abhisamento svākkhātadīgūṇavisesayuttataṃ manasikaronto sakkaccaṃ savanadhāraṇaparipucchādīhi paricayaṃ karonto ca sadevako loko pūjayati nāma. Lokanātho ca sammāsambodhippattiyā veneyyānaṃ sakkaccaṃ dhammadesanena “ariyaṃ vo, bhikkhave, sammāsamādhiṃ desessāmi” (ma. ni. 3.136; saṃ. ni. 5.28; peṭako. 24), “maggānaṭṭhaṅgiko seṭṭho” (dha. pa. 273; kathā. 872; netti. 125; peṭako. 30), “yāvātā, bhikkhave, dhammā sañkhatā vā asañkhatā vā, virāgo tesamaṃ aggamakkhāyati” (itivu. 90; a. ni. 4.34), “khayaṃ virāgaṃ amataṃ pañītaṃ” (khu. pā. 6.4; su. ni. 227), “ekāyano ayaṃ, bhikkhave, maggo sattānaṃ visuddhiyā” (dī. ni. 2.373; ma. ni. 1.106; saṃ. ni. 5.367), “dhammaṃ vo, bhikkhave, desessāmi ādikalyāṇa”ntiādīhi (ma. ni. 3.420; netti. 5) vacanehi thomanena ca pūjayati nāma. Tasmā sāsanaavarassa pūjanīyabhāvo idha vuccamāno anavasesato dhammaguṇe dīpetīti ye ariyabhāvādayo niyyānādayo khayavirāgādayo madanimmadanaṇādayo asañkhatādayo svākkhātātādayo ādikalyāṇatādayo ca anekehi suttapadehi paveditā aneke dhammaguṇā, te niravasesato imāya gāthāya pakāsītāti veditabbā.

Yasmā pana ariyasaccappaṭivedhena samugghāṭitasammohāyeva paramatthato paṇḍitā bālyādisamatikkamanato, tasmā bhāvitalokuttaramaggā sacchikatasāmaññaphalā ca ariyapuggalā visesato vidūti vuccanti. Te hi yathāvuttasāsanavaraṃ aviparītato ñātuṃ netuñca saparasantāne sakkūṇantīti aṭṭhaariyapuggalasamūhassa paramatthasaṅghassāpi idha gahitattā ye suppaṭipannatādayo anekehi suttapadehi saṃvaṇṇitā ariyasaṅhaguṇā, tepi niravasesato idha pakāsītāti veditabbā.

Evamaṃ paṭhamagāthāya sātisayaṃ ratanattayaguṇaparidīpanaṃ katvā idāni –

“Sabbapāpassa akaraṇaṃ, kusalassa upasampadā;

Sacittapariyodapanam, etaṃ buddhāna sāsana’nti. (dī. ni. 2.90; dha. pa. 183; netti. 30, 50, 116, 124) –

Vacanato saṅkhepato sikkhattayasaṅgahaṃ sāsanaṃ, taṃ pana sikkhattayaṃ ñānavisesavisayabhāvabhedato avatthābhedato ca tividhaṃ hoti. Kathaṃ? Sutamayañānagocaro ca yo “pariyattisaddhammo”ti vuccati. Cintāmayañānagocaro ca yo ākāraparivitakkadiṭṭhinijjhānakkhantīhi gahetabbākāro vimuttāyatanaviseso “paṭipattisaddhammo”ti vuccati. Vipassanāñānādisahagato bhāvanāmayañānagocaro ca yo “paṭivedhasaddhammo”ti vuccati. Evaṃ tividhampi sāsanaṃ sāsana varanti padena saṅgaṇhitvā tattha yaṃ paṭhamaṃ, taṃ itaresaṃ adhigamūpāyoti sabbasāsanaṃ mūlabhūtaṃ attano pakaraṇassa ca visayabhūtaṃ pariyattisāsanaṃ eva tāva saṅkhepato vibhajanto “**dvādasa padāni**”ti gāthamāha.

Tattha **dvādasāti** gaṇanaparicchedo. **Padāni**ti paricchinnadhammanidassanaṃ. Tesu byañjanapadāni pajjati attho etehīti padāni. Atthapadāni pana pajjanti ñāyantīti padāni. Ubhayampi vā ubhayathā yojetabbaṃ byañjanapadānampi aviparītaṃ paṭipajjitabbattā, atthapadānaṃ uttarivisesādhigamassa kāraṇabhāvato, tāni padāni parato pāliyaññeva āvi bhavissantīti tattheva vaṇṇayissāma. Atthasūcanādiatthato **suttaṃ**. Vuttañhetam saṅgahesu –

“Atthānaṃ sūcanato, suvuttato savanatotha sūdanato;
Suttānā suttasabhāgato ca, ‘sutta’nti akkhāta’nti. (pārā. aṭṭha. 1.paṭhamamahāsāṅgītikathā; dī. ni. aṭṭha. 1.paṭhamamahāsāṅgītikathā; dha. sa. aṭṭha. nidānakathā);

Tadetaṃ tattha suttapaṭakavasena āgataṃ, idha pana paṭakattayavasena yojetabbaṃ. “Dvādasa padāni sutta”nti vuttaṃ, yaṃ pariyattisāsanaṃ attho. **Taṃ sabbanti** taṃ “sutta”nti vuttaṃ sakalaṃ buddhavacanaṃ. **Byañjanañca attho cāti** byañjanañceva tadattho ca. Yato “dvādasa padāni sutta”nti vuttaṃ. Idaṃ vuttaṃ hoti – atthasūcanādito suttam pariyattidhammo, tañca sabbam atthato dvādasa padāni cha byañjanapadāni ceva cha atthapadāni cāti. Atha vā yadetaṃ “sāsana vara”nti vuttaṃ, taṃ sabbam suttam, pariyattisāsanaṃ adhippetattā. Atthato pana dvādasa padāni, byañjanatthapadasamudāyabhāvato. Yathāha – “byañjanañca attho cā”ti. **Taṃ viññeyyaṃ ubhayanti** yasmim byañjane atthe ca vacanavacanīyabhāvena sambandhe suttavohāro, tadubhayaṃ sarūpato viññātabbaṃ tattha katamaṃ byañjanaṃ katamo atthoti? Tenevāha – “**ko attho byañjanaṃ katama**”nti.

Evaṃ “sāsana vara”nti vuttassa suttassa pariyattibhāvaṃ tassa ca atthabyañjanapadabhāvena veditabbaṃ dassetvā idāni tassa pavicayupāyaṃ nettippakaraṇaṃ padatthavibhāgena dassetuṃ “**soḷasahārā**”ti gāthamāha.

Tattha soḷasa hārā etissāti **soḷasahārā. Pañcanayā aṭṭhārasamūlapadāti** etthāpi ese va nayo. Atha vā soḷasa hārā soḷasahārā. Evaṃ itaratthāpi. Hāranayamūlapadāni eva hi saṅkhepato vitthārato ca bhāsītāni nettīti. **Sāsanaṃ pariyetthīti** sāsanaṃ atthapariyesanā, pariyattisāsanaṃ atthasamvaṇṇanāti attho, sakalasseva vā sāsanaṃ atthavicāraṇāti attho. Paṭipattipaṭivedhepi hi nettinayānusārena adhigacchantīti. **Mahakaccānenāti** kaccoti purātano isi, tassa vaṃsālaṅkārahūtoyaṃ mahāthero “kaccāno”ti vuccati. Mahakaccānoti pana pūjāvacaṇaṃ, yathā mahāmoggallānoti, “kaccāyanagottaniddiṭṭhā”tipi pāṭho. Ayañca gāthā nettim saṅgāyantehi pakaraṇatthasaṅgaṇhanavasena ṭhapitāti daṭṭhabbā. Yathā cāyaṃ, evaṃ **hāravibhaṅgavāre** taṃtaṃhāraniddesani gamane “tenāha āyasmā”tiādivacaṇaṃ, hārādisamudāyabhūtāyaṃ nettiyaṃ byañjanatthasamudāye ca sutte kiṃ kena vicīyatīti vicāraṇāyaṃ āha – “**hārā byañjanavicayo**”tiādi.

Tattha soḷasapi hārā mūlapadaniddhāraṇamantarena byañjanamukheneva suttassa samvaṇṇanā honti, na nayā viya mūlapadasaṅkhātasabhāvadhāmaniddhāraṇamukhenāti te “byañjanavicayo suttassā”ti vuttā. Atthanayā pana yathāvuttaatthamukheneva suttassa atthasampaṭipattiyā hontīti āha – “**nayā tayo**

ca suttattho’ti. Ayañca vicāraṇā paratopi āgamissati. Keci “nayo cā”ti paṭhanti, taṃ na sundaraṃ. **Ubhayaṃ pariggahīti** hārā nayā cāti etaṃ ubhayaṃ suttassa atthaniddhāraṇavasena parisamantato gahitaṃ sabbathā sutte yojitaṃ. **Vuccati suttam** vadati saṃvaṇṇeti. Kathaṃ? **Yathāsuttam** suttānurūpaṃ, yaṃ suttam yathā saṃvaṇṇetabbaṃ, tathā saṃvaṇṇetīti attho. Yaṃ yaṃ suttanti vā **yathāsuttam**, sabbam suttanti attho. Nettinayena hi saṃvaṇṇetuṃ asakkuṇeyyaṃ nāma suttam natthīti.

Idāni yaṃ vuttam – “sāsanavaram vidūhi ñeyya”nti, tattha nettisaṃvaṇṇanāya visayabhūtaṃ pariyaṭṭidhammeva pakārantarena niyamevā dassetuṃ **“yā cevā”**tiādi vuttam.

Tattha atthesu kataparicchedo byañjanappabandho desanā, yo paṭhoti vuccati. Tadatto desitaṃ tāya desanāya pabodhitattā. Tadubhayañca vimuttāyatanaśīsenā paricayaṃ karontānaṃ anupādāparinibbānapariyosānānaṃ sampattīnaṃ hetubhāvato ekantena viññeyyaṃ, tadubhayaṃ vimuttassa vā ñeyyassa abhāvato tadeva dvayaṃ viññeyyanti imamattaṃ dasseti **yā ceva... pe... viññeyyanti**. **Tatrāti** tasmim vijānane sādhetabbe, nipphādetabbe cetam bhummaṃ. **Ayamānupubbīti** ayam vakkhamānā anupubbī hāranayānaṃ anukkamo, anukkamena vakkhamānā hāranayāti attho. **Navavidhasuttantapariyeṭṭhīti** suttādivasena navaṅgassa sāsanassa pariyesanā, atthavicāraṇāti attho. Sāmiatthe vā etaṃ paccattaṃ navavidhasuttantapariyeṭṭhiyā anupubbīti. Atha vā **anupubbīti** karaṇatthe paccattaṃ. Idaṃ vuttam hoti – yathāvuttavijānane sādhetabbe vakkhamānāya hāranayānupubbīyā ayam navavidhasuttantassa atthapariyesanāti.

Etthāha – kathaṃ panettha geyyaṅgādīnaṃ suttabhāvo, suttabhāve ca tesam kathaṃ sāsanassa navaṅgabhāvo. Yañca saṅgahesu vuccati “sagāthakaṃ suttam geyyaṃ, niggāthakaṃ suttam veyyākaraṇa”nti, tathā ca sati suttāṅgameva na siyā. Athāpi visuṃ suttāṅgaṃ siyā, maṅgalasuttādīnaṃ (khu. pā. 5.1 ādayo; su. ni. 261 ādayo) suttāṅgasaṅgaho na siyā, gāthābhāvato dhammapadādīnaṃ viya, geyyaṅgasaṅgaho vā siyā, sagāthakattā sagāthāvaggassa viya, tathā ubhatovibhaṅgādīsu sagāthakappadesānanti. Vuccate –

Suttanti sāmāññavidhi, visesavidhayo pare;
Sanimittā niruḷhattā, sahatāññena nāññato.

Sabbassāpi hi buddhavacanassa suttanti ayam **sāmāññavidhi**. Tathā hi “ettakaṃ tassa bhagavato suttāgataṃ suttapariyāpannaṃ (pāci. 1242), sāvattihīyā suttavibhaṅge, sakavāde pañca suttasatāni”tiādivacanato vinayābhiddhammapariyattivisesepi suttavohāro dissati. Tadekadesesu pana geyyādayo **visesavidhayo** tena tena nimittena paṭiṭṭhitā. Tathā hi geyyassa sagāthakattaṃ tabbhāvanimittaṃ. Lokepi hi sasilokaṃ sagāthakaṃ cuṇṇiyaganthaṃ geyya”nti vadanti. Gāthāvirahe pana sati pucchivā vissajjanabhāvo veyyākaraṇassa. Pucchāvissajjanañhi “byākaraṇa”nti vuccati. Byākaraṇameva veyyākaraṇanti. Evaṃ sante sagāthakādīnampi pañhāvissajjanavasena pavattānaṃ veyyākaraṇabhāvo āpajjati? Nāpajjati, geyyādisaññānaṃ anokāsabhāvato “gāthāvirahe satī”ti visesitattā ca. Tathā hi dhammapadādīsu kevalaṃ gāthābandhesu sagāthakattepi somanassaññāmayikagāthāyuttesu “vuttañheta”ntiādivacanasambandhesu abbhutadhammapaṭisaṃyuttesu ca suttavisesesu yathākkamaṃ gāthāudānaitivuttakaabbhutadhammasaññā paṭiṭṭhitā, tathā satipi gāthābandhabhāve bhagavato atītāsu jātīsu cariyānubhāvappakāsakesu jātakasaññā. Satipi pañhāvissajjanabhāve sagāthakatte ca kesuci suttantesu vedassa labhāpanato vedallasaññā paṭiṭṭhitāti evaṃ tena tena sagāthakattādīnā nimittena tesu tesu suttavisesesu geyyaṅgādisaññā paṭiṭṭhitāti visesavidhayo suttāṅgato pare geyyādayo.

Yaṃ panettha geyyaṅgādīnimittarahitaṃ suttam, taṃ suttāṅgaṃ visesasaññāparihārena sāmāññasaññāya pavattanotī. Nanu ca sagāthakaṃ suttam geyyaṃ, niggāthakaṃ suttam veyyākaraṇanti suttāṅgaṃ na sambhavatīti codanā tadavatthā evāti? Na tadavatthā, sodhitattā. Sodhitañhi pubbe gāthāvirahe sati pucchāvissajjanabhāvo veyyākaraṇassa tabbhāvanimittanti. Yañca vuttam – “gāthābhāvato maṅgalasuttādīnaṃ suttāṅgasaṅgaho na siyā”ti, tampi na, niruḷhattā. Niruḷho hi maṅgalasuttādīsu suttabhāvo, na hi tāni dhammapadabuddhavaṃsādayo viya gāthābhāvena paññātāni,

kintu suttabhāveneṇa. Teneva hi **aṭṭhakathāyaṃ** “suttanāmaka”nti nāmaggaṇaṃ kaṃṃ.

Yaṃ pana vuttaṃ “sagāthakattā geḃyaṅgasaṅgaho vā siyā”ti, tadapi natthi, yasmā sahatāññeṇa. Saha gāthāhīti hi sagāthakaṃ. Sahabhāvo ca nāma atthato aññeṇa hoti, na ca maṅgalasuttādīsū gāthāvinimutto koci suttaṃpadeso atthi. Yo saha gāthāhīti vucceyya, na ca samudāyo nāma koci atthi. Yadapi vuttaṃ – “ubhatovibhaṅgādīsū sagāthakappadesānaṃ geḃyaṅgasaṅgaho siyā”ti, tadapi na aññato. Aññā eva hi tā gāthā, jātakādīpariyāpannattā. Ato na tāhi ubhatovibhaṅgādīnaṃ geḃyaṅgabhāvoti evaṃ suttādīnaṃ aṅgānaṃ aññamaññasaṅkarābhāvo vedītabbo. Yasmā pana sabbampi buddhavaṇaṃ yathāvuttanayena atthānaṃ sūcanādiatthena suttantveva vuccati, tasmā vuttaṃ – “navavidhasuttantapariyeyṭṭhi”ti.

Saṅgahavāraṇṇanā niṭṭhitā.

2. Uddesavāraṇṇanā

1. Evaṃ saṅgahavāreṇa saṅkhepato dassite hārādayo idāni vibhāgena dassetuṃ “**tattha katame soḃasa hārā**”tiādīdesanā āradadhā. Tattha **tatthāti** yaṃ vuttaṃ – “soḃasahārā netti”ti, tasmīṃ vacane, tissaṃ vā gāthāyaṃ, yāni hāranayamūlapadāni uddhaṭāni, tesūti attho. **Katame**ti pucchāvacaṇaṃ. Pucchā ca nāmesā pañcavidhā adīṭṭhajotanāpucchā diṭṭhasaṃsandanaṃpucchā vimaticchedanaṃpucchā anumatiṃpucchā kathetukamyatāpucchāti. Tāsu ayaṃ kathetukamyatāpucchā. **Soḃasāti** gaṇanavasena paricchedo. Tena nesam na tato uddham adho cāti etaparamataṃ dasseti. Sā cetaparamatā parato āvi bhavissati. **Hārāti** gaṇanavasena paricchinnānaṃ sāmāññato dassanaṃ. **Desanā vicayoti**ādi sarūpadassanaṃ.

Tattha kenatṭhena hārā? Harīyanti etehi, ettha vā suttageyyādivisayā aññāṇasaṃsayavipallāsāti **hārā**, haranti vā sayam tāni, haraṇamattameva vāti **hārā** phalūpacāreṇa. Atha vā harīyanti voharīyanti dhammasaṃvaṇṇakadhammapaṭiggāhakehi dhammassa dānaggahaṇavasenāti **hārā**. Atha vā hārā viyāti **hārā**. Yathā hi anekaratanāvalisamūho hārasaṅkhāto attano avayavabhūtaratanasamphashehi samuppajjanīyamānahilādasukho hutvā tadupabhogījanasārīrasantāpaṃ nidāghapariḃhupajjanitaṃ vūpasameti, evametepi nānāvidhapaṃmattharatanappabandhā saṃvaṇṇanāvīsesā attano avayavabhūtapapaṃmattharatanādhiḃgamena samuppādiyamānanibbutisukhā dhammapaṭiggāhakajanaḃadayaḃparitāpaṃ kāmarāgādīkīlesahetukaṃ vūpasamentīti. Atha vā hārāyanti aññāṇādīnaṃ hāraṃ apagamaṃ karonti ācikkhantīti vā **hārā**. Atha vā sotujanacittassa haraṇato ramaṇato ca **hārā** niruttinayena, yathā – “bhavesu vantaḃamano bhagavā”ti (visuddhi. 1.144; pārā. aṭṭha. 1.1 verañjakaṇḃavaṇṇanā). Ayaṃ tāva hārānaṃ sādīhāraṇato attho.

Asādīhāraṇato pana desīyati saṃvaṇṇīyati etāya suttatthoti **desanā**, desanāsahacaraṇato vā **desanā**. Nanu ca aññepi hārā desanāsāṅkhātassa suttassa atthasaṃvaṇṇanato desanāsahacārinovāti? Saccametaṃ, ayaṃ pana hāro yebhuyyena yathārutavaseneva viññāyamāno desanāya saha caratīti vattabataṃ arahati, na tathā pare. Na hi assādādīnavanissaraṇādīsandassanarahitā suttadesanā atthi. Assādādīsandassanavibhāvanalakkhaṇo cāyaṃ hāroti.

Viciyanti etena, ettha vā padapañhādayo, viciṭi eva vā tesanti **vicayo**. Pāḃiyaṃ pana vicinatīti vicayoti ayamattho dassito.

Yuttīti upapattisādhanayutti, idha pana yuttivicāraṇā yutti uttarapadalopena “rūpabhavo rūpa”nti yathā, yuttisahacaraṇato vā. Idhāpi desanāhāre vuttanayena attho vitthāretabbo.

Padaṭṭhānanti āsannaḃaraṇaṃ, idhāpi padaṭṭhānavicāraṇātiādi vuttanayeneva vedītabbaṃ.

Lakkhīyanti etena, ettha vā ekalakkhaṇā dhammā avuttāpi ekavacaṇenāti **lakkhaṇaṃ**.

Viyūhīyanti vibhāgena piṇḍīyanti etena, ettha vāti byūho. Nibbacanādīnaṃ sutte dassiyamānānaṃ catunnaṃ byūhoti **catubyūho**, catunnaṃ vā byūho etthāti **catubyūho**.

Āvaṭṭīyanti etena, ettha vā sabhāgā visabhāgā ca dhammā, tesam vā āvaṭṭananti **āvaṭṭo**.

Vibhajīyanti etena, ettha vā sādharmaṇāsādhāraṇānaṃ saṃkilesavodānadhammānaṃ bhūmiyoti **vibhatti**, vibhajanam vā etesaṃ bhūmiyāti **vibhatti**.

Paṭipakkhavasena parivattīyanti iminā, ettha vā sutte vuttadhammā, parivattanaṃ vā tesanti **parivattano**.

Vividhaṃ vacanaṃ ekassevatthassa vācakametthāti vivacanaṃ, vivacanameva **vevacanaṃ**, vividhaṃ vuccati etena atthoti vā vivacanaṃ. Sesam vuttanayameva.

Pakārehi pabhedato vā ṇāpīyanti iminā, ettha vā atthāti **paññatti**.

Oṭārīyanti anuppavesīyanti etena, ettha vā suttāgatā dhammā paṭiccasamuppādādīsūti **otaraṇo**.

Sodhīyanti samādhīyanti etena, ettha vā sutte padapadatthapañhārambhāti **sodhano**.

Adhiṭṭhīyanti anupavattīyanti etena, ettha vā sāmāññavisesabhūtā dhammā vinā vikappenaṭi **adhiṭṭhāno**.

Parikaroti abhisankharoti phalanti parikkhāro, hetu paccayo ca, parikkhāraṃ ācikkhatīti **parikkhāro**, hāro, parikkhāraṃ avasāyattā parikkhārasahacaraṇato vā **parikkhāro**.

Samāropīyanti etena, ettha vā padaṭṭhānādīmukhena dhammāti **samāropano**. Sabbattha ca bhāvasādhanavasenaṭi attho sambhavatīti tassāpi vasena yojetabbaṃ.

Tassāti yathāvuttassa hāruddesassa. **Anugīti** vuttassevatthassa sukhaggahaṇatthaṃ anupacchā gāyanagāthā, tāsū osānagāthāya **atthato asaṃkiṇṇāti** padatthena saṅkararahitā, tena yadipi keci hārā aññamaññaṃ avasiṭṭhā viya dissanti, tathāpi tesam atthato saṅkaro natthīti dasseti. So ca nesaṃ asaṅkaro lakkhaṇaniddese supākaṭo hoti. **Etesañcevāti** etesaṃ soḷasannaṃ hārānaṃ. Yathā asaṅkaro, tathā ceva bhavati. Kiṃ bhavati? **Vitthāratayā** vitthārena. **Nayavibhatti** nayena upāyena ṇāyena vibhāgo. Etena taṃ eva asaṅkiṇṇataṃ vibhāveti. Keci ‘‘vitthāranayā’’ti paṭhanti, taṃ na sundaraṃ, ayaṅca gāthā kesuci potthakesu natthi.

2. Evaṃ hāre uddisitvā idāni naye uddisitum ‘‘**tattha katame**’’tiādi vuttaṃ. Tattha nayanti saṃkilese vodānāni ca vibhāgato ṇāpentīti **nayā**, nīyanti vā tāni etehi, ettha vāti **nayā**, nayanamattameva vāti **nayā**, nīyanti vā sayam dhammakathikehi upanīyanti suttassa atthapavicayatthanti **nayā**. Atha vā nayā viyāti **nayā**. Yathā hi ekattādayo nayā sammā paṭivijjhiyamānā paccayapaccayuppannadhammānaṃ yathākkamaṃ sambandhavibhāgabyāpāravirahānurūpaphalabhāvadassanena asaṅkarato sammutisaccaparamatthasaccānaṃ sabhāvaṃ pavedayantā paramatthasaccappaṭivedhāya saṃvattanti, evametepi kaṅhasukkasappaṭibhāgadhammavibhāgadassanena aviparītasuttatthāvabodhāya abhisambhuṇantā veneyyānaṃ catusaccappaṭivedhāya saṃvattanti. Atha vā pariyattiatthassa nayanato saṃkilesato yamanato ca **nayā** niruttinayena.

Nandiyāvaṭṭotiādīsū nandiyāvaṭṭassa viya āvaṭṭo etassāti **nandiyāvaṭṭo**, yathā hi nandiyāvaṭṭo antoṭhitena padhānavayavena bahiddhā āvaṭṭati, evamayampi nayoti attho. Atha vā nandiyā taṅhāya pamodassa vā āvaṭṭo etthāti **nandiyāvaṭṭo**. Tīhi avayavehi lobhādīhi saṃkilesapakkhe alobhādīhi ca vodānapakkhe pukkhalo sobhanoti **tipukkhalo**. Asantāsanajavaparakkamādivisesayogena sīho bhagavā,

tassa vikkīlitaṃ desanāvacaṅkammabhūto vihāroti katvā vipallāsataṃ paṭipakkhapaṭipānato sīhassa vikkīlitaṃ etthāti **sīhavikkīlito**, nayo. Balavisesayogadīpanato vā sīhavikkīlitasadisattā nayo **sīhavikkīlito**. Balaviseso cettha saddhādībalaṃ, dasabalāni eva vā. Atthanayattayadisābhāvena kusalādīdhammānaṃ ālocanaṃ **disālocanaṃ**. Tathā ālocitānaṃ tesāṃ dhammānaṃ atthanayattayajane samānayanato ankuso viya **ankuso**. Gāthāsu lañjeti pakāseti suttatthanti lañjako, nayo ca so lañjako cāti **nayalañjako**. **Gatāti** ñātā, matāti attho. So eva vā pāṭho. Sesāṃ vuttanayena veditabbaṃ.

3. Evaṃ nayepi uddisitvā idāni mūlapadāni uddisitum **“tatta katamāni”** tiādi āradhamaṃ. Tatta mūlāni ca tāni nayānaṃ paṭṭhānabhāgānaṃ patiṭṭhābhāvato padāni ca adhigamūpāyabhāvato koṭṭhāsabhāvato cāti **mūlapadāni**. Kosallasambhūtaṭṭhena, kucchitānaṃ vā pāpadhammānaṃ salanato viddhamāsanato, kusānaṃ vā rāgādīnaṃ lavanato, kusā viya vā lavanato, kusena vā ñāṇena lātabbato pavattetabbato **kusalāni**, tappaṭipakkhato **akusalāni**ti padattho veditabbo.

Evaṃ gaṇanaparicchedato jātībhedaṃ ca mūlapadāni dassetvā idāni sarūpato dassento saṃkilesapakkhamyeva paṭhamamaṃ uddisati **“taṇhā”** tiādinā. Tatta tasati paritasatīti **taṇhā**. Avindiyamaṃ vindati, vindiyaṃ na vindatīti **avijjā**, vijjāpaṭipakkhāti vā **avijjā**. Lubbhanti tena, sayamaṃ vā lubbhati, lubbhanamattameva vā soti **lobho**. **Dosamohesupi** eseva nayo. Asubhe “subha”nti pavattā saññā **subhasaññā**. **Sukhasaññā**disupi imināva nayena attho veditabbo. **Saṅghanti** gaṇanaṃ. **Samosaraṇanti** samoropanaṃ.

Paccanīkadhamme sametīti **samatho**. Aniccādīhi vividhehi ākārehi passatīti **vipassanā**. **Alobhā**dayo lobhādīpaṭipakkhato veditabbā. Asubhe “asubha”nti pavattā saññā **asubhasaññā**, kāyānupassanāsatiṭṭhānaṃ. Saññāsīsena hi desanā. **Dukkhasaññā**disupi eseva nayo.

Idamaṃ uddānanti idamaṃ vuttasseva atthassa vipakīṇabhāvena nassitum adatvā uddhamaṃ dānaṃ rakkhaṇamaṃ uddānaṃ, saṅghavacanaṃ attho. “Cattāro vipallāsā”tipi pāṭho. **Kilesabhūmi**ti saṃkilesabhūmi sabbesaṃ akusaladhammānaṃ samosaraṇaṭṭhānattā. Kusalanamaṃ yāni tīṇi mūlāni. “Kusalāni”tipi paṭhanti. **Satiṭṭhānā**ti asubhasaññādayo sandhāyāha. **Indriyabhūmi**ti saddhādīnaṃ vimuttiparipācanindriyānaṃ samosaraṇaṭṭhānattā vuttaṃ. **Yujjantī**ti yojīyanti. **Khoti** padapūraṇe, avadhāraṇatthe vā nipāto. Tena ete evāti dasseti. Aṭṭhārasevāti vā. **Mūlapadā**ti mūlapadāni, līṅgavipallāso vā.

Uddesavāraṇṇanā niṭṭhitā.

3. Niddesavāraṇṇanā

4. Evaṃ uddiṭṭhe hārādayo niddisitum **“tatta saṅkhepato”** tiādi āradhamaṃ. Tatta **tatthā**ti tasmīṃ uddesapāṭhe. **Saṅkhepato netti kittitā**ti samāsato nettippakaraṇamaṃ kathitaṃ. Hāranayamūlapadānaṃ hi sarūpadassanaṃ uddesapāṭhena katanti. Ettha ca hāranayānaṃ –

Sāmaññato visesena, padattho lakkhaṇamaṃ kamo;
Ettāvata ca hetvādī, veditabbā hi viññunā.

Tesu avisesato visesato ca hāranayānaṃ attho dassito. Lakkhaṇādīsū pana avisesato sabbepi hārā nayā ca yathākkamaṃ byañjanatthamukhena navaṅgassa sāsanassa atthasaṃvaṇṇanalakkhaṇā. Visesato pana tassa tassa hārassa nayassa ca lakkhaṇamaṃ niddese eva kathayissāma. Kamādīni ca yasmā nesamaṃ lakkhaṇesu ñātesu viññeyyāni honti, tasmā tānīpi niddesato parato pakāsayissāma.

Hārasaṅkhepo

1. Yā pana **assādādīnavatā**tiādikā niddesagāthā, tāsū **assādādīnavatā**ti assādo ādīnavatāti padavibhāgo. Ādīnavatāti ca ādīnavo eva. Keci “assādādīnavato”ti paṭhanti, taṃ na sundaraṃ. Tattha assādīyatīti assādo, sukhaṃ somanassaṃ. Vuttañhettaṃ – “yaṃ, bhikkhave, pañcupādānakkhandhe paṭicca uppajjati sukhaṃ somanassaṃ, ayaṃ pañcasu upādānakkhandhesu assādo”ti (ma. ni. 1.166; saṃ. ni. 3.26). Yathā cettaṃ sukhaṃ somanassaṃ, evaṃ iṭṭhārammaṇampi. Vuttampi cettaṃ – “so tadassādeti taṃ nikāmeti”ti “rūpaṃ assādeti abhinandati, taṃ ārabba rāgo uppajjati”ti (paṭṭhā. 1.1.424), “saṃyojanīyesu, bhikkhave, dhammesu assādānupassino”ti (saṃ. ni. 2.53) ca. Assādeti etāyāti vā assādo, taṇhā. Taṇhāya hi kāraṇabhūtāya puggalo sukhaṃpi sukhārammaṇampi assādeti. Yathā ca taṇhā, evaṃ vipallāsāpi. Vipallāsavasena hi sattā anīṭṭhampi ārammaṇaṃ iṭṭhākārena assādeti, evaṃ vedanāya sabbesaṃ tebhūmakasaṅkhārānaṃ taṇhāya vipallāsānaṃca assādavicāro veditaṃbo.

Kathaṃ pana dukkhādukkhamasukhavedanānaṃ assādānīyatāti? Vipallāsato sukhaṃpariyāyasabbhāvato ca. Tathā hi vuttaṃ – “sukhā kho, āvuso visākha, vedanā ṭhitisukhā vipariṇāmadukkhā. Dukkhaṃ vedanā ṭhitudukkhā vipariṇāmasukhā, adukkhamasukhā vedanā ñāṇasukhā aññānadukkhā”ti (ma. ni. 1.465). Tattha vedanāya aṭṭhasatāpariyāyavasena, tebhūmakasaṅkhārānaṃ nikkhepaṇḍarūpaṇḍavasena, taṇhāya saṃkilesavattuvibhaṅge **nikkhepaṇḍe** ca taṇhāniddevasena, vipallāsānaṃ sukhasaññādivasena dvāsaṭṭhidiṭṭhigatavasena ca vibhāgo veditaṃbo.

Ādīnavo dukkhā vedanā tissopi vā dukkhatā. Atha vā sabbepi tebhūmakā saṅkhārā ādīnavo. Ādīnaṃ ativiya kapaṇaṃ vāti pavattatīti hi ādīnavo, kapaṇamanusso, evaṃsabbhāvā ca tebhūmakā dhammā aniccatādiyogena. Yato tattha ādīnavānupassanā āradhāvippassakānaṃ yathābhūtanayoti vuccati. Tathā ca vuttaṃ – “yaṃ, bhikkhave, pañcupādānakkhandhā aniccā dukkhā vipariṇāmadhammā, ayaṃ pañcasu upādānakkhandhesu ādīnavo”ti. Tasmā ādīnavo dukkhasaccaniddesabhūtānaṃ jātiyādīnaṃ aniccatādīnaṃ dvācattālīsāya ākāraṇānaṃca vasena vibhajitvā niddisitaṃbo.

Nissarati etenāti **nissaraṇaṃ**, ariyamaggo. Nissaratīti vā **nissaraṇaṃ** nibbānaṃ. Ubhayampi sāmāññaniddesena ekasesena vā “nissaraṇa”nti vuttaṃ. **Pi**-saddo purimānaṃ pacchimānaṃca sampiṇḍanatto. Tattha ariyamaggapakke satipaṭṭhānādīnaṃ sattattiṃsabodhipakkhiyadhammānaṃ kāyānupassanādīnaṃca tadantogadhabhedānaṃ vasena nissaraṇaṃ vibhajitvā niddisitaṃbaṃ.

Nibbānapakke pana kiñcāpi asaṅkhatāya dhātuyā nippariyāyena vibhāgo natthi. Pariyāyena pana sopādisesanirupādisesabhedenā. Yato vā taṃ nissaṭaṃ, tesāṃ **paṭisambhidāmagge** (paṭi. ma. 1.3) dassitappabhedānaṃ cakkhādīnaṃ channaṃ dvārānaṃ rūpādīnaṃ channaṃ ārammaṇānaṃ taṃtaṃdvārappavattānaṃ channaṃ channaṃ viññāṇaphassavedanāsaññācetanātaṇhāvitaṅkavicārānaṃ pathavīdhātuādīnaṃ channaṃ dhātūnaṃ dasannaṃ kasiṇāyatanānaṃ asubhānaṃ kesādīnaṃ dvattiṃsāya ākāraṇaṃ pañcannaṃ khandhānaṃ dvādasannaṃ āyatanānaṃ aṭṭhārasannaṃ dhātūnaṃ lokiyānaṃ indriyānaṃ kāmādhātuādīnaṃ tissannaṃ dhātūnaṃ kāmabhavādīnaṃ tiṇṇaṃ tiṇṇaṃ bhavānaṃ catunnaṃ jhānānaṃ appamaññānaṃ āruppānaṃ dvādasannaṃ paṭiccasamuppādaṅgānañcāti evamādīnaṃ saṅkhatadhammānaṃ nissaraṇabhāvena ca vibhajitvā niddisitaṃbaṃ.

Phalanti desanāphalaṃ. Kiṃ pana tanti? Yaṃ desanāya nipphādīyati. Nanu ca nibbānādhiḡamo bhagavato desanāya nipphādīyati. Nibbānaṃca “nissaraṇa”nti iminā vuttamevāti? Saccametaṃ, taṃca kho paramparāya. Idha pana paccakkhato desanāphalaṃ adhippettaṃ. Taṃ pana sutamayaññaṃ. Atthadhammavedādiariyamaggassa pubbhāgappaṭipattibhūtā chabbisuddhiyo. Yaṃca tasmim̄ khaṇe maggaṃ anabhisambhuṇṭassa kālantare tadadhigamakāraṇabhūtaṃ sampattibhavahetu ca siyā. Tathā hi vakkhati – “attānudiṭṭhiṃ ūhacca, evaṃ maccutaro siyāti (su. ni. 1125; kathā. 226; cūḷani. mogharājamāṇavapucchā 144, mogharājamāṇavapucchāniddeśa 88; netti. 5; peṭako. 22) idaṃ phala”nti, “dhammo have rakkhati dhammacārinti idaṃ phala”nti (jā. 1.10.102-103; 1.15.385) ca. Etena nayena devesu ca mānusesu ca āyuvanṇabalasukhayasaparivāraādhipateyyasampattiyo upadhisampattiyo cakkavattisiriṃ devarajjasiriṃ cattāri sampatticakkāni sīlasampadā samādhisampadā tisso vijjā cha abhiññā catasso paṭisambhidā sāvakaḡbodhi paccakaḡbodhi sammāsambodhīti sabbāpi sampattiyo puññasambhārahetukā bhagavato desanāya sādhetabbatāya phalanti veditaḡbā.

Upāyoti ariyamaggapadaṭṭhānabhūtā pubbabhāgappaṭipadā. Sā hi purimā purimā pacchimāya pacchimāya adhigamūpāyabhāvato paramparāya magganibbānādhigamassa ca hetubhāvato upāyo. Yā ca pubbe vuttaphalādhigamassa upāyapaṭipatti. Keci pana “saha vipassanāya maggo upāyo”ti vadanti, tesam matena nissaraṇanti nibbānameva vuttaṃ siyā. Phalaṃ viya upāyopi pubbabhāgoti vuttaṃ siyā, yaṃ pana vakkhati “sabbe dhammā...pe... visuddhiyāti (dha. pa. 279; theragā. 678) ayam upāyo”ti. Etthāpi pubbabhāgappaṭipadā eva udāhaṭāti sakkā viññātuṃ. Yasmā pana “te pahāya tare oghanti idaṃ nissaraṇa”nti ariyamaggassa nissaraṇabhāvaṃ vakkhati. Ariyamaggo hi oghataraṇanti.

Āṇattīti āṇārahassa bhagavato veneyyajanassa hitasiddhiyā “evaṃ paṭipajjāhī”ti vidhānaṃ. Tathā hi vakkhati “suññato lokaṃ avekkhassu, mogharājāti (su. ni. 1125; kathā. 226; netti. 5; peṭako. 22; cūḷani. mogharājamānavapucchā 144, mogharājamānavapucchāniddeśa 88) āṇattī”ti.

Yoginanti catusaccakammaṭṭhānabhāvanāya yuttappayuttānaṃ veneyyānaṃ, atthāyāti vacanaseso. **Desanāhāroti** etesaṃ yathāvuttānaṃ assādādīnaṃ vibhajanalakkhaṇo saṃvaṇṇanāviseso desanāhāro nāmāti attho. Etthāha – kiṃ panetesam assādādīnaṃ anavasesānaṃ vacanaṃ desanāhāro, udāhu ekaccānanti? Niravasesānaṃyeva. Yasmiñhi sutte assādādīnavanissaraṇāni sarūpato āgatāni, tattha vattabbameva natthi. Yattha pana ekadesena āgatāni, na vā sarūpena. Tattha anāgataṃ atthavasena niddhāretvā hāro yojetabbo. Ayañca attho desanāhāravibhaṅge āgamissatīti idha na papañcīto.

2. Yaṃ pucchitanti yā pucchā, viciyamānāti vacanaseso. **Vissajjitaṃ anugītīti** etthāpi eseva nayo. Tattha **vissajjanti** vissajjanā, sā ekaṃsabyākaraṇādīvasena catubbidhaṃ byākaraṇaṃ. **Ca**-saddo sampiṇḍanatto, tena gāthāyaṃ avuttaṃ padādiṃ saṅgaṇhāti. Tā pana pucchāvissajjanā kassāti āha “**suttassā**”ti. Etena sutte āgataṃ pucchāvissajjanaṃ vicetabbanti dasseti. **Yā ca anugītīti** vuttasseva atthassa yā anu pucchā gīti anugīti, saṅgahagāthā, pucchāya vā anurūpā gīti. Etena pubbāparaṃ gahitaṃ. Byākaraṇassa hi pucchānurūpatā idha pubbāparaṃ adhippetam. Yā “pucchānusandhi”ti vuccati. Purimaṃ “suttassā”ti padaṃ pubbāpekkhanti puna “**suttassā**”ti vuttaṃ. Tena suttassa nissayabhūte assādādīke pariggaṇhāti. Ettāvata vicayahārassa visayo niravasesena dassito hoti. Tathā ca vakkhati vicayahāravibhaṅge “padaṃ vicināti...pe... anugītiṃ vicināti”ti.

Tattha sutte sabbesaṃ padānaṃ anupubbena atthaso byañjanaṃ ca vicayo **padavicayo**. “Ayaṃ pucchā adiṭṭhajotanaṃ diṭṭhasaṃsandanā vimaticchedanā anumati pucchā kathetukamyatāpucchā sattādiṭṭhānā dhammādiṭṭhānā ekādhiṭṭhānā anekādhiṭṭhānā sammuti visayā paramatthavisayā atītavisayā anāgatavisayā paccuppannavisayā”tiādīnā **pucchāvicayo** veditabbo. “Idaṃ vissajjanaṃ ekaṃsabyākaraṇaṃ vibhajjabyākaraṇaṃ paṭipucchābyākaraṇaṃ ṭhapanam sāvasesam niravasesam sauttaram anuttaram lokiyam lokuttara”ntiādīnā **vissajjanavicayo**.

“Ayaṃ pucchā iminā sameti, etena na sameti”ti pucchitattaṃ ānetvā vicayo pubbenāparaṃ saṃsandiṭvā ca vicayo **pubbāparavicayo**. “Ayaṃ anugīti vuttatthasaṅgahā avuttatthasaṅgahā tadubhayatthasaṅgahā kusalatthasaṅgahā akusalatthasaṅgahā”tiādīnā **anugītivicayo**. Assādādīsu sukhavedanāya “iṭṭhārammaṇānubhavanalakkhaṇā”tiādīnā, taṇhāya “ārammaṇaggahaṇalakkhaṇā”tiādīnā, vipallāsānaṃ “viparītaggahaṇalakkhaṇā”tiādīnā, avasiṭṭhānaṃ tebhūmakadhammānaṃ “yathāsakalakkhaṇā”tiādīnā sabbesañca dvāvīsatiyā tikesu dvācattālīsādhike ca dukasate labbhamānapadavasena taṃtaṃassādatthavisesaniddhāraṇaṃ **assādavicayo**.

Dukkhavedanāya “aniṭṭhānubhavanalakkhaṇā”tiādīnā, dukkhasaccānaṃ “paṭisandhilakkhaṇā”tiādīnā, aniccātādīnaṃ ādiantavantatāya aniccantikātāya ca “aniccā”tiādīnā sabbesañca lokiyadharmānaṃ saṃkilesabhāgiyāhānabhāgiyatādivasena ādīnavavuttiyā okāraniddhāraṇena **ādīnavavicayo**. Nissaraṇapade ariyamaggassa āgamanato kāyānupassanādipubbabhāgappaṭipadāvibhāgavisesaniddhāraṇavasena nibbānassa yathāvuttapariyāyavibhāgavisesaniddhāraṇavasenāti evaṃ **nissaraṇavicayo**. **Phalādīnaṃ** taṃtaṃsuttadesanāya sādhetabbaphalassa tadupāyassa tattha tattha suttavidhivacanassa ca

vibhāganiddhāraṇavasena **vicayo** veditabbo. Evaṃ padapucchāvissajjanapubbāparānugītīnaṃ assādādīnaṃca visesaniddhāraṇavaseneva vicayalakkhaṇo “vicayo hāro”ti veditabbo.

3. Sabbesanti soḷasannaṃ. **Bhūmīti** byañjanaṃ sandhāyāha. Byañjanaṃhi mūlapadāni viya nayānaṃ hārānaṃ bhūmi pavattiṭṭhānaṃ, tesam byañjanavicārabhāvato. Vuttaṃhi – “hārā byañjanavicayo”ti, peṭakepi hi vuttaṃ – “yattha ca sabbe hārā, sampatamānā nayanti suttatthaṃ. Byañjanavidhiputhuttā”ti. **Gocaroti** suttattho. Suttassa hi padatthuddhāraṇamukhena hārayojanā. Tesam byañjanatthānaṃ. **Yuttāyuttaparikkhāti** yuttassa ca ayuttassa ca upaparikkhā. “Yuttāyuttaparikkhā”tipi pāṭho, yuttāyuttīnaṃ vicāraṇāti attho. Kathaṃ pana tesam yuttāyuttājānanā? Catūhi mahāpadesehi avirujjhanena. Tattha byañjanassa tāva sabhāvaniruttibhāvo adhippetatthavācakabhāvo ca yuttabhāvo. Atthassa pana suttavinayadhammatāhi avilomanam. Ayamettha saṅkhepo. Vitthāro pana parato āvi bhavissati. **Hāro yuttīti niddiṭṭhoti** evaṃ sutte byañjanatthānaṃ yuttāyuttabhāvavibhāvanalakkhaṇo yuttihāroti veditabbo.

4. Dhammanti yaṃ kiñci suttāgataṃ kusalādiddhammāha. **Tassa dhammassāti** tassa yathāvuttassa kusalādiddhammassa. **Yaṃ padaṭṭhānanti** yaṃ kāraṇam, yonisomanasikārādī sutte āgataṃ vā anāgataṃ vā sambhavato niddhāretvā kathetabbanti adhippāyo. **Itīti** evaṃ, vuttanayenāti attho. **Yāva sabbadhammāti** yattakā tasmim sutte āgatā dhammā, tesam sabbesampi yathānurūpaṃ padaṭṭhānaṃ niddhāretvā kathetabbanti adhippāyo. Atha vā **yāva sabbadhammāti** suttāgataṃ dhammassa yaṃ padaṭṭhānaṃ, tassapi yaṃ padaṭṭhānanti sambhavato yāva sabbadhammā padaṭṭhānavicāraṇā kātabbāti attho. **Eso hāro padaṭṭhānoti** evaṃ sutte āgatadhammānaṃ padaṭṭhānabhūtā dhammā tesaṃca padaṭṭhānabhūtāti sambhavato padaṭṭhānabhūtadhammaniddhāraṇalakkhaṇo padaṭṭhāno nāma hāroti attho.

5. Vuttamhi ekadhammeti kusalādīsū khandhādīsū vā yasmiṃ kismiñci ekadhamme, sutte sarūpato niddhāraṇavasena vā kathite. **Ye dhammā ekalakkhaṇā kecīti** ye keci dhammā kusalādibhāvena rūpakkhāndhādibhāvena vā tena dhammena samānalakkhaṇā. **Vuttā bhavanti sabbeti** te sabbepi kusalādīsabhāvā, khandhādīsabhāvā vā dhammā sutte avuttāpi tāya samānalakkhaṇatāya vuttā bhavanti ānetvā saṃvaṇṇanāvassenāti adhippāyo. Ettha ca **ekalakkhaṇāti** samānalakkhaṇā vuttā. Tena sahaçarītā samānakicatā samānahetutā samānaphalatā samānārammaṇatāti evamādīhi avuttānampi vuttānaṃ viya niddhāraṇam veditabbaṃ. **So hāro lakkhaṇo nāmāti** evaṃ sutte anāgatepi dhamme vuttappakārena āgate viya niddhāretvā yā saṃvaṇṇanā, so lakkhaṇo nāma hāroti attho.

6. Neruttanti niruttaṃ, padanibbacananti attho. **Adhippāyoti** buddhānaṃ sāvakānaṃ vā tassa suttassa desakānaṃ adhippāyo. **Byañjananti** byañjanena, karaṇe hi etaṃ paccattaṃ. Kāmaṃca sabbe hārā byañjanavicayā, ayaṃ pana visesato byañjanadvārenea atthapariyesanāti katvā “byañjana”nti vuttaṃ. Tathā hi vakkhati – “byañjanena suttassa neruttaṃca adhippāyo ca nidānaṃca pubbāparānusandhi ca gavesitabbā”ti. **Athāti** padapūraṇamattaṃ. **Desanānidānanti** nidadāti phalanti nidānaṃ, kāraṇam, yena kāraṇena desanā pavattā, taṃ desanāya pavattinimittanti attho. **Pubbāparānusandhīti** pubbena ca aparena ca anusandhi. “Pubbāparena sandhī”tipi pāṭho, suttassa pubbābhāgena aparabhāgaṃ saṃsanditvā kathananti attho. Saṅgītivaseña vā pubbāparabhūtehi suttantarehi saṃvaṇṇiyamānassa suttassa saṃsandanaṃ pubbāparānusandhi. Yaṃca pubbapadena parapadassa sambandhanaṃ, ayampi pubbāparānusandhi. **Eso hāro catubyūhoti** evaṃ nibbacanādhippāyādīnaṃ catunnaṃ vibhāvanalakkhaṇo catubyūho hāro nāmāti attho.

7. Ekamhi padaṭṭhāneti ekasmim ārambhadhātuādike parakkamadhātuādīnaṃ padaṭṭhānabhūte dhamme desanārulhe sati. **Pariyesati sesakaṃ padaṭṭhānanti** tassa visabhāgatāya aggahaṇena vā sesakaṃ pamādādīnaṃ āsannakāraṇattā padaṭṭhānabhūtaṃ kosajjādikaṃ dhammantaraṃ pariyesati paññāya gavesati, pariyesitvā ca saṃvaṇṇanāya yojento desanaṃ **āvaṭṭati paṭipakkheti** vīriyārambhādīmukhena āradhasuttaṃ vuttanayena pamādādivaseña niddisanto desanaṃ paṭipakkhato āvaṭṭeti nāma. **Āvaṭṭo nāma so hāroti** desanāya gahitadhammānaṃ sabhāgavisabhāgadhammavasena

āvaṭṭanalakkhaṇo āvaṭṭo hāro nāmāti attho.

8. Dhammanti sabhāvadhammaṃ, taṃ kusalādivasena anekavidhaṃ. **Paḍaṭṭhānanti** yasmim̐ patiṭṭhite uttari guṇavisesa adhiḡacchati, taṃ visesādhigamanakāraṇaṃ. **Bhūminti** puthujjanabhūmi dassanabhūmīti evamādikam̐ bhūmim̐. **Vibhajjati** vibhāgena katheti. **Sādhāraṇeti** dassanapahātabbādināmavasena vā puthujjanasotāpannādivatthuvaseṇa vā sādhāraṇe avasiṭṭhe samāneti attho. Vuttavipariyāyena **asādhāraṇā** veditabbā. **Neyyo vibhattīti** yathāvuttadhammādīnaṃ vibhajano ayaṃ hāro vibhattīti ñātabboti attho. Tasmā saṃkilesadhamme vodānadhamme ca sādhāraṇāsādhāraṇato paḍaṭṭhānato bhūmito ca vibhajanalakkhaṇo “vibhattihāro”ti daṭṭhabbaṃ.

9. Niddiṭṭheti kathite sutte āgate, saṃvaṇṇite vā. **Bhāviteti** yathā uppannasadisā uppannāti vuccanti, evaṃ bhāvitasadisā bhāvetabbeti attho. **Pahīneti** etthāpi eseṇa nayo. **Parivattati paṭipakkheti** vuttānaṃ dhammānaṃ ye paṭipakkhā, tesam̐ vaseṇa parivatteti attho. Evaṃ niddiṭṭhānaṃ dhammānaṃ paṭipakkhato parivattanalakkhaṇo “parivattano hāro”ti veditabbo.

10. Vividhāni ekasmiṃyeva atthe vacanāni vivacanāni, vivacanāni eva **vevacanāni**, pariṃyāyasaddāti attho. Tāni vevacanāni. **Bahūnīti** anekāni. **Tu**-saddo avadhāraṇe. Tena bahū eva pariṃyāyasaddā vevacanahāraṇojanāyaṃ kathetabbā, na katipayāti dasseti. **Sutte vuttānīti** navavidhasuttantasāṅkhāte teṭṭake buddhavacane bhāsītāni. Etthāpi tu-saddassa attho ānetvā yojetabbo, tena pāliyaṃ āgatāniyeva vevacanāni gahetabbānīti vuttaṃ hoti. **Ekadhammassāti** ekassa padatthassa. **Yo jānāti suttavidūti** yathā “sappissa jānāhi”ti vutte “sappinā vicārehi, sappim̐ dehi, dethā”ti vā āṇāpetīti attho, evaṃ yo suttakovidō dhammakathiko ekassa atthassa bahūpi pariṃyāyasadda vicāreti vibhāveti yojetīti attho. **Vevacano nāma so hāro**ti tassa atthassa vuttappakārapariṃyāyasaddaṇojanālakkhaṇo vevacanahāro nāma. Tasmā ekasmiṃ atthe anekapariṃyāyasaddaṇojanālakkhaṇo “vevacanahāro”ti veditabbam̐.

11. Dhammanti khandhādidhammaṃ. **Paññattīhi** paññāpanehi pakārehi ñāpanehi, asaṅkarato vā ṭṭhāpanehi. **Vividhāhīti** nikkhepappabhavādivasena anekavidhāhi. **So ākāro**ti yo ekassevatthassa nikkhepappabhavapaññattīdivasena anekāhi paññattīhi paññāpanākāro. **Neyyo paññatti nāma hāro**ti paññattihāro nāmāti ñātabbo. Tasmā ekekassa dhammassa anekāhi paññattīhi paññāpetabbākāravibhāvanalakkhaṇo “paññattihāro”ti veditabbam̐.

12. Paṭiccuppādoti paṭiccasaṃuppādo. **Indriyakhandhāti** indriyāni ca khandhā ca. **Dhātuāyatanāti** dhātuyo ca āyatanāni ca. **Etehīti** yo dvādasapadiko paccayākāro yāni ca dvāvīsatiindriyāni ye ca pañcakkhandhā yā ca aṭṭhārasa dhātuyo yāni ca dvādasāyatanāni, etehi sutte āgatapadatthamukhena niddhāriyamānehi. **Otarati yoti** yo saṃvaṇṇanāyayo ogāhati, paṭiccasaṃuppādādike anupavisatīti attho. **Otaraṇo nāma so hāro**ti yo yathāvutto saṃvaṇṇanāviseṇo, so otaraṇahāro nāma. **Ca**-saddena cettha suññatamukhādīnaṃ gāthāyaṃ avuttānampi saṅgaho daṭṭhabbo. Evaṃ paṭiccasaṃuppādādīmukhehi suttatthassa otaraṇalakkhaṇo otaraṇo hāro nāmāti veditabbam̐.

13. Vissajjitamhīti buddhādīhi byākate. **Pañheti** ñātuṃ icchite atthe. **Gāthāyanti** gāthāruḷhe. **Idaṇca pucchantā yebhuyyena gāthābandhavasena pucchantīti katvā vuttaṃ.** **Yamārabbhāti** sā pana gāthā yaṃ atthaṃ ārabhā adhikicca pucchitā, tassa atthassa. **Suddhāsuddhaparikkhāti** padaṃ sodhitam̐, ārambho na sodhito, padaṇca sodhitam̐ ārambho ca sodhitoti evaṃ padādīnaṃ sodhitāsodhitabhāvavicāro. **Hāro so sodhana nāmāti** yathāvuttavicāro sodhana hāro nāma. Evaṃ sutte padapadatthapaññārambhanam̐ sodhanalakkhaṇo “sodhana hāro”ti veditabbam̐.

14. Ekattatāyāti ekassa bhāvo ekattaṃ, ekattameva ekattatā, tāya ekattatāya. **Eka**-saddo cettha samānasaddapariṃyāyo, tasmā sāmāññenāti attho. Visiṭṭhā mattā vimattā, vimattāva vemattaṃ, tassa bhāvo vemattatā, tāya **vemattatāya**, vivesenāti attho. **Te na vikappayitabbāti** ye dhammā “dukkhaṃ samudayo”tiādīnā sāmāññeṇa, “jāti jarā kāmataṇhā bhavataṇhā”tiādīnā viveseṇa ca sutte desitā, te “kimettha sāmāññaṃ, ko vā viveso”ti evaṃ sāmāññavisesavikappanavasena na vikappayitabbā. Kasmā?

Sāmaññavisesakappanāya vohārabhāvena anavaṭṭhānato kāladiśāvisesādīnaṃ viya apekkhāsiddhito ca. Yathā hi “ajja hiyyo sve”ti vuccamānā kālāvisesā anavaṭṭhitasabhāvā “purimā disā pacchimā disā”ti vuccamānā disāvisesā ca, evaṃ sāmaññavisesāpi. Tathā hi “idaṃ dukkha”nti vuccamānaṃ jātiādiapekkhāya sāmaññampi samānaṃ saccāpekkhāya viseso hoti. Esa nayo samudayādīsupi. **Eso hāro adhiṭṭhānoti** evaṃ suttāgatānaṃ dhammānaṃ avikappanavasena sāmaññavisesaniddhāraṇalakkhaṇo adhiṭṭhāno hāro nāmāti attho.

15. Ye dhammāti ye avijjādikā paccayadhammā. **Yaṃ dhammanti** yaṃ saṅkhārādikāṃ paccayuppannadhammaṃ. **Janayantīti** nibbattenti. **Paccayāti** sahaṃjātapaccayabhāvena. **Paramparatoti** paramparapaccayabhāvena, anurūpasantānaghaṭṭanavasena paccayo hutvāti attho. Upanissayakoṭi hi idhādhippetā. Purimasmiṃ avasiṭṭho paccayabhāvo. **Hetumavakaḍḍhayitvāti** taṃ yathāvuttapaccayasāṅkhātāṃ janakādibhedabhinnaṃ hetuṃ ākaḍḍhitvā suttato niddhāretvā yo saṃvaṇṇanāsāṅkhāto, **eso hāro parikkhāroti** evaṃ sutte āgatadhammānaṃ parikkhārasāṅkhāte hetupaccaye niddhāretvā saṃvaṇṇanalakkhaṇo parikkhāro hāroti attho.

16. Ye dhammāti ye sīlādidhammā. **Yaṃ mūlāti** yesaṃ samādhiādīnaṃ mūlabhūtā, te tesāṃ samādhiādīnaṃ padaṭṭhānabhāvena samāropayitabbāti sambandho. **Ye cekatthā pakāsītā munināti** ye ca rāgavirāgācetovimuttisekkhaphalakāmadhātusamatikkamanādisaddā anāgāmiphalatthāya ekatthā buddhamuninā paridīpitā, te aññaṃaññavevacanabhāvena samāropayitabbāti sambandho. Samāropanañcettha sutte yathārutavasena niddhāraṇavasena vā gayhamānassa sikkhattayasāṅkhātassa sīlādikkhandhattayassa pariyāyantaravibhāvanamukhena bhāvanāpāripūrikathanāṃ, bhāvanāpāripūrī ca pahātabbassa pahānenāti pahānasamāropanāpi atthato dassitā eva hoti. **Esa samāropano hāroti** esa sutte āgatadhammānaṃ padaṭṭhānavevacanabhāvanāpahānasamāropanavicāraṇalakkhaṇo samāropano nāma hāroti attho.

Nayasaṅkhepo

17. Evaṃ gāthābandhavasena soḷasapi hāre niddisitvā idāni naye niddisituṃ “**taṇhañcā**”tiādi vuttaṃ. Tattha **taṇhañca avijjampi cāti** sutte āgataṃ atthato niddhāraṇavasena vā gahitaṃ taṇhaṃ avijjāñca yo netīti sambandho. Yo saṃvaṇṇanāviseso taṃ neti saṃkilesapakkhaṃ pāpeti saṃkilesavasena suttatthaṃ yojetīti adhippāyo. **Samathenāti** samādhinā. **Vipassanāyāti** paññāya, yo neti vodānapakkhaṃ pāpeti, tathā suttatthaṃ yojetīti adhippāyo. **Saccehi yojayitvāti** nayanto ca taṇhā ca avijjā ca bhavamūlakattā samudayasaccaṃ, avasesā tebhūmakadhammā dukkhasaccaṃ, samathavipassanā maggasaccaṃ, tena pattabbā asaṅkhatadhātu nirodhasaccanti evaṃ imehi catūhi saccehi yojetvā. **Ayaṃ nayo nandiyāvaṭṭoti** yo taṇhāvijjāhi saṃkilesapakkhassa suttatthassa samathavipassanāhi vodānapakkhassa catusaccayojanamukhena nayanalakkhaṇo saṃvaṇṇanāviseso, ayaṃ nandiyāvaṭṭo nayo nāmāti attho. Ettha ca nayassa bhūmi gāthāyaṃ “nayo”ti vuttā, tasmā saṃvaṇṇanāvisesoti vuttaṃ. Na hi atthanayo saṃvaṇṇanā, catusaccapaṭivedhassa anurūpo pubbabhāge anugāhaṇanayo atthanayo. Tassa pana yā ugghaṭṭitaññuādīnaṃ vasena taṇhādīmukhena nayabhūmiracanā, tattha nayavohāro.

18. Akusaleti dvādasacittuppādasaṅgahite sabbepi akusale dhamme. **Samūlehīti** attano mūlehi, lobhadosaṃmohehīti attho. **Kusaleti** sabbepi catubhūmake kusale dhamme. **Kusalāmūlehīti** kusalehi alobhādīmūlehi **yo neti**. Nayanto ca kusalākusalaṃ māyāmarīciādayo viya abhūtaṃ na hotīti **bhūtaṃ**. Paṭaghaṭṭādayo viya na sammutisaccamattanti **tathaṃ**. Akusalassa iṭṭhavipākatābhāvato kusalassa ca anīṭṭhavipākatābhāvato vipāke satī avisaṃvādakattā **avitathaṃ** neti. Evametesāṃ tiṇṇampi padānaṃ kusalākusalavisesanatā daṭṭhabbā. Atha vā akusalāmūlehi akusalāni kusalāmūlehi ca kusalāni nayanto ayaṃ nayo **bhūtaṃ tathaṃ avitathaṃ** neti, cattāri saccāni niddhāretvā yojetīti attho. Dukkhādīni hi bādhakādibhāvato aññathābhāvābhāvena bhūtāni, saccasabhāvattā tathāni, avisaṃvādanato avitathāni. Vuttañhetāṃ bhagavatā “cattārimāni, bhikkhave, tathāni avitathāni anaññathāni”ti (saṃ. ni. 5.1090). **Tipukkhalāṃ taṃ nayaṃ āhūti** yo akusalāmūlehi saṃkilesapakkhassa kusalāmūlehi vodānapakkhassa suttatthassa catusaccayojanamukhena nayanalakkhaṇo saṃvaṇṇanāviseso, taṃ tipukkhalāṃ nayanti

vadantīti attho.

19. Vipallāsehīti asubhe subhantiādinayappavattehi catūhi vipallāsehi. **Kileseti** kilissanti vibādhiyantīti kilesā, saṃkiliṭṭhadhammā, saṃkilesapakkhanti attho. Keci “saṃkilese”tipi paṭhanti, kilesasahiteti attho. **Indriyehīti** saddhādīhi indriyehi. **Saddhammeti** paṭipattipaṭivedhasaddhamme, vodānapakkhanti attho. **Etam nayanti** yo subhasaññādīhi vipallāsehi sakalassa saṃkilesapakkhassa saddhindriyādīhi vodānapakkhassa catusaccayojanavasena nayanalakkhaṇo saṃvaṇṇanāviseso, etam nayam **nayavidū** saddhammanayakovidā, atthanayakusalā eva vā sīhavikkīṭitam nayanti vadantīti attho.

20. Veyyākaraṇesūti tassa tassa atthanayassa yojanattham katesu suttassa atthavissajjanesūti attho. Tenevāha “tahiṃ tahi”nti. **Kusalākusalāti** vodāniyā saṃkilesikā ca tassa tassa nayassa disābhūdadhammā. **Vuttāti** suttato niddhāretvā kathitā. **Manasā volokayate** te yathāvuttadhamme citteneva “ayam paṭhamā disā ayam dutiyā disā”tiādīnā tassa tassa nayassa disābhāvena upaparikkhati, vicāretīti attho. “Olokayate te abahī”tipi pāṭho. Tattha **teti** te yathāvuttadhamme. **Abahīti** abhantaram, citte evāti attho. **Tam khu disālocanam āhūti** olokayate ettha yadetam olokanam, tam disālocanam nāma nayam vadanti. **Khu**-ti ca nipāto avadhāraṇe. Tena olokanameva ayam nayo, na koci atthavisesoti dasseti.

21. Oloketvāti paṭhamādidisābhāvena upaparikkhitvā. **Disālocanenāti** disālocanayena karaṇabhūtena. Yena hi vidhinā tassa tassa atthanayassa yojanāya disā olokīyanti, so vidhi disālocananti evam vā ettha attho daṭṭhabbo. **Ukkhipiyāti** uddharitvā, disābhūdadhamme suttato niddhāretvāti attho. “Ukkhipiya yo samānetī”tipi paṭhanti, tassattho – “yo tesam disābhūdadhammānam samānayanam karotī”ti. **Yanti** vā kiriyāparāmasanam. **Samānetīti** samam, sammā vā āneti tassa tassa nayassa yojanāvasena. Ke pana āneti? Sabbe kusalākusale tamtamnayadisābhūte. **Ayam nayoti** samānetīti ettha yadetam tamtamnayadisābhūdadhammānam samānayanam, ayam **ānkuso** nāma nayoti attho. Etañca dvayam “vohāranayo, kammanayo”ti ca vuccati.

22. Evam hāre naye ca niddisitvā idāni nesam yojanakkamaṃ dassento “**soḷasa hārā paṭhama**”ntiādīmāha. Tattha paṭhamam soḷasa hārā “yojetabbā”ti vacanaseso. Hārasaṃvaṇṇanā paṭhamam kātabbā byañjanapariyēṭṭhibhāvatoti adhippāyo. **Disalocanatoti** disālocanena, ayameva vā pāṭho. **Ānkusena hīti hi**-saddo nipātamattam. Sesam uttānameva.

Dvādasapadam

23. Idāni yesam byañjanapadānam atthapadānañca vasena dvādasa padāni suttanti vuttam, tāni padāni niddisitum “**akkharam pada**”ntiādīmāha. Tattha apariyosite pade vaṇṇo **akkharam** pariyāyavasena akkharaṇato asañcaraṇato. Na hi vaṇṇassa pariyāyo vijjati, atha vaṇṇoti kenatṭhena vaṇṇo? Atthasaṃvaṇṇanaṭṭhena. Vaṇṇo eva hi ittarakhaṇatāya aparāparabhāvena pavatto padādibhāvena gayhamāno yathāsambandham tam tam attham vadati. Ekakkharam vā padam **akkharam**, keci pana “manasā desanāvācāya akkharaṇato akkhara”nti vadanti.

Padanti pajjati attho etenāti padam, tam nāmapadam ākhyātapadam upasaggapadam nipātapadanti catubbidham. Tattha “phasso vedanā citta”nti evamādikaṃ satvappadhānam nāmapadam. “Phusati vedayati vijānāti”ti evamādikaṃ kiriyāpadhānam ākhyātapadam. Kiriyāvisesaggahaṇanimittam “pa” iti evamādikaṃ upasaggapadam. Kiriyāya satvassa ca sarūpavisesappakāsanahetubhūtam “eva”nti evamādikaṃ nipātapadam.

Byañjananti sañkhepato vuttam padābhīhitam attham byañjayatīti byañjanam, vākyam. Tam pana atthato padasamudāyoti daṭṭhabbam. Padamattasavanepi hi adhikārādivasena labbhamānehi padantarehi anusandhānam katvāva atthasampaṭipatti hotīti vākyameva attham byañjayati. **Nirutṭīti** ākārābhīhitam nibbacanam nirutṭi.

Niddesoti nibbacanavittthāro niravasesadesanattā niddeso. Padehi vākyassa vibhāgo ākāro. Yadi evaṃ padato ākāraṃ ko visesoti? Apariyosite vākye avibhajjamāne vā tadavayavo padaṃ. Uccāraṇavasena pariyosite vākye vibhajjamāne vā tadavayavo ākāroti ayametesam viseso. Chaṭṭhaṃ vacanaṃ chaṭṭhavacanaṃ. Ākāro chaṭṭhavacanaṃ etassāti **ākārachaṭṭhavacanaṃ**, byañjanapadaṃ. Ettha ca byañjananti imassa padassa anantaraṃ vattabbaṃ ākārapadaṃ niddesapadānantaraṃ vadantena “ākārachaṭṭhavacana”nti vuttaṃ, padānupubbikaṃ pana icchantehi taṃ byañjanapadānantarameva kātappaṃ. Tathā hi vakkhati “aparimāṇā byañjanā aparimāṇā ākāraṃ, byañjanehi vivarati ākārehi vibhajati”ti ca. Keci pana “ākārapadabyañjananiruttiyo ca niddeso”ti paṭhanti. **Ettāva byañjanaṃ sabbanti** yānimāni akkharādāni niddiṭṭhāni, ettakameva sabbam byañjanaṃ, etehi asaṅgahitaṃ byañjanaṃ nāma natthīti attho.

24. Saṅkāsanāti saṃkhittena kāsanā. **Pakāsanāti** paṭhamaṃ kāsanā, kāsiyati dīpīyatīti attho. Iminā hi atthapadadvayena akkharapadehi vibhāvīyamāno atthākāro gahito. Yasmā akkharehi suyyamānehi suṇantānaṃ visesavidhānassa katattā padapariyosāne padatthasampañipatti hoti. Tathā hi vakkhati “tattha bhagavā akkharehi saṅkāseti padehi pakāsetīti, akkharehi padehi ca ugghāṭeti”ti ca.

Vivaraṇāti vitthāraṇā. Vibhajanā ca uttānīkammaṇca paññatti ca **vibhajanuttānīkammaṇñatti**. Tattha **vibhajanāti** vibhāgakaraṇaṃ, ubhayenāpi niddisaṇamāha. Idha purimanayeneva byañjanākārehi niddisiyamāno atthākāro dassitoti daṭṭhabbaṃ. **Uttānīkammaṇ** pākāṭakaraṇaṃ. Pakārehi ṇāpanaṃ **paññatti**. Dvayenāpi paṇiniddisaṇaṃ katheti. Etthāpi niruttiniddesasaṅkhātehi byañjanapadehi niddisiyamāno atthākāro vutto, yo paṇiniddisiyatīti vuccati. **Etehīti** etehi eva saṅkāsanādivinimuttassa desanāthassa abhāvato. **Atthoti** suttattho. **Kammanti** ugghaṭṭanādīkammaṇ. Suttatthena hi desanāya pavattiyamānena ugghaṭṭitaññuādiveneyyānaṃ cittasantānassa pabodhanakiriyānibbatti. So ca suttattho saṅkāsanādiākāroti. Tena vuttaṃ – “attho kammaṇca niddiṭṭha”nti.

25. Tīṇīti līngavipallāseṇa vuttaṃ, tayoti vuttaṃ hoti. **Navahi padehīti** navahi koṭṭhāsehi. **Attho samāyuttoti** attho sammā yutto na vinā vattati. Sabbassa hi buddhavacanaṃ catusaccappakāsanato atthanayānaṇca catusaccayojanavasena pavattanato sabbo pāḷiattho atthanayattayasāṅgahito saṅkāsanādiākāravisesavutti cāti.

26. Idāni yathāniddiṭṭhe desanāhārādike nettippakaraṇassa padatthe sukhaḅgahaṇatthaṃ gaṇanavasena paricchinditvā dassento “**atthassā**”tiādīmāha. Tattha **catubbīsāti** soḷasa hārā cha byañjanapadāni dve kammanayāti evaṃ catubbīsa. **Ubhayanti** cha atthapadāni tayo atthanayāti idaṃ navavidhaṃ yathāvuttaṃ catubbīsavidhañcāti etaṃ ubhayaṃ. **Saṅkalayitvāti** sampiṇḍetvā. “Saṅkhepayato”tipi pāḷho, ekato karontassāti attho. **Ettikāti** etappamāṇā, ito vinimutto koci nettipadathā natthīti attho.

Evaṃ tettiṃsapadatthāya nettiyā suttassa atthapariyēsanāya yo “soḷasa hārā paṭhama”nti nayehi paṭhamaṃ hārā saṃvaṇṇetabbāti hāranayānaṃ saṃvaṇṇanākkamo dassito, svāyaṃ hāranayānaṃ desanākkameneva siddho. Evaṃ siddhe sati ayaṃ ārambho imamatthaṃ dīpeti – sabbepime hārā nayā ca iminā dassitakkameneva suttessa saṃvaṇṇanāvasena yojetabbā, na uppaṭipāṭiyāti.

Kiṃ panettha kāraṇaṃ, yadete hārā nayā ca imināva kamena desitāti? Yāpīpi nāyamanuyogo katthaci anukkame nivisati, api ca dhammadeśanāya nissayaphalatadupāyasarīrabhūtānaṃ assādādīnaṃ vibhāvanasabhāvattā pakatiyā sabbasuttānurūpāti suviññeyyabhāvato paresaṇca saṃvaṇṇanāvisesānaṃ vicayahārādīnaṃ patiṭṭhābhāvato paṭhamaṃ desanāhāro dassito.

Padapucchāvissajjanapubbāparānugītihi saddhiṃ desanāhārapadatthānaṃ pavicayasabhāvātāya tassa anantaraṃ vicayo. Tathā hi vakkhati “padaṃ vicinati...pe... āṇattim vicinati anugītim vicinati”ti.

Vicayena hārena pavicitānaṃ atthānaṃ yuttāyuttivicāraṇā yuttāti yuttivicāraṇabhāvato

vicayānantaram yuttihāro vutto. Tathā hi vakkhati – “vicayena hārena vicinitvā yuttihārena yojetabba”nti.

Yuttāyuttānaṃyeva atthānaṃ upapattianurūpaṃ kāraṇaparamparāya niddhāraṇalakkhaṇaṃ padaṭṭhānacintanaṃ kattabbanti yuttihārānantaram padaṭṭhānahāro dassito. Tathā hi vakkhati – “yo koci upanissayo yo koci paccayo ca, sabbo so padaṭṭhāna”nti.

Yuttāyuttānaṃ kāraṇaparamparāya pariggahitasabhāvānaṃyeva ca dhammānaṃ avuttānampi ekalakkhaṇatāya gahaṇaṃ kātabbanti dassanattamaṃ padaṭṭhānānantaram lakkhaṇo hāro vutto. Tathā hi lakkhaṇahāravibhaṅge “avijjāpaccayā saṅkhārā”tiādinaṃ paṭiccasamuppādaṃ dassetvā “evaṃ ye dhammā ekalakkhaṇā”tiādi vuttaṃ.

Atthato niddhāritānampi dhammānaṃ nibbacaṇādīni vattabbāni, na sutte sarūpato āgatānamevāti dassanattamaṃ lakkhaṇānantaram catubyūho vutto. Evañhi niravasesato atthāvabodho hoti, evañca katvā “yadā hi bhikkhu atthassa ca nāmaṃ jānāti dhammassa ca nāmaṃ jānāti tathā tathā naṃ abhiniropetī”ti anavasesapariyādānaṃ vakkhati. Tathā “punappunaṃ gabbhamupetī”ti ettha “ye jarāmarāṇena aṭṭiyitukāmā bhavissanti, te bhavissanti bhojane mattaññuno indriyesu guttadvārā”tiādinaṃ sammāpaṭipattim adhippāyabhāvena vakkhati.

Nibbacaṇādhippāyanidānavacanehi saddhim sutte padaṭṭhānaṃ suttantarasaṃsandanasāṅkhāte pubbāparavicāre dassite tesam sabhāgavisabhāgadhammantarāvaṭṭanaṃ sukhena sakkā dassetunti catubyūhānantaram āvaṭṭo vutto. Teneva hi “ārambhatha nikkamathā”ti gāthāyaṃ ārambhanikkamanabuddhasāsanayogadhunanehi vīriyasamādhipaññindriyāni niddhāretvā tadanuyogassa mūlaṃ “pamādo”ti suttantare dassito pamādo āvaṭṭito.

Sabhāgavisabhāgadhammāvaṭṭane niyojite sādharmaṇāsādharmaṇavasena saṃkilesavodānadhammānaṃ padaṭṭhānato bhūmito ca vibhāgo sakkā sukhena yojitunti āvaṭṭānantaram vibhattihāro vutto. Yato vibhattihāravibhaṅge “katame dhammā sādharmaṇā? Dve dhammā sādharmaṇā, nāmasādharmaṇā vatthusādharmaṇā cā”ti ārabhitvā “micchattaniyatānaṃ sattānaṃ aniyatānañca sattānaṃ dassanappahātābā kilesā sādharmaṇā, puthujjanassa sotāpannassa ca kāmarāgabyāpādā sādharmaṇā”tiādinaṃ sabhāgavisabhāgapariyāyanteyeva dhamme vibhajjissati.

Sāvajjānavajjadhammānaṃ sappaṭibhāgābhāvato tesam vibhāge kate suttāgate dhamme akasirena paṭipakkhato parivattetuṃ sakkāti vibhattianantaram parivattanaṃ hāro vutto. Tathā hi “sammādiṭṭhissa purisapuggalassa micchādiṭṭhi nijjiṇṇā bhavati”ti paṭivibhattasabhāve eva dhamme parivattanaṃ hāravibhaṅge udāharissati.

Paṭipakkhato parivattitāpi dhammā pariyaṇavacanehi bodhetabbā, na sutte āgatāyevāti dassanattamaṃ parivattānantaram vevacanaṃ hāro vutto.

Evaṃ te dhammā pariyaṇasaddatopi vibhāvitā hontīti pariyaṇato pakāsītānaṃ dhammānaṃ pabhedato paññattivasena vibhajanaṃ sukhena sakkā nātunti vevacanaṃ hāranantaram paññattihāro vutto. Tathā hi sutte āgatadhammānaṃ pariyaṇapaññattivibhāgaṃ subodhanañca paññattihāravibhaṅge vakkhati.

Pabhāvapariññādipaññattivibhāgamukhena paṭiccasamuppādasaccādidhammavibhāge kate sutte āgatadhammānaṃ paṭiccasamuppādādimukhena avadhāraṇaṃ sakkā dassetunti paññattianantaram otaṇaṃ hāro vutto. Tathā hi “uddhaṃ adho”ti gāthaṃ uddisitvā “vippamutto”ti padena asekkhaṃ vijjaṃ niddhāretvā “vijjuppādā avijjānirodho”tiādinaṃ paṭiccasamuppādaṃ udāharissati.

Dhātāyatanādīsu otāritānaṃ sutte padaṭṭhānaṃ pucchārambhavisodhanaṃ sakkā sukhena

sampādetunti otaraṇānantaraṃ sodhano hāro vutto. Tathā hi vakkhati – “yattha evaṃ suddho ārambho, so pañho vissajjito bhavati”’tiādi.

Visodhitesu sutte padapadatthesu tattha labbhamānasāmaññavisesabhāvo sukaro hotīti dassetuṃ sodhanānantaraṃ adhiṭṭhāno hāro dassito. Sodhano hi adhiṭṭhānassa bahūpakāro, tato eva hi “yathā yathā vā pana pucchitaṃ, tathā tathā vissajjayitabba”’nti vakkhati.

Sāmaññavisesabhūtesu sādharmaṇāsādhāraṇesu dhammesu paveditesu parikkhārasankhātassa sādharmaṇāsādhāraṇarūpassa paccayaheturāsissa pabhedo suviññeyyoti adhiṭṭhānantaraṃ parikkhāro vutto. Tathā hi vakkhati “asādhāraṇalakkhaṇo hetu, sādharmaṇalakkhaṇo paccayo. Yathā kiṃ bhave, yathā ānkurassa nibbattiyā bijaṃ asādhāraṇaṃ, pathavī āpo ca sādharmaṇā”’tiādi.

Asādhāraṇe sādharmaṇe ca kāraṇe dassite tassa attano phalesu kāraṇākāro tesam hetuphalānaṃ pabhedato desanākāro bhāvetabbapahātabbadhammānaṃ bhāvanāpahānāni ca niddhāretvā vuccamānāni sammā suttassa atthaṃ tathattāvabodhāya saṃvattantīti parikkhārantaraṃ samāropano hāro dassitoti. Idaṃ hārānaṃ anukkamakāraṇaṃ.

Nayānaṃ pana veneyyattayappayojitattā atthanayattayūpadesassa tadanukkameneva nandiyāvattādānaṃ tiṇṇaṃ atthanayānaṃ kamo veditabbo. Ugghaṭitaññūdayo hi tayo veneyyā nandiyāvattādayo payojenti. Tasmā te uddesaniddesapaṭiniddesā viya yathākkamaṃ tesam upakārāya savaṃttantīti. Tathā hi nesam cattāro cha aṭṭha ca mūlapadā niddiṭṭhā. Itarassa pana nayadvayassa atthanayattayassa bhūmiyā ālocanaṃ tassa tattha samānayanañcāti iminā kāraṇena uddesakkamo veditabbo. Na hi sakkā anoloketvā samānetunti.

Etaparamatā ca hārānaṃ ettakehi pakāravisesehi atthanayattayasahitehi suttassa attho niddhāriyamāno veneyyānaṃ alamanuttarāya paṭhamāya bhūmiyā samadhigamāyāti veditabbo. Dassanabhūmisamanuppattiatthā hi nettippakaraṇadesanāti. Atha vā etadantogadhattā sabbesaṃ suttassa saṃvaṇṇanāvisesānaṃ ettāvata hārānaṃ daṭṭhabbā. Yattakā hi suttassa saṃvaṇṇanāvisesā, sabbe te nettiupadesāyattāti vuttovāyamatto.

Tathā hi ye keci suttassa saṃvaṇṇanāpakārā niddisīyanti. Seyyathidaṃ – suttassa samuṭṭhānaṃ vattabbaṃ, adhippāyo vibhāvetabbo, anekadhā padattho saṃvaṇṇetabbo, vidhi anuvādo ca veditabbo, virodho samādhātabbo, anusandhiyā anurūpaṃ nigametabbanti. Tathā suttassa payojanaṃ piṇḍattho padattho anusandhi codanā parihāro ca atthaṃ vadantena vattabbāti. Tathā upogghāṭapadaviggahapadatthacālanāpaccupaṭṭhānāni vattabbāntīti.

Tathā tisso kathā ekanālikā caturassā nisinnavattikā. Tattha paḷiṃ vatvā ekekapadassa atthakathanam **ekanālikā** nāma.

Paṭipakkhaṃ dassetvā paṭipakkhassa upamaṃ dassetvā sapakkhaṃ dassetvā sapakkhassa upamaṃ dassetvā kathanam **caturassā** nāma.

Visabhāgadhammaseneva pariyosānaṃ gantvā puna sabhāgadhammaseneva pariyosānagamaṇam **nisinnavattikā** nāma.

Bhedakathāya tatvakathāya pariyāyavacanehi ca suttam saṃvaṇṇetabbanti ca evamādayo. Tesampi ettheva avarodho, yasmā te idha katipayahārasaṅgahitāti.

Nayānaṃ pana yasmā ugghaṭitaññūdayo tayo eva veneyyā saccābhisamayabhāgino tadatthāya ca atthanayadesanā, tasmā satipi saṃkilesavodānadhammānaṃ yathāvuttamūlapadabhedato vaḍḍhetvā vibhajitabbapakāre tathā mūlapadāni avaḍḍhetvā veneyyattayavaseneva etaparamatā vuttā. Navasu

navasu eva hi mūlapadesu sabbesaṃ saṃkilesavodānadhammānaṃ antogadhabhāvato na tāni vaḍḍhetabbāni veneyyattayādhikāro na hāpetabbānīti nayānaṃ etaparamatā daṭṭhabbā.

Kammanayānaṃ pana ālocanasamānayanato aññassa pakārantarassa asambhavato etaparamatā. **Hetvādīti** ettha ādisaddena phalabhūmiupanisāsabhāgavisabhāgalakkhaṇanayādayo pariggahitā. Tesu **hetūti** kāraṇaṃ, yo dhammotipi vuccati, so pana paccayabhāvena ekavidho. Kārako sampāpakoti duvidho. Puna kārako nāpako sampāpakoti tividho. Hetuhetu paccayahetu uttamahetu sādharmaṇahetūti catubbidho. Paccayadhammo kusalo akusalo saddo ariyamaggoti pañcavidho. Tathā sabhāgahetu asabhāgahetu ajjhātikahetu bāhirahetu janakahetu pariggāhakahetu sādharmaṇahetu asādharmaṇahetu samanantarahetu paramparahetu sahaajātahetu asahaajātahetu sāsavahetu anāsavahetūtiādinā anekavidho cāti veditabbo.

Phalampi paccayuppannabhāvena ekavidhaṃ. Adhigantabbatopi sampāpakahetuvaseṇa phalapariyāyo labbhatīti nibbattetabbaadhigantabbabhāvato duvidhaṃ. Nāpetabbanibbattetabbapattabbato tividhaṃ. Paccayuppannavipākakiriyāvacanathanibbānavaseṇa pañcavidhaṃ. Sabhāgahetunibbattaṃ asabhāgahetunibbattanti evamādivaseṇa anekavidhañcāti veditabbaṃ. Tathā lokiyaṃ lokuttaranti. Tattha lokuttaraṃ cattāri sāmāññaphalāni. Lokiyaphalaṃ duvidhaṃ kāyikaṃ mānasañca. Tattha kāyikaṃ pañcadvārikaṃ, avasiṭṭhaṃ mānaṃ. Yañca tāya tāya suttadesanāya sādhetabbaṃ, tadapi phalanti.

Bhūmīti sāsavabhūmi anāsavabhūmi saṅkhatabhūmi asaṅkhatabhūmi dassanabhūmi bhāvanābhūmi puthujjanabhūmi sekkhabhūmi asekkhabhūmi sāvakaḥbhūmi paccekabuddhabhūmi sammāsambuddhabhūmi jhānabhūmi asamāhitabhūmi paṭipajjamānabhūmi paṭipannabhūmi paṭhamābhūmi yāva catutthībhūmi kāmāvacarabhūmi yāva lokuttarabhūmīti bahuvidhā. Tattha sāsavabhūmi parittamahaggatā dhammā. Anāsavabhūmi appamāṇā dhammā. Saṅkhatabhūmi nibbānavajjā sabbe sabhāvadhammā. Asaṅkhatabhūmi appaccayā dhammā. Dassanabhūmi paṭhamamaggaphaladhammā. Bhāvanābhūmi avasiṭṭhamaggaphaladhammā. Puthujjanabhūmi hīnamajjhīmā dhammā. Sekkhabhūmi cattāro ariyamaggadhammā heṭṭhimā ca tayo phaladhammā. Asekkhabhūmi aggaphaladhammā. Sāvakaḥpaccekabuddhabuddhadhammā sāvakādībhūmiyo. Jhānabhūmi jhānadhammā. Asamāhitabhūmi jhānavajjitā dhammā. Paṭipajjamānabhūmi maggadhammā. Paṭipannabhūmi phaladhammā. Paṭhamādībhūmiyo saha phalena cattāro maggā aperiyaṇṇā dhammā “paṭhamāya bhūmiyā pattiya” tiādivacanato. Kāmāvacarādībhūmiyo kāmāvacarādīdhammā. Ye ca dhammā tesam tesam hāranayānaṃ patiṭṭhānabhāvena suttasu niddhāriyanti, tepi bhūmiyoti viññātabbā.

Upanisāti balavakāraṇaṃ, yo upanissayapaccayoti vuccati. Yañca sandhāya sutte “dukkhūpanisā saddhā saddhūpanisaṃ ‘sīla’nti yāva vimuttūpanisaṃ vimuttiñāṇadassana”nti vuttaṃ. Api ca upanisāti tasmīṃ tasmīṃ samaye siddhante hadayabhūtaṃ abhantaraṃ vuccati. Idhāpi nettihadayaṃ, yaṃ sammā pariggaṇhantā dhammakathikā tasmīṃ tasmīṃ sutte āgatadhammamukhena sabbahāranayayojanāya samatthā honti. Kiṃ panetaṃ nettihadayaṃ? Yadiḍaṃ etasseva tettiṃsavidhassa pakaraṇapadatthasoḷasassa aṭṭhavīsatividhapaṭṭhānavibhaṅgasahitassa visayo saha nimittavibhāgena asaṅkarato vavatthito.

Seyyathidaṃ – desanāhārassa assādādayo visayo, tassa assādādivibhāvanalakkhaṇattā. Tassa assādo sukhaṃ somanassanti evamādivibhāgo, tassa nimittaṃ iṭṭhārammaṇādi, ayañca attho desanāhāravacayahāraniddesavaṇṇanāyaṃ vitthārato pakāsito eva. Sutte āgatadhammassa sabhāgavisabhāgadhammāvaṭṭanavisayo āvaṭṭahāro, tadubhayaāvaṭṭanalakkhaṇattā. Sutte āgatadhammānaṃ paccanīkadhammavisayo parivattanahāro, paṭipakkhadhammaparivattanalakkhaṇattā. Padaṭṭhānaparikkhāresu āsannaḥkāraṇaṃ upanissayakāraṇaṃ padaṭṭhānaṃ, hetu parikkhāroti ayametesam viseso.

Sabhāgavisabhāgadhammā ca tesam tesam dhammānaṃ anukūlapaṭikūladhammā yathākkamaṃ veditabbā. Yathā – sammādiṭṭhiyā sammāsaṅkappo sabhāgo, micchāsaṅkappo visabhāgoti iminā nayena sabbaṃ sabhāgavisabhāgato veditabbaṃ.

Lakkhaṇanti sabhāvo. So hāranayānaṃ niddese vibhāvito eva.

Yaṃ panetaṃ hetuādivisesavinimuttaṃ hāranayānaṃ yojanānibandhanaṃ, so nayo. Yathāha – **lakkhaṇahāre** “evaṃ ye dhammā ekalakkhaṇā kiccato ca lakkhaṇato ca sāmāññato cā”tiādi. Tathā vicayena hārena vicinivā yuttihārena yojetabbāti. Tathā sodhanahārādīsu suddho ārambho hoti, so pañho vissajjito bhavatīti evamādi. Ekattādayopi nayā idha nayoti gahetabbā.

Evaṃ hetuphalādīni upadhāretvā nesam vasena tattha tattha sutte labbhamānapadatthaniddhāraṇamukhena yathālakkaṇaṃ ete hārā nayā ca yojetabbā. Visesato pana padaṭṭhānaparikkhārā hetuvaseṇa. Desanāvicayacatubhūhasamāropanā hetuphalavasena. Tathā vevacanapaññattiotaraṇasodhanā phalavasenevāti keci. Vibhatti hetubhūmivasena. Parivatto visabhāgavasena. Āvaṭṭo sabhāgavisabhāgavasena. Lakkhaṇayuttiadhiṭṭhānā nayavasena yojetabbāti. Ettāvātā ca yaṃ vuttaṃ –

“Sāmāññato vasesena, padattho lakkhaṇaṃ kamo;
Ettāvātā ca hetvādī, veditabbā hi viññunā”ti.

Ayaṃ gāthā vuttatthā hoti.

Niddesavāraṇaṇā niṭṭhitā.

4. Paṭiniddesavāraṇaṇā

1. Desanāhāravibhaṅgavaṇaṇā

5. Evaṃ hārādayo sukhaḅgahaṇatthaṃ gāthābandhavasena sarūpato niddisitvā idāni tesu hāre tāva paṭiniddesavasena vibhajitum **“tattha katamo desanāhāro”**tiādi āradham. Tattha **katamoti** kathetukamyatāpucchā. **Desanāhāro**ti pucchitabbadhammanidassanaṃ. Kiñcāpi desanāhāro niddesavāre sarūpato dassito, paṭiniddesassa pana visayaṃ dassento **“assādādīnavatā”**ti gātham ekadesena paccāmasati. Ayaṃ desanāhāro pubbāparāpekkho. Tattha pubbāpekkhatte **“katamo desanāhāro”**ti pucchitvā **“assādādīnavatā”**ti sarūpato dassitassa nigamaṇaṃ hoti. Parāpekkhatte pana **“ayaṃ desanāhāro kiṃ desayati”**ti desanākiriyaṃ kattaniddeso hoti. Tena desanāhārassa anvatthasaññataṃ dasseti. **Desayati**ti saṃvaṇṇeti, vitthāretīti attho.

Idāni anena desetabbadhamme sarūpato dassento **“assāda”**ntiādimāha, taṃ pubbe vuttanayattā uttānameva. Tasmā ito parampi avuttameva vaṇṇayissāma. **“Kattha pana āgate assādādīke ayaṃ hāro saṃvaṇṇeti”**ti anuyogaṃ manasikatvā desanāhārena saṃvaṇṇetabbadhammaṃ dassento **“dhammaṃ vo, bhikkhave, desessāmi”**tiādikam sabbapariyattidhammasaṅgāhakaṃ bhagavato chachakkadesanaṃ ekadesena dasseti.

Tattha **dhammanti** ayaṃ **dhamma**-saddo pariyattisaccasamādhipaññāpakatipuññāpattiñeyyādīsu bahūsu atthesu diṭṭhappayogo. Tathā hi **“idha, bhikkhu, dhammaṃ pariyāpuṇāti”**tiādīsu (a. ni. 5.73) pariyattidhamme dissati. **“Diṭṭhadhammo pattadhammo”**tiādīsu (dī. ni. 1.299; mahāva. 18) sacce. **“Evaṃdhammā te bhagavanto ahesu”**ntiādīsu (dī. ni. 2.13, 145) samādhimhi. **“Saccaṃ dhammo dhiti cāgo”**ti evamādīsu (jā. 1.1.57; 1.2.147-148) paññāyaṃ. **“Jātidhammaṇaṃ, bhikkhave, sattāna”**nti evamādīsu (dī. ni. 2.398; ma. ni. 1.131) pakatiyaṃ. **“Dhammo have rakkhati dhammacāri”**ntiādīsu (jā. 1.10.102; 1.15.385) puññe. **“Cattāro pārājikā dhammā”**ti evamādīsu (pārā. 233) āpattiyaṃ. **“Kusalā dhammā akusalādhammā”**tiādīsu (dha. sa. tikamātikā 1) ñeyye. Idha pana pariyattiyaṃ daṭṭhabboti (ma. ni. aṭṭha. 1.mūlapariyāyasuttavaṇṇaṇā; dha. sa. aṭṭha. cittuppādakaṇḍa 1; bu. vaṃ. aṭṭha. 1.1).

Voti pana ayaṃ **vo**-saddo **“handā dāni, bhikkhave, pavāremi vo”**ti (saṃ. ni. 1.215) ettha

upayogatthe āgato. “Sannipatitānaṃ vo, bhikkhave, dvayaṃ karaṇīya”ntiādīsu (ma. ni. 1.273) karaṇatthe. “Ye hi vo ariyā parisuddhakāyakammantā”tiādīsu padapūraṇe. “Ārocayāmi vo, bhikkhave”tiādīsu (a. ni. 7.72) sampadānatthe. Idhāpi sampadānatthe evāti daṭṭhabbo.

Bhikkhanasīlatādiguṇayogena bhikkhū, bhinnakilesatādiguṇayogena vā. Atha vā saṃsāre bhayaṃ ikkhantīti bhikkhū. **Bhikkhaveti** tesam ālapanam. Tena te dhammassavane niyojento attano mukhābhimukhaṃ karoti. **Desessāmīti** kathessāmi. Tena nāhaṃ dhammissaratāya tumhe aññaṃ kiñci kāreyyāmi, anāvaraṇaññaṇena sabbaṃ ñeyyadhammaṃ paccakkhakāritāya pana dhammaṃ desessāmīti idāni pavattiyamānaṃ dhammadesanaṃ paṭijjānāti. **Ādikalyāṇanti**ādīsu ādimhi kalyāṇaṃ **ādikalyāṇaṃ**, ādikalyāṇametassāti vā **ādikalyāṇaṃ**. Sesapadadvayepi eseva nayo. Tattha sīlena ādikalyāṇaṃ. Samādhinā majjhekalyāṇaṃ. Paññāya pariyosānakalyāṇaṃ. Buddhasubuddhatāya vā ādikalyāṇaṃ. Dhammasudhammatāya majjhekalyāṇaṃ. Saṅghasuppaṭipattiyā pariyosānakalyāṇaṃ. Atha vā ugghaṭṭitaññuvīnayanena ādikalyāṇaṃ. Vipañcītaññuvīnayanena majjhekalyāṇaṃ neyyapuggalavinayanena pariyosānakalyāṇaṃ. Ayamevattho idhāhippeto.

Atthasampattiyā **sātthaṃ**. Byañjanasampattiyā **sabyañjanaṃ**. Saṅkāsānādichaathapadasamāyogato vā **sātthaṃ**. Akkharādichabyañjanapadasamāyogato **sabyañjanaṃ**. Ayamevattho idhāhippeto. Upanetabbābhāvato ekantena paripuṇṇanti **kevalaparipuṇṇaṃ**. Apanetabbābhāvato **parisuddhaṃ**. Sīlādipañcadhammakhandhapāripūriyā vā **paripuṇṇaṃ**. Caturoghānittharaṇāya pavattiyā lokāmisānirapekkhatāya ca **parisuddhaṃ**. Brahmaṃ seṭṭhaṃ uttamaṃ brahmūnaṃ vā seṭṭhānaṃ ariyānaṃ cariyaṃ sikkhattayasāṅghaṃ sāsanaṃ **brahmacariyaṃ pakāsayissāmi** paridīpayissāmīti attho.

Evam bhagavatā desito pakāsito ca sāsanaḍhammo yesam assādādīnaṃ dassanavasena pavatto, te assādādayo desanāhārassa visayabhūtā yattha yattha pāṭhe savisesam vuttā, tato tato niddhāretvā udāharaṇavasena idhānetvā dassetuṃ “**tattha katamo assādo**”tiādi āraddhaṃ. Tattha **kāmanti** manāpiyarūpādīṃ tebhūmakadhammasaṅkhātāṃ vatthukāmaṃ. **Kāmayamānassāti** icchantassa. **Tassa cetam samijjhatīti** tassa kāmayamānassa sattassa taṃ kāmasaṅkhātāṃ vatthu samijjhāti ce, sace so taṃ labhatīti vuttaṃ hoti. **Addhā pītimano hotīti** ekamsena tuṭṭhacitto hoti. **Laddhāti** labhivā. **Maccoti** satto. **Yadicchatīti** yaṃ icchati. Ayamettha saṅkhepo, vitthāro pana **niddese** (mahāni. 1) vuttanayena veditabbo. **Ayam assādoti** yāyaṃ adhippāyasamijjhanā icchitalābhe pītimanatā somanassaṃ, ayam assādetabbato assādo.

Tassa ce kāmayānassāti tassa puggalassa kāme icchamānassa, kāmena vā yāyamānassa. **Chandajātassāti** jātataṇhassa. **Jantunoti** sattassa. **Te kāmā parihāyantīti** te vatthukāmā kenaci antarāyena vinassanti ce. **Sallaviddhova ruppattīti** atha ayomayādīnā sallena viddho viya pīḷiyatīti attho. **Ayam ādīnavoti** yāyaṃ kāmānaṃ vipariṇāmaññathābhāvā kāmayānassa sattassa rupanā domanassuppatti, ayam ādīnavo.

Yo kāme parivajjetīti yo bhikkhu yathāvutte kāme tattha chandarāgassa vikkhambhanaena vā samucchindanaena vā sabbabhāgena vajjeti. Yathā kiṃ? **Sappasseva padā siroti**, yathā koci puriso jīvitukāmo kaṇhasappaṃ paṭipathe passivā attano pādena tassa siram parivajjeti, **somam...pe... samativattatīti** so bhikkhu sabbaṃ lokaṃ visarivā ṭhitattā loke visattikāsaṅkhātāṃ imaṃ taṇhaṃ satimā hutvā samatikkamatīti. **Idam nissaraṇanti** yadidaṃ visattikāsaṅkhātāya taṇhāya nibbānārammaṇena ariyamaggena samativattanaṃ, idaṃ nissaraṇaṃ.

Khettanti kedārādikhettaṃ. **Vatthunti** gharavattuādivatthuṃ. **Hiraññaṃ vāti** kahāpaṇasaṅkhātāṃ suvaṇṇasaṅkhātāṃ hiraññaṃ. **Vā**-saddo vikappanatto, so sabbapadesu yojetabbo. **Gavāssanti** gāvo ca asse cāti gavāssaṃ. **Dāsaporisanti** dāse ca porise cāti dāsaporisaṃ. **Thiyoti** itthiyo. **Bandhūti** ñātibandhavo. **Puthū kāmēti** aññēpi vā manāpiyarūpādīke bahū kāmaguṇe. **Yo naro anugijjhatīti** yo satto anu anu abhikaṅkhāti patthetīti attho. **Ayam assādoti** yadidaṃ khettādīnaṃ anugijjhanaṃ, ayam

assādeti vatthukāme etenāti assādo.

Abalā naṃ balīyantīti khettādibhede kāme anugijjhantaṃ taṃ puggalaṃ kusalehi pahātabbattā abalasaṅkhātā kilesā balīyanti abhibhavanti, saddhābalādivirahena vā abalaṃ taṃ puggalaṃ abalā kilesā balīyanti, abalattā abhibhavanti attho. **Maddantaṃ parissayā**ti enaṃ kāmagiddhaṃ kāme pariyesantaṃ rakkhantaṃca sīhādayo ca pākaṭaparissayā kāyaduccaritādayo ca apākaṭaparissayā maddanti. **Tato naṃ...pe... dakanti** tato tehi pākaṭapākaṭaparissayehi abhibhūtaṃ taṃ puggalaṃ jātiādidukkaṃ samudde bhinnanāvaṃ udakaṃ viya anveti anugacchatīti attho. **Ayaṃ ādīnavoti** yvāyaṃ taṃhaduccaritasamkilesahetuko jātiādidukkhānubandho, ayaṃ ādīnavo.

Tasmāti yasmā kāmagiddhassa vuttanayena dukkhānubandho vijjati, tasmā. **Jantūti** satto. **Sadā satoti** pubbarattāpararattaṃ jāgariyānuyogena sato hutvā. **Kāmāni parivajjeyeti** vikkhambhanavasena samucchavasena ca rūpādīsu vatthukāmesu sabbappakāraṃ kilesakāmaṃ anuppādentō kāmāni parivajjaye pajaheyya. **Te pahāya tare oghanti** evaṃ te kāme pahāya tappahānakaraariyamaggeneva catubbidhampi oghaṃ tareyya, taritūṃ sakkūṇeyyāti attho. **Nāvaṃ sitvāva pāragūti** yathā puriso udakaggahaṇena garubhāraṃ nāvaṃ udakaṃ bahi siñcitvā lahukāya nāvāya appakasireneva pāragū bhaveyya, pāraṃ gaccheyya, evameva attabhāvanāvaṃ kilesūdakagarukaṃ siñcitvā lahukena attabhāvena pāragū bhaveyya, pāraṃ nibbānaṃ arahattappattiyā gaccheyya anupādisesāya nibbānadhātuyā parinibbānenāti attho. **Idaṃ nissaraṇanti** yaṃ kāmappahānamukhena caturoghaṃ taritvā anupādisesāya nibbānadhātuyā nibbānaṃ, idaṃ sabbasaṅkhatanissaraṇato nissaraṇanti.

Dhammoti dānādipuññadhammo. **Haveti** nipātamattaṃ. **Rakkhati dhammacārīti** yo taṃ dhammaṃ appamatto carati, taṃ dhammacāriṃ diṭṭhadhammikasamparāyikabhedena duvidhatopi anattatho rakkhati pāleti. **Chattaṃ mahantaṃ yatha vassakāleti** vassakāle deve vassante yathā mahantaṃ chattaṃ kusalena purisena dhāritaṃ taṃ vassatemanato rakkhati. Tattha yathā taṃ chattaṃ appamatto hutvā attānaṃ rakkhantaṃ chādentaṃca vassādito rakkhati, evaṃ dhammopi attasammāpaṇidhānena appamatto hutvā dhammacariyāya attānaṃ rakkhantaṃeva rakkhatīti adhippāyo. **Esā...pe... cārīti** etena vuttamevatthaṃ pākaṭataraṃ karoti, taṃ suviññeyyameva. **Idaṃ phalanti** diṭṭhadhammikehi samparāyikehi ca anattthehi yadidaṃ dhammassa rakkhaṇaṃ vuttaṃ rakkhāvasānassa ca abbhudayassa nipphādanaṃ, idaṃ nissaraṇaṃ anāmasitvā desanāya nibbattetabbatāya phalanti.

Sabbe dhammāti sabbe saṅkhatā dhammā. **Anattāti** natthi etesaṃ attā kāravedakasabhāvo, sayam vā na attāti anattāti. **Itīti** evaṃ. **Yadā paññāya passatīti** yasmiṃ kāle vipassanaṃ ussukkāpento anattānupassanāsaṅkhātāya paññāya passati. **Atha nibbindati dukkheti** atha anattānupassanāya pubbe eva aniccatādukkhatānaṃ superidiṭṭhattā nibbidānupassanāvasena vipassanāgocarabhūte pañcakkhandhadukkhe nibbindati nibbedam āpajjati. **Esa maggo visuddhiyāti** yā vuttalakkaṇā nibbidānupassanā sabbakilesavisujjanato visuddhisāṅkhātassa ariyamaggassa accantavisuddhiyā vā amatadhātuyā maggo upāyo. **Ayaṃ upāyoti** yadidaṃ anattānupassanāmukhena sabbasmiṃ vaṭṭasmiṃ nibbindanaṃ vuttaṃ, taṃ visuddhiyā adhiṅgamahetubhāvato upāyo.

“**Cakkhumā...pe... parivajjaye**”ti imissā gāthāya ayaṃ saṅkhepattho – yathā cakkhumā puriso sarīre vahante visamāni bhūmippadesāni caṇḍatāya vā visame hatthiādayo parivajjeti, evaṃ loke sappañño puriso sappaññatāya hitāhitaṃ jānanto pāpāni lāmakāni duccharitāni parivajjeyyāti. **Ayaṃ āṇattīti** yā ayaṃ “pāpāni parivajjetabbāni”ti dhammarājassa bhagavato āṇā, ayaṃ āṇattīti.

Evaṃ visum visum suttesu āgatā phalūpāyāṇattiyō udāharaṇabhāvena dassetvā idāni tā ekato āgatā dassetuṃ “**suññato**”ti gāthamāha.

Tattha **suññato lokam avekkhassu, mogharājāti āṇattīti** “mogharāja, sabbampi saṅkhāralokaṃ avasavattitāsallakkaṇavasena vā tucchabhāvasamanupassanavasena vā suññoti passā”ti idaṃ dhammarājassa vacanaṃ vidhānabhāvato āṇatti. Sabbadā satikiriyāya taṃsuññatādassanaṃ sampajjati

“**sadā satoti upāyo**”ti vuttam. **Attānudiṭṭhiṃ ūhaccāti** vīsativatthukam sakkāyadassanam uddharitvā samucchinditvā. **Evaṃ maccutaro siyāti. Idaṃ phalanti** yaṃ evaṃ vuttena vidhinā maccutaraṇam maccuno visayātikkanam tassa yaṃ pubbabhāgapaṭipadāpaṭipajjanam, idaṃ desanāya phalanti attho. Yathā pana assādādayo sutte katthaci sarūpato katthaci niddhāretabbatāya katthaci visum visum katthaci ekato dassitā, na evaṃ phalādayo. Phalādayo pana sabbattha sutte gāthāsu vā ekato dassetabbāti imassa nayassa dassanattham visum visum udāharitvāpi puna “suññato loka”ntiādinā ekato udāharaṇam katanti daṭṭhabbam.

6. Evaṃ assādādayo udāharaṇavasena sarūpato dassetvā idāni tattha puggalavibhāgena desanāvibhāgam dassetuṃ “**tattha bhagavā**”tiādi vuttam.

Tattha ugghaṭitam ghaṭitamattam uddiṭṭhamattam yassa niddesapaṭiniddesā na katā, tam jānātīti ugghaṭitaññū. Uddesamattena sappabhedam savitthāramattam paṭivijjhatīti attho, ugghaṭitam vā uccalitam uṭṭhapitanti attho, tam jānātīti ugghaṭitaññū. Dhammo hi desiyamāno desakato desanābhājanam saṅkamanto viya hoti, tamesa uccalitameva jānātīti attho, calitameva vā ugghaṭitam. Sassatādiākārassa hi veneyyānam āsayassa buddhāveṇikā dhammadesanā taṅkhaṇapatitā eva calanāya hoti, tato paramparānuvattiyā, tatthāyaṃ ugghaṭite calitamatteyeva āsaye dhammam jānāti avabujjhatīti ugghaṭitaññū, tassa **ugghaṭitaññussa nissaraṇam desayati**, tattakeneva tassa atthasiddhito. Vipañcitam vitthāritam niddiṭṭham jānātīti vipañcitaññū, vipañcitam vā mandam saṅikam dhammam jānātīti vipañcitaññū, tassa **vipañcitaññussa ādīnavaṅca nissaraṇaṅca desayati**, nātisaṅkhepavitthārāya desanāya tassa atthasiddhito. Netabbo dhammassa paṭiniddisena attham pāpetabboti neyyo, mudindriyatāya vā paṭilomaggahaṇato netabbo anunetabboti neyyo, tassa **neyyassa assādam ādīnavam nissaraṇaṅca desayati**, anavasesetvāva desanena tassa atthasiddhito. Tatthāyaṃ pāli –

“Katamo ca puggalo ugghaṭitaññū? Yassa puggalassa saha udāhaṭavelāya dhammābhisamayo hoti. Ayaṃ vuccati puggalo ugghaṭitaññū.

“Katamo ca puggalo vipañcitaññū? Yassa puggalassa saṅkhittena bhāsītassa vitthārena atthe vibhājiyamāne dhammābhisamayo hoti. Ayaṃ vuccati puggalo vipañcitaññū.

“Katamo ca puggalo neyyo? Yassa puggalassa uddesato paripucchato yonisomanasikaroto kalyāṇamitte sevato bhajato payirupāsato evaṃ anupubbena dhammābhisamayo hoti. Ayaṃ vuccati puggalo neyyo”ti (pu. pa. 148-150).

Padaparamo panettha nettiyaṃ paṭivedhassa abhājananti na gahitoti daṭṭhabbam. Ettha ca assādo, ādīnavo, nissaraṇam, assādo ca ādīnavo ca, assādo ca nissaraṇaṅca, ādīnavo ca nissaraṇaṅca, assādo ca ādīnavo ca nissaraṇaṅcāti ete satta paṭṭhānanayā.

Tesu tatiyaṅcattasattamā veneyyattayavinayane samatthātāya gahitā, itare cattāro na gahitā. Na hi kevalena assādena ādīnavena tadubhayena vā kathitena veneyyavinayanaṃ sambhavati, kilesānaṃ pahānavācanato. Pañcamopi ādīnavāvacanato nissaraṇassa anupāyo eva. Na hi vimuttirasā bhagavato desanā vimuttiṃ tadupāyaṅca anāmasantī pavattati. Tasmā ete cattāro nayā anuddhaṭā. Sace pana padaparamassa puggalassa vasena pavattam saṅkilesabhāgiyaṃ vāsanābhāgiyaṃ tadubhayabhāge ṭhitam desanaṃ suttekadesaṃ gātham vā tādisaṃ etesaṃ nayānaṃ udāharaṇabhāvena uddharati, evaṃ sati sattannampi nayānaṃ gahaṇam bhavēyya. Veneyyavinayanaṃ pana tesam santāne ariyamaggassa uppādanaṃ. Tam yathāvutthehi eva nayeti, nāvasesehīti itare idha na vuttā. Yasmā pana **peṭake** (peṭako. 23) –

“Tattha katamo assādo ca ādīnavo ca?

Yāni karoti puriso, tāni attani passati;

Kalyāṇakārī kalyāṇaṃ, pāpakārī ca pāpaka’’nti.

Tattha yaṃ kalyāṇakārī kalyāṇaṃ paccanubhoti, yaṃ assādo. Yaṃ pāpakārī pāpaṃ paccanubhoti, yaṃ ādīnavo.

Aṭṭhime, bhikkhave, lokadhammā. Katame aṭṭha? Lābhotiādi (a. ni. 8.6). Tattha lābho yaso sukhaṃ pasamsā, yaṃ assādo. Alābho ayaso dukkhaṃ nindā, yaṃ ādīnavo.

Tattha katamo assādo ca nissaraṇaṇca?

‘‘Sukho vipāko puññānaṃ, adhippāyo ca ijjhati;
Khippaṇca paramaṃ santiṃ, nibbānamadhigacchatī’’ti. (peṭako. 23);

Ayaṃ assādo ca nissaraṇaṇca.

Dvattiṃsimāni, bhikkhave, mahāpurisassa mahāpurisalakkhaṇāni, yehi samannāgatassa mahāpurisassa dveva gatiyo bhavanti anaññā...pe... vivaṭacchadoti sabbam **lakkhaṇasuttaṃ**, (dī. ni. 3.199) yaṃ assādo ca nissaraṇaṇca.

Tattha katamo ādīnavo ca nissaraṇaṇca?

‘‘Bhārā have pañcakkhandhā, bhārahāro ca puggalo;
Bhārādānaṃ dukhaṃ loke, bhāranikkhepanaṃ sukhaṃ.

‘‘Nikkhipitvā garuṃ bhāraṃ, aññaṃ bhāraṃ anādiya;
Samūlaṃ taṇhamabbuyha, nicchāto parinibbuto’’ti. (saṃ. ni. 3.22);

Ayaṃ ādīnavo ca nissaraṇaṇca.

Tattha katamo assādo ca ādīnavo ca nissaraṇaṇca?

‘‘Kāmā hi citrā madhurā manoramā, virūparūpena mathenti cittaṃ;
Tasmā ahaṃ pabbajitomi rāja, apaṇṇakaṃ sāmāññaṃ seyyoti. (ma. ni. 2.307; theragā. 787-788; peṭako. 23);

Ayaṃ assādo ca ādīnavo ca nissaraṇaṇcā’’ti vuttaṃ. Tasmā tepi nayā idha niddhāretvā veditabbā. Phalādīsupi yaṃ nayo labbhati eva. Yasmā **peṭake** (peṭako. 22) ‘‘tattha katamaṃ phalaṇca upāyo ca? Sīle patiṭṭhāya naro sapañña’’ti gāthā (saṃ. ni. 1.23), idaṃ phalaṇca upāyo ca.

Tattha katamaṃ phalaṇca āṇatti ca?

‘‘Sace bhāyatha dukkhassa, sace vo dukkhamappiyaṃ;
Mākattha pāpakaṃ kammaṃ, āvi vā yadi vā rahoti. (udā. 44);

Idaṃ phalaṇca āṇatti ca.

Tattha katamo upāyo ca āṇatti ca?

‘‘Kumbhūpamaṃ kāyamimaṃ veditvā, nagarūpamaṃ cittamidaṃ ṭhapetvā;
Yodhetha māraṃ paññāvudhena, jitaṇca rakkhe anivesano siyā’’ti. (dha. pa. 40);

Ayaṃ upāyo ca āṇatti ca. Evaṃ phalādīnaṃ dukavasenapi udāharaṇaṃ veditabbaṃ. Ettha ca yo nissaraṇadesanāya vinetabbo, so ugghaṭṭitaññūtiādīnā yathā desanāvibhāgena puggalavibhāgasiddhi hoti, evaṃ ugghaṭṭitaññussa bhagavā nissaraṇaṃ desetītiādīnā puggalavibhāgena desanāvibhāgo sambhavatīti so tathā dassito.

Evaṃ yesaṃ puggalānaṃ vasena desanāvibhāgo dassito, te puggale paṭipadāvibhāgena vibhajitvā dassetuṃ “**catasso paṭipadā**”tiādi vuttaṃ. Tattha paṭipadābhiññākato vibhāgo paṭipadākato hotīti āha – “catasso paṭipadā”ti. Tā panetā ca samathavipassanāpaṭipattivasena duvidhā honti. Kathaṃ? Samathapakkhe tāva paṭhamasamannāhārato paṭṭhāya yāva tassa tassa jhānassa upacāraṃ uppajjati, tāva pavattā samathabhāvanā “paṭipadā”ti vuccati. Upacārato pana paṭṭhāya yāva appanā tāva pavattā paññā “abhiññā”ti vuccati.

Sā panāyaṃ paṭipadā ekaccassa dukkhā hoti nīvaraṇādi paccaṇīkadhammasamudācāragahaṇatāya kicchā asukhasevanāti attho, ekaccassa tadabhāvena sukhā. Abhiññāpi ekaccassa dandhā hoti mandā asīghappavatti, ekaccassa khippā amandā sīghappavatti. Tasmā yo ādito kilese vikkhambhento dukkhena sasaṅkhārena sappayogena kilamanto vikkhambheti, tassa dukkhā paṭipadā hoti. Yo pana vikkhambhitakileso appanāparivāsaṃ vasanto cirena aṅgapātubhāvaṃ pāpuṇāti, tassa dandhābhiññā nāma hoti. Yo khippaṃ aṅgapātubhāvaṃ pāpuṇāti, tassa khippābhiññā nāma hoti. Yo kilese vikkhambhento sukhena akilamanto vikkhambheti, tassa sukhā paṭipadā nāma hoti.

Vipassanāpakkhe pana yo rūpārūpamukhena vipassanaṃ abhinivisanto cattāri mahābhūtāni pariggahetvā upādārūpaṃ pariggaṇhāti arūpaṃ pariggaṇhāti, rūpārūpaṃ pana pariggaṇhanto dukkhena kasirena kilamanto pariggahetuṃ sakkoti, tassa dukkhā paṭipadā nāma hoti. Pariggahitarūpārūpassa pana vipassanāparivāse maggapātubhāvadandhatāya dandhābhiññā nāma hoti. Yopi rūpārūpaṃ pariggahetvā nāmarūpaṃ vavatthapento dukkhena kasirena kilamanto vavatthapeti, vavatthapite ca nāmarūpe vipassanāparivāsaṃ vasanto cirena maggaṃ uppādetuṃ sakkoti. Tassāpi dukkhā paṭipadā dandhābhiññā nāma hoti.

Aparo nāmarūpampi vavatthapetvā paccaye pariggaṇhanto dukkhena kasirena kilamanto pariggaṇhāti, paccaye ca pariggahetvā vipassanāparivāsaṃ vasanto cirena maggaṃ uppādeti. Evampi **dukkhā paṭipadā dandhābhiññā** nāma hoti.

Aparo paccayepi pariggahetvā lakkhaṇāni paṭivijjhanto dukkhena kasirena kilamanto paṭivijjhanti, paṭividhalakkaṇo ca vipassanāparivāsaṃ vasanto cirena maggaṃ uppādeti. Evampi **dukkhā paṭipadā dandhābhiññā** nāma hoti.

Aparo lakkhaṇānipi paṭivijjhivā vipassanāñāṇe tikkhe sūre suppasanne vahante uppannaṃ vipassanānikantiṃ pariyādiyamāno dukkhena kasirena kilamanto pariyādiyati, nikantiṇca pariyādiyitvā vipassanāparivāsaṃ vasanto cirena maggaṃ uppādeti. Evampi **dukkhā paṭipadā dandhābhiññā** nāma hoti. Imināvupāyena itarāpi tisso paṭipadā veditabbā. Vipassanāpakkhikā eva panettha catasso paṭipadā daṭṭhabbā.

Cattāro puggalāti yathāvuttapaṭipadāvibhāgena cattāro paṭipannakapuggalā. Taṃ pana paṭipadāvibhāgaṃ saddhiṃ hetupāyaphalehi dassetuṃ “**taṇhācarito**”tiādi vuttaṃ.

Tattha **caritanti** cariyā, vuttīti attho. Taṇhāya nibbattitaṃ caritaṃ etassāti **taṇhācarito**, taṇhāya vā pavattito carito **taṇhācarito**, lobhajjhāsayoti attho. **Diṭṭhicaritoti** etthāpi eseva nayo. **Mandoti** mandiyaṃ vuccati avijjā, tāya samannāgato mando, mohādhikoti attho.

Satindriyenāti satiyā ādhipaccaṃ kurumānāya. Satindriyameva hissa visadaṃ hoti. Yasmā taṇhācaritatāya pubbhāge kosajjābhāvavena na vīriyaṃ balavaṃ hoti, mohādhikatāya na paññā

balavatī. Tadubhayenāpi na samādhi balavā hoti, tasmā “satindriyameva hissa visadam hoti”ti vuttam. Tenevāha – “satipaṭṭhānehi nissayehi”ti. Taṇhācaritāya cassa kilesavikkhambhanam na sukaranti dukkhā paṭipadā, avisadañānatāya dandhābhiññāti pubbe vuttanayam ānetvā yojetabbam. **Niyyātī** ariyamaggena vaṭṭadukkhato niggacchati.

Udatthoti udattho, ulārapaññoti attho. Paññāsahāyapaṭilābhena cassa samādhi tikkho hoti sampayuttesu ādhipaccam pavatteti. Tenevāha – “samādhindriyenā”ti. Visadañānatā “**khippābhiññāyā**”ti vuttam. Samādhipadhānatā jhānānam jhānehi nissayehiṭi ayam viseso. Sesam purimasadisameva. Diṭṭhicarito aniyyānikamaggampi niyyānikanti maññamāno tattha ussāhabahulattā vīriyādhiko hoti. Vīriyādhikatāyeva cassa kilesavikkhambhanam sukaranti sukhā paṭipadā, avisadañānatāya pana dandhābhiññāti imamattam dasseti “**diṭṭhicarito mando**”tiādīnā. Sesam vuttanayameva.

Sacchēti ariyasacchehi. Ariyasaccāni hi lokiyāni pubbabhāgañāṇassa sammasanaṭṭhānatāya lokuttarāni adhimuccanatāya maggañāṇassa abhisamayattānatāya ca nissayāni hontīti. Sesam vuttanayameva. Ettha ca diṭṭhicarito udattho ugghaṭṭitaññū. Taṇhācarito mando neyyo. Itare dvepi vipaṇcītaññūti evam yena veneyyattayena pubbe desanāvibhāgo dassito, tadeva veneyyattayam iminā paṭipadāvibhāgena dassitanti daṭṭhabbam.

Idāni tam veneyyupuggalavibhāgam atthanayayojanāya visayam katvā dassetuṃ “**ubho taṇhācaritā**”tiādī vuttam. Taṇhāya samādhipaṭipakkhattā taṇhācarito visujjhamāno samādhimukhena visujjhatīti āha – “**samathapubbaṅgamāyā**”ti. “Samathavipassanam yuganaddham bhāveti”ti (a. ni. 4.170; paṭi. ma. 2.1, 3) vacanato pana sammādiṭṭhisahiteneva sammāsamādhinā niyyānam, na sammāsamādhinā evāti āha – “samathapubbaṅgamāya vipassanāyā”ti. “Rāgavirāgā cetovimuttīti arahattaphalāsamādhī”ti saṅghesu vuttam. Idha pana anāgāmiphalāsamādhīti vakkhati. So hi samādhismiṃ paripūrakārīti. Tattha rañjanaṭṭhena rāgo. So virajjati etāyāti rāgavirāgā, tāya **rāgavirāgāya**, rāgappahāyikāyāti attho.

Cetovimuttīyāti cetoti cittaṃ, tadapadesena cettha samādhi vuccati “yathā cittaṃ paññaṇca bhāvaya”nti (saṃ. ni. 1.23). Paṭippassaddhivasena paṭipakkhato vimucattīti vimutti, tena vā vimutto, tato vimuccananti vā vimutti, samādhiyeva. Yathā hi lokiyakathāyam saññā cittaṇca desanāsisaṃ. Yathāha – “nānattakāyā nānattasaññino”ti (dī. ni. 3.332, 341, 357; a. ni. 7.44; 9.24) “kiṃ citto tvaṃ, bhikkhū”ti (pārā. 135) ca, evam lokuttarakathāyam paññā samādhi ca. Yathāha – “pañcañāṇiko sammāsamādhī”ti (vibha. 804) ca “samathavipassanam yuganaddham bhāveti”ti ca. Tesu idha rāgassa ujuvipaccanīkato samathapubbaṅgamatāvacanato ca cetoggahaṇena samādhi vutto. Tathā vimuttivacanena. Tena vuttam “samādhiyevā”ti. Ceto ca tam vimutti cāti cetovimutti. Atha vā vuttappakārasseva cetaso paṭipakkhato vimutti vimokkhoti cetovimutti, cetasi vā phalaviññāṇe vuttappakāraṇa vimuttīti cetovimutti, cetaso vā phalaviññāṇassa paṭipakkhato vimutti vimokkho etasminti cetovimutti, samādhiyeva. **Paññāvimuttīyāti** etthāpi ayam nayo yathāsambhavam yojetabbo.

Diṭṭhiyā savisaye paññāsadisī pavattīti diṭṭhicarito visujjhamāno paññāmukhena visujjhatīti āha – “**ubho diṭṭhicaritā vipassanā**”tiādī. **Avijjāvirāgā paññāvimuttīti** arahattaphalapaññā. Samathaggahaṇena tappaṭipakkhato taṇham vipassanāggahaṇena avijjaṇca niddhāretvā paṭhamanayassa bhūmiṃ sakkā sukhena dassetunti āha – “**ye samatha...pe... hātabbā**”ti.

Tattha **samathapubbaṅgamā paṭipadāti** purimā dve paṭipadā, itarā **vipassanāpubbaṅgamāti** daṭṭhabbā. **Hātabbāti** gametabbā, netabbāti attho. Vipassanāya aniccadukkhaanattasaññābhāvato dukkhasaññāparivāratā ca asubhasaññāya imā catasso saññā dassitā hontī. Tappaṭipakkhena ca cattāro vipallāsāti sakalassa sīhavikkīṭitanayassa bhūmiṃ sukhena sakkā dassetunti āha – “**ye vipassanā...pe... hātabbā**”ti.

7. Evaṃ paṭipadāvibhāgena veneyyapuggalavibhāgaṃ dassetvā idāni taṃ ñāṇavibhāgena dassento yasmā bhagavato desanā yāvadeva veneyyavinayanatthā, vinayanañca nesam sutamayādīnaṃ tissannaṃ paññānaṃ anukkamena nibbattaṃ, yathā bhagavato desanāya pavattibhāvavibhāvanañca hāranayabyāpāro, tasmā imassa hārassa samuṭṭhitappakāraṃ tāva pucchitvā yena puggalavibhāgadassanena desanābhājanam vibhajitvā tattha desanāyaṃ desanāhāraṃ niyojetukāmo taṃ dassetuṃ “**svāyaṃ hāro kattha sambhavatī**”tiādīmāha.

Tattha **yassāti** yo so aṭṭhahi akkhaṇehi vimutto sotāvadhānapariyosānāhi ca sampattīti samannāgato yassa. **Satthāti** diṭṭhadhammikasamparāyikaparamatthehi yathārahaṃ anusāsanato satthā. **Dhammanti** yathānusiṭṭhaṃ paṭipajjamāne apāyesu apatamāne dhāretīti dhammo, taṃ dhammaṃ. **Desayātīti** saṅkhepavitthāranayehi bhāsati katheti. **Aññataroti** bhagavato sāvakesu aññataro. **Garuṭṭhāniyoti** sīlasutādiguṇavisesayogena garukaraṇīyo. **Sabrahmacārīti** brahmaṃ vuccati seṭṭhaṭṭhena sakalaṃ satthusāsanam. Samaṃ saha vā brahmaṃ carati paṭipajjatīti sabrahmacārī. **Saddhaṃ paṭilabhatīti** “sammāsambuddho vata so bhagavā yo evarūpassa dhammassa desetā”ti tathāgate, “svākkhāto vatāyaṃ dhammo yo evaṃ ekantaparipuṇṇo ekantaparisuddho”tiādīnā dhamme ca saddhaṃ labhati uppādetīti attho.

Tatthāti tasmīṃ yathāsute yathāpariyatte dhamme. **Vīmaṃsāti** pāḷiyā pāḷiatthassa ca vīmaṃsanapaññā. Sesam tassā eva vevacanaṃ. Sā hi yathāvuttavīmaṃsane saṅkocaṃ anāpajjitvā ussahanavasena **ussāhanā**, tulanavasena **tulanā**, upaparikkhaṇavasena **upaparikkhāti** ca vuttā. Atha vā vīmaṃsatīti **vīmaṃsā**, sā padapadatthavicāraṇā paññā. **Ussāhanāti** vīriyena upatthambhitā dhammassa dhāraṇaparicayasādhikā paññā. **Tulanāti** padena padantaram, desanāya vā desanantaram tulayitvā saṃsanditvā gahaṇapaññā. **Upaparikkhāti** mahāpadese otāretvā pāḷiyā pāḷiatthassa ca upaparikkhaṇapaññā. Attahitaṃ parahitañca ākaṅkhanthehi suyyatīti sutam, kālavacanicchāya abhāvato, yathā duddhanti. Kiṃ pana tanti? Adhikāro sāmattiyato vā pariyattidhammoti viññāyati. Atha vā savanaṃ sutam, sotadvārānusāreṇa pariyattidhammassa upadhāraṇanti attho. Sutena hetunā nibbattā **sutamayī**. Pakāreṇa jānātīti **paññā**. Yā vīmaṃsā, ayaṃ sutamayī paññāti paccekampi yojetabbaṃ. **Tathāti** yathā sutamayī paññā vīmaṃsādi-pariyāyavatī vīmaṃsādivibhāgavatī ca, tathā **cintāmayī** cāti attho. Yathā vā sutamayī oramattikā anavaṭṭhitā ca, evaṃ cintāmayī cāti dasseti.

Sutena nissayenāti sutena pariyattidhammena pariyattidhammassavanena vā upanissayena itthambhūtalakkhaṇe karaṇavacanaṃ, yathāvuttaṃ sutam upanissāyati attho. **Vīmaṃsāti**ādīsū “idaṃ sīlam, ayaṃ samādhi, ime rūpārūpadhammā, ime pañcakkhandhā”ti tesam tesam dhammānaṃ sabhāvavīmaṃsanabhūtā paññā **vīmaṃsā**. Tesamyeva dhammānaṃ vacanattham muñcivā sabhāvasarasalakkhaṇassa tulayitvā viya gahaṇapaññā **tulanā**. Tesamyeva dhammānaṃ salakkhaṇam avijahitvā aniccatādiruppanasappaccayādiākāre ca takketvā vitakketvā ca upaparikkhaṇapaññā **upaparikkhā**, tathā upaparikkhite dhamme saviggāhe viya upaṭṭhahante evameteḥi nijjhānakkhame katvā cittaṇa anu anu pekkhaṇā **manasānupekkhaṇā**. Ettha ca yathā sutamayī paññā yathāsutassa dhammassa dhāraṇaparicayavasena pavattanato ussāhajātā “ussāhanā”ti vattabbaṃ arahati, na evaṃ cintāmayīti idha “ussāhanā”ti padaṃ na vuttaṃ. Cintanaṃ cintā, nijjhānanti attho. Sesam vuttanayameva.

Imāhi dvīhi paññāhīti yathāvuttāhi dvīhi paññāhi kāraṇabhūtāhi. Sutacintāmayaññesu hi patitṭhito vipassanaṃ ārabhatīti. “Imāsu dvīsū paññāsū”tipi paṭhanti. “Tehi jātāsū uppanāsū”ti vā vacanaseso yojetabbo. **Manasikārasampayuttassāti** rūpārūpapariggahādīmanasikāre yuttappayuttassa. **Yaṃ ñāṇam uppajjatīti** vuttanayena manasikārapayogena diṭṭhivisuddhikāṅkavitarāṇavisuddhimaggāmaggaññadassanavisuddhipaṭipadāññadassanavisuddhīnaṃ sampa ādanena vipassanaṃ ussukkantassa yaṃ ñāṇadassanavisuddhisāṅkhātāṃ ariyamaggaññam uppajjati, ayaṃ **bhāvanāmayī paññāti** sambandho. Taṃ pana dassanaṃ bhāvanāti duvidhanti āha – “**dassanabhūmiyaṃ vā bhāvanābhūmiyaṃ vā**”ti. Yadi dassananti vuccati, kathaṃ tattha paññā bhāvanāmayīti? Bhāvanāmayameva hi taṃ ñāṇam, paṭhamam nibbānadassanato pana “dassana”nti vuttanti saphalo paṭhamamaggo dassanabhūmi. Sesā sekkhāsekkhadhammā bhāvanābhūmi.

8. Idāni imā tisso paññā pariyāyantarena dassetum “**paratoghosa**”tiādi vuttam. Tattha **paratoti** na attato, aññato satthuto sāvakato vāti attho. **Ghosa**ti tesam desanāghosato, desanāpaccayāti attho. Atha vā parato ghoso etissāti **paratoghosa**, yā paññā, sā sutamayīti yojetabbaṃ. **Paccattasamuṭṭhitāti** paccattam tassa tassa attani sambhūtā. **Yonisomanasikārāti** tesam tesam dhammānaṃ sabhāvapariggaṇhanādinā yathāvuttena upāyena pavattamanasikārā. **Parato ca ghosenāti** paratoghosena hetubhūtena. Sesam vuttanayameva.

Idāni yadattham imā paññā uddhaṭā, tameva veneyyapuggalavibhāgaṃ yojetvā dassetum “**yassa**”tiādi vuttam. Tattha **imā dveti** gaṇanavasena vatvā puna tā **sutamayī cintāmayī cāti** sarūpato dasseti. **Ayam ugghaṭitaññūti** ayam sutamayacintāmayaññehi āsayapayogapabodhassa nipphāditattā uddesamatteneva jānanato “ugghaṭitaññū”ti vuccati. **Ayam vipañcitaññūti** cintāmayaññehena āsayassa aparikkhatattā uddesaniddesehi jānanato vipañcitaññū. **Ayam neyyoti** sutamayaññassāpi abhāvato nīravasesam vitthāradesanāya netabbato neyyo.

9. Evaṃ desanāpaṭipadāññāvibhāgehi desanābhājanam veneyyattayam vibhajitvā idāni tattha pavattitāya bhagavato dhammadesanāya desanāhāram niddhāretvā yojetum “**sāyam dhammadesanā**”tiādi āradham.

Tattha **sāyanti** sā ayam. Yā pubbe “dhammam vo, bhikkhave, desessāmī”tiādinā (netti. 5) paṭiniddesavārassa ādito desanāhārassa visayabhāvena nikkhittā pāli, tamevettha desanāhāram niyojetum “sāyam dhammadesanā”ti paccāmasati. **Kim desayatīti** kathetukamyatāvasena desanāya piṇḍattham pucchitvā tam gaṇanāya paricchinditvā sāmāññato dasseti “**cattāri saccāni**”ti. Saccavinimuttā hi bhagavato desanā natthīti. Tassā ca cattāri saccāni piṇḍattho. Pavattipavattakanivattitadupāyavimuttassa neyyassa abhāvato cattāri aviparītabhāvena saccānīti daṭṭhabbaṃ. Tāni “**dukkham samudayam nirodham magga**”nti sarūpato dasseti.

Tattha anekupaddavādhiṭṭhānabhāvena kucchitattā bālanaparikkappitadhuvasubhasukhattabhāvavirahena tucchattā ca **dukkham**. Avasesapaccayasamavāye dukkhassa uppattikāraṇattā **samudayo**. Sabbagatisuññattā natthi ettha saṃsāracārasaṅkhāto dukkharodho, etasmiṃ vā adhigate saṃsāracārasaṅkhātassa dukkharodhassa abhāvotipi **nirodho**, anuppādanīrodhapaccayattā vā. Mārento gacchati, nibbānatthikehi maggiyatīti vā **maggo**. Tattha samudayena assādo, dukkhena ādīnavo, magganīrodhehi nissaraṇam. Evaṃ yasmiṃ sutte cattāri saccāni sarūpato āgatāni, tattha yathārutavasena. Yattha pana sutte cattāri saccāni sarūpato na āgatāni, tattha atthato cattāri saccāni uddharitvā tesam vasena assādādayo niddhāretabbā. Yattha ca assādādayo sarūpato āgatā, tattha vattabbameva natthi. Yattha pana na āgatā, tattha atthato uddharitvā tesam vasena cattāri saccāni niddhāretabbāni. Idha pana assādādayo udāharaṇavasena sarūpato dassitāti tehi saccāni niddhāretum “**ādīnavo cā**”tiādi vuttam.

Tattha “saṃkhittena pañcupādānakkhandhā dukkhā”ti (dī. ni. 2.387; ma. ni. 1.120; 3.373; vibha. 202) vacanato taṇhāvajjā tebhūmakadhammā dukkhasaccaṃ, te ca aniccādisabhāvattā ādīnavo, phalañca desanāya sādhetabbaṃ. Tattha yaṃ lokiyam, tam sandhāya vuttam “**phalañca dukkha**”nti. Assādoti taṇhāvīpallāsānampi icchitattā te sandhāya “**assādo samudayo**”ti vuttam. Saha vipassanāya ariyamaggo desanā ca desanāphalādhiḡamassa upāyoti katvā “**upāyo āṇatti ca maggo**”ti vuttam. Nissaraṇapade cāpi ariyamaggo niddhāretabbo, na cāyam saccavibhāgo ākuloti daṭṭhabbo. Yathā hi **saccavibhaṅge** (vibha. 208) “taṇhā avasiṭṭhā kilesā avasiṭṭhā akusalā dhammā sāsavāni kusalamūlāni sāsavā ca kusalā dhammā samudayasaccabhāvena vibhattā”ti tasmim tasmim naye tamtamavasīṭṭhā tebhūmakadhammā dukkhasaccabhāvena vibhattā, evamidhāpi daṭṭhabbanti. **Imāni cattāri saccānīti** nigamaṇam. **Idam dhammacakkanti** yāyam bhagavato catusaccavasena sāmukkaṃsīkā dhammadesanā, idam dhammacakkaṃ.

Idāni tassā dhammadesanāya dhammacakkabhāvaṃ **saccavibhaṅgasuttavasena** (ma. ni. 3.371

ādayo) dassetuṃ “**yathāha bhagavā**”tiādi vuttaṃ. Tattha **idaṃ dukkhanti** idaṃ jātiādivibhāgaṃ saṅkhepato pañcupādānakkhandhasaṅgahaṃ taṇhāvajjaṃ tebhūmakadhammajātaṃ dukkhassa adhiṭṭhānabhāvena dukkhadukkhādibhāvena ca dukkhaṃ ariyasaccanti attho. **Meti** bhagavā attānaṃ niddisati. **Bārāṇasiyanti** bārāṇasīnāmakassa nagarassa avidūre. Paccekabuddhaisīnaṃ ākāso otaraṇaṭṭhānatāya **isipatanam**. Migānaṃ tattha abhayassa dinnattā **migadāyanti** ca laddhanāme assame. Uttarati atikkamati, abhibhavatīti vā uttaraṃ, natthi etassa uttaranti **anuttaram**. Anatisayaṃ appaṭibhāgaṃ vā. Kiñcāpi bhagavato dhammadesanā anekāsu devamanussaparīsāsu anekasatakkhattuṃ tesam ariyasaccappaṭivedhasampādanavasena pavattitā, tathāpi sabbapaṭhamam aññāsikoṇḍaññappamukhāya aṭṭhārasaparimāṇāya brahmakoṭṭiyā catusaccappaṭivedhavibhāvanīyā dhammadesanā, tassā sātisayā dhammacakkasamaññāti “**dhammacakkaṃ pavattita**”nti vuttaṃ.

Tattha satipaṭṭhānādiddhammo eva pavattanaṭṭhena cakkanti **dhammacakkaṃ**, cakkanti vā aññā. Dhammato anapetattā dhammañca taṃ cakkañcāti **dhammacakkaṃ**. Dhammena ñāyena cakkantīpi **dhammacakkaṃ**. Yathāha – “dhammañca pavatteti cakkañcāti dhammacakkaṃ, cakkañca pavatteti dhammañcāti dhammacakkaṃ, dhammena pavattetīti dhammacakka”ntiādi (paṭi. ma. 2.41-42). **Appaṭivattiyanti** dhammissarassa bhagavato sammāsambuddhabhāvato dhammacakkassa ca anuttarabhāvato appaṭisedhanīyaṃ. Kena pana appaṭivattiyanti āha “**samaṇena vā**”tiādi. Tattha **samaṇenāti** pabbajjaṃ upagatena. **Brāhmaṇenāti** jātibrahmaṇena. Paramatthasamaṇabrāhmaṇānañhi paṭilomanacittāmyeva natthi. **Devenāti** kāmāvacaradevena. **Kenacīti** yena kenaci avasiṭṭhapārisajjena. Ettāvata aṭṭhannampi parisānaṃ anavasesapariyādānaṃ daṭṭhabbaṃ. **Lokasminti** sattaloke.

Tatthāti tissaṃ catusaccadhammadesanāyaṃ. **Aparimāṇā padā, aparimāṇā akkharāti** uppaṭipāṭivacanaṃ yebhuyyena padasaṅgahitāni akkharānīti dassanattamaṃ. Padā akkharā byañjanāti līngavipallāso katoti daṭṭhabbaṃ. **Atthassāti** catusaccasaṅkhātassa atthassa. **Saṅkāsanāti** saṅkāsitabbākāro. Esa nayo sesesupi. Atthassāti ca sambandhe sāmivacanaṃ. **Itipidanti itīti** pakārattho, **pi-saddo** sampiṇḍanattho, imināpi imināpi pakārena idaṃ dukkhaṃ ariyasaccaṃ veditabbanti attho. Tena jātiādivhedena yathāvuttassa dukkhasaccassa anekabhedataṃ taṃdīpakānaṃ akkharapadādīnaṃ vuttappakāraṃ aparimāṇatañca samattheti.

Ayaṃ dukkhasamudayoti ayaṃ kāmataṇhādibhedā taṇhāvaṭṭassa mūlabhūtā yathāvuttassa dukkhassa nibbattihetubhāvato dukkhasamudayo. **Ayaṃ dukkhanirodhoti** ayaṃ sabbasaṅkhatanissaṭṭā asaṅkhatadhātu yathāvuttassa dukkhassa anuppādanirodhapaccayattā dukkhanirodho. **Ayaṃ dukkhanirodhagāminī paṭipadāti** ayaṃ sammādiṭṭhiādiatṭhaṅgasamūho dukkhanirodhasaṅkhātamaṃ nibbānaṃ gacchati ārammaṇavasena tadabhimukhībhūtattā paṭipadā ca hoti dukkhanirodhappattiyāti dukkhanirodhagāminī paṭipadā. **Itipidanti** padassa pana samudayasacce aṭṭhasatataṇhāvicaritehi, nirodhasacce madanimmadanādiṭṭhāyehi, maggasacce sattattiṃsabodhipakkhiyadhammehi attho vibhajitvā veditabbo. Sesam vuttanayameva.

Evam “dvādasā padāni sutta”nti gāthāya sakalassa sāsanaṃ channaṃ atthapadānaṃ channañca byañjanapadānaṃ vasena yā dvādasapadā vuttā, tameva “dhammaṃ vo, bhikkhave, desessāmī”tiādinā desanāhārassa visayadassanavasena **chachakkapariyāyaṃ** (ma. ni. 3.420 ādayo) ekadesena uddisitvā **dhammacakkappavattanasuttana** (saṃ. ni. 5.1081; mahāva. 13; paṭi. ma. 2.30) tadatthassa saṅgahitabhāvadassanamukhena sabbassāpi bhagavato vacanassa catusaccadesanābhāvaṃ tadatthassa ca catusaccabhāvaṃ vibhāvento “idaṃ dukkhanti me, bhikkhave, bārāṇasiya”ntiādinā **saccavibhaṅgasuttaṃ** (ma. ni. 3.371 ādayo) uddesato dassetvā “tattha aparimāṇā padā”tiādinā byañjanatthapadāni vibhajanto dvādasapadabhāvaṃ dīpetvā idāni tesam aññamaññavisayivisayabhāvena sambandhabhāvaṃ dassetuṃ “**tattha bhagavā akkharēhi saṅkāsetī**”tiādi vuttaṃ.

Tattha padāvayavaggahaṇamukhena padaggahaṇam, gahite ca pade padatthāvabodho gahitapubbasaṅketassa hoti. Tattha ca padāvayavaggahaṇena viya padaggahaṇassa, padatthāvayavaggahaṇenāpi padatthaggahaṇassa visesādhānaṃ jāyatīti āha – “**akkharēhi saṅkāsetī**”ti.

Yasmā pana akkharehi samkhittena dīpiyamāno attho padapariyosāne vākyassa apariyositattā padeneva pakāsito dīpito hoti, tasmā “**padehi pakāseti**”ti vuttaṃ. Vākyapariyosāne pana so attho vivarito vivaṭo kato hotīti vuttaṃ “**byañjanehi vivarati**”ti. Yasmā ca pakārehi vākyabhede kate tadattho vibhatto nāma hoti, tasmā “**ākārehi vibhajati**”ti vuttaṃ. Tathā vākyāvayavānaṃ paccekam nibbacaṇavibhāge kate so attho pakāṭo hotīti vuttaṃ “**nirutthi uttānikaroti**”ti. Katanibbacanehi vākyāvayavehi vitthāravasena niravasesato desitehi veneyyānaṃ cittaparitosanaṃ buddhinisānañca kataṃ hotīti āha – “**niddesehi paññapeti**”ti. Ettha ca akkharehi eva saṅkāsetīti avadhāraṇaṃ akatvā akkharehi saṅkāsetiyevāti evaṃ avadhāraṇaṃ daṭṭhabbam. Evañhi sati atthapadānaṃ nānāvākyavisayatāpi siddhā hoti. Tena ekānusandhike sutte chaḷeva atthapadāni, nānānusandhike pana anusandhimhi anusandhimhi cha cha atthapadāni niddhāretabbāni.

“**Akkharehi ca padehi ca ugghaṭeti**”tiādīnā byañjanapadānaṃ kiccaśādhaṇaṃ dasseti. Veneyyattayavinayameva hi tesam byāpāro. Aṭṭhānabhāvato pana saccappaṭivedhassa padaparamo na idha vutto. Neyyaggahaṇeneva vā tassāpi idha gahaṇaṃ sekkhaggahaṇena viya kalyāṇaputhujjanassāti daṭṭhabbam. Akkharehītiādīsu karaṇasādhanā karaṇavacanaṃ, na hetumhi. Akkharādīni hi ugghaṭanādiatthāni, na ugghaṭanādiakkharādiattham. Yadatthā ca kiriyā so hetu, yathā “**annavasati**”ti. Ugghaṭeti sōtāvadhānaṃ katvā samāhitacittānaṃ veneyyānaṃ saṅkāsanavasena akkharehi visesaṃ ādahanto yathā padapariyosāne āsayappaṭibodho hoti, tathā yathādhippetaṃ attham saṅkhepena katheti uddisati attho. **Vipañcayati**ti yathāuddiṭṭham attham niddisati. **Vitthāreteti**ti vitthāraṃ karoti, vitthāraṃ katvā ācikkhati vā, paṭiniddisati attho. Yasmā cettha ugghaṭeti uddisanaṃ adhippetam. Uddeso ca desanāya ādi, tasmā vuttaṃ – “**ugghaṭanā ādi**”ti. Tathā vipañcanaṃ niddisanaṃ, vittharaṇaṃ paṭiniddisanaṃ, niddesapaṭiniddesā ca desanāya majjhapariyosānāti. Tena vuttaṃ – “**vipañcanā majjhe, vitthāraṇā pariyoṣāna**”nti.

Evam “**akkharehi saṅkāseti**”tiādīnā channaṃ byañjanapadānaṃ byāpāraṃ dassetvā idāni atthapadānaṃ byāpāraṃ dassetuṃ “**soyam dhammavinayo**”tiādi vuttaṃ. Tattha sīlādiddhammo eva pariyaṭṭhatthabhūto veneyyavinayanato **dhammavinayo**. **Ugghaṭiyantoti** uddisiamāno. **Tenāti** ugghaṭitaññūvinayanena. **Vipañciyantoti** niddisiamāno. **Vitthāriyantoti** paṭiniddisiamāno.

10. Ettāvata “**dhammaṃ vo, bhikkhave, desessāmi**”ti uddiṭṭhāya pāḷiyā tividhakalyāṇataṃ dassetvā idāni atthabyañjanasampattiṃ dassetuṃ “**cha padāni attho**”tiādi vuttaṃ. Tam suviññeyyam. “**Tenāha bhagavā**”tiādīnā desanāhārassa visayabhāvena uddiṭṭham pāḷiṃ nigamanavasena dasseti. **Lokuttarantiādi** “**kevalaparipuṇṇam parisuddha**”nti padānaṃ atthavivaraṇaṃ. Tattha **upaṭṭhitam sabbavisesānanti** sabbesaṃ uttarimanussadhammasaṅkhātānaṃ visesaṃ adhisīlasikkhādivisesānaṃ vā upatiṭṭhanatthānaṃ. “**Idam nesaṃ padakkanta**”ntiādīnaṃ viya etassa saddasiddhi veditabbā. “**Idam vuccati tathāgatapadam itipi**”tiādīsu idam sikkhattayaśaṅgahaṃ sāsanabrahmacariyaṃ tathāgatagandhahatthino paṭipattidesanāgamanehi kilesagahaṇaṃ ottharivā gatamaggotipi. Tena gocarabhāvanāsevanāhi **nisevitaṃ** bhajitantipi. Tassa mahāvajiraññānasabbaññūtaññānadantehi **ārañjitaṃ** tebhūmakadhammānaṃ ārañjanaṭṭhānantipi vuccati attho. **Ato cetanti** yato tathāgatapadādibhāvena vuccati, ato aneneva kāraṇena brahmuno sabbasattutamassa bhagavato, brahmaṃ vā sabbasettham cariyanti **paññāyati** yāvadeva manussehi suppakāsītattā yathāvuttappakārehi ñāyati. **Tenāha bhagavāti** yathāvuttattham pāḷiṃ nigamanavasena dasseti.

Anupādāparinibbānatthāya bhagavato desanāya yāvadeva ariyamaggasampāpanattho desanāhāroti dassetuṃ “**kesam ayam dhammadesanā**”ti pucchitvā “**yogīna**”nti āha. Catusaccakammaṭṭhānabhāvanāya yuttappayuttāti yogino. Te hi imaṃ desanāhāraṃ payojenti. Idam vacanaṃ desanāhāravibhaṅgassa yathānusandhinā sammā ṭhapitabhāvaṃ dassetuṃ pakaraṇaṃ saṅgāyantehi ṭhapitanti daṭṭhabbam. Tathā hi vuttaṃ “**tenāha āyasmā mahākaccāyano**”ti. **Niyuttoti** pāḷito assādādi padatthe niddhāretvā yojitoti attho.

Desanāhāravibhaṅgavaṇṇanā niṭṭhitā.

2. Vicayahāravibhaṅgavaṇṇanā

11. Tattha katamo vicayo hārotiādi vicayahāravibhaṅgo. Tatthāyaṃ apubbapadavaṇṇanā – **kiṃ vicinatīti** ettha “vicinatī”ti etena vicayasaddassa kattuniddesataṃ dasseti. **Kinti** panatthassa hārassa visayo pucchitoti taṃ tassa visayaṃ dassetuṃ “**padam vicinatī**”tiādi vuttaṃ. Tattha **padam vicinatīti** ādito paṭṭhāya yāva nigamanā suttassa sabbam padam vicinati. Ayañca vicayo duvidho saddato atthato ca. Tesu “idaṃ nāmapadam, idaṃ ākhyātapadam, idaṃ upasaggapadam, idaṃ nipātapadam, idaṃ itthilingam, idaṃ purisalingam, idaṃ napumsakalingam, idaṃ atitakālam, idaṃ anāgatakālam, idaṃ vattamānakālam, idaṃ kattusādhanam, idaṃ karaṇasādhanam, idaṃ kammāsādhanam, idaṃ adhikaraṇasādhanam, idaṃ paccattavacanam, idaṃ upayogavacanam, yāva idaṃ bhummavacanam, idaṃ ekavacanam, idaṃ anekavacana”nti evamādivibhāgavacanam, ayaṃ saddato padavicayo. So paṇāyam padavicayo aviparītasabhāvaniruttisallakkhaṇeneva sampajjati dāṭṭhabbam. Atthato pana vicayo tena tena padena vattabbaatthasamvaṇṇanā. Sace pana padam pucchādivasena pavattaṃ, tassa tadatthassa ca pucchādibhāvo vicetabboti imamattham dassento “**pañham vicinatī**”tiādimāha.

Yasmā ca sabbo desanāhāro vicayahārassa visayo suttassa vicayoti katvā, tasmā vuttaṃ – “**assadam vicinatī**”tiādi. Yasmā pana **anugīti**ti ettha anurūpā gīti anugīti ayampi attho icchito, tasmā viciyamānassa suttapadassa anurūpato suttantarapadānipi atthuddhārasena vā paduddhārasena vā ānetvā vicetabbanīti dassento “**sabbe nava suttante vicinatī**”ti āha. **Nava suttanteti** suttageyyādike nava sutte, yathāsambhavatoti adhippāyo. Ayaṃ vicayahārassa padatthaniddeso.

Evam niddesavāre vicayahāro saṅkhepato niddiṭṭhoti taṃ vibhāgena niddisitvā paṇiniddesavasena vibhajanto yasmā padavicayo suttassa anupadam pavattetabbatāya atibhāriko na sukaro cāti taṃ anāmasitvā pañhavissajjanavicaye tāva dassento “**yathā kiṃ bhave**”tiādimāha. Tattha **yathā kiṃ bhaveti** yena pakārena so vicayo pavattetabbo, taṃ pakārajātam kiṃ bhave, kīdisam bhaveyyāti attho. “Yathā kiṃ bhaveyyā”tipi pāṭho. Puna **yathāti** nipātamattaṃ. **Āyasmāti** piyavacanam **ajitoti** bāvarībrāhmaṇassa paricārakabhūtānam soḷasannaṃ aññataro. **Pārāyaneti** pāram vuccati nibbānam, tassa adhigamūpāyadesanattā kiñcāpi sabbam bhagavato vacanam “pārāyana”nti vattabbaṃ arahati, saṅgītikārehi pana vatthugāthānugītigāthādīhi saddhim **ajitasuttādīnam** (su. ni. 1038 ādayo; cūḷani. ajitamānavapucchā 57 ādayo, ajitamānavapucchāniddesa 1 ādayo) soḷasannaṃ suttānam idaṃ nāmaṃ katanti tesaññeva pārāyanasamaññāti āha “pārāyane”ti. Keci “pārāyaniko”ti paṭhanti. Te kira tāpasapabbajjūpagamanato pubbe pārāyanam adhiyantā vicariṃsu. Tasmā ayampi pārāyanam vatteti pārāyanikoti vutto. **Pucchati**ti kasmā vuttaṃ, nanu pucchānibbattatā atītāti? Saccametam, pucchānākāram pana buddhiyam viparivattamānam katvā evamāha.

Pucchā ca nāmesā adiṭṭhajotanāpucchā diṭṭhasamsandanā vimaticchedanā anumati pucchā kathetukamyatāpucchā ekaṃsabyākaraṇīyā vibhajjabyākaraṇīyā paṭipucchābyākaraṇīyā ṭhapanīyā dhammādiṭṭhānā sattādiṭṭhānāti anekavidhā. Tasmā “kimayaṃ pucchā adiṭṭhajotanā”tiādinā yathāsambhavaṃ pucchā vicetabbā. Yathā cettha pucchāvibhāgo, evam vissajjanavibhāgopi vissajjanavicaye yathāsambhavaṃ vattabbo. Pucchāsabhāgena hi vissajjananti. Idha pana vimaticchedanam sattādiṭṭhānam puccham udāharitvā tattha vicayanākāram dassetuṃ “**kenassu nivuto loko**”tiādimāha.

Tattha **kenāti** kattari karaṇavacanam. **Sūti** nipātamattaṃ, **sūti** vā saṃsaye nipāto, tenassa pañhassa vimaticchedanapucchābhāvam dasseti. **Nivutoti** paṭicchādito. **Lokoti** sattaḷoko. **Iccāyasmā ajitoti** saṅgītikāravacanam. **Nappakāsati**ti na paññāyati. **Kissābhilepanam brūsīti** kiṃ assa lokassa abhilepanam vadasi. “Kiṃ svābhilepana”ntipi pāṭho, tassa kiṃ su abhilepananti padavibhāgo.

Padānīti pajjati etehi atthoti padāni, vākyāni. **Pucchitānīti** pucchābhāvena vuttānīti attho. **Eko pañhoti** yadipi cattāri padāni pucchānavasena vuttāni, ñātum icchito pana attho eko evāti “eko pañho”ti vuttaṃ. Tattha kāraṇamāha “**ekavattupariggahā**”ti. Idaṃ vuttaṃ hoti – kiñcāpi

nivāraṇaappakāsanaabhilepanamahābhayasaṅkhātā pucchāya gahitā cattāro ete atthā, te panekam lokam patiguṇabhūtā, loko padhānabhāvena gahitoti tabbasena ekovāyaṃ paṇhoti. Tenevāha “**lokādhiṭṭhāna**”ntiādi. Ko pana so lokoti? Aha “**loko tividho**”tiādi.

Tattha rāgādikilesabahulatāya kāmāvacarasattā **kilesaloko**. Jhānābhiññāparibuddhiyā rūpāvacarasattā **bhavaloko**. Āneñjasamādhībahulatāya visadindriyattā arūpāvacarasattā **indriyaloko**. Atha vā kilissanam kilesa, vipākadukkanti attho. Tasmā dukkhabahulatāya apāyesu sattā **kilesaloko**. Tadaññe sattā sampattibhavabhāvato **bhavaloko**. Tattha ye vimuttiparipācākehi indriyehi samannāgatā sattā, so **indriyalokoti** veditabbaṃ. Pariyāpannadhamavasena lokasamaññāti ariyapuggalā idha na saṅgayhanti.

Avijjāya nivuto lokoti caturaṅgasamannāgatena andhakārena viya rathaghaṭṭādidhammasabhāvappaṭicchādānalakkhaṇāya avijjāya nivuto paṭicchādito loko. **Vivicchāti** vicikicchāhetu. “Vivicchā macchariya”nti saṅgahe vuttaṃ. **Pamādāti** pamādāhetu. **Jappābhilepananti** jappā taṇhā assa lokassa makkaṭālepo viya makkaṭassa abhilepanam silesoti brūmi. **Dukkanti** jātiādikaṃ vaṭṭadukkanti ayam padattho. Sesam pāḷiyā eva viññāyati. **Imāni cattāri padāni** pucchāgāthāyaṃ vuttāni “**imehi**”ti vissajjanagāthāyaṃ vuttehi imehi catūhi padēhi vissajjitāni. Kathanti āha “**paṭhama**”ntiādiṃ. Tena yathākkamaṃ pucchāvissajjanāni veditabbānīti dasseti.

Idāni taṃ yathākkamaṃ puccham vissajjanañca sarūpato dassetuṃ gāthāya ca attham vivarituṃ “**kenassū**”tiādi vuttaṃ. Tattha “nīvaraṇehi”ti padena vuttamevattham pākaṭam katvā dassetuṃ “**avijjānīvaraṇā hi sabbe sattā**”tiādi vuttaṃ. Ettha ca “**yathāhā**”tiādinā suttantaradassanena imasmiṃ paṇhavissajjanavicaye anugīticayaṃ dasseti daṭṭhabbaṃ. Tattha **pariyāyatoti** kāraṇato. Nīvaraṇasaṅkhātānaṃ kāmācchāndādīnampi kāraṇabhāvato paṭicchādānabhāvato ca ekamyeva nīvaraṇam vadāmi, na pana aññesaṃ nīvaraṇasabhāvānaṃ abhāvāti attho. Yathā ca avijjāya sati nīvaraṇānaṃ bhāvo, evam avijjāya asati na santi nīvaraṇānīti dassetuṃ “**sabbaso**”tiādi vuttaṃ.

Tenāti “avijjāya nivuto loko”ti padena. **Paṭhamassa padassāti** “kenassu nivuto loko”ti padassa. **Yuttāti** yojitā, anurūpāti vā attho. Etena pucchānurūpatā vissajjanassa dassitāti pubbāparavicayo vuttoti veditabbaṃ. “Yo puggalo nīvaraṇehi nivuto”tiādinā vicicchāpamādānaṃ avijjāya paccayabhāvaṃ dasseti. Nivuto eva hi nappakāsati. **Vivicchāti** vicikicchā. Tenevāha – “**vivicchā nāma vuccati vicikicchā**”ti. Tatrāyaṃ padasiddhi – yathā micchādhiṭṭhisammādiṭṭhiyo “niccam anicca”ntiādinā ekamaṃsaggāhabhāvena pavattanti, na evamayaṃ. Ayam pana anekamaṃsaggāhabhāvato “niccam nu kho aniccaṃ nu kho”tiādinā vividham viruddham vā icchati esaṭṭi vicicchāti. “**So vicikicchanto**”tiādinā appakāsanaṃ vicicchāpamādānaṃ kāraṇabhāvaṃ vivarati. **Sukke dhamme na uppādiyati** na samādāya vattati. **Nappakāsanti** te attano santāne anuppādiyamānā kusalā dhammā taṃ puggalaṃ pakāsaṃ loke abhiññātaṃ na karontīti attho. **Abhilimpanti** makkaṭālepo viya makkaṭam dārusilādīsū purisaṃ rūpādivisaye allīyāpetīti attho. **Āsattibahulassati** āsaṅgabahulassa. **Evam abhijappāti karitvāti** evam pariyaṭṭhānaṭṭhāyiniṭi iminā kāraṇena. **Tatthāti** tāya taṇhāya. **Loko abhilitto** silesena makkhito viya hotīti attho.

Bhāyati etasmāti bhayaṃ. Mahantaṃ bhayaṃ **mahabbhayaṃ**. Tenevāha – “**dukkhamassa mahabbhaya**”nti. Dukkham domanassanti dukkhameva vibhattanti sabbaṃ dukkham vibhajitvā dassetuṃ “**tisso dukkhatā**”tiādi vuttaṃ. **Odhasoti** kadāci attūpakkamamūlāya kadāci parūpakkamamūlāyatiādinā vibhāgena dukkhadukkhatāya muccanakā visesena rūpāvacarā. **Tathāti** odhaso kadāci karahacīti evam ākaḍḍhati. **Vipariṇāmadukkhatāya** muccanakā upekkhāsamāpattibahulā visesena arūpāvacarasattā. **Appābādhāti** padaṃ dukkhadukkhatāya muccanassa kāraṇavacanāṃ. **Dīghāyukāti** vipariṇāmadukkhatāya. Arūpadevā hi loke visesato dīghāyukāti. Idañca muccanamaccantikaṃ. Yasmā ca dukkhā vedanāpi saṅkhatattā aniccatādisaṅkhāradukkhasabhāvā eva, tasmā yato muccanamaccantikaṃ, taṃ anavasesapariyādānavasena saṅgaṇhitvā dassetuṃ “**saṅkhāradukkhatāya panā**”tiādimāha.

Tattha upādiyatīti upādi, vipākakkhandhā kaṭattā ca rūpaṃ. Upādissa sesaṃ upādisesaṃ, taṃ natthi etissāti anupādisesā, nibbānadhātu, tāya **anupādisesāya nibbānadhātuyā**, itthambhūtalakkhaṇe cāyaṃ karaṇaniddeso. Nibbānadhātūti ca nibbāyanamattaṃ. **Tasmāti** yasmā sakalalokabyāpinī sabbasaṅgāhīni ca saṅkhāradukkhatā, tasmā. **Lokassāti** sambandhe sāmivacanaṃ. Tena “dukkhamassā”ti padassa atthaṃ dasseti. Evamettha lokassa nīvaraṇādīni ajānantena, samayanataraparicayena vā tattha saṃsayapakkhandena ekamseneva byākātabbattā sattādhiṭṭhānā pucchā katā, sā ca ajānanassa, saṃsayassa vā nīvaraṇādivisayatāya catubbidhā. Pāḷiyaṃ pana nīvaraṇādīnaṃ loko ādhārabhāvena gāthāyaṃ vuttoti eko pañhoti dassitanti. Ayamettha pucchāvicayo. Vissajjanavicayopi adiṭṭhajotīni vissajjanā vimaticchedīni cātiādīnā pucchāvicaye vuttanayānusārena vedītabbo.

Evam ekādhāraṃ pucchāṃ dassetvā idāni anekādhāraṃ dassetuṃ “**savanti sabbadhī**”tiādi vuttaṃ. Tattha **savantīti** sandanti. **Sabbadhīti** sabbesu rūpādīsu āyatanesu. **Sotāti** taṇhādisotā. **Kiṃ nīvaraṇanti** tesāṃ kiṃ āvaraṇaṃ kā rakkhā. **Samvaram brūhīti** taṃ nesaṃ nīvaraṇasaṅkhātāṃ samvaram kathehi. **Kena sotā pidhiyareti** kena dhammena taṇhādisotā pidhiyyanti pacchijjantīti ayamettha padattho. Sesaṃ pāḷivaseneva āvi bhavissati.

Te dve pañhāti yadipi imissā gāthāya pucchāvasena pavattāya cattāri padāni cattāri vākyāni. Nātuṃ icchitassa pana atthassa duvidhattā te dve pañhā. Kasmāti ce? “**Imehi bahvādhivacanena pucchitā**”ti āha. Tatthāyaṃ saṅkhepattho – ime etāya gāthāya gahitā atthā yasmā bahūni adhikicca pavattavacanena pucchitā, tasmā te dve pañhāti. Ekato upari bahūti hi sāsānavohāro, tameva pucchāya duvidhatthavisayatāṃ vivarituṃ “**eva**”ntiādi vuttaṃ. Tassattho – yāhi nītibyasanādisaṅkhātāhi pāṇavadhādīhi eva vā duggatīhetubhūtāhi āpadāhi **samaṃ** saha, sabbathā vā ayaṃ loko āpanno ajjhotthaṭṭho. Taṃnimittehi dasahi kilesavatthūhi saṃkiliṭṭho ca, tassa taṃ āpannākāraṃ saṃkiliṭṭhākāraṇca buddhiyaṃ katvā āha – “**evam samāpannassa evam saṃkiliṭṭhassa**”ti. Vodāyati sujjhanti etenāti **vodānaṃ**, samathavipassanā. Vuṭṭhāti etena nimittato pavattato cāti **vuṭṭhānaṃ**, ariyamaggo.

Asamāhitassāti nānārammaṇesu vikkhittacittassa. **Savantīti** pavattanti. **Abhijjhātiādi** asamādhānāhetudassanaṃ. Tenevāha – “**evam asamāhitassā**”ti. “**Yathāha bhagavā**”tiādīnā idhāpi anugītivicayaṃ dasseti. Sotānaṃ savanaṃ yebhuyyena anurodhavasenevāti āha – “**savati manāpikesu rūpesū**”ti. Ettha ca cakkhādayo sotānaṃ dvārabhāvena pavattamānā upacārasena sayāṃ savantā viya vuttā. **Itti** evaṃ. **Sabbāti** sabbasmā. **Sabbathāti** sabbappakārena. **Idaṃ vodānanti** idaṃ “pariyuṭṭhānavighāta”nti vuttaṃ pariyuṭṭhānappahānaṃ vodānaṃ.

Vissajjanagāthāya **sati tesāṃ nīvaraṇanti** vipassanāsampayuttā sati kusalākusalānaṃ dhammānaṃ gatiyo samanvesamānā tesāṃ sotānaṃ nīvaraṇanti. **Sotānaṃ samvaram brūmīti** tameva satīṃ sotānaṃ samvaram brūmi. **Paññāyete pidhiyareti** rūpādīsu aniccatādiपाठिवेदhasādhikāya maggapaññāya ete sotā sabbaso pidhiyyanti, uppajjituṃ appadānavasena samucchijjantīti attho.

Nāviñchatīti abhijjhādiṃ pavattidvārabhāvena cittasantānaṃ, puggalaṃ vā nākaḍḍhati. Anusayappahānaṃ idha pidhānaṃ adhippetanti āha – “**paññāya anusayā pahiyantī**”ti. Yasmā anusayanimittaṃ pariyuṭṭhānaṃ anusayābhāve na hotīti āha “**anusayesū**”tiādi. Idāni tamevatthaṃ upamāya vibhāvento “**taṃ yathā khandhavantassā**”tiādimāha. Etthāpi sotānaṃ nīvaraṇasaṅkhātāṃ samvaram pidhānaṃca ajānantena tattha vā saṃsayitena ekamsikattā dhammādiṭṭhānā pucchā katāti idha pucchāvicayo vuttanayāneva vissajjanavicayo ca vedītabbo.

Ettha ca yena adhippāyena “kenassu nivuto loko”ti gāthāya (su. ni. 1038; cūḷani. ajitamāṇavapucchā 57, ajitamāṇavapucchāniddeśa 1; netti. 45) satipi nīvaraṇādīnaṃ catunnaṃ pucchitabbabhāve eko pañhoti vuttaṃ. Tena tāva sotānaṃyeva samvaro pidhānaṃca pucchitanti sote ekatthavasena gahetvā pucchāya ekādhiṭṭhānabhāvato eko pañhoti vattabbaṃ siyā. Sotānaṃ vā bahubhāvato bahūti yattakā sotā, tattakā pañhāti. Yena pana adhippāyena “savanti sabbadhī sotā”ti gāthāyaṃ (su. ni. 1040; cūḷani. ajitamāṇavapucchā 59, ajitamāṇavapucchāniddeśa 3; netti. 45) sote

anāmasitvā saṃvarapidhānānaṃ vasena “dve pañhā”ti vuttaṃ. Tena paṭhamagāthāyaṃ satipi nivāraṇādīnaṃ lokādhārabhāve lokānaṃ anāmasitvā nivāraṇādīnaṃ vibhāgena cattāro pañhātīpi vattabbanti ayaṃ nayo dassitoti daṭṭhabbaṃ.

Idāni yasmā pucchanto na kevalaṃ pubbe attanā racitanīyāmeneva pucchati, atha kho desanākāle vuttadhammassa anusandhiṃ gahetvāpi pucchati, tasmā tassa anusandhiṃ pucchāya vicetabbākāraṃ dassento “yāni sotānī”ti gāthāya anantaraṃ “**paññā ceva sati cā**”ti gāthamāha. Tassāyaṃ saṅkhepattho – yāyaṃ bhagavatā vuttā paññā, yā ca sati yañca tadavasesaṃ nāmarūpaṃ, etaṃ sabbampi kattha nirujjhati, etaṃ me puṭṭho pabrūhīti.

Vissajjanagāthāyaṃ panassa yasmā paññāsatiyo nāmeneva saṅgahaṃ gacchanti, tasmā tā visuṃ na vuttā. Ayañcettha saṅkhepattho – yaṃ maṃ tvam, ajita, etaṃ pañhaṃ apucchi – “katthetaṃ uparujjhatī”ti anantaragāthāyaṃ (su. nī. 1042; cūḷani. ajitamāṇavapucchā 61, ajitamāṇavapucchānidessa 5; netti. 11, 45), yattha taṃ asesam uparujjhati, taṃ te vadāmi. Tassa tassa hi viññāssa nirodhena saheva apubbaṃ acarimaṃ etthetaṃ uparujjhati, ettheva viññāssa nirodhena nirujjhati, etaṃ viññānīroddhaṃ tassa nirodho nātivattatīti vuttaṃ hotīti. **Ayaṃ pañhe anusandhiṃ pucchati**ti anantaragāthāyaṃ sotānaṃ pariyuṭṭhānānusayappahānakiccena saddhiṃ sati paññā ca vuttā, taṃ sutvā tappahāne paññāsatisu tiṭṭhantīsu tāsam sannissayena nāmarūpena bhavitabbaṃ, tathā ca sati vaṭṭatī eva. Kattha nu kho imāsaṃ sanissayānaṃ paññāsatiṇaṃ asesanirodhoti iminā adhippāyena ayaṃ pucchā katāti āha – “**ayaṃ pañhe...pe... dhātu**”nti. Tattha anusandhiyati desanā etāyāti anusandhi.

Yāya paṭipadāya anupādīsesaṃ nibbānadhātuṃ adhigacchanti, taṃ catusaccakammaṭṭhānabhāvanāsaṅkhātāṃ paṭipadaṃ saha visayena dassetaṃ “**tiṇi ca saccānī**”tiādi vuttaṃ. Tattha **saṅkhatānīti** samecca sambhūya paccayehi katānīti saṅkhatāni. **Niroddhadhammānīti** nirujjhanasabhāvāni. **Dukkhaṃ samudayo maggoti** tesam sarūpadassanaṃ. Nirodho pana kathanti āha “**nirodho asaṅkhato**”ti. So hi kenaci paccayena na saṅkhatoti **asaṅkhato**. Saha visayena pahātabbapahāyakaṃ saṅkhatānaṃ ariyasaccesu pahāyakaṃ vibhāgamukhena pahātabbavibhāgaṃ dassetaṃ “**tattha samudayo**”tiādi vuttaṃ.

Tattha **avijjāvasesāti** dassanamaggena pahīnāvasesā avijjāti attho. Ayañca sesa-saddo kāmacchando byāpādo māno uddhaccanti etthāpi yojetabbo. Yathā hi avijjā, evaṃ etepi dhammā apāyagamanīyasabhāvā paṭhamamaggena pahīyanti evāti. “Avijjāniravasesā”tipi pātho, etthāpi yathāvuttesu kāmacchandādīpadesu niravasesa-saddo yojetabbo. Sāvasesaṃhi purimamaggadvayena kāmacchandādayo pahīyanti, itarehi pana niravasesanti. **Tedhātuke imāni dasa saṃyojanānīti** ettha **tedhātuketi** saṃyojanānaṃ visayadassanaṃ. Tattha hi tāni saṃyojanavasena pavattanti.

12. Anaññātāññassāmīndriyaṃ adhiṭṭhāyāti taṃ pahāyakaṃ patvā. **Yaṃ panāti** ettha yanti hetuatthe nipāto. **Idaṃ khaye ñāṇanti** yena ñāṇena hetubhūtena “khīṇā me jāti”ti attano jātiyā khīṇabhāvaṃ jānāti, idaṃ evaṃ paccavekkhaṇassa nimittabhūtaṃ arahattaphalañānaṃ khaye ñāṇaṃ nāma. **Nāparaṃ itthattāyāti pajānāti**ti etthāpi yanti ānetabbaṃ “yaṃ nāparaṃ itthattāyāti pajānāti”ti. **Idaṃ anuppāde ñāṇanti** idhāpi pubbe vuttanayeneva arahattaphalañānavasena attho yojetabbo. **Aṭṭhasālīniyaṃ** (dha. sa. aṭṭha. cittuppādakkaṇḍa 135-142) pana “khaye ñāṇaṃ kilesakkhayakare ariyamagge ñāṇanti vuttaṃ. Anuppāde ñāṇaṃ paṭisandhivasena anuppādabhūte taṃtaṃ maggavajjhakilesānaṃ anuppādapariyosāne uppanne ariyaphale ñāṇa”nti vuttaṃ. Idha pana ubhayampi arahattaphalañānavaseneva vibhattaṃ. Tenevāha – “**imāni dve ñāṇāni aññātāvīndriya**”nti, “**ārammaṇasaṅketena dve nāmāni labbhanti**”ti ca.

Aññīndriyaṃ heṭṭhimesu tīsu phalesu, uparimesu ca tīsu maggesu uppattiyā punappunaṃ uppajjamānampi anaññātāññassāmīndriyaṃ viya paṭhamaphaluppattiyā aggaphaluppattiyā anuppādanirodhena nirujjhatīti āha – “**yañca anaññātāññassāmīndriya**”ntiādi. Etena pahātabbadhammā viya dassanabhāvanāhi aggaphaluppattiyā tadavasesaphaladhammāpi

anuppādanirodhena nirujjhanti. Ko pana vādo tebhūmakadhammānanti dasseti, ekā paññā aññātāvindriyattā. Yadi ekā, kathaṃ dvidhā vuttāti āha “**api cā**”tiādi. **Ārammaṇasaṅketenā**ti khaye anuppādeti imāya ārammaṇasamaññāya. **Sā pajānanaṭṭhena paññāti** yā pubbe sotānaṃ pidhānakkiccā vuttā paññā, sā pajānanaśabhāvena paññā. Itarā pana **yathādiṭṭhaṃ** yathāgahitaṃ ārammaṇaṃ **apilāpanaṭṭhena** ogāhanaṭṭhena **satī**ti.

13. Evaṃ “paññā ceva sati cā”ti padassa atthaṃ vivarivā idāni “nāmarūpa”nti padassa atthaṃ vivaranto “**tattha ye pañcupādānakkhandhā, idaṃ nāmarūpa**”nti āha. Nāmarūpañca vibhāgena dassento sukhaḅgahaṇatthaṃ pākāṭanāmarūpameva vibhāvetuṃ “**tattha ye**”tiādimāha. Taggahaṇeneva hi sahaḅaraṇādinā tadaññe cittacetasiḅkā rūpadhammā ca gahitā hontīti. Nāmaggahaṇena cettha khandhattayameva gahitanti “**nāmarūpaṃ viññāṇasampayutta**”nti vuttaṃ. Taṃ pana rūpaṃ sampayuttanti? Nayidaṃ sampayuttapaccayavasena vuttaṃ. Pacurajanassa pana avibhāgena gahaṇiyasabhāvaṃ sandhāya vuttanti daṭṭhabbaṃ.

Gāthāya anupādisesā nibbānadhātu pucchitāti taṃ caturiddhipādāmukhena ariyamaggādhigamena pattabbanti dassento iddhipādabhāvanāmūlabhūtāni indriyāni satipaññāhi niddhāretuṃ “**tattha sati ca paññā ca cattāri indriyāni**”ti āha. Kusalākusalānaṃ dhammānaṃ gatiyo samanvesamānā sati sijaṅhanti ekantena samādhim nippādeti. Satiggahaṇena cettha pariyaṭṭhānappahānaṃ idhādhippetanti āha – “**sati dve indriyāni, satindriyañca samādhindriyañcā**”ti. Tathā anusayasamuggahātaviddhāyini paññā sijaṅhamānā na vinā catubbidhasammappadhānavīriyaṃ sijaṅhatīti vuttaṃ – “**paññā dve indriyāni paññindriyañca vīriyindriyañcā**”ti.

Yā imesu catūsu indriyesūti imesu satīādīsu catūsu indriyesu nissayapaccayatāya adhiṭṭhānabhūtesu taṃsahajātā eva yā saddahanā. “Imehi catūhi indriyehi”tipi pāḅi, tassā imehi catūhi indriyehi sampayuttāti vacanaseso, ārammaṇe abhippasādalakkhaṇā saddhā kattukāmatāsabhāvassa chandassa viśesapaccayo hotīti āha – “**yā saddhādhipeyyā cittekaggatā, ayaṃ chandasamādhī**”ti. **Samāhite citteti** vipassanāsamādhinā samāhite citte. **Idaṃ pahānanti** vikkhambhanappahānasādhako samādhī pahānanti vutto pajahati etenāti katvā. “Padhāna”ntipi pāṭho, aggoti attho. Tathā hi “samādhī ekodī”ti vuccati.

“**Assāsapassāsā**”tiādinā kāyavacīcittasaṅkhārasīsenā taṃsamuṭṭhāpakā vīriyasaṅkhārāva gahitā. Te hi yāva bhāvanānippatti tāva ekarasena saraṇato saṅkappetabbato ca **sarasaṅkappā**”ti vuttā “evaṃ me bhāvanā hotū”ti yathā icchitā, tathā pavattiyā hetubhāvato. **Tadubhayanti** chandasamādhisaṅkhātāñca padhānasaṅkhārasaṅkhātāñca vīriyanti taṃ ubhayaṃ. Ubhayaṃmeva hi upacāravasena aññaṃ viya katvā “**chandasamādhīpadhānasaṅkhārasamannāgataṃ iddhipāda**”nti vuttaṃ. Abhinnaṃpi hi upacāravasena bhinnaṃ viya katvā voharanti, yathā “silāputtakassa sarīra”nti.

Tattha ijaṅhatīti iddhi, samijaṅhati nippajaṅhatīti attho. Ijaṅhanti vā tāya sattā iddhā vuddhā ukkaṃsagatā hontīti iddhi, pajjati etenāti pādo, paṭhamena atthena iddhi eva pādo **iddhipādo**, iddhikoṭṭhāsoti attho. Dutiyena atthena iddhiyā pādo patiṭṭhā adhiḅgamūpāyoti **iddhipādo**. Tena hi uparūparivisesasaṅkhātāṃ iddhim pajjanti pāpuṇanti. **Vivekanissitanti** tadaṅgavivekanissitaṃ samucchedaḅvivekanissitaṃ nissaraṇavivekanissitañca iddhipādaṃ bhāvetīti attho. Tathā hi ayaṃ iddhipādabhāvanānuyutto yogī vipassanākkhaṇe kiccato tadaṅgavivekanissitaṃ aijaṅhāsayato nissaraṇavivekanissitaṃ. Maggakkhaṇe pana kiccato samucchedaḅvivekanissitaṃ ārammaṇato nissaraṇavivekanissitaṃ iddhipādaṃ bhāvetīti. Esa nayo **virāganissitanti**ādīsu.

Vivekattā eva hi virāgādayo, kevalāñcettha vossaggo duvidho pariccāgavossaggo ca pakkhandanavossaggo cāti. Tattha pariccāgavossaggo vipassanākkhaṇe tadaṅgavasena, maggakkhaṇe samucchedaḅvasena kilesappahānaṃ. Pakkhandanavossaggo vipassanākkhaṇe tanninnabhāvena, maggakkhaṇe ārammaṇakaraṇavasena nibbānapakkhandanaṃ. Tadubhayampi imasmiṃ lokiyalokuttaramissake atthasaṃvaṇṇanānaye yujjati. Tathā hi ayaṃ paṭhamiddhipādo yathāvuttena

pakārena kilese pariccajati nibbānañca pakkhandati. **Vossaggapariṇāminti** iminā pana vacanena vossaggatthaṃ pariṇamantaṃ pariṇatañca paripaccantaṃ paripakkañcāti attho. Ayañhi iddhipādabhāvanānuyutto yogī yathā paṭhamo iddhipādo kilesapariccāgavossaggatthaṃ nibbānapakkhandanavossaggatthañca paripaccati, yathā ca paripakko hoti, tathā naṃ bhāvetīti. Sesiddhipādesupi eseva nayo. Ayaṃ pana viseso – yathā chandaṃ jeṭṭhakaṃ katvā pavattito samādhi **chandasamādhi**. Evaṃ vīriyaṃ cittaṃ vīmaṃsaṃ jeṭṭhakaṃ katvā pavattito samādhi **vīmaṃsāsamādhi**.

14. Na kevalaṃ catutthaiddhipādo eva samādhiñāṇamūlako, atha kho sabbopīti dassetuṃ “**sabbo samādhi ñāṇamūlako ñāṇapubbaṅgamo ñāṇānuparivattī**”ti vuttaṃ. Yadi evaṃ kasmā so eva vīmaṃsāsamādhi vuttoti? Vīmaṃsaṃ jeṭṭhakaṃ katvā pavattitattāti vuttovāyamattho. Tattha pubbabhāgapaññāya **ñāṇamūlako**. Adhigamapaññāya **ñāṇapubbaṅgamo**. Paccavekkhaṇapaññāya **ñāṇānuparivattī**. Atha vā pubbabhāgapaññāya **ñāṇamūlako**. Upacārapaññāya **ñāṇapubbaṅgamo**. Appanāpaññāya **ñāṇānuparivattī**. Upacārapaññāya vā **ñāṇamūlako**. Appanāpaññāya **ñāṇapubbaṅgamo**. Abhiññāpaññāya **ñāṇānuparivattī**ti veditabbaṃ.

Yathā pureti yathā samādhissa pubbenivāsānussatiñāṇānuparivattibhāvena pure pubbe atītāsu jātīsu asaṅkhyeyyesupi saṃvaṭṭavivaṭṭesu attano paresaṅca khandhaṃ khandhūpanibaddhañca duppaṭivijjhaṃ nāma natthi, tathā pacchā samādhissa anāgataṃsaññānuparivattibhāvena anāgataṃsu jātīsu asaṅkhyeyyesupi saṃvaṭṭavivaṭṭesu attano paresaṅca khandhaṃ khandhūpanibaddhañca duppaṭivijjhaṃ nāma natthīti attho.

Yathā pacchāti yathā samādhissa cetopariyañāṇānuparivattibhāvena anāgatesu sattasu divasesu parasattānaṃ cittaṃ duppaṭivijjhaṃ nāma natthi, tathā pure atītesu sattasu divasesu parasattānaṃ cittaṃ duppaṭivijjhaṃ nāma natthīti attho. **Yathā divāti** yathā divasabhāge sūriyālokena andhakārassa vidhamitattā cakkhumantānaṃ sattānaṃ āpāthagataṃ cakkhuviññeyyaṃ rūpaṃ suviññeyyaṃ. **Tathā rattinti** tathā rattibhāge caturaṅgasamānāgatepi andhakāre vattamāne samādhissa dibbacakkhuññānuparivattitāya duppaṭivijjhaṃ rūpāyatanaṃ natthi.

Yathā rattim tathā divāti yathā ca rattiyaṃ tathā divāpi atisukhumaṃ kenaci tirohitaṃ yañca atidūre, taṃ sabbarūpaṃ duppaṭivijjhaṃ nāma natthi. Yathā ca rūpāyatane vuttaṃ, tathā samādhissa dibbasotaññānuparivattitāya saddāyatane ca netabbaṃ. Tenevāha “**iti vivaṭṭena cetasā**”tiādi. Tattha **apariyonaddhenāti** abhiññāñāṇassa pāribandhakakilesehi anajjhotthaṭena, apariyonaddhattā eva sappabhāsaṃ cittaṃ. Eteneva samādhissa iddhividhaññānuparivattitāpi vuttā evāti daṭṭhabbaṃ. **Pañcindriyānīti** iddhipādasampayuttāni sekkhassa pañcindriyāni adhippetānīti āha “**kusalānī**”ti. **Cittasahabhūnīti**ādi tesam viññāṇanirodhena nirodhadassanattaṃ āradhamaṃ. Tathā “**nāmarūpañcā**”tiādi. Tenetaṃ dasseti “na kevalaṃ pañcindriyāni eva, atha kho nāmarūpañca viññāṇahetukaṃ viññāṇassa nirodhā nirujjhatī”ti.

Tassāti viññāṇassa. **Hetūti** taṇhāavijjādiko. **Anāhāranti** padassa atthavivaraṇaṃ. **Anabhinanditanti** abhinandanabhūtāya taṇhāya pahīnattā eva apatthitaṃ. Tato eva **appaṭisandhikaṃ** viññāṇaṃ taṃ nirujjhati. Yathā ca viññāṇaṃ, evaṃ nāmarūpampi viññāṇasaṅkhātassa hetuno paccayassa ca abhāvā tappaccayānaṃ saṅkhārādīnaṃ abhāvā **ahetu appaccayaṃ**. Sesam pākaṭameva. Pucchāvissajjanavicayopi vuttanayānusārena veditabbo.

Evaṃ anusandhipucchampi dassetvā heṭṭhā sattādhiṭṭhānā dhammādhiṭṭhānā ca pucchā viṣuṃ viṣuṃ dassitāti idāni tā saha dassetuṃ “**ye ca saṅkhātadhammāse**”tiādi āradhamaṃ. Tattāyaṃ padattho – **saṅkhātadhammāti** aniccādivasena parivīmaṃsitadhammā, arahataṃ etaṃ adhivacanaṃ. **Sekkhāti** silādīni sikkhamānā avasesā ariyapuggalā. **Puthūti** bahū sattajanā. **Tesam me nipako iriyaṃ, puṭṭho pabrūhīti** tesam sekhāsekhānaṃ nipako paṇḍito tvaṃ bhagavā paṭipattiṃ puṭṭho me brūhīti. Sesam pālivaseneva viññāyati.

15. Kissa kissa hetu, kena kārāṇenāti attho. **Sekhāsekhavipassanā** **pubbaṅgamappahānayo**genāti sekhe asekkhe vipassanāpubbaṅgamappahāne ca pucchanayogena, pucchāvidhināti attho.

Vissajjanagāthāyaṃ **kāmesu nābhigijjheyā**ti vatthukāmesu kilesakāmena na abhigijjheyā. **Manasānāvilo siyā**ti byāpādavittakkādayo kāyaduccarītādayo ca manaso āvilabhāvakkare dhamme pajahanto cittaena anāvilo bhavēyya. Yasmā pana asekkho aniccatādivasena sabbadhammānaṃ paritullitattā kusalo sabbadhammesu kāyānupassanāsatiādīhi ca sato sabbakilesānaṃ bhinnattā uttamabhikkhubhāvaṃ patto ca hutvā sabbairiyāpathesu pavattati, tasmā **“kusalo...pe... paribbaje”**ti āhāti ayaṃ saṅkhepattho.

Tattha yaṃ pucchāgāthāyaṃ **“nipako”**ti padaṃ vuttaṃ, taṃ bhagavantaṃ sandhāya vuttaṃ, bhagavato ca nepakkaṃ ukkaṃsapāramippattaṃ anāvaraṇāñāṇadassanena dīpetabbanti anāvaraṇāñāṇaṃ tāva kammadvārabhedehi vibhajitvā sekhāsekhapaṭipadaṃ dassetuṃ **“bhagavato sabbam kāyakamma”**ntiādi vuttaṃ. Tena sabbattha appaṭihatañāṇadassanena tathāgatassa sekhāsekhapaṭipattidesanākosallameva vibhāveti. Tattha **ko cāti** kva ca, kasmim visayeti attho. Taṃ visayaṃ dasseti **“yaṃ anicce dukkhe anattani cā”**ti. Idaṃ vuttaṃ hoti – ñāṇadassanaṃ nāma uppajjamānaṃ **“sabbam saṅkhataṃ aniccaṃ dukkhaṃ sabbe dhammā anattā”**ti uppajjati, tassa pana tasmim visaye yena appavatti, so paṭighātoti, etena lakkhaṇattayappaṭivedhassa durabhisambhavataṃ anaññasādhāraṇatañca dasseti. Lakkhaṇattayavibhāvanena hi bhagavato catusaccappaṭivedhaṃ sammāsambodhiṇca paṇḍitā paṭijānanti.

Aññānaṃ adassananti taṃ paṭighātaṃ sarūpato dasseti. Chaḷārammaṇasabhāvappaṭicchādako hi sammoho ñāṇadassanassa paṭighātoti. Yasmiṃ visaye ñāṇadassanaṃ uppattiraṃhaṃ, tattheva tassa paṭighātena bhavitabbanti āha – **“yaṃ anicce dukkhe anattani cā”**ti. **Yathā idha purisotiādi** upamāḍassanaṃ. Tatrīdaṃ opammaṃsandanaṃ – puriso viya sabbo loko, tārarakūpāni viya cha ārammaṇāni, tassa purisassa tārarakūpānaṃ dassanaṃ viya lokassa cakkhuvīññādīhi yathāraṃhaṃ chaḷārammaṇajānanaṃ, tassa purisassa tārarakūpāni passantassāpi **“ettakāni satāni, ettakāni sahaṇṇāni”**tiādinā gaṇanasāṅketena ajānanaṃ viya lokassa rūpādīārammaṇaṃ kathaṇci jānantassāpi aniccādīlakkhaṇattayānavabodhoti. Sesam pākāṭameva.

Idāni yehi padehi bhagavatā āyasmato ajitassa sekhāsekhapaṭipadā vuttā, tesam padānaṃ atthaṃ vibhajitūṃ **“tattha sekhenā”**tiādimāha. Tattha **tatthāti** nipātamattaṃ, tasmim vā vissajjane. **Sekhenāti** sikkhā etassa silanti sekho, tena sekkena. **Dvīsu dhammesūti** duvidhesu dhammesūti adhippāyo. **Pariyuṭṭhānīyesūti** dosena pariyuṭṭhitena yattha parivattitabbaṃ, tesu āghātavattūsūti attho. **“Paṭighaṭṭhānīyesū”**tipi pāṭho, soyevattho.

Ettha ca gedhapaṭisedhacodanāyaṃ gedhanimitto doso gedhe sati hotīti tatopi cittassa rakkhitabbatā niddhāretvā vuttā. Yasmā pana bhagavatā **“kāmesu nābhigijjheyā”**ti (su. ni. 1045; cūḷani. ajitamāṇavapucchā 64, ajitamāṇavapucchāniddeśa 8; netti. 15-17) vuttaṃ, tasmā **“tattha yā icchā”**tiādinā gedhavasena niddeso kato. Atha vā dosato cittassa rakkhitabbatā gāthāya dutiyapādena vuttāyevāti daṭṭhabbā. Dutiyapādena hi sesakilesavodānadhammā dassitā. Tathā hi uppānānuppānabhedato sammāvāyāmassa visayabhāvena sabbe saṃkilesavodānadhamme catudhā vibhajitvā sammappadhānamukhena sekhapaṭipadaṃ matthakaṃ pāpetvā dassetuṃ **“sekho abhigijjhanto”**tiādi vuttaṃ. Tattha **anāvīlasaṅkappoti** āvilānaṃ kāmasaṅkappādīnaṃ abhāvena anāvīlasaṅkappo. Tato eva ca **anabhigijjhanto vāyamaṭi**, vīriyaṃ pavatteti. Kathaṃ vāyamaṭīti āha – **“so anuppānāna”**ntiādi.

Tattha **soti** uttarivisesatthāya paṭipajjamāno sekkho. **Anuppānānanti** anibbattānaṃ. **Pāpakānanti** lāmakānaṃ. **Akusalānaṃ dhammānanti** akosallasambhūtānaṃ dhammānaṃ. **Anuppādāyāti** na uppādanatthāya. **Chandaṃ janetīti** kattukamyatāsāṅkhātaṃ kusalacchandaṃ uppādeti. **Vāyamaṭīti** payogaparakkamaṃ karoti. **Vīriyaṃ ārabhatīti** kāyikacetāsikavīriyaṃ karoti. **Cittaṃ paggaṇhātīti**

teneva sahaḥātavīriyena cittaṃ ukkhipati. **Padahatīti** padhānavīriyaṃ karoti. Vāyamatītiādini pana cattāri padāni āsevanābhāvanābahulīkammaṣācchakiriyāhi yojetabbāni. **Uppannānaṃ pāpakānanti** anuppannāti avattabbataṃ āpannānaṃ pāpadhammānaṃ. **Pahānāyāti** pajahanatthāya. **Anuppannānaṃ kusalananti** anibbattānaṃ kosallasambhūtaṃ dhammānaṃ. **Uppādāyāti** uppādanatthāya. **Uppannānanti** nibbattānaṃ. **Ṭhitiyāti** ṭhitattham. **Asammosāyāti** anassanattham. **Bhiyyobhāvāyāti** punappunaṃ bhāvāya. **Vepullāyāti** vipulabhāvāya. **Bhāvanāyāti** vaḍḍhiyā. **Pāripūriyāti** paripūraṇatthāyāti ayaṃ tāva padattho.

16. “Katame anuppannā”tiādi akusaladhammā kusaladhammā ca yādisā anuppannā yādisā ca uppannā, te dassetuṃ āradḍham. Tattha **ime anuppannāti** ime kāmavitakkādayo asamudācāravasena vā ananubhūtarammaṇavasena vā anuppannā nāma. Aññathā hi anamatagge saṃsāre anuppannā nāma akusalā dhammā natthi. Vitakkatayaggahaṇaṇcetta nidassanamattaṃ daṭṭhabbaṃ. **Akusalamūlānti** anusayā eva sabbesaṃ akusalānaṃ mūlabhāvato evaṃ vuttā, na lobhādayo eva. Ime uppannā anusayā bhūmiladdhuppannā asamugghātipuppannātiādiuppannapariyāyasabbhāvato nāmavasena uppannā nāma, na vattamānabhāvenāti attho. **Ime anuppannā kusalā dhammāti** ime sotāpannassa saddhādayo sotāpattiphalasacchikiriyāya paṭipannassa anuppannā kusalā dhammā nāma, ko pana vādo puthujjanānanti dasseti. **Kusalasaddo** cettha **bāhitikasutte** (ma. ni. 2.358 ādayo) viya anavajjapariyāyo daṭṭhabbo. **Ime uppannā kusalā dhammāti** ime paṭhamamagge saddhādayo sotāpattiphalasacchikiriyāya paṭipannassa uppannā kusalā dhammā nāma.

Satipaṭṭhānabhāvanāya suniggahito kāmavitakkoti āha – **“yena kāmavitakkaṃ vāreti, idaṃ satindriya”**nti. Anavajjasukhapadaṭṭhānena avikkhepena cetodukkhasannissayo vikkhepapaccayo byāpādavitakko suniggahitoti vuttam – **“yena byāpādavitakkaṃ vāreti, idaṃ samādhindriya”**nti. Kusalesu dhammesu āradḍhavīriyo parāparādham sukkena sahatīti vīriyena vihiṃsāvitakko suniggahitoti āha – **“yena vihiṃsāvitakkaṃ vāreti, idaṃ vīriyindriya”**nti. Samādhīdānampi yathāsakaṃpaṭipakkhappahānaṃ paññavantasseva ijjhatīti imamattham dassento āha – **“yena uppannuppanne”**tiādi.

Etesaṃ yathānidhāritānaṃ pañcannaṃ indriyānaṃ savisaye jeṭṭhakabhāvaṃ dassetuṃ **“saddhindriyaṃ kattha daṭṭhabba”**ntiādi vuttam. Taṃ suviññeyyameva. Imesañca saddhādīnaṃ sekhānaṃ indriyānaṃ nibbattiyā sabbepi sekhā dhammā matthakappattā hontīti dassento **“evaṃ sekho”**tiādinā sekhapaṭipadaṃ nigameti.

17. Evaṃ sekhapaṭipadaṃ vibhajitvā idāni asekhapaṭipadaṃ vibhajituṃ **“kusalo sabbadhammāna”**ntiādimāha. Tattha **sabbadhammānanti** iminā padena vuttadhamme tāva vibhajitvā tattha asekkhassa kosallaṃ dassetuṃ **“loko nāmā”**tiādi vuttam. Taṃ vuttatthameva. **Kilesalokena bhavaloko samudāgacchatīti** kāmāvacaradhammaṃ nissāya rūpārūpāvacaradhamme samudāgametīti attho. **Soti** so mahaggatadhammesu, parittamahaggatadhammesu vā ṭhito. **Indriyāni nibbattetīti** sīlasamādhayo nibbedhabhāgiye katvā vimutti-paripācanīyāni saddhādīni indriyāni uppādeti. **Indriyesu bhāviyamānesūti** yathāvuttaindriyesu vaḍḍhiyamānesu rūpārūpapariggahādivasena neyyassa pariññā bhavati.

Dassanapariññāti nātapariññā. **Bhāvanāpariññāti** tīraṇapariññā pahānapariññā ca. **“Sā duvidhenā”**tiādinā saṅkhepato vuttamattham **“yadā hi sekho”**tiādinā vivarati. Tattha **“nibbidāsahagatehi saññāmanasikārehi”**ti iminā balavavipassanaṃ dasseti. Yadā hi sekhoti cettha sikkhanasīlatāya kalyāṇaputhujjanopi sekhapadena saṅgahitoti katvā **“dve dhammā kosallaṃ gacchanti dassanakosallañcā”**tiādi vuttam. Ayamettha adhippāyo – yadā kalyāṇaputhujjano pubbabhāgasikkham sikkhanto nibbidāsahagatehi saññāmanasikārehi ñeyyaṃ parijānāti, tadā tassa te vipassanādhammā dassanakosallaṃ paṭhamamaggañānaṃ gacchanti sampāpuṇanti tena saddhiṃ ghaṭenti. Yadā pana sotāpannādisekho vuttanayena neyyaṃ parijānāti, tadā tassa te vipassanādhammā bhāvanākosallaṃ gacchantīti.

Taṃ nāṇanti yā pubbe neyyassa pariññā vuttā, taṃ neyyaparijānanaññaṃ. **Pañcavidhena veditabbanti** visayabhedena tassa bhedaṃ dasseti. **Dhammānaṃ salakkhaṇe nāṇanti** rūpārūpadhammānaṃ kakkhaḷaphusaṇādisalakkhaṇe nāṇaṃ. Taṃ pana yasmā sabbaṃ neyyaṃ hetuhetuphalabhedato duvidhameva hoti, tasmā “**dhammapaṭṭisambhidā ca atthapaṭṭisambhidā cā**”ti niddiṭṭhaṃ.

Pariññāti tīraṇapariññā adhippetā. Yasmā panassa rūpārūpadhamme salakkhaṇato paccayato ca abhijānitvā kusalādivibhāgehi te pariggahetvā aniccādivasena jānanā hoti, tasmā “**evaṃ abhijānitvā yā parijānanā, idaṃ kusala**”ntiādi vuttaṃ. Tattha **evaṃgahitāti** evaṃ aniccādito kalāpasammasanādivasena gahitā sammasitā. **Idaṃ phalaṃ nibbattenti** idaṃ udayabbayaññādikaṃ phalaṃ paṭipāṭiyā uppādentī, nimittassa kattubhāvena upacaraṇato yathā ariyabhāvakarāni saccāni ariyasaccānīti. **Tesanti** udayabbayaññādīnaṃ. **Evaṃgahitānanti** evaṃpavattitānaṃ. **Ayaṃ atthoti** ayaṃ saccānaṃ anubodhapaṭivedho attho. Yathā hi pariññāpaññā sammasitabbadhamme sammasanadhamme tattha sammasanākāraṃ pariñānāti, evaṃ sammasanaphalampi pariñānāti katvā ayaṃ nayo dassito.

Ye akusalāti samudayasaccamāha. Sabbe hi akusalā samudayapakkhiyāti. **Ye kusalāti** maggadhammā sammādiṭṭhiādayo. Yadi pi phaladhammāpi sacchikātabbā, catusaccapaṭivedhassa pana adhippetattā “**katame dhammā sacchikātabbā, yaṃ asaṅkhata**”nti vuttaṃ. **Atthakusaloti** paccayuppannesu atthesu kusalo. **Dhammakusaloti** paccayadhammesu kusalo. Pāḷiatthapāḷidhammā vā atthadhammā. **Kalyāṇatākusaloti** yuttatākusalo, catunayakovidoti attho, desanāyuttikusalo vā. **Phalatākusaloti** khīṇāsavaphalakusalo. “**Āyakusalo**”tiādīsu āyoti vaḍḍhi. Sā anattahānito aṭṭhuppattito ca duvidhā. **Apāyāti** avaḍḍhi. Sāpi atthahānito anaṭṭhuppattito ca duvidhā. **Upāyoti** sattānaṃ accāyike kicce vā bhaye vā uppanne tassa tikicchanasamatthaṃ ṭhānuppattikāraṇaṃ, tattha kusaloti attho. **Khīṇāsavo hi sabbaso avijjāya pahīnattā paññāvepullappatto** etesu āyādīsu kusaloti. **Evaṃ asekhassa kosallaṃ ekadesena vibhāvetvā puna anavasesato dassento** “**mahatā kosallena samannāgato**”ti āha.

Pariniṭṭhitasikkhassa asekhassa satokāritāya aññaṃ payojanaṃ natthīti vuttaṃ “**diṭṭhadhammasukhavihārattha**”nti. Idāni yathānididiṭṭhaṃ sekhāsekhapaṭipadaṃ nigamento “**imā dve cariyā**”tiādīmāha. Tattha **bojjhanti** bujjhitabbaṃ. **Taṃ catubbidhanti** taṃ bojjhaṃ catubbidhaṃ, catusaccabhāvato. **Evaṃ jānāti** evaṃ pariññābhīsamayādivasena yo jānāti. **Ayaṃ vuccatīti** ayaṃ asekho satīvepullappatto nipariyāyena “**sato abhikkamati**”tiādīnaṃ vuccatīti. Sesamā uttānatthameva. Idhāpi pucchāvissajjanavicayā pubbe vuttanayānusārena veditabbā.

Ettāvātā ca mahāthero vicayahāraṃ vibhajanto **ajitasuttavasena** (su. ni. 103 ādayo; cūḷani. ajitamānavapucchā 57 ādayo, ajitamānavapucchāniddeśa 1 ādayo) pucchāvicayaṃ vissajjanavicayañca dassetvā idāni suttantaresupī pucchāvissajjanavicayānaṃ nayaṃ dassento “**evaṃ pucchitabbaṃ, evaṃ vissajjitabba**”nti āha. Tattha **evanti** iminā nayena. **Pucchitabbanti** pucchā kātabbā, ācikkhitabbā vā, vivecetabbāti attho. **Evaṃ vissajjitanti** etthāpi eseva nayo. **Suttassa cāti**ādi anugītivīcayanidassanaṃ. **Anugīti atthato ca byañjanato ca samānetabbāti** suttantaradesanāsaṅkhātā anugīti atthato byañjanato ca saṃvaṇṇiyamānena suttana samānā sadisī kātabbā, tasmim vā sutte sammā ānetabbā. **Atthāpagatanti** atthato apetaṃ, asambandhatthaṃ vā dasadāḷimādivacanaṃ viya. Tenevāha “**samhappalāpaṃ bhavati**”ti. Etena atthassa samānetabbatāya kāraṇamāha. **Dunnikkhittassāti** asamāvuttassa. **Dunnayoti** dukkhena netabbo, netuṃ vā asakkuṇeyyo. **Byañjanupetanti** sabhāvaniruttisamupetaṃ.

Evaṃ anugītivīcayaṃ dassetvā niddesavāre “**suttassa yo pavīcayo**”ti saṃkhittena vuttamatthaṃ vibhajitūṃ “**suttañca pavīcinitabba**”nti vatvā tassa vicinanākāraṃ dassento “**kiṃ idaṃ suttaṃ āhaccavacana**”ntiādīmāha. Tattha **āhaccavacanaṃ** bhagavato ṭhānakaraṇāni āhacca abhīhantvā pavattavacanaṃ, sammāsambuddhena sāmāṃ desitasuttanti attho. **Anusandhivacanaṃ** sāvaka bhāsitaṃ. Tañhi bhagavato vacanaṃ anusandhetvā pavattanato “**anusandhivacana**”nti vuttanti. **Nītatthanti** yathārutavasena nītabbatthaṃ. **Neyyatthanti** niddhāretvā gahetabbatthaṃ. **Samkilesabhāgiyanti**ādīnaṃ

padānaṃ attho paṭṭhānavāraṇṇanāyaṃ āvi bhavissati. Yasmā pana bhagavato desanā soḷasavidhe sāsanaṃ paṭṭhāne ekaṃ bhāgaṃ abhajanṭī nāma natthi, tasmā sopi nayo vicetabbabhāvena idha nikkhitto.

Kuhiṃ imassa suttassāti imassa suttassa kasmim padese ādimajjhāpariyosānesu. **Sabbāni saccāni passitabbānīti** dukkhasaccaṃ suttassa “kuhiṃ kasmim padese kasmim vā pade passitabbaṃ niddhāretvā vicetuṃ, samudayasaccaṃ nirodhasaccaṃ maggasaccaṃ kuhiṃ passitabbaṃ datṭhabbaṃ niddhāretvā vicetu”nti evaṃ sabbāni saccāni uddharitvā vicetabbānīti adhippāyo. **Ādimajjhāpariyosāneti** evaṃ suttam pavicitabbanti ādito majjhato pariyosānato ca evaṃ iminā pucchāvicayādinayena suttam pavicitabbanti attho. Ettha ca pucchāvissajjanapubbāparānugītivicayā pāḷiyaṃ sarūpeneva dassitā. Assādādivicayo pana saccaniddhāraṇamukhena nayato dassito, so niddesavāre vuttanayeneva veditabbo. Tabbicayeneva ca padavicayo siddhoti.

Vicayahāravibhaṅgavaṇṇanā niṭṭhitā.

3. Yuttihāravibhaṅgavaṇṇanā

18. Tattha katamo yuttihārotiādi yuttihāravibhaṅgo. Tattha **kiṃ yojayatīti** yuttihārassa visayaṃ pucchati. Ko panetassa visayo? Atathākārena gayhamānā suttatthā visayo, te hi tena sātisayaṃ yāthāvato yuttiniddhāraṇena yojetabbā. Itaresupī ayaṃ hāro icchito eva. Tam pana bhūtakathanamattam hoti. Yasmā panāyaṃ yuttigavesanā nāma na mahāpadesena vinā, tasmā yuttihāraṃ vibhajanto tassa lakkhaṇaṃ tāva upadisitum **“cattāro mahāpadesā”**tiādimāha.

Tattha **mahāpadesāti** mahāpadesā, buddhādayo mahante apadisitvā vuttāni mahākāraṇānīti attho. Atha vā **mahāpadesāti** mahāokāsā, mahantāni dhammassa paṭiṭṭhānānīti vuttam hoti. Tatrāyaṃ vacanatto – apadissatīti apadeso, buddho apadeso etassāti **buddhāpadeso**. Esa nayo sesesupī. “Sammukhā metaṃ bhagavato suta”ntiādinā kenaci ābhatassa ganthassa dhammoti vā adhammoti vā vinicchayane kāraṇaṃ. Kiṃ pana tanti? Tassa tathā ābhatassa suttotaraṇādi eva. Yadi evaṃ kathaṃ cattāroti? Apadisitappabhedato. Dhammassa hi dve sampadāyo bhagavā sāvakā ca. Tesu sāvakā saṅghaṇapuggalavasena tivadhā. “Evamamumhā mayāyaṃ dhammo paṭiggahito”ti apadisitabbānaṃ bhedenā cattāro. Tenāha – “buddhāpadeso...pe... ekattherāpadeso”ti. **Tāni padabyañjanānīti** kenaci ābhataṃ suttassa padāni byañjanāni ca, atthapadāni ceva byañjanapadāni cāti attho. Saṃvaṇṇakena vā saṃvaṇṇanāvasena āhariyamānāni padabyañjanāni. **Sutte otārayitabbānīti** sutte anuppavesitabbāni. **Sandassayitabbānīti** saṃsandetabbāni. **Upanikkhipitabbānīti** pakkhipitabbāni.

Suttādīni dassetuṃ **“katamasmi”**ntiādi vuttam. Tattha yasmā bhagavato vacanaṃ ekaḡāthāmatampi saccavinimuttaṃ natthi, tasmā sutteti padassa attham dassetuṃ **“catūsu ariyasaccesu”**ti vuttam. Aṭṭhakathāyaṃ pana tīṇi piṭākāni suttanti vuttam, tam iminā nettivacanena aññadatthu saṃsandati ceva sameti cāti datṭhabbaṃ. Yāvadeva anupādāparinibbānatthā bhagavato desanā, sā ekantena rāḡādikilesavūpasamaṃ vadatīti **vinayeti**padassa attham dassento **“rāḡavinaye”**tiādimāha. Vinayoti hi kāraṇaṃ rāḡādivūpasamanimittam idhādhippetam. Yathāha –

“Ye kho tvam, gotami, dhamme jāneyyāsi, ime dhammā sarāḡāya saṃvattanti no virāḡāya, saññogāya saṃvattanti no visaññogāya, ācayāya saṃvattanti no apacayāya, mahicchatāya saṃvattanti no appicchatāya, asantuṭṭhiyā saṃvattanti no santuṭṭhiyā, saṅgaṇikāya saṃvattanti no pavivekāya, kosajjāya saṃvattanti no vīriyārambhāya, dubbharatāya saṃvattanti no subharatāya, ekaṃsena gotami dhāreyyāsi ‘neso dhammo, neso vinayo, netaṃ satthusāsana’nti. Ye ca kho tvam, gotami, dhamme jāneyyāsi ime dhammā virāḡāya saṃvattanti no sarāḡāya, visaññogāya saṃvattanti no saññogāya, apacayāya saṃvattanti no ācayāya, appicchatāya saṃvattanti no mahicchatāya, santuṭṭhiyā saṃvattanti no asantuṭṭhiyā pavivekāya saṃvattanti no saṅgaṇikāya, vīriyārambhāya saṃvattanti no kosajjāya, subharatāya saṃvattanti no dubbharatāya, ekaṃsena gotami dhāreyyāsi ‘eso dhammo, eso vinayo, etaṃ satthusāsana’”nti (cūḷava. 406).

Dhammatāyantipadassa atthaṃ dassetuṃ “**paṭiccasamuppāde**”ti vuttaṃ. Paṭiccasamuppādo hi ṭhitāva sā dhātu dhammatṭhitatā dhammaniyāmatāti (a. ni. 3.137) vutto. “Dhammatāyaṃ upanikkhipitabbāni”ti idaṃ **pāḷiyam** natthi, atthadassanavasena pana idha vuttanti daṭṭhabbaṃ. Ettha ca pavattiṃ nivattiṃ tadupāyañca bādhakādhāve niyataṃ paridīpento sutte otarati nāma. Ekantena rāgādikilesavinayaṃ vadanto vinaye sandissati nāma. Tathā sassataṃ ucchedañca vajjetvā ekattanayādiparidīpanena sabhāvadhammānaṃ paccayapaccayuppannabhāvaṃ vibhāvento dhammatam na vilometi nāma.

Evaṃvidho ca kāmāsavādikaṃ āsavaṃ na uppādetīti imamatthaṃ dassento “**yadi catūsu ariyasaccesū**”tiādīmāha. Nanu ca anulomato paṭiccasamuppādo pavatti, paṭilomato nivattīti so cattāri ariyasaccāni anupaviṭṭho kasmā idha visuṃ gahitoti? Saccametaṃ. Idha pana visuṃ gahaṇaṃ dhammānaṃ paccayāyattavuttidassanena aniccapaccayalakkhaṇaṃ asamatthapaccayalakkhaṇaṃ nirīthapaccayalakkhaṇaṃca vibhāvetvā tesam udayavantatā tato eva vayavantatā tadubhayena aniccatā udayabbayaṭṭipīḷanena dukkhatā anattatāti tilakkhaṇasamāyogaparidīpanī sabbadiṭṭhigatakumatividhamsanī anaññasādhāraṇā sāsanasampatti pakāsītā hotīti dassanatthaṃ.

Ettha ca suttaṃ suttānulomaṃ ācariyavādo attanomatīti idaṃ catukkaṃ vedītabbaṃ – tattha **suttaṃ** nāma tisso saṅgītiyo āruḷhāni tīṇi piṭakāni. **Suttānulomaṃ** nāma mahāpadesā, yaṃ “anulomakappiya”nti vuccati. **Ācariyavādo** nāma aṭṭhakathā. **Attanomati** nāma nayaggāhena anubuddhiyā attano paṭibhānaṃ. Tattha suttaṃ appaṭibhāniyaṃ, taṃ paṭibhāntena satthāva paṭibhānito hoti. Anulomakappiyaṃ pana suttena samentameva gahetabbaṃ, na itaraṃ. Ācariyavādopi suttena samento eva gahetabbo, na itaro. Tathā attanomati, sā pana sabbadubbalāti.

Idāni yadatthaṃ idha cattāro mahāpadesā ābhatā, taṃ dassetuṃ “**catūhi mahāpadesehi**”tiādi vuttaṃ. Tattha **yaṃ yanti** yaṃ yaṃ atthajātañca dhammajātañca. **Yujjati**ti yathāvuttehi catūhi mahāpadesehi yujjati. **Yena yenāti** yena yena kāraṇena. **Yathā yathāti** yena yena pakārena. **Taṃ taṃ gahetabbanti** saṃvaṇṇiyamāne sutte ābhatena kāraṇena pasaṅgena pakārena ca suttato uddharitvā saṃvaṇṇanāvasena gahetabbanti attho. Tena catumahāpadesāvīruddhāya yuttīyā suttato atthe niddhāretvā yuttihārayojanā kātābātī dasseti.

19. Idāni taṃ yuttiniddhāraṇaṃ dassetuṃ “**pañhaṃ pucchitenā**”tiādi āradhamaṃ. Tattha **kati padānīti** kittakāni padāni. **Pariyogāhitabbanti** padassa atthaṃ dassetuṃ “**vicetabba**”nti vuttaṃ. Yattakāni padāni yathādhīpettaṃ atthaṃ abhivadanti, tattakāni padāni tadatthassekassa ñātuṃ icchitattā “eko pañho”ti vuccati, tāni pana ekagāthāyaṃ yadi vā sabbāni padāni yāva yadi vā ekaṃ padaṃ ekaṃ atthaṃ abhivadati, ekoyeva so pañhoti imamatthaṃ dasseti “**yadi sabbāni**”tiādinā. **Tanti** taṃ pañhaṃ. **Aññātabbanti** ājānitabbaṃ. **Kiṃ ime dhammāti**ādi ājānanākāradassanaṃ. Tattha **dhammāti** pariyattidhammā. **Nānatthāti** nānā atthā.

Pucchāgāthāyaṃ ayaṃ padattho – **kenassubbhāhato lokoti** ayaṃ sattaloko coro viya coraghātakena kena abhīhato vadhiyati attho. **Kenassu parivāritoti** māluvalatāya viya nissitarukkho kena loko ajjhotthaṭṭho. **Kena sallena otiṇṇoti** kena visapītakhurappena viya sarīrabbhantaranimuggena sallena anupaviṭṭho. **Kissa dhūpāyitoti** kissa kena kāraṇena dhūpāyito santāpito loko. **Sadāti** padaṃ sabbattha yojetabbaṃ. **Teti** cattāri padāni. Pañhasaddāpekkhāya pullīnganiddeso. “Vissajjeti”ti etena vissajjanato tayo pañhāti ñāyatīti dasseti.

20. **Tatthāti** vissajjanagāthāyaṃ dutiyapāde vuttā **jarā ca** paṭhamapāde vuttaṃ **maraṇaṃcāti imāni dve saṅkhatassa** pañcakkhandhassa “saṅkhatoti”ti lakkhīyati etehīti **saṅkhatalakkhaṇāni**. Vuttañhetam bhagavatā – “tīṇimāni, bhikkhave, saṅkhatassa saṅkhatalakkhaṇāni. Katamāni tīṇi? Uppādo paññāyati, vayo paññāyati, ṭhitassa aññathattaṃ paññāyati”ti (a. ni. 3.47; kathā. 214). Tena vuttaṃ – “**jarāyaṃ ṭhitassa aññathattaṃ, maraṇaṃ vayo**”ti. Ettha ca “ṭhitassa aññathatta”nti etena khandhappabandhassa pubbāparaviseso idha jarā, na khaṇaṭṭhitīti dasseti. “Maraṇaṃ vayo”ti iminā ca

“tisso mato, phusso mato”ti evaṃ loke vuttaṃ sammutimaraṇaṃ dasseti, na khaṇikamaraṇaṃ, samucchadamaraṇaṃ vā.

Idāni “te tayo pañhā”ti vuttamatthaṃ yuttivasena dassetuṃ “**jarāya cā**”tiādi vuttaṃ. Tattha yebhuyyena jīṇassa maraṇadassanato jarāmaraṇānaṃ nānattaṃ asampaṭicchamaṇaṃ pati tesam nānattadassanattaṃ “**gabbhagatāpi hi mīyanti**”ti vuttaṃ. Idaṃ vuttaṃ hoti – yathādhippetajarāviraḥitassa maraṇassa dassanato aññā jarā aññaṃ maraṇanti. Tenevāha – “**na ca te jīṇā bhavanti**”ti. Kiñca bhīyyo? Kevalassa maraṇassa diṭṭhattā aññāva jarā aññaṃ maraṇaṃ, yathā taṃ devānanti imamatthaṃ dasseti “atthi ca devāna”ntiādinā. Anuttarimanussadhammena ca tikicchana sakkā jarāya paṭikāraṃ kātuṃ, na tathā maraṇassāti evampi jarāmaraṇānaṃ atthato nānattaṃ sampaṭicchitabbanti dassetuṃ “**sakkatevā**”tiādi vuttaṃ. Tattha **sakkateti** sakyate, sakkāti attho. **Paṭikammanti** paṭikāraṇaṃ. Nanu ca maraṇassāpi paṭikāraṃ kātuṃ sakkā iddhipādabhāvanāya vasibhāve satīti codanaṃ manasi katvā āha – “**aññatreva iddhimantānaṃ iddhivisayā**”ti. Vuttañhetam bhagavatā

“Yassa kassaci, ānanda, cattāro iddhipādā bhāvītā bahulīkatā yānīkatā vatthukatā anuṭṭhitā paricitā susamāraddhā, so ākaṅkhamāno kappam vā tiṭṭheyya kappāvasesam vā”ti (dī. ni. 2.166, 182; saṃ. ni. 5.822; kathā. 623; udā. 51).

Ko panettha kappo, ko vā kappāvasesoti? Kappoti āyukappo, yasmim tasmīhi kāle yaṃ manussānaṃ āyupamānaṃ, taṃ paripuṇṇaṃ karonto kappam tiṭṭhati nāma. “Appam vā bhīyyo”ti (dī. ni. 2.7; a. ni. 7.74) vuttaṃ pana vassatādīto atirekaṃ tiṭṭhanto kappāvasesam tiṭṭhati nāma. Yadi evam kasmā iddhimanto cetovasippattā khīṇāsavā lokahitattaṃ tathā na tiṭṭhantīti? Khandhasaṅkhātassa dukkhabhāraṇassa pariññātattā anussukkatāya ca. Paṭippassaddhasabbussukkā hi te uttamapurisāti. Vuttañhetam dhammasenāpatinā –

“Nābhinandāmi maraṇaṃ, nābhikaṅkhāmi jīvitam;
Kālañca paṭikaṅkhāmi, vetanaṃ bhatako yathā”ti. (theragā. 654; mi. pa. 2.2.4);

Yathā jarāmaraṇānaṃ aññamaññaṃ atthato nānattaṃ, evaṃ tehi taṇhāya ca nānatte dassite “tayo pañhā”ti idaṃ sijjhatīti taṃ dassetuṃ “**yaṃ panā**”tiādimāha.

Tattha yasmā taṇhāya abhāvepi sati jarāmaraṇaṃ labbhati khīṇāsavasantāne, tasmā aññaṃ jarāmaraṇaṃ aññā taṇhāti imamatthamāha “**dissanti vitarāgā jīrantāpi mīyantāpi**”ti. Nanu ca taṇhāpi jīraṇabhijjanasabhāvāti? Saccam, na idaṃ jarāmaraṇaṃ idhādhippetanti vuttovāyamattho. “Yadi cā”tiādinā jarāmaraṇato taṇhāya anaññatte dosaṃ dasseti. Yobbanatṭhāpi vigatataṇhā siyūṃ, na idaṃ yuttanti adhippāyo. Jarāmaraṇampi siyā dukkhassa samudayo taṇhāya anaññatte satīti adhippāyo. Na ca siyā taṇhā dukkhassa samudayo jarāmaraṇato anaññatte satīti bhāvo. Na hi jarāmaraṇaṃ dukkhassa samudayo, taṇhā dukkhassa samudayo, tasmā veditabbaṃ etesamatthato nānattanti adhippāyo. Yathā ca taṇhā maggavajjhā, evaṃ jarāmaraṇampi siyā maggavajjhaṃ taṇhāya anaññatte sati. Yathā ca jarāmaraṇaṃ na maggavajjhaṃ, tathā taṇhāpi siyāti ayampi nayo vutto evāti daṭṭhabbaṃ. **Imāya yuttiyāti** imāya yathāvuttāya upapattiyā. **Aññamaññehīti** aññāhi aññāhi kāraṇūpapattīhi atthato ce aññattaṃ, tadaññampi byañjanato gavesitabbanti attho.

Imesaṃ dhammānaṃ atthato ekattanti imamevatthaṃ “**na hi yujjati**”tiādinā vivarati. **Taṇhāya adhippāye aparipūramāneti** icchitālābhamāha. Tena icchātataṇhānaṃ atthato ekattaṃ vuttaṃ hotīti. Etena na hi yujjati icchāya ca taṇhāya ca atthato aññattanti. Yathā idaṃ vacanaṃ samatthanaṃ hoti, evaṃ icchāvipariyāye āghātavattūsu kodho ca upanāho ca uppajjatīti idampi samatthanaṃ hoti, na tathā jarāmaraṇavipariyāyeti jarāmaraṇataṇhānaṃ atthato aññattampi samatthitaṃ hotīti etamatthaṃ dasseti “imāya yuttiyā”tiādinā.

Yadi icchātaṇhānaṃ atthato anaññattaṃ, atha kasmā bhagavatā imissā gāthāya dvidhā vuttāti? Tattha parihāramāha “**yaṃ panida**”ntiadinā. Tattha yanti kiriyāparāmasanaṃ. **Abhilapitanti** vuttaṃ yaṃ idaṃ abhilapanam, idaṃ bāhirānaṃ rūpādīnaṃ vatthūnaṃ ārammaṇavasena, ārammaṇakaraṇavasena vā yojetabbaṃ. **Dvīhi dhammehīti** dvīhi pakatīhi. Kā pana tā pakatiyoti? Appattassa visayassa esanavasena icchā, pattassa appattassa vā pātukāmatāvasena taṇhā, ayametāsaṃ viseso. Yadi pi evaṃ, tathāpi sabbā taṇhā rūpādivisayaṃ gilitvā pariniṭṭhapetvā gahaṇena ekasabhāvā evāti dassento “**sabbā hi taṇhā ajjhosānalakkhaṇena ekalakkhaṇā**”ti āha. Idāni tamatthaṃ upamāya pakāsento “**sabbo aggī**”tiadinā, taṃ suviññeyyameva.

Ayaṃ pana na kevalaṃ taṇhā ārammaṇe pavattivisesena dvīhi eva nāmehi vuttā, atha kho anekehipi pariyaeyhīti dassanattaṃ “**icchātipi**”tiadi vuttaṃ.

Tattha icchanti tāya ārammaṇānīti **icchā**. Taṇhāyanaṭṭhena **taṇhā**. Pīlājananato duruddhāraṇato ca visapītaṃ sallaṃ viyāti **sallaṃ**. Santāpanaṭṭhena **dhūpāyanā**. Ākaḍḍhanaṭṭhena sīghasotā saritā viyāti **saritā**, allatṭhena vā **saritā**, “saritāni sinehitāni ca, somanassāni bhavanti jantuno”ti (dha. pa. 341) hi vuttaṃ. Allāni ceva siniddhāni cāti ayamettha attho. **Visattikāti** visatāti visattikā. Visatāti visattikā. Visamāti visattikā. Visālāti visattikā. Visakkatīti visattikā. Visamvādikāti visattikā. Visamharatīti visattikā. Visamūlāti visattikā. Visaphalāti visattikā. Visaparibhogāti visattikā. Visatā vā pana sā taṇhā rūpe sadde gandhe rase phoṭṭhabbe dhamme kule gaṇe visatā vitthātāti visattikā.

Sinehanavasena **sineho**. Nānāgatīsu kilamathuppādanena **kilamatho**. Paliveṭṭhanaṭṭhena latā viyāti **latā**. “Latā uppajja tiṭṭhatī”ti (dha. pa. 340) hi vuttaṃ. Mamanti maññanavasena **maññanā**. Dūragatampi ākaḍḍhitvā bandhanaṭṭhena **bandho**. Āsīsanatṭhena **āsā**. Ārammaṇarasam pātukāmatāvasena **pipāsā**. Abhinandanaṭṭhena **abhinandanā**. Itīti evaṃ ārammaṇe pavattivisesena anekehi nāmehi gayhamānāpi sabbā taṇhā ajjhosānalakkhaṇena ekalakkhaṇāti yathāvuttamatthaṃ nigameti.

Puna taṇhāya anekehi nāmehi gahitabhāvameva “**yathā cā**”tiadinā upacayena dasseti. Tattha **vevacaneti** vevacanaḥaravibhaṅge. “Āsā ca pihā”ti gāthāya (netti. 37; peṭako. 11) atthaṃ tattheva vaṇṇayissāma. **Avigatarāgassāti**adinā rañjanaṭṭhena **rāgo**, chandanaṭṭhena **chando**, piyāyanaṭṭhena **pemaṃ**, paridhanaṭṭhena **paridāhoti** taṇhāva vuttā. Tenevāha – “**taṇhāyetam vevacana**”nti. **Evaṃ yujjati**ti evaṃ icchātaṇhānaṃ atthato anaññattā “tayo pañhā”ti yaṃ vuttaṃ, taṃ yujjati yuttiyā saṅgacchatīti attho.

21. Evaṃ “kenassubbhāhato loko”ti (saṃ. ni. 1.66) gāthāya “tayo pañhā”ti pañhattayabhāve yuttiṃ dassetvā idāni aññehi pakārehi yuttigavesanaṃ dassento “**sabbo dukkhūpacāro**”tiadinā. Tattha **dukkhūpacāro**ti dukkhappavatti. **Kāmataṇhāsānkhāramūlakoti** kāmataṇhāpaccayasānkhārahētukoti yujjati adhippāyo. **Nibbidūpacāro**ti nibbidāpavatti kāmānaṃ vipariṇāmaññathābhāvā uppajjamānā anabhirati ṇāṇanibbidā ca. **Kāmataṇhāparikkhāramūlakoti** kāmataṇhāya parikkhārahētavattukāmāhetuko. Tattha anabhiratisānkhātā nibbidā kāmataṇhāparikkhāramūlikā, na ṇāṇanibbidāti sabbo nibbidūpacāro kāmataṇhāparikkhāramūlakoti na pana yujjati vuttaṃ. **Imāya yuttiyāti** nayaṃ dasseti. Idaṃ vuttaṃ hoti – yathā pañhattayabhāve yutti vuttā, yathā ca dukkhūpacāranibbidūpacāresu, evaṃ imāya yuttiyā iminā yogena nayena aññamaññehi kāraṇehi taṃtaṃpālīppadese anurūpehi aññathā aññehi hetūhi yutti gavesitabbāti.

Idāni taṃ nayadassanaṃ saṃkhittanti vitthārato vibhajitvā dassetuṃ “**yathā hi bhagavā**”tiadi āradhaṃ. Tatthāyaṃ saṅkhepattho – rāgadosamohacaritānaṃ yathākkamaṃ asubhamettāpaccayākārakathā rāgādivinayanato sappāyāti ayaṃ sāsana yutti. Evamavaṭṭhite yadi rāgacaritassa mettācetovimuttiṃ deseyya, sā desanā na yujjati asappāyabhāvato. Tathā sukhāpaṭipadādayoti. Nanu ca sukhāpaṭipadādayo paṭipattiyā sambhavanti, na desanāyāti? Saccametaṃ, idha pana rāgacaritoti tikkhilesa rāgacaritoti adhippeto. Tassa dukkhāya paṭipadāya bhāvanā samijjhati. Yassa ca dukkhāya paṭipadāya bhāvanā samijjhati, tassa garutarā asubhadesanā sappāyā, yassa garutarā

asubhadesanā sappāyā, na tassa mandakilesassa viya lahukatarāti imamattham dassento āha – **“sukham vā paṭipadam...pe... deseyya na yujjati desanā”**ti. Iminā nayena sesapadesupi yathāsambhavaṃ attho vattabbo. Ettha ca ayuttaparihārena yuttisamadhigamoti yuttivicāraṇāya ayuttipi gavesitabbāti vuttam – **“yadi hi...pe... na yujjati desanā”**ti. Sesesupi eseva nayo. **Evam yaṃ kiñcīti**ādi yuttihārayojanāya nayadassanameva.

Tattha **evanti** iminā nayena. **Yaṃ kiñcīti** aññampi yaṃ kiñci. **Anulomappahānanti** pahānassa anurūpaṃ, pahānasamatthanti attho. Sutte anavasesānaṃ padatthānaṃ anupadavicāraṇā vicayo hāro, vicayahārasaṃvaṇṇanāya niddhāritesu atthesu yuttigavesanaṃ sukaranti āha – **“sabbaṃ taṃ vicayena hārena vicitvā yuttihārena yojetabba”**nti. **Yāvaticā nāṇassa bhūmīti** saṃvaṇṇentassa ācariyassa yaṃ nāṇaṃ yaṃ paṭibhānaṃ, tassa yattako visayo, tattako yuttihāravīcāroti attho. Taṃ kissa hetu? Anantanayo samantabhaddako vimaddakkhamo vicittadesano ca saddhammoti.

Evam nayadassanavaseneva yuttihārayojanā dassitāti taṃ brahmavīhāraphalasaṃpattinavānupubbasaṃpattivasibhāvehi vibhajivā dassetuṃ **“mettāvihārissa sato”**tiādi āradhamaṃ. Tattha **mettāvihārissāti** mettāvīhāralābhino. **Satoti** samānassa, tathābhūtassāti attho. **Byāpādoti** padoso. **Cittaṃ pariyādāya ṭhassatīti** cittaṃ abhibhavissati. Yasmā pana kusalākusalānaṃ dhammānaṃ apubbaṃ acarimaṃ pavatti nāma natthi, tasmā samāpattito vuṭṭhānassa aparabhāgeti dassanattham **“ṭhassatī”**ti vuttam. **Na yujjati desanāti** byāpādapaṭipakkhattā mettāya tādisi kathā na yuttāti attho. **Byāpādo pahānaṃ abbattham gacchatīti yujjati desanāti** yathāvuttakāraṇato eva ayaṃ kathā yuttāti. Sesavāresupi imināva nayena attho veditabbo. Anuttānaṃ eva vaṇṇayissāma.

Animittavīhārissāti aniccānupassanāmukhena paṭiladdhaphalasaṃpattivīhārassa. **Nimittānusārīti** saṅkhāranimittānusārī. **Tena tenevāti** niccādīsu yaṃ yaṃ pahīnaṃ, tena teneva nimittena. **Asmīti vigatanti** pañcasu upādānakkhandhesu diṭṭhimānavasena yaṃ asmīti maññitaṃ, taṃ vigataṃ. Tamevattham vivarati **“ayamahasmīti na samanupassāmī”**ti. **Vicikicchākathamkathāsallanti** vinayakukkucassāpi katham kathanti pavattisabbhāvato vicikicchāpadena visesitaṃ. **Na yujjati desanāti** vicikicchāya pahānekaṭṭhabhāvato na yuttāyaṃ kathā.

Paṭhamam jhānaṃ samāpannassāti paṭhamajjhānasamaṅgino. **Kāmarāgabyāpādā visesāya saṃvattantīti na yujjati**ti yasmā nīvaraṇesu appahīnesu paṭhamajjhānassa upacāraṃpi na sampajjati, pageva jhānaṃ, tasmā kāmarāgabyāpādā visesāya dutiyajjhānāya saṃvattantīti na yuttāyaṃ kathā. Yathāladhassa pana paṭhamajjhānassa kāmarāgabyāpādā pariyuṭṭhānappattā hānāya saṃvattantīti yujjati desanā yuttā kathāti, evam sabbattha yojetabbaṃ. Avitakkasahagatā saññāmanasikārā nāma saha upacārena dutiyajjhānadhammā, ārammaṇakaraṇattho hettha sahaṅgata-saddo. **Hānāyāti** paṭhamajjhānato parihānāya. **Visesāyāti** dutiyajjhānāya. Iminā nayena tattha tattha hānanti, visesoti ca vuttadhammā veditabbā. **Vitakkavicārasahagatāti** paṭhamajjhānadhammā, kāmāvacaradhammā eva vā. **Upekkhāsukhasahagatāti** upacārena saddhiṃ dutiyajjhānadhammā, tatramajjhattupekkhā hi idha upekkhāti adhippetā. **Pītisukhasahagatāti** saha upacārena tatiyajjhānadhammā. **Upekkhāsati**parisuddhisahagatāti catutthajjhānadhammā.

Saññūpacārāti paṭusaññākiccaṃ karontā eva ye keci cittuppādā, “ākiñcaññāyatanadhammā”tipi vadanti. **Saññāvedayitanirodhasahagatāti** “saññāvedayitanirodham upasampajja viharissāmī”ti tassa parikammavasena pavattadhammā. Te pana yasmā nevasaññānāsaññāyatanasamāpattiyam ṭhiteneva sakkā saññāvedayitanirodham upasampajja viharitum, na tato parihīnena, tasmā nevasaññānāsaññāyatanasamāpattiyā hānāya saṃvattantīti na yuttā kathā. Visesāya saṃvattantīti pana yuttā kathāti āha – **“hānāya...pe... desanā”**ti. **Kallatāparicīti**ti samatthabhāvena paricītiṃ, yathāvuttasamāpattīsu vasibhāvena paricītiṃ attho. Tenevāha – **“abhinīhāraṃ khamatī”**ti. Sesam sabbaṃ uttānameva.

Api cettha appaṭikkūlasaññāmukhena kāmaccchando vañcetīti yujjati. Paṭikkūlasaññāpatirūpatāya byāpādo vañcetīti yujjati. Samādhimukhena thinamiddham vañcetīti yujjati. Vīriyārambhamukhena uddhaccaṃ vañcetīti yujjati. Sikkhākāmatāmukhena kukkucçaṃ vañcetīti yujjati. Ubhayapakkhasantīraṇamukhena vicikicchā vañcetīti yujjati. Itthāniṭṭhasamupekkhanamukhena sammoho vañcetīti yujjati. Attaññutāmukhena attani aparibhavane māno vañcetīti yujjati. Vīmaṃsāmukhena hetupatirūpakapariggahena micchādīṭṭhi vañcetīti yujjati. Virattatāpatirūpakena sattesu adayāpannatā vañcetīti yujjati. Anuññātaṭṭhisevanapatirūpatāya kāmasukhallikānuyogo vañcetīti yujjati. Ājīvapārisuddhipatirūpatāya asaṃvibhāgasīlatā vañcetīti yujjati. Saṃvibhāgasīlatāpatirūpatāya micchājīvo vañcetīti yujjati. Asaṃsaggavihāritāpatirūpatāya asaṅgahasīlatā vañcetīti yujjati. Saṅgahasīlatāpatirūpatāya ananulomikasamṣaggo vañcetīti yujjati. Saccavādītāpatirūpatāya piṣuṇavācā vañcetīti yujjati. Apisuṇavādītāpatirūpatāya anattakāmatā vañcetīti yujjati. Piyavādītāpatirūpatāya cātukamyatā vañcetīti yujjati. Mītabhānītāpatirūpatāya asaṃmodanasīlatā vañcetīti yujjati. Saṃmodanasīlatāpatirūpatāya māyā sātṭheyyaṅca vañcetīti yujjati. Niggayhavādītāpatirūpatāya pharusavācatā vañcetīti yujjati. Pāpagarahītāpatirūpatāya paravajjānupassitā vañcetīti yujjati. Kulānuddhayatāpatirūpatāya kulamacchariyaṃ vañcetīti yujjati. Āvāsaciraṭṭhitikāmatāmukhena āvāsamacchariyaṃ vañcetīti yujjati. Dhammaparibandhapariharaṇamukhena dhammacchariyaṃ vañcetīti yujjati. Dhammadesanābhiratimukhena bhassārāmatā vañcetīti yujjati. Apharusavācatāgaṇānuggahakaraṇamukhena saṅgaṇikārāmatā vañcetīti yujjati. Puññakāmatāpatirūpatāya kammārāmatā vañcetīti yujjati. Saṃvegapatirūpena cittasantāpo vañcetīti yujjati. Saddhālūtāpatirūpatāya aparikkhatā vañcetīti yujjati. Vīmaṃsanāpatirūpena assaddhiyaṃ vañcetīti yujjati. Attādhīpateyyapatirūpena garūnaṃ anusāsaniyā appadakkhiṇaggāhitā vañcetīti yujjati. Dhammādhīpateyyapatirūpena sabrahmacārīsu agāraṃ vañcetīti yujjati. Lokādhīpateyyapatirūpena attani dhamme ca paribhavo vañcetīti yujjati. Mettāyanāmukhena rāgo vañcetīti yujjati. Karuṇāyanāpatirūpena soko vañcetīti yujjati. Muditāvīhārapatirūpena pahāso vañcetīti yujjati. Upekkhāvīhārapatirūpena kusalesu dhammesu nikkhattachandatā vañcetīti yujjati. Evaṃ āgamapatirūpakaadhigamapatirūpakādīnampi tathā tathā vañcanasabhāvo yuttito veditabbo. Evaṃ āgamānusārena yuttigavesanā kātabbāti.

Yuttihāravibhaṅgavaṇṇanā niṭṭhitā.

4. Padaṭṭhānahāravibhaṅgavaṇṇanā

22. Tattha katamo padaṭṭhāno hārotiādi padaṭṭhānahāravibhaṅgo. Tattha yasmā “idaṃ imassa padaṭṭhānaṃ, idaṃ imassa padaṭṭhāna”nti tesam tesam dhammānaṃ padaṭṭhānabhūtaḍḍhammavibhāvanalakkhaṇo padaṭṭhāno hāro, tasmā pavattiyā mūlabhūtaṃ avijjāṃ ādiṃ katvā sabhāvadhammānaṃ padaṭṭhānaṃ āsannakāraṇaṃ niddhārento avijjāya sabhāvaṃ niddisati “**sabbadhammayāthāvasampañivedhalakkhaṇā avijjā**”ti. Tassattho – sabbesaṃ dhammānaṃ aviparītasabhāvo na sampañivijjhīyati etenāti sabbadhammayāthāvasampañivedho. So lakkhaṇaṃ etissāti sā tathā vuttā. Etena dhammasabhāvappaṭicchādanalakkhaṇā avijjāti vuttaṃ hoti. Atha vā sammā paṭivedho sampañivedho. Tassa paṭipakkho asampañivedho. Kattha pana so sampañivedhassa paṭipakkhoti āha – “sabba...pe... lakkhaṇā”ti. Yasmā pana asubhe subhantiādivipallāse sati tattha sammoho uparūpari jāyatiyeva na hāyati, tasmā “**tassā vipallāsā padaṭṭhāna**”nti vuttaṃ.

Piyarūpaṃ sātārūpanti piyāyitabbajātiyaṃ itthajātiyaṅca padaṭṭhānaṃ. “Yaṃ loke piyarūpaṃ sātārūpaṃ etthesā taṅhā uppajjamānā uppajjati”ti (dī. ni. 2.400; ma. ni. 1.133; vibha. 203) hi vuttaṃ. **Adinnādānanti** adinnādānacetanā. Sā hi ekavāraṃ uppannāpi anādīnavadassitāya lobhassa uppattikāraṇaṃ hotīti tassa padaṭṭhānaṃ vuttaṃ. Dosassa pāṇātipāto padaṭṭhānaṃ, mohassa micchāpaṭipadā padaṭṭhānanti etthāpi imināva nayena attho veditabbo.

Vaṇṇasaṅghānabyañjanaggahaṇalakkhaṇāti nimittānubyañjanaggahaṇalakkhaṇā. Sukhasaññāya phassassa upagamānalakkhaṇatā phassapaccayatā vuttā. “Phuṭṭho sañjānāti”ti (saṃ. ni. 4.93) hi vuttaṃ. **Assādoti** taṅhā. Saṅkhatalakkhaṇāni uppādavayaññathattāni. Yebhuyyena niccaggahaṇaṃ viññāṇādhīnanti niccasaññāya viññāṇapadaṭṭhānatā vuttā. Tathā hi so bhikkhu taṃyeva viññāṇaṃ

sandhāvati saṃsaratīti viññāṇavisayameva attano niccaggāhaṃ pavedesi. Pañcannaṃ khandhānaṃ yadi aniccatā dukkhatā ca sudiṭṭhā, attasaññā sukhasaññā anavakāsāti āha – “**aniccasaññādukkhasaññāasamanupassanalakkhaṇā attasaññā**”ti. “Yadaniccaṃ taṃ dukkhaṃ, yaṃ dukkhaṃ tadanattā”ti (saṃ. ni. 3.15) hi vuttaṃ.

Yebhuyyena attābhiniveso arūpadhammesūti āha – “**tassā nāmakāyo padaṭṭhāna**”nti. **Sabbaṃ neyyanti** cattāri saccāni catusaccavinimuttassa ñeyyassa abhāvato. **Cittavikkhepaṭisaṃharaṇaṃ** uddhaccavikkhambhanaṃ. **Asubhāti** asubhānupassanā, paṭibhāganimittabhūtā asubhā eva vā, taṇhāpaṭipakkhattā samathassa asubhā padaṭṭhānanti vuttaṃ. Abhijjhāya tanukaraṇato adinnādānāveramaṇī alobhassa padaṭṭhānanti vuttā. Tathā byāpādassa tanukaraṇato pāṇātipātāveramaṇī adosassa padaṭṭhānanti vuttā. **Vatthuavippaṭipatti** visayasabhāvapaṭivedho, **sammāpaṭipatti** sīlasamādhisampadānaṃ nibbidāññāna anabhiratiññānameva vā tathā pavattaṃ. Sabbāpi vedanā dukkhadukkhatādibhāvato dukkhanti katvā vuttaṃ – “dukkhasaññāya vedanā padaṭṭhāna”nti. **Dhammasaññāti** dhammamattanti saññā.

Sattānaṃ kāye avītarāgatā pañcannaṃ ajjhattikāyatanānaṃ vasena hotīti āha – “**pañcindriyāni rūpīni rūparāgassa padaṭṭhāna**”nti. Kāyo hi idha rūpanti adhippeto. Visesato jhānanissayabhūte manāyatane ca nikanti hotīti āha – “**chaṭṭhāyatanam bhavarāgassa padaṭṭhāna**”nti. Edisaṃ mā rūpaṃ nibbattatu, mā edisī vedanāti evaṃ pavattā rūpādiabhinandanā **nibbattabhavānupassitā**. **Ñānadassanassāti** kammassakataññānadassanassa. Yonisomanasikāravato hi pubbenivāsānussati kammassakataññāṇassa kāraṇaṃ hoti, na ayoniso ummujjantassa. Imassa ca atthassa vibhāvanatthaṃ **mahānāradakassapajātakaṃ** (jā. 2.22.1153 ādayo), **brahmajāle** (dī. ni. 1.38 ādayo) ekaccasassatavādo ca udāharitabbo. “**Okappanalakkhaṇā**”tiādīnā saddhāpasādānaṃ visesaṃ dasseti. So pana saddhāyayeva avatthāviseso daṭṭhabbo. Tattha **okappanaṃ** saddahanavasena ārammaṇassa ogāhaṇaṃ nicchayo. **Anāvilatā** assaddhiyāpagamena cittassa akālussiyatā. **Abhipatthiyanā** saddahanameva. **Aveccapasādo** paññāsahito āyatanagato abhippasādo. **Apilāpanaṃ** asammoso nimujjitvā viya ārammaṇassa ogāhaṇaṃ vā, ettha ca saddhādīnaṃ pasādasaddhāsammappadhānasatipaṭṭhānajhānaṅgāni yathākkamaṃ padaṭṭhānanti vadantena avatthāvisesavasena padaṭṭhānabhāvo vuttoti daṭṭhabbaṃ. Satisamādhīnaṃ vā kāyādayo satipaṭṭhānāti. Vitakkādayo ca jhānānīti padaṭṭhānabhāvena vuttā.

Assādamanasikāro saṃyojanīyesu dhammesu assādānupassitā. **Punabbhavavirohaṇāti** punabbhavāya virohaṇā, punabbhavanibbattanārahataṃ vipākadhammatāti attho. **Opapaccayikanibbattilakkhaṇanti** upapattibhavabhāvena nibbattanasabhāvaṃ. **Nāmakāyarūpakāyasaṅghātalakkhaṇanti** arūparūpakāyānaṃ samūhiyabhāvaṃ. **Indriyavavatthānanti** cakkhādīnaṃ channaṃ indriyānaṃ vavatthitabhāvo. **Opapaccayikanti** upapattikkhandhanibbattakaṃ. **Upadhīti** attabhāvo. Attano piyassa maraṇaṃ cintentassa bālassa yebhuyyena soko uppajjatīti maraṇaṃ sokassa padaṭṭhānanti vuttaṃ. **Ussukkaṃ** cetaso santāpo. **Odahananti** avadahanam. Attano nissayassa santapanameva bhavassāti vuttaṃ bhavaṃ dassetuṃ “**imāni**”tiādi vuttaṃ. Tattha bhavassa āṅgāni bhavaṣaṅkhātāni ca āṅgāni bhavaṅgāni. Tesu kilesā bhavassa āṅgāni. Kammavipākavaṭṭaṃ bhavaṣaṅkhātāni āṅgāni. **Samaggānīti** sabbāni. Khandhāyatanādīnaṃ aparāparuppattisaṃsaraṇaṃ saṃsāro. Tassa purimapurimajātiniṭṭhannaṃ kilesādivaṭṭaṃ kāraṇanti āha – “**bhavo saṃsārassa padaṭṭhāna**”nti. Sampāpakahetubhāvaṃ sandhāya “maggo nirodhassa padaṭṭhāna”nti vuttaṃ.

Kammaṭṭhānogaṅhakassa otaraṇaṭṭhānatāya bahussuto titthaṃ nāma, tassa sammāpayirupāsanaṃ **titthaññutā**. Dhammūpasañhitaṃ pāmojjaṃ pītaṃ nāma, sappāyadhammassavanena taṃ uppādetvā kammaṭṭhānassa brūhanā **pītaññutā**, bhāvanāya thokampi layāpattiyā uddhampattiyā ca jānanā **pattaññutā**. Attano pañcahi padhāniyaṅgehi samannāgatassa jānanā **attaññutā**, tesu purimānaṃ purimānaṃ pacchimassa pacchimassa padaṭṭhānabhāvo suviññeyyo eva. Katapuññasseva patirūpadesavāso sambhavati, na itarassāti “**pubbekatapuññatā patirūpadesavāsassa padaṭṭhāna**”nti vuttaṃ. **Yathābhūtaññānadassanaṃ** saha adhiṭṭhānena taruṇavipassanā. **Nibbidāti** balavavipassanā. **Virāgoti** maggo. **Vimuttīti** phalaṃ. **Evanti** yadidaṃ “tassā vipallāsā padaṭṭhāna”ntiādīnā avijjādīnaṃ

padaṭṭhānaṃ dassitaṃ, iminā nayena athāpi yo koci upanissayo balavapaccayoti yo koci avasesapaccayo, **sabbo so padaṭṭhānaṃ** kāraṇanti veditabbaṃ. “Evaṃ yā kāci upanisā yogato ca paccayato cā”ṭipi paṭhanti. Tattha **upanisāti** kāraṇaṃ, **yogatoti** yuttito, **paccayatoti** paccayabhāvamattatoti attho veditabbo. Yaṃ panettha atthato na vibhattaṃ, taṃ suviññeyyameva.

Padaṭṭhānahāravibhaṅgavaṇṇanā niṭṭhitā.

5. Lakkhaṇahāravibhaṅgavaṇṇanā

23. Tattha katamo lakkhaṇo hārotiādi lakkhaṇahāravibhaṅgo. Tattha **kiṃ lakkhayatīti** lakkhaṇahārasa visayaṃ pucchati. “**Ye dhammā**”tiādinā lakkhaṇahāraṃ saṅkhepato dassetvā taṃ udāharaṇehi vibhajitum “**cakkhu**”ntiādi āradhamaṃ. Tattha “**vadhakaṭṭhena ekalakkhaṇāni**”ti iminā anavaṭṭhitabhāvādināpi ekalakkhaṇatā vuttā evāti daṭṭhabbaṃ.

Evaṃ āyatanavasena ekalakkhaṇataṃ dassetvā idāni khandhādivasena dassetum “**atīte, rādha, rūpe anapekkho hoti**”tiādi suttaṃ ābhattaṃ. **Yamakovādasutte** (saṃ. ni. 3.85) **vadhakaṭṭhena ekalakkhaṇā vuttāti** tasmiṃ sutte “vadhakaṃ rūpaṃ vadhakaṃ rūpanti yathābhūtaṃ nappajānātī”tiādinā āgatattā vuttam. **Itīti** evaṃ, imissaṃ gāthāyaṃ kāyagatāya satiyā vuttāya sati vedanāgatā sati cittaगतā sati dhammagatā ca sati vuttā bhavati satipaṭṭhānabhāvena ekalakkhaṇattāti adhippāyo. **Diṭṭhanti**ādināṃ atthaṃ parato vaṇṇayissāma.

Kāye kāyānupassī viharāhīti ettha **kāyeti** rūpakāye. Rūpakāyo hi idha aṅgapaccāṅgānaṃ kesādināna samūhaṭṭhena kāyoti adhippeto. Yathā ca samūhaṭṭhena, evaṃ kucchitānaṃ āyatṭhena. Kucchitānaṃhi paramajegucchānaṃ so āyoti **kāyo, āyoti** uppattideso. Tatrāyaṃ vacanatto – āyanti tatoti āyo. Ke āyanti? Kucchitā kesādayo, iti kucchitānaṃ āyoti kāyo.

Kāyānupassīti kāyaṃ anupassanasīlo, kāyaṃ vā anupassamāno. “Kāye”ti ca vatvā puna “kāyānupassī”ti dutiyaṃ kāyaggahaṇaṃ asammissato vavatthānaghanavinibbhogādidassanattamaṃ. Tena na kāye vedanānupassī cittadhammānupassī vā, atha kho kāyānupassī evāti kāyasāṅkhāte vatthusmiṃ kāyānupassanākārasseva dassanena asammissato vavatthānaṃ dassitaṃ hoti. Tathā na kāye aṅgapaccāṅgavinimuttaekadhammānupassī, nāpi kesalomādivinimuttaitthipurisānupassī.

Yopi cettha kesalomādiko bhūtopādāyasamūhasāṅkhāto kāyo, tatthapi na bhūtopādāyavinimuttaekadhammānupassī, atha kho rathasambhārānupassako viya aṅgapaccāṅgasamūhānupassī, nagarāvayavānupassako viya kesalomādisamūhānupassī, kadalikkhandhapattavaṭṭivinihbhujjako viya rittamuṭṭhivinihveṭṭhako viya ca bhūtopādāyasamūhānupassī evāti nānappakārato samūhasaseneva kāyasāṅkhātassa vatthuno dassanena ghanavinibbhogo dassito hoti. Na hettha yathāvuttasamūhavinimutto kāyo vā añño vā koci dhammo dissati, yathāvuttadhammasamūhamatte eva pana tathā tathā sattā micchābhinivesaṃ karonti. Tenāhu porāṇā –

“Yaṃ passati na taṃ diṭṭhaṃ, yaṃ diṭṭhaṃ taṃ na passati;
Apassaṃ bajjhate mūlho, bajjhamāno na muccatī”ti. (dī. ni. aṭṭha. 2.373; ma. ni. aṭṭha. 1.106; paṭi. ma. aṭṭha. 1.1.36; mahāni. aṭṭha. 3);

Ghanavinibbhogādidassanattanti ādisaddena ayamatto veditabbo. Ayaṃhi etasmiṃ kāye kāyānupassīyeva, na aññadhammānupassī.

Idaṃ vuttam hoti – yathā anudakabhūṭāyapi marīciyā udakānupassino honti, na evaṃ aniccadukkhanattaasubhabhūte eva imasmiṃ kāye niccasukhaattasubhabhāvānupassī, atha kho kāyānupassī aniccadukkhaanattaasubhākārasamūhānupassīti attho. Atha vā yvāyaṃ **mahāsatiपाṭṭhāne**

(dī. ni. 2.374 ādayo) assāsapassāsādicuṇṇikajātaatṭhikapariyosāno kāyo vutto, yo ca “idhekacco pathavīkāyaṃ aniccato anupassati, āpokāyaṃ tejokāyaṃ vāyokāyaṃ kesakāyaṃ...pe... atṭhimiñjakāya”nti **paṭisambhidāyaṃ** (paṭi. ma. 3.34 ādayo) kāyo vutto, tassa sabbassa imasmimīyeva kāye anupassanato kāye kāyānupassīti evampettha attho daṭṭhabbo.

Atha vā kāye ahanti vā mamanti vā gahetabbassa kassaci ananupassanato, tassa pana kesalomādīkassa nānādhammasamūhassa anupassanato kāye kesādīdhammasamūhasaṅkhāte kāyānupassīti attho daṭṭhabbo. Api ca “imasmimī kāye aniccato anupassati no niccato”tiādīnā anukkamena **paṭisambhidāyaṃ** (paṭi. ma. 3.34 ādayo) āgatanayassa sabbasseva aniccalakkhaṇādīkassa ākārasamūhasaṅkhātassa kāyassa anupassanato kāye kāyānupassīti attho.

Viharāhīti vattāhi. **Ātāpīti** tīsu bhavesu kilese ātāpetīti ātāpo, so assa atthīti ātāpī. **Sampajānoti** sampajāññasaṅkhātena ñāṇena samannāgato. **Satimāti** kāyapariggāhikāya satiyā samannāgato. Ayamā pana yasmā satiyā ārammaṇaṃ pariggahetvā paññāya anupassati, na hi sativirahitā anupassanā atthi, tenevāha – “satiñca khvāhaṃ, bhikkhave, sabbatthikaṃ vadāmi”ti (saṃ. ni. 5.234). Anātāpino ca anto saṅkoco antarāyakaro hoti, kammatṭhānaṃ na sampajjati. Tasmā yesaṃ dhammānaṃ ānubhāvena taṃ sampajjati, taṃ dassanatthaṃ “ātāpī”tiādī vuttaṃ.

Tattha **vineyyāti** tadaṅgavinayena vā vikkhambhanavinayena vā vinayitvā. **Loketi** tasmimīyeva kāye. Kāyo hi idha lujjanapalujjanaṭṭhena lokoti adhippeto. Abhijjhāggahaṇena cettha kāmaccando, domanassaggahaṇena byāpādo gahitoti nīvaraṇesu balavadhammadvayappahānadassanena nīvaraṇappahānaṃ vuttanti kāyānupassanāsatiṭṭhānaṃ pahānaṅgaṃ dassitaṃ. “Ātāpī”tiādīnā pana sampayogaṅgaṃ dassitanti imamatthaṃ dassetaṃ “ātāpī”tiādī vuttaṃ. Tattha abhijjhādomanassānaṃ samatho ujupaṭipakkhoti abhijjhādomanassavinayo vuccamāno samādhindriyaṃ dīpetīti āha – “**vineyya loke abhijjhādomanassanti samādhindriya**”nti (saṃ. ni. atṭha. 3.5.367). **Ekalakkhaṇattā catunnaṃ indriyānanti** yathā vīriyapaññāsamādhindriyehi kāyānupassanāsatiṭṭhānaṃ ijjhanti, evaṃ vedanācittadhammānupassanāsatiṭṭhānānīpi tehi ijjhantīti catusatiṭṭhānasādhane imesaṃ indriyānaṃ sabhāvabhedābhāvato samānalakkhaṇattā itarāni satipaṭṭhānānīpi vuttāni eva hontīti attho.

24. Idāni satipaṭṭhānesu gahitesu sabbesaṃ bodhipakkhiyadhammānaṃ gahitabhāvaṃ dassetaṃ “**catūsu satipaṭṭhānesū**”tiādī vuttaṃ. Tattha **bodhaṅgamāti** bodhaṃ ariyamaggañānaṃ gacchantīti bodhaṅgamā. Yathāvuttassa bodhassa pakkhe bhavāti **bodhipakkhiyā**. **Neyyānikalakkhaṇenāti** ettha nimittato pavattato ca vuṭṭhānaṃ niyyānaṃ, niyyāne niyuttāti neyyānikā, yathā dovārikoti. Niyyānasaṅkhātaṃ vā phalaṃ arahantīti neyyānikā. Niyyānaṃ payojanaṃ etesanti vā neyyānikā. “Neyyānikā”tipi pāṭho, tattha niyyānaṃ etesaṃ atthīti niyyānikāti attho. “Neyyāniyā”tipi pāṭho, tassa niyyantīti niyyāniyāti attho daṭṭhabbo. Niyyānikalakkhaṇenāti niyyānikasabhāvena.

Evaṃ akusalāpi dhammāti yathā kusalā dhammā ekalakkhaṇabhāvena niddhāritā, evaṃ akusalāpi dhammā ekalakkhaṇaṭṭhena niddhāretabbā. Kathaṃ? Pahānekaṭṭhatāvasenāti dassento “**pahānaṃ abbatthaṃ gacchantī**”ti āha. Idāni taṃ pahānaṃ dassetaṃ “**catūsu satipaṭṭhānesū**”tiādī vuttaṃ. Tattha kāyānupassanādīsu catūsu satipaṭṭhānesu bhāviyamānesu asubhe subhantiādayo cattāro vipallāsā pahīyanti, kabaḷīkārahārādayo cattāro āhārā cassa pariññaṃ gacchanti, tesamā parijānanassa paribandhino kāmāragādayo byantīkatā hontīti attho, kasmā? Tehi pahātabbābhāvena ekalakkhaṇattāti. Evaṃ sabbattha attho yojetabbo. Tenevāha – “evaṃ akusalāpi dhammā ekalakkhaṇattā pahānaṃ abbatthaṃ gacchantī”ti.

Idāni aññenapi pariyāyena lakkhaṇahārassa udāharaṇāni dassetaṃ “**yattha vā panā**”tiādī vuttaṃ. Tattha **yatthāti** yassaṃ desanāyaṃ. **Vā**-saddo vikappattho. **Panāti** padapūraṇo. **Rūpindriyanti** ruppanasabhāvaṃ aṭṭhavidhaṃ indriyaṃ. **Tatthāti** tassaṃ desanāyaṃ. **Rūpadhātūti** ruppanasabhāvā dasa dhātuyo. **Rūpāyatananti** ruppanasabhāvaṃ dasāyatanamā, rūpīni dasāyatanānīti attho. Ruppanalakkhaṇena ekalakkhaṇattā imāni desitānīti adhippāyo. Desitaṃ tattha sukhindriyaṃ

somanassindriyaṃ sukhavedanābhāvena ekalakkhaṇattāti adhippāyo.

Dukkhasamudayo ca ariyasaccanti idaṃ akusalassa somanassassa vasena vuttaṃ, sāsavakusalassāpi vasena yujjati eva. Sabbo ca paṭiccasamuppādo desitoti sambandho. Avijjānusayitattā adukkhamasukhāya vedanāya. Vuttañhetuṃ – “adukkhamasukhāya vedanāya avijjānusayo anuseti”ti (ma. ni. 1.465). Tathā ca vuttaṃ “**adukkhamasukhāya hi vedanāya avijjā anuseti**”ti. Etena adukkhamasukhāvedanāggahaṇena avijjā gahitāti dasseti. Sati ca avijjāggahaṇe sabbo paṭiccasamuppādo desitoti dassetuṃ “**avijjāpaccayā saṅkhārā**”tiādi vuttaṃ. **So cāti** ettha **ca**-saddo byatirekattho, tena so paṭiccasamuppādo anulomapaṭilomavasena duvidhoti imaṃ vakkhamānavisesaṃ joteti. Tesu anulomato paṭiccasamuppādo yathādassito sarāgasadosasamohasaṃkilesapakkhena hātabboti vutto, paṭilomato pana paṭiccasamuppādo yo “avijjāyatveva asesavirāgaṇirodhā”tiādinā **pāliyaṃ** (ma. ni. 3.126; mahāva. 1) vutto, taṃ sandhāya “**vītarāgavītadosavītamohaariyadhammehi hātabbo**”ti vuttaṃ.

Idāni ekalakkhaṇatāvibhāvanena lakkhaṇahārayojanāya nayaṃ dassetuṃ “**evaṃ ye dhammā**”tiādi vuttaṃ. Tattha **kiccatoti** pathavīādīnaṃ phassādīnaṃ rūpārūpadhammānaṃ sandhāraṇasaṅghaṭṭanādīkiccato, tesam tesam vā paccayadhammānaṃ taṃtaṃpaccayuppannadhammassa paccayabhāvasaṅkhātakiccato. **Lakkhaṇatoti** kakkhaḷaphusanādisabhāvato. **Sāmaññatoti** ruppananamaṇādito aniccatādito khandhāyatanādito ca. **Cutūpapātati** saṅkhatadhammānaṃ bhaṅgato uppādato ca, samānanirodhato samānuppādato cāti attho. Ettha ca saha caraṇaṃ samānahetutā samānaphalatā samānabhūmitā samānavisayatā samānārammaṇatāti evamādayopi **ca**-saddena saṅgahitāti daṭṭhabbaṃ. Sesam uttānatthameva.

Lakkhaṇahāravibhaṅgavaṇṇanā niṭṭhitā.

6. Catubyūhahāravibhaṅgavaṇṇanā

25. Tattha katamo catubyūho hāroti catubyūhahāravibhaṅgo. Tattha **byañjanena suttassa neruttaṅca adhippāyo ca nidānaṅca pubbāparasandhi ca gavesitabboti** saṅkhepena tāva catubyūhaṃ dasseti. “**Byañjanenā**”ti iminā hārānaṃ suttassa byañjanavicayabhāvato byañjanamukheneva ete catubyūhahārapadattā niddhāretabbāti dasseti. **Neruttanti** niruttaṃ nibbacananti attho. Niruttameva neruttaṃ. Tenevāha – “**yā niruttipadasaṃhitā**”ti. Tassattho – yā nirutti, idaṃ neruttaṃ. Kā pana sā nirutti? Padasaṃhitāti padesu saṃhitā yuttā, liṅgavacanakālasādhanapurisādivisesayogena yo yo attho yathā yathā vattabbo, tathā tathā pavattasabhāvaniruttīti attho. Tathā hi vuttaṃ “**yaṃ dhammānaṃ nāmaso ñāṇa**”nti.

Tattha **yanti** hetuatthe nipāto, yāya kāraṇabhūtāyāti attho. **Dhammānanti** ñeyyadhammānaṃ. **Nāmasoti** pathavī phasso khandhā dhātu tisso phussoti evamādināmavisesena ñāṇaṃ pavattati, ayaṃ sabhāvanirutti nāma. Pathavīti hi evamādikam saddaṃ gahetvā tato paraṃ saṅketadvārena tadatthapaṭipatti taṃtaṃmaniyatanāmapaññattiggahaṇavaseneva hotīti. Atha vā padasaṃhitāti padena saṃhitā. Padato hi padatthāvabodho. So panassa atthe pavattinimittabhūtāya paññattiyā gahitāya eva hotīti sā pana paññatti niruttisaṅkhātapadena saṃhitā padatthaṃ bodhetīti padasaṃhitāti vuttā. “**Yadā hi bhikkhū**”tiādinā “dhammānaṃ nāmaso ñāṇa”nti padassa atthaṃ vivarati.

Tattha **atthassāti** saddābhidheyyassa atthassa. **Nāmaṃ jānātīti** nāmapaññattivaseṇa ayaṃ nāmāti nāmaṃ jānāti. **Dhammassāti** sabhāvadhammassa. **Tathā tathā naṃ abhiniropetīti** yo yo attho dhammo ca yathā yathā ca voharitabbo, tathā tathā naṃ nāmaṃ vohāraṃ abhiniropeti desetīti attho. Ettāvata ca ayaṃ bhikkhu atthakusalo yāva anekādhivacanakusaloti vuccatīti sambandhitabbaṃ.

Tattha **atthakusaloti** pāliatthe kusalo. **Dhammakusaloti** pāliyaṃ kusalo. **Byañjanakusaloti** akkharesu ca vākyesu ca kusalo. **Niruttikusaloti** nibbacane kusalo. **Pubbāparakusaloti** desanāya pubbāparakusaloti. **Desanākusaloti** dhammassa desanāya kusalo. **Atītādhivacanakusaloti**

atītapaññattikusalo. Esa nayo sesesupi. **Evam sabbāni kātabbāni, janapadaniruttānīti** yattakāni sattavohārapadāni, tāni sabbāni yathāsambhavaṃ sutte nibbanavasena kātabbāni vattabbānīti attho. **Sabbā ca janapadaniruttiyoti** sabbā ca lokasamaññāyo yathārahaṃ kātabbā. “Samaññaṃ nātidhāveyyā”ti hi vuttaṃ. Tathā hi sammutisaccamukheneva paramatthasaccādighamo hotīti.

26. Adhippāyakaṇḍe anuttānaṃ nāma natthi.

27. Nidānakaṇḍe **iminā vatthunāti** iminā puttagavādikittanasāṅkhātena kāraṇena. Kāraṇañhettha vatthu nidānanti ca vuttaṃ. Iminā nayena sabbattha nidānaniddhāraṇaṃ veditabbaṃ.

Kāmandhāti kilesakāmena andhā. **Jālasāṅchannāti** taṅhājālapaliguṅṅhitā. **Taṅhāchadanachādītīti** taṅhāsāṅkhātena andhakārena pihitā. **Bandhanābaddhāti** kāmaguṇasāṅkhātena bandhanena baddhā. “Pamattabandhanā”tipi pāṭho, pamādenāti attho. **Pubbāparenāti** pubbena vā aparena vā desanantarenāti adhippāyo. **Yujjātīti** yogaṃ upeti, sametīti attho. **Imehi padehi pariyuṭṭhānehīti** imehi yathāvuttehi gāthāpadehi taṅhāpariyuṭṭhānadīpakehi. **Sāyeva taṅhāti** yā purimagāthāya vuttā, sāyeva taṅhā. “**Yañcāhā**”tiādīnā dvinnampī gāthānaṃ atthasamsandanena pubbāparaṃ vibhāveti. **Payogenāti** samudācārena. **Tasmāti** yattha sayāṃ uppannā, taṃ santānaṃ nissarituṃ adentī nānārammaṇehi palobhayamānā kilesehi cittaṃ pariyādāya tiṭṭhati. Tasmā kilesavasena ca pariyuṭṭhānavasena ca taṅhābandhanaṃ vuttā.

Papañcenti saṃsāre ciraṃ ṭhapentīti **papañcā**. Tiṭṭhanti etāhīti **ṭhitī**. Bandhanaṭṭhena sandānaṃ viyāti **sandānaṃ**. Nibbānanagarappavesassa paṭisedhanato palighaṃ viyāti **palighaṃ**. Anavasesataṅhāpahānena **nittaṅho**. Attahitaparahitānaṃ idhalokaparalokānañca munanato **munīti** evaṃ gāthāya padattho veditabbo. Papañcādiatthā pana **pāḷiyāṃ** vibhattā evāti. Tattha yassete papañcādayo abbhatthaṃ gatā, tassa taṅhāya lesopi na bhavati. Tena vuttaṃ – “**yo etaṃ sabbāṃ samatikkanto, ayaṃ vuccati nittaṅho**”ti.

28. **Pariyuṭṭhānanti** “taṅhāya pariyuṭṭhāna”nti vuttāni taṅhāvicarītāni. **Sāṅkhārāti** “tadabhisaṅkhatā sāṅkhārā”ti vuttā taṅhādīṭṭhimānāhetukā sāṅkhārā. Te pana yasmā sattuṃ javanacetanāsu paṭhamacetanā sati paccayasamavāye imasmimīyeva attabhāve phalaṃ deti. Pacchimacetanā anantare attabhāve. Ubhinnaṃ vemajjhacetanā yattha katthaci phalaṃ deti, tasmā vipaccanokāsavasena vibhajitvā dassetuṃ “**diṭṭhadhammavedanīyā vā**”tiādi vuttaṃ. Yasmā pana taṃtaṃcetanāsampayuttā taṅhāpi cetanā viya diṭṭhadhammavedanīyādivasena tidhā hoti, tasmā vuttaṃ – “**evaṃ taṅhā tividhaṃ phalaṃ detī**”ti. **Pubbāparena yujjātīti** yaṃ pubbaṃ purimaṃ sāṅkhārānaṃ diṭṭhadhammavedanīyatādivacanāṃ vuttaṃ, taṃ iminā aparena kammassa diṭṭhadhammavedanīyatādivacanena yujjati gaṅgodakaṃ viya yamunodakena saṃsandati sametīti attho.

Sāṅkhārā dassanabalenāti catūsu diṭṭhigatasampayuttesu vicikicchāsampayutte cāti pañcasu cittuppādesu sāṅkhārā paṭhamamaggapaññābalena. **Chattimsa taṅhāvicarītāni bhāvanābalenāti** paṭhamamaggena pahīnāvasesavasena vuttaṃ, na sabbesaṃ vasena.

Anubandhoti taṅhādīnaṃ anuppabandhena pavatti. **Yo cāpi papañcoti**ādīnā “papañcetī”tiādīnā vuttaṃ **rādhasuttañcāsaṃsandati**. Tenevāha – “**idaṃ ekattha**”nti. Yādipi atthato ekaṃ, desanāya pana viseso vijjātīti dassetuṃ “**api cā**”tiādi vuttaṃ. **Evanti** iminā vuttappakārena. **Suttenāti** saṃvaṇṇīyamānena suttena. **Suttanti** suttantaraṃ. **Saṃsandayitvāti** vimissitvā atthato abhinnaṃ katvā. **Pubbāparena saddhiṃ yojayitvāti** pubbena vā aparena vā suttena saddhiṃ atthato sambandhaṃ yojetvā. Vuttamevatthaṃ pākāṭaṃ karoti tena suttassa attho niddiṭṭho hoti vitthārīto suttantaradassanena.

Na kevalaṃ suttantarasamsandanameva pubbāparasandhi, atha kho aññopi atthīti dassetuṃ “**so cāya**”ntiādi vuttaṃ. Tattha **atthasandhīti** kiriyākārakādivasena atthassa sambandho. So pana yasmā sāṅkāsānādīnaṃ channaṃ atthapadānaṃyeva hoti, sabbassāpi padatthassa tadavarodhato.

Sambandho ca nāma na koci attho. Tasmā “**atthasandhi chappadānī**”tiādi vuttaṃ.
Byañjanasandhī padassa padantarena sambandho. Yasmā pana sabbampi nāmādiṭṭhādaṃ chahi
 byañjanapadehi asaṅgahitaṃ nāma natthi, tasmā “**byañjanasandhi chappadānī**”tiādi vuttaṃ.

Desanāsandhī yathāvuttadesanantarena desanāya saṃsandanaṃ. **Na ca pathaviṃ nissāyāti**
 pathaviṃ visayasāṅkhātāṃ nissayaṃ katvā, pathaviṃ ālambitvāti attho. **Jhāyīti** phalasaṃpattijhānena
 jhāyī. So hi sabbasaṅkhāraṇissaṭṭhaṃ nibbānaṃ ālambitvā samāpajjanavasena jhāyati, na pathaviṃ nissāya
 jhāyatīti vutto. Sesapadesupi eseva nayo. Ettha ca catūhi mahābhūtehi rūpappaṭibaddhavuttitāya sabbo
 kāmabhavo rūpabhavo ca gahitā. Arūpabhavo pana sarūpeneva gahitoti sabbaṃ lokaṃ pariyādiyitvā puna
 aññenapi pariyāyena taṃ dassetuṃ “**na ca imaṃ loka**”ntiādimāha. Sabbo hi loko idhaloko paraloko cāti
 dveva koṭṭhāsā honti. Yasmā pana “**idhaloko**”ti visesato diṭṭhadhammabhūto sattasantāno vuccati.
 “Paraloko”ti bhavantarasaṅkhepagato sattasantāno tadubhayavinimutto anindriyabaddho rūpasantāno.
 Tasmā taṃ sandhāya “**yamidaṃ ubhayamantarenā**”tiādi vuttaṃ.

Ye pana “ubhayamantarenā”ti vacanaṃ gahetvā antarābhavaṃ icchanti, tesam taṃ micchā.
 Antarābhavo hi abhidhamme paṭikkhittoti. **Diṭṭhanti** rūpāyatanaṃ. **Sutanti** saddāyatanaṃ. **Mutanti** patvā
 gahetabbato gandhāyatanaṃ rasāyatanaṃ phoṭṭhabbāyatanaṃ. **Viññānti** avasiṭṭhaṃ
 dhammārammaṇapariyāpannarūpaṃ. **Pattanti** pariyesitvā vā apariyesitvā vā pattam. **Pariyesitanti** pattam
 vā appattam vā pariyesitam. **Vitakkitaṃ vicāritanti** vitakkanavasena anumajjanavasena ca ālambitam.
Manasānucintitanti cittena anu anu cintitam. **Ayaṃ sadevake...pe... anissitena cittena na ñāyati**
jhāyantoti ayaṃ khīṇāsavo phalasaṃpattijhānena jhāyanto pubbeva taṇhādiṭṭhinissayānaṃ suṭṭhu
 pahīnattā sadevake loke...pe... manussāya yattha katthacipi anissitena cittena jhāyati nāma. Tato eva
 loke kenacipi na ñāyati “ayaṃ idaṃ nāma nissāya jhāyati”ti. Vuttañhetam –

“Namo te purisājañña, namo te purisuttama;
 Yassa te nābhijānāma, kiṃ tvaṃ nissāya jhāyasī”ti. (netti. 104);

Idāni khīṇāsavacittassa katthacipi anissitabhāvaṃ **godhikasuttana** (saṃ. ni. 1.159) **vakkalisuttana**
 (saṃ. ni. 3.87) ca vibhāvetuṃ “**yathā māro**”tiādi vuttaṃ. **Viññānaṃ samanvesantoti** parinibbānato
 uddham viññānaṃ pariyesanto. “**Papañcātīto**”tiādinā adassanassa kāraṇamāha. **Anissitacittā na**
ñāyanti jhāyamānāti na kevalaṃ anupādisesāya nibbānadhātuyā khīṇāsavassa cittagatiṃ mārādayo na
 jānanti, api ca kho saupādisesāyapi nibbānadhātuyā tassa taṃ na jānantīti attho. **Ayaṃ desanāsandhī**
godhikasuttavakkalisuttānaṃ viya suttantānaṃ aññamaññaatthasaṃsandanaṃ desanāsandhi nāma.

Niddesasandhī niddesassa sandhi niddesasandhi, niddesena vā sandhi niddesasandhi. Purimena
 suttassa niddesena tasseva pacchimassa niddesassa, pacchimena vā purimassa sambandhananti attho. Taṃ
 dassetuṃ yasmā bhagavā yebhuyyena paṭhamaṃ vaṭṭam dassetvā pacchā vivaṭṭam dasseti, tasmā
 “**nissitacittā**”tiādi vuttaṃ. Tattha nissitam cittam etesanti **nissitacittā**, puggalā, niddisitabbā
 puggalādhiṭṭhānāya desanāyāti adhippāyo. Dhammādhiṭṭhānāya pana nissitam cittam etthāti **nissitacittā**,
 nissitacittavanto taṇhādiṭṭhinissayavasena pavattā suttapadesā. Sesamettha sabbaṃ pākaṭameva.

Catubyūhahāravibhaṅgavaṇṇanā niṭṭhitā.

7. Āvaṭṭahāravibhaṅgavaṇṇanā

29. Tattha katamo āvaṭṭo hāroti āvaṭṭahāravibhaṅgo. Tattha **ārambhathāti**
 ārambhadhātusaṅkhātāṃ vīriyaṃ karotha. **Nikkamathāti** kosajjapakkhato nikkhantattā
 nikkamadhātusaṅkhātāṃ taduttarivīriyaṃ karotha. **Yuñjatha buddhasāsaneti** yasmā sīlasaṃvaro
 indriyesu guttadvāratā bhojane mattaññutā satisampajaññanti imesu dhammesu patiṭṭhitānaṃ
 jāgariyānuoyogavasena ārambhanikkamadhātuyo sampajjanti, tasmā tathābhūtasamathavipassanāsāṅkhāte

bhagavato sāsane yuttappayuttā hotha. **Dhunātha maccuno senaṃ, naḷāgāraṃva kuñjaroti** evaṃ paṭipajjantā ca tedhātuissarassa maccurājassa vasaṃ satte netīti tassa senāsaṅkhātā abalaṃ dubbalaṃ yathā nāma balūpapanno kuñjaro naḷehi kataṃ agāraṃ khaṇeneva viddhaṃseti, evameva kilesagaṇaṃ dhunātha vidhamatha viddhaṃsethāti attho (saṃ. ni. aṭṭha. 1.1.185).

Idāni yadatthaṃ ayaṃ gāthā nikkhittā, taṃ yojetvā dassetuṃ “**ārambhatha nikkamathāti vīriyassa padaṭṭhāna**”ntiādi vuttaṃ. Tattha **ārambhatha nikkamathāti** idaṃ vacanaṃ **vīriyassa padaṭṭhānaṃ** vīriyapayogassa kāraṇaṃ vīriyārambhe niyojanato, “yogā ve jāyatī bhūrī”ti (dha. pa. 282) vacanato yogo bhāvanā. Tattha vipassanābhāvanāya vakkhamānattā samādhībhāvanā idhādhippetāti vuttaṃ – “**yuñjatha buddhasāsaneṭi samādhissa padaṭṭhāna**”nti. “Maccuno sena”nti vuttāya kilesasenāya sammā dhunanaṃ nāṇeneva hotīti āha – “**dhunātha...pe... padaṭṭhāna**”nti. Puna yathāvuttavīriyasamādhīpaññāsampayuttesu ādhipaccakicatāya papañcappahānasamatthā vaṭṭamūlaṃ chinditvā vivaṭṭaṃ pāpentī cāti dassanattaṃ “**ārambhatha nikkamathāti vīriyindriyassa padaṭṭhāna**”ntiādi vuttaṃ. **Imāni padaṭṭhānāni desanāti** “yānimāni vīriyassa padaṭṭhāna”ntiādinā vīriyādīnaṃ padaṭṭhānāni vuttāni, sā ārambhatha nikkamathāti ādidesanā, na vīriyārambhavatthuādīnīti attho. Tathā ceva saṃvaṇṇitaṃ.

Evaṃ yathānikkhittāya desanāya padaṭṭhānavasena atthaṃ niddhāretvā idāni taṃ sabhāgavisabhāgadhamavasena āvaṭṭetukāmo tassa bhūmiṃ dassetuṃ “**ayuñjantānaṃ vā sattānaṃ yoge yuñjantānaṃ vā ārambho**”tiādimāha. Tassattho – yoge bhāvanāyaṃ taṃ ayuñjantānaṃ vā sattānaṃ aparipakkañāṇānaṃ vāsanābhāgena āyatīṃ vijānanattaṃ ayaṃ desanārambho yuñjantānaṃ vā paripakkañāṇānti.

So pamādo duvidhoti yena pamādena bhāvanaṃ nānuyuñjanti, so pamādo attano kāraṇabhedena duvidho. **Aññāṇenāti** pañcannaṃ khandhānaṃ salakkhaṇasāmaññalakkhaṇapaṭicchādakena sammohena. **Nivutoti** chādito. **Ñeyyaṭṭhānanti** ñeyyañca taṃ “iti rūpaṃ, iti rūpassa samudayo”tiādinā ñāṇassa pavattanaṭṭhānañcāti ñeyyaṭṭhānaṃ. Anekabhedattā pāpadhamānaṃ tabbasena anekabhedopi pamādo mūlabhūtāya avijjāya vasena eko evāti āha – “**ekavidho avijjāyā**”ti. Lābhavinicchayapariggahamacchariyāni pariyesanāārakkhāparibhogesu antogadhāni. Chandarāgajjhosānā taṇhā evāti taṇhāmūlakepi dhamme ettheva pakkhipitvā “**tividho taṇhāyā**”ti vuttaṃ.

Rūpīsu bhavesūti rūpadhammesu. **Ajjhosānanti** taṇhābhiniveso. Etena “**taṇhāya rūpakāyo padaṭṭhāna**”nti padassa atthaṃ vivarati. Anādimati hi saṃsāre itthipurisā aññamaññārūpābhīrāmā, ayañcattho **cittapariyādānasuttēna** (a. ni. 1.1-10) dīpetabbo. **Arūpīsu sammohoti** phassādīnaṃ atisukhumasabhāvattā santatisamūhakkiccarammaṇaḥanavinibbhogassa dukkarattā ca arūpadhammesu sammoho, sattānaṃ paṭiṭṭhitoti vacanaseso. Evaṃ niddhārite rūpakāyanāmākāyasaṅkhāte upādānakkhandhapañcake ārammaṇakaraṇavasena pavattaṃ taṇhañca avijjañca avisesena vuttaṃ catupādānānaṃ vasena vibhajitvā tesāṃ khandhānaṃ upādānānañca dukkhasamudayabhāvena sahapariññeyyapahātabbabhāvaṃ dasseti “**tattha rūpakāyo**”tiādinā.

30. Evaṃ pamādamukhena purimasaccadvayaṃ niddhāretvā pamādamukheneva aparampi saccadvayaṃ niddhāretuṃ “**tattha yo**”tiādi vuttaṃ. Tattha **tassāti** tassa pamādassa. **Sampaṭivedhenāti** sammā pari jānanena assādādīnaṃ jānanena. **Rakkhaṇā paṭisaṃharaṇāti** attano cittassa rakkhaṇasaṅkhātā pamādassa paṭisaṃharaṇā, tappaṭipakkhena saṅkocanā appamādānuyogena yā khepanā. **Ayaṃ samathoti** kiccena samādhīṃ dasseti. Ayaṃ vodānapakkhavisabhāgadhamavasena āvaṭṭanā. “**Yadā jānāti kāmānaṃ...pe... ānisaṃsa**”nti iminā samathādhiḡamaṃsa upāyaṃ dasseti.

Tattha **kāmānanti** vatthukāmānañca kilesakāmānañca. **Assādañca assādatoti** kāme paṭicca uppajjamānaṃ sukhasomanassasaṅkhātāṃ assādaṃ assādatāya assādamattato. **Ādīnavanti** “appassādā kāmā bahudukkhā”tiādinā (ma. ni. 1.236) vuttaṃ ādīnavāṃ dosaṃ. **Nissaraṇanti** paṭhamajjhānaṃ.

Vuttañhetam – “kāmānametaṃ nissaraṇaṃ yadidaṃ nekkhamma”nti (itivu. 72). **Okāranti** lāmakabhāvaṃ. **Samkilesanti** samkilissanaṃ. Kāmahetu hi sattā samkilissanti. **Vodānanti** visujjanaṃ. **Nekkhamme ca ānisaṃsanti** nīvaraṇappahānādiguṇavisesayogaṃ. **Tatthāti** tasmim yathāvutte samathe sati. **Yā vīmaṃsāti** yā paññā. “Samāhito, bhikkhave, bhikkhu yathābhūtaṃ pajānāti”ti (saṃ. ni. 5.1071) hi vuttaṃ. Yathā taṇhāsahitāva avijjā saṅkhārānaṃ paccayo, evaṃ avijjāsahitāva taṇhā upādānaṃ paccayo. Tāsu niruddhāsu upādānādīnaṃ abhāvo evāti taṇhāavijjāpahānena sakalavaṭṭadukkhanirodhaṃ dassento “**imesu dvīsu dhammesu pahīnesū**”tiādīmāha. Imāni cattāri saccāni visabhāgasabhāgadhammāvaṭṭanavasena niddhāritānīti adhippāyo.

Evaṃ vodānapakkhaṃ nikkhipitvā tassa visabhāgadhammavasena sabhāgadhammavasena ca āvaṭṭanaṃ dassetvā idāni samkilesapakkhaṃ nikkhipitvā tassa visabhāgadhammavasena sabhāgadhammavasena ca āvaṭṭanaṃ dassetuṃ “**yathāpi mūle**”ti gāthamāha. Tassattho – yathā nāma patiṭṭhāhetubhāvena mūlanti laddhavohāre bhūmigate rukkhassa avayave pharasuchedādiantarāyābhāvena anupaddave tato eva dalhe thire sati khandhe chinnepi assatthādirukkho ruhati, evameva taṇhānusayasaṅkhāte attabhāvarukkhassa mūle maggañāṇapharasunā anupacchinne tayidaṃ dukkhaṃ punappunaṃ aparāparabhāvena nibbattati na nirujjhatīti. Kāmataṇhādīnivaṭṭanaṃ “**bhavataṇhāyā**”ti vuttaṃ. **Etassa dhammassa paccayoti** etassa bhavataṇhāsaṅkhātassa dhammassa bhavesu ādīnavappaṭicchādanādivasena assādaggaṇassa paccayo. Vuttañhetam – “saṃyojanīyesu, bhikkhave, dhammesu assādānupassino taṇhā pavaḍḍhatī”ti (saṃ. ni. 2.57). Tenevāha – “**avijjāpaccayā hi bhavataṇhā**”ti. Idha samatho vipassanā ca maggasamādhī maggapaññā ca adhippetāti āha – “**yena taṇhānusayaṃ samūhanatī**”tiādi. **Imāni cattāri saccānīti** visabhāgasabhāgadhammāvaṭṭanavasena niddhāritānīti. Sesam vuttanayameva.

Idāni na kevalaṃ niddhāriteheva visabhāgasabhāgadhammehi āvaṭṭanaṃ, atha kho pālīagatehipi tehi āvaṭṭanaṃ āvaṭṭahāroti dassanattaṃ “**sabbapāpassa akaraṇa**”nti gāthamāha. Tattha **sabbapāpassāti** sabbākusalassa. **Akaraṇanti** anuppādanaṃ. **Kusalassāti** catubhūmakakusalassa. **Upasampadāti** paṭilābho. **Sacittapariyodāpananti** attano cittavodānaṃ, taṃ pana arahattena hoti. Iti silasaṃvarena sabbapāpaṃ pahāya samathavipassanāhi kusalaṃ sampādetvā arahattaphalena cittaṃ pariyodapetabbanti **etaṃ buddhāna sāsanaṃ** ovādo anusitṭhīti ayaṃ saṅkhepattho, vitthārato pana attho pālito eva viññāyati.

Tattha “**sabbapāpaṃ nāmā**”tiādīsu **dosasamuṭṭhānanti** doso samuṭṭhānameva etassāti dosasamuṭṭhānaṃ, na doso eva samuṭṭhānanti. Lobhasamuṭṭhānāyapi piṣuṇavācāya sambhavato. Kāyaduccaritanti padaṃ apekkhitvā “dosasamuṭṭhāna”nti napuṃsakaniddeso. **Lobhasamuṭṭhānaṃ mohasamuṭṭhānanti** etthāpi eseva nayo. Samphappalāpo uddhaccacittena pavattayatīti adhippāyena tassa mohasamuṭṭhānatā vuttā.

Evaṃ duccharitaakusalakammāpathakammavibhāgena “sabbapāpa”nti ettha vuttapāpaṃ vibhajitvā idānissa akusalamūlavasena agatigamanavibhāgampi dassetuṃ “**akusalamūla**”ntiādi vuttaṃ. Tattha **akusalamūlaṃ payogaṃ gacchantanti** lobhādiakusalāni kāyavacīpayogaṃ gacchantāni, kāyavacīpayogaṃ samuṭṭhāpentānīti attho. **Chandāti** chandahetu. **Yaṃ chandā agatiṃ gacchati, idaṃ lobhasamuṭṭhānanti** chandā agatiṃ gacchatīti yadetam agatigamaṇaṃ, idaṃ lobhasamuṭṭhānanti. Evaṃ sesesupi attho daṭṭhabbo. Ettāvata “sabbapāpassa akaraṇa”nti ettha pāpaṃ dassetvā idāni tassa akaraṇaṃ dassento “**lobho...pe... paññāyā**”ti tīhi kusalamūlehi tiṇṇaṃ akusalamūlānaṃ pahānavasena sabbapāpassa akaraṇaṃ anuppādanamāha. Tathā **lobho upekkhāyāti**ādīnā brahmavihārehi. Tattha aratiṃ vūpasamentī muditā tassā mūlabhūtaṃ mohaṃ pajahatīti katvā vuttaṃ – “**moho muditāya pahānaṃ abbatthaṃ gacchati**”ti.

31. Idāni aññenapi pariyāyena pāpaṃ tassa akaraṇaṇca dassetvā sesapadānaṇca atthavibhāvanamukhena sabhāgavisabhāgadhammāvaṭṭanaṃ dassetuṃ “**sabbapāpaṃ nāma aṭṭha micchattānī**”tiādi vuttaṃ. **Akiriya akaraṇaṃ anajjhācāroti** tīhipi padehi micchattānaṃ

anuppādanameva vadati. Tathā **kiriya karaṇaṃ ajjhācāroti** tīhipi padehi uppādanameva vadati. **Ajjhācāroti** adhiṭṭhahitvā ācaraṇaṃ. **Atītassāti** cirakālapavattivasena purāṇassa. **Maggassāti** ariyamaggassa. Vuttañhetva – “purāṇamaggaṃ purāṇaṃ añjasanti kho ariyassetva aṭṭhaṅgikassa maggassa adhivacana”nti (saṃ. ni. 2.65 atthato samānaṃ). Atītena vā vipassinā bhagavatā yathādhigataṃ desitabhāvaṃ sandhāya “atītassa maggassā”ti vuttaṃ. Vipassino hi ayaṃ bhagavato sammāsambuddhassa pātimokkhuḍdesagāthāti.

Yaṃ paṭivedhenāti yassa pariññābhisamayena. **Yaṃ pariyaḍāpitaṃ, ayaṃ nirodhoti** yadipi asaṅkhatā dhātu kenaci saṅkilesena na saṅkilissati, adhigacchantassa pana puggalassa vasena evaṃ vuttaṃ. Tassa hi yāva saṅkilesā na vigacchanti, tāva asaṅkhatā dhātu aparivaḍāpitaṃ vuccati. Yathā nibbānādhigamena ye khandhā vūpasametabbā, tesam sesabhāvena asesabhāvena ca “saupādisesā”ti ca, “anupādisesā”ti ca vuccati, evaṃsampaḍamidaṃ daṭṭhabbaṃ.

Imāni pāliāgatadhammānaṃ sabhāgavisabhāgadhammāvaṭṭanavasena niddhāritāni cattāri saccāni punapi pāliāgatadhammānaṃ sabhāgavisabhāgadhammāvaṭṭanena āvaṭṭahāraṃ dassetuṃ “**dhammo have rakkhati**”ti gāthamāha. Tassā padattho pubbe vutto eva. **Dhammoti** puññadhammo idhādhippeto. Taṃ vibhajivā dassento “**dhammo nāma duvidho indriyaṣaṃvaro maggo cā**”ti āha. Indriyaṣaṃvarasīna cettha sabbampi sīlaṃ gahitanti daṭṭhabbaṃ. Sabbā upapattiyo **duggati** dukkhadukkhatādiyogena dukkhā gatiyoti katvā. Yathāvutte duvidhe dhamme paṭhamo dhammo yathā suciṇṇo hoti, yato ca so rakkhati, yattha ca paṭiṭṭhāpeti, taṃ sabbam dassetuṃ “**tattha yā saṃvarasīle akhaṇḍakāritā**”tiādi vuttaṃ. Idāni tassa dhammassa apāyato rakkhaṇe ekantikabhāvaṃ vibhāvetuṃ gāmaṇisaṃyutte (saṃ. ni. 4.358) **asibandhakaputtasuttaṃ** ābhatam.

Tattha **evanti** pakārena. **Ca**-saddo sampiṇḍane, imināpi pakārena ayamattho vedittabboti adhippāyo. **Asibandhakaputtoti** asibandhakassa nāma putto. Gāme jeṭṭhakatāya **gāmaṇī**. **Pacchābhūmakāti** pacchābhūmivāsino. **Kāmaṇḍalukāti** sakamaṇḍaluno. **Sevālamālikāti** pātova udakato sevālañceva uppālādīni ca gahetvā udakasuddhibhāvajānanatthaṃ mālaṃ katvā piḷandhanakā. **Udakorohakāti** sāyaṃ pātaṃ udakaṃ oroḥanakā. **Uyyāpentīti** upariyāpenti. **Saññāpentīti** sammā yāpenti. **Saggaṃ nāma okkāmentīti** parivāretvā ṭhitāva “gaccha, bho, brahmalokaṃ, gaccha, bho, brahmaloka”nti vadantā saggaṃ pavesenti.

Anuparisakkeyyāti anuparigaccheyya. **Ummujjāti** utṭhaha. **Uplavāti** jalassa upariplava. **Thalamuplavāti** thalaṃ abhiruha. **Tatra yāssāti** tatra yaṃ assa, yaṃ bhavye. **Sakkharakaṭhalanti** sakkharā vā kaṭhalā vā. **Sā adhogāmī assāti** sā adho gaccheyya, heṭṭhāgāmī bhavye. **Adho gaccheyyāti** heṭṭhā gaccheyya. **Maggassāti** ariyamaggassa. **Tikkhatāti** tikkhatā. Sā ca kho na satthakassa viya nisitakaraṇatā, atha kho indriyānaṃ paṭubhāvoti dassetuṃ “**adhimattatā**”ti āha. Nanu ca ariyamagga attanā pahātabbakilese anavasesaṃ samucchindatīti atikkhiṇo nāma natthīti? Saccametva, tathāpi no ca kho “yathā diṭṭhippattassā”ti vacanato saddhāvimuttadiṭṭhippattānaṃ kilesappahānaṃ pati atthi kāci visesamattāti sakkā vattuṃ. Ayaṃ pana viseso na idhādhippeto, sabbupapattisamatikkamanassa adhippetatā. Yasmā pana ariyamaggena odhiso kilesā pahīyanti, taṅca nesaṃ tathāpahānaṃ maggadhammesu indriyānaṃ apāṭavapāṭavataṭṭavataṭṭamabhāvena hotīti yo vajirūpamadhammesu matthakapattānaṃ aggamaggadhammānaṃ paṭutambhāvo. Ayaṃ idha maggassa tikkhatāti adhippetā. Tenevāha – “**ayaṃ dhammo suciṇṇo sabbāhi upapattihi rakkhati**”ti. “**Tasmā rakkhitacittassā**”tiādinā **suttantarena** (udā. 32) sugatisaññitānampi upapattīnaṃ duggatibhāvaṃ sādheti.

32. Idāni yathāvuttassa dhammassa visabhāgadhammānaṃ taṅhāvijjādīnaṃ sabhāgadhammānaṅca samathavipassanādīnaṃ niddhāraṇavasena āvaṭṭahāraṃ yojetvā dassetuṃ “**tattha duggatīnaṃ hetu taṅhā ca avijjā cā**”tiādimāha. Taṃ pubbe vuttanayattā suviññeyyameva. **Idaṃ vuccati brahmacariyanti** idaṃ ariyaṃ samathavipassanāsaṅkhatāṃ maggabrahmacariyanti vuccati. **Yaṃ rakkhatīti** sabbāhi duggatīhi rakkhantassa ariyamaggassa ārammaṇabhūto nirodho rakkhanto viya vutto,

nimittassa kattubhāvena upacaritattā. Imāni cattāri saccāni visabhāgasabhāgadhammāvaṭṭanavasena niddhāritānīti adhippāyo.

Āvaṭṭahāravibhaṅgavaṇṇanā niṭṭhitā.

8. Vibhattihāravibhaṅgavaṇṇanā

33. Tattha katamo vibhattihāroti vibhattihāravibhaṅgo. Tattha dhammavibhattibhūmivibhattipadaṭṭhānavibhattīti tividhā vibhatti. Tāsu yasmā dhammesu vibhāgato niddiṭṭhesu tattha labbhamāno bhūmivibhāgo padaṭṭhānavibhāgo ca niddisiyamāno suviññeyyo hoti, tasmā dhammavibhattiṃ tāva niddisanto soḷasavidhe paṭṭhāne yesaṃ suttānaṃ vasena visesato vibhajitabbā, tāni suttāni dassetuṃ “**dve suttāni vāsanābhāgiyaṅca nibbedhabhāgiyaṅcā**”ti vuttaṃ. Tattha vāsanā puññabhāvanā, tassā bhāgo koṭṭhāso vāsanābhāgo, tassa hitanti **vāsanābhāgiyaṃ**, suttaṃ. Nibbijjhanāṃ lobhakkhandhādīnaṃ padālanāṃ nibbedho, tassa bhāgoti sesaṃ purimasadisameva. Yasmīṃ sutte tīṇi puññakiriyavatthūni desitāni, taṃ suttaṃ vāsanābhāgiyaṃ. Yasmīṃ pana sekkhāsekkhā desitā, taṃ nibbedhabhāgiyaṃ. Ayaṅca attho **pāḷiyaṃ**veva āgamissati.

Puññabhāgiyāti puññabhāge bhavā. Tathā **phalabhāgiyā** veditabbā. **Phalanti** pana sāmāññaphalaṃ. **Samvarasīlanti** pātimokkhasaṃvaro, satisaṃvaro, ñāṇasaṃvaro, khantisāṃvaro, vīriyasaṃvaroti pañca saṃvarā saṃvarasīlaṃ. **Pahānasīlanti** tadaṅgappahānaṃ, vikkhambhanappahānaṃ, samucchadappahānaṃ, paṭippassaddhippahānaṃ, nissaraṇappahānanti pañcappahānāni. Tesu nissaraṇappahānavajjānaṃ pahānānaṃ vasena pahānasīlaṃ veditabbāṃ. **Soti** yo vāsanābhāgiyasuttasampaṭiggāhako, so. **Tena brahmacariyenā**ti tena saṃvarasīlasaṅkhātena seṭṭhacariyena kāraṇabhūtena brahmacārī bhavati. Ettha ca aṭṭhasamāpattibrahmacariyassa na paṭikkhepo, keci pana “teneva brahmacariyenā”ti paṭhanti, tesāṃ matena siyā tassa paṭikkhepo.

Pahānasīle ṭhitoti samucchadapaṭippassaddhippahānaṃ vasena pahānasīle ṭhito. **Tena brahmacariyenā**ti tena pahānasīlena visesabhūtena maggabrahmacariyena. Ye pana “teneva brahmacariyenā”ti paṭhanti, tesāṃ ayaṃ pāṭho “vāsanābhāgiyaṃ nāma suttaṃ dānakathā, sīlakathā, saggakathā, puññavipākakathā”ti. Ye pana “tena brahmacariyenā”ti paṭhanti, tesāṃ ayaṃ pāṭho – “vāsanābhāgiyaṃ nāma suttaṃ dānakathā, sīlakathā, saggakathā kāmānaṃ ādīnavo nekkhamme ānisaṃso”ti. Tattha katamo pāṭho yuttataroti? Pacchimo pāṭhoti niṭṭhaṃ gantabbāṃ. Yasmā “nibbedhabhāgiyaṃ nāma suttaṃ yā catusaccappakāsanā”ti vakkhati, na hi mahāthero sāvasesaṃ katvā dhammaṃ desesīti.

“**Natthi pajānanā**”tiādīnā ubhinnaṃ suttānaṃ sātisaṃyaṃ asaṅkarakāraṇaṃ dasseti. Tattha **pajānanā**ti ariyamaggassa padaṭṭhānabhūtā vuṭṭhānagāminī vipassanāpaññā. **Imāni cattāri suttānī**ti imesaṃ suttānaṃ vāsanābhāgiyanibbedhabhāgiyānaṃ vakkhamānānaṅca saṃkilesabhāgiyaasekkhabhāgiyānaṃ vasena cattāri suttāni. **Desanāyā**ti desanāyena. **Sabbato vicayena hārena vicinityvā**ti sabbatobhāgena ekādasasu ṭhānesu pakkhipitvā vicayena hārena vicinityvā. “**Yuttihārena yojetabbānī**”ti etena vicayahārayuttihārā vibhattihārassa parikkammaṭṭhānanti dasseti. “**Yāvaticā ñāṇassa bhūmī**”ti iminā vibhattihārassa mahāvisayataṃ dasseti.

34. Evaṃ vāsanābhāgiyanibbedhabhāgiyabhāvehi dhamme ekadesena vibhajitvā idāni tesāṃ kilesabhāgiyaasekkhabhāgiyabhāvehi sādharmaṇāsādhāraṇabhāvehi vibhajitūṃ “**tattha katame dhammā sādharmaṇā**”tiādī āradhāṃ. Tattha **katame dhammā**ti katame sabhāvadhammā. **Sādharmaṇā**ti avisiṭṭhā, samānāti attho. **Dve dhammā**ti duve pakatiyo. Pakatiattho hi ayaṃ dhamma-saddo “jātidhammānaṃ sattāna”ntiādīsu (paṭi. ma. 1.33) viya. **Nāmasādhāraṇā**ti nāmena sādharmaṇā, kusalākusalāti samānanāmāti attho. **Vatthusādhāraṇā**ti vatthunā nissayena sādharmaṇā, ekasantatipatitāyā samānavatthukāti attho. Visesato saṃkilesapakkhe pahānekaṭṭhā nāmasādhāraṇā, sahaṅgakaṭṭhā

vatthusādhāraṇā. **Aññampi evaṃ jātiyanti** kiccapaccayapaṭipakkhādīhi samānaṃ saṅgaṇhāti. **Micchattaniyatānaṃ aniyatānanti** idaṃ puthujjanānaṃ upalakkhaṇaṃ. Tasmā sassatavādā ucchedavādāti ādiko sabbo puthujjanabhedo āharitvā vattabbo. Dasanappahātabbā kilesā sādharmaṇā micchattaniyatānaṃ aniyatānaṃ eva ca sambhavato sammattaniyatānaṃ asambhavato ca. Iminā nayena sesapadesupi attho veditabbo.

Ariyasāvakoti sekkhaṃ sandhāya vadati. **Sabbā sā avītarāgehi sādharmaṇāti** lokiyasamāpatti rūpāvacarā arūpāvacarā dibbavihāro brahmavihāro paṭhamajjhānasamāpattīti evamādīhi pariyāyehi sādharmaṇā. Kusalasamāpatti pana iminā pariyāyena siyā asādharmaṇā, imaṃ pana dosaṃ passantā keci “yaṃ kiñci...pe... sabbā sā avītarāgehi sādharmaṇā”ti paṭhanti. Kathaṃ te odhiso gahitā, atha odhiso gahetabbā, kathaṃ sādharmaṇāti? Anuyogaṃ manasikatvā taṃ visodhento āha – “**sādharmaṇā hi dhammā evaṃ aññamañña**”ntiādi. Tassattho – yathā micchattaniyatānaṃ aniyatānaṃca sādharmaṇāti vuttaṃ, evaṃ sādharmaṇā dhammā na sabbasattānaṃ sādharmaṇatāya sādharmaṇā, kasmā? Yasmā **aññamaññaṃ paraṃ paraṃ sakaṃ sakaṃ visayaṃ nātivattanti**. Paṭiniyatañhi tesam pavattiṭṭhānaṃ, itarathā tathā vohāro eva na siyāti adhippāyo. Yasmā ca ete eva dhammā evaṃ niyatā visayā, tasmā “**yopi imehi dhammehi samannāgato na so taṃ dhammaṃ upātivattati**”ti āha. Na hi micchattaniyatānaṃ aniyatānaṃca dassanena pahātabbā kilesā na santi, aññesaṃ vā santīti evaṃ sesepi vattabbaṃ.

Asādharmaṇo nāma dhammo tassa tassa puggalassa paccattaniyato ariyesu sekkhāsekkhadhammavasena anariyesu sabbābhābhāpāhātabbavasena gavesitabbo, itarassa tathā niddisitabbabhāvābhāvato. So ca kho sādharmaṇāvidhuratāya taṃ taṃ upādāya tathāvuttadesanānusārenāti imamatthaṃ dasseti “**katame dhammā asādharmaṇā yāva desanaṃ upādāya gavesitabbā sekkhāsekkhā bhābhābhābhā**”ti iminā. **Aṭṭhamakassāti** sotāpatti phalāsacchikiriyāya paṭipannassa. **Dhammatāti** dhammasabhāvo paṭhamassa maggaṭṭhatā dutiyassa phalaṭṭhatā. Paṭhamassa vā pahīyamānakilesatā. Dutiyassa pahīnakilesatā. Puna **aṭṭhamakassāti** anāgāmimaggaṭṭhassa. **Nāmaṃti** sekkhāti nāmaṃ. **Dhammatāti** taṃtaṃmaggaṭṭhatā heṭṭhimaphalaṭṭhatā ca. **Paṭipannakānanti** maggasamaṅgīnaṃ. **Nāmaṃti** paṭipannakāti nāmaṃ. Evaṃ “aṭṭhamakassā”tiādinā ariyapuggalesu asādharmaṇadhammaṃ dassetvā itaresu nayadassanattaṃ “**evaṃ visesānupassinā**”tiādi vuttaṃ. Lokiyadhammesu eva hi hīnādibhāvo. Tatha **visesānupassināti** asādharmaṇadhammānupassinā. Micchattaniyatānaṃ aniyatā dhammā sādharmaṇā micchattaniyatā dhammā asādharmaṇā. Micchattaniyatesupi niyatamicchādiṭṭhikānaṃ aniyatā dhammā sādharmaṇā. Niyatamicchādiṭṭhi asādharmaṇāti iminā nayena visesānupassinā veditabbā.

Evaṃ nānāyehi dhammavibhattiṃ dassetvā idāni bhūmivibhattiṃ padaṭṭhānavibhattiṃca vibhajitvā dassetuṃ “**dassanabhūmi**”tiādimāha. Tatha **dassanabhūmi**ti paṭhamamaggo. Yasmā pana paṭhamamaggakkhaṇe ariyasāvako sammattaniyāmaṃ okkamanto nāma hoti, tato paraṃ okkanto, tasmā “dassanabhūmi niyāmāvakkantiyā padaṭṭhāna”nti vuttaṃ. Kiñcāpi heṭṭhimo heṭṭhimo maggo upariuparimaggādhiḡamassa kāraṇaṃ hoti, sakkāyadīṭṭhiādīni appahāya kāmarāgabyāpādādippahānassa asakkuṇeyyattā. Tathāpi ariyamaggo attano phalassa visesakāraṇaṃ āsannakāraṇaṃcāti dassetuṃ “**bhāvanābhūmi uttarikānaṃ phalānaṃ pattiyā padaṭṭhāna**”nti vuttaṃ. Sukhā paṭipadā khippābhiññā ñāṇuttarassa tathāvidhapaccayasamāyoge ca hotīti sā vipassanāya padaṭṭhānanti vuttā. Itarā pana tissopi paṭipadā samathaṃ āvahanti eva. Tāsu sabbamudutāya dassitāya sesāpi dassitā evāti āha – “**dukkhā paṭipadā dandhābhiññā samathassa padaṭṭhāna**”nti.

Dānamayaṃ puññakiriyavattthūti dānameva dānamayaṃ, puṇṇaphalanibbattanaṭṭhena puññaṃ, tadeva kattabbato kiriyā, payogasampattiyādīnaṃ adhiṭṭhānabhāvato vatthu cāti dānamayapuññakiriyavattthu. **Paratoghossati** dhammassavanassa. **Sādharmaṇanti** na bījaṃ viya ānkurassa, dassanabhūmiādayo viya vā niyāmāvakkantiādīnaṃ āveṇikaṃ, atha kho sādharmaṇaṃ, tadaññakāraṇehipi paratoghossassa pavattanatoti adhippāyo. Tatha keci dāyakaṃ dānānumodanaṃ āciṇṇanti dānaṃ paratoghossassa kāraṇanti vadanti. Dāyako pana dakkhiṇāvisuddhiṃ ākaṅkhanto dānasīlādiguṇavisesānaṃ savane yuttappayutto hotīti dānaṃ dhammassavanassa kāraṇaṃ vuttaṃ.

Sīlasampanno vippaṭṭisārābhāvena samāhito dhammacintāsamatto hotīti sīlaṃ cintāmayāñāssa kāraṇanti āha “**sīlamaya**”ntiādi. **Bhāvanāmayanti** samathasaṅkhātāṃ bhāvanāmayāṃ. **Bhāvanāmayiyāti** uparijānasaṅkhātāya vipassanāsaṅkhātāya ca bhāvanāmayiyā. Purimaṃ purimañhi pacchimassa pacchimassa padaṭṭhānaṃ. Idāni yasmā dānaṃ sīlaṃ lokiyabhāvanā ca na kevalaṃ yathāvuttaparatoḥsādīnaṃyeva, atha kho yathākkamaṃ pariyattibāhusaccakammaṭṭhānānuyogamaggasammādiṭṭhīnampi paccayā honti, tasmā tampi nayaṃ dassetuṃ puna “**dānamaya**”ntiādinā desanaṃ vaḍḍhesi. Tathā patirūpadesavāsādayo kāyavivekacittavivekādināṃ kāraṇaṃ hotīti imaṃ nayaṃ dassetuṃ “**patirūpadesavāso**”tiādimāha. Tattha **kusalavīmaṃsāyāti** paṭisaṅkhānupassanāya. **Akusalapariccāgoti** iminā pahānapariññā vuttāti. **Samādhindriyassāti** maggasamādhindriyassa. Sesam suviññeyyameva.

Vibhattihāravibhaṅgavaṇṇanā niṭṭhitā.

9. Parivattanaḥāravibhaṅgavaṇṇanā

35. Tattha katamo parivattano hāroti parivattanaḥāravibhaṅgo. Tattha yasmā saṃvaṇṇiyamāne sutte yathānidḍiṭṭhānaṃ kusalākusaladhammānaṃ paṭipakkhabhūte akusalakusaladhamme pahātabbabhāvādivasena niddhāraṇaṃ paṭipakkhato parivattanaṃ, tasmā “**sammādiṭṭhissa purisapuggalassa micchādiṭṭhi nijjiṇṇā bhavati**”tiādi āradḍhaṃ. Tattha sammā pasatthā, suṇḍarā diṭṭhi etassāti sammādiṭṭhi, tassa. Sā paṇassa sammādiṭṭhitā pubbabhāgasammādiṭṭhiyā vā lokuttarasammādiṭṭhiyā vā veditabbā. **Micchādiṭṭhi nijjiṇṇā bhavati** purimanaye vipassanāsammādiṭṭhiyā pahīnā hoti, vikkhambhitāti attho. Pacchimanaye paṭhamamaggasammādiṭṭhiyā pahīnā samucchinnāti attho.

Ye cassa micchādiṭṭhipaccayāti micchābhinivesahetu ye ariyānaṃ adassanakāmatādayo lobhādayo paṇātipātādayo ca **aneke** lāmakatṭhena **pāpakā** akosallasambhūtaṭṭhena **akusalā** dhammā uppajjeyyūṃ. Imassa āradḍhavipassakassa ariyassa ca. **Dhammāti** samathavipassanādhammā, sattattiṃsabodhipakkhiyadhammā vā anuppannā vā sambhavanti uppannā, bhāvanāpāripūriṃ gacchanti. **Sammāsaṅkappassāti**ādinampi imināva nayaṇa attho veditabbo. Ayaṃ pana viṣeso – sammāvimuttiādināṃ micchāvimutti avimuttāva samānā “**vimuttā maya**”nti evaṃsaññino avimuttiyam vā vimuttisaññino. Tatrāyaṃ vacanatto – micchā pāpikā vimutti vimokkho etassāti **micchāvimutti**. Aṭṭhaṅgā ca micchāvimutti yathāvuttenākārena micchābhinivesavasena ca pavattā antadvayalakkhaṇā. **Sammāvimutti** pana phaladhammā, micchādiṭṭhike samāsevato micchāvimokkho vā micchāvimutti. **Micchāvimuttiñāḍadassanaṃ** pana micchāvimokkhe micchādiṭṭhiyā ca sāranti gahaṇavasena pavatto akusalacittuppādo antamaso pāpaṃ katvā “**sukataṃ mayā**”ti paccavekkhato uppannamoho ca. **Sammāvimuttiñāḍadassanassāti** ettha sekkhānaṃ paccavekkhaṇaṇānaṃ sammāvimuttiñāḍadassananti adhippetam. Tañhi uttaribhāvanāpāripūriyā saṃvattati.

36. Evaṃ sammādiṭṭhiādimukhena micchādiṭṭhiādiṃ dassetvā puna paṇātipātaadinnādānakāmesumicchācārādito veramaṇiyādīhi paṇātipātādināṃ parivattanaṃ dassetuṃ “**yassā**”tiādi āradḍhaṃ. Tattha **kālavādissāti** lakkhaṇavacanāṃ. Kālena sāpadesaṃ pariyantavatim atthasañhitanti so samphappalāpassa pahānāya paṭipanno hotīti vuttaṃ.

Puna “**ye ca kho keci**”tiādinā sammādiṭṭhiādimukheneva micchādiṭṭhiādihi eva parivattanaṃ pakāraṇarena dasseti. Tattha **sandiṭṭhikāti** paccakkhā. **Sahadhammikāti** sakāraṇā. **Gārayhāti** garahitabbayuttā. **Vādānuvādāti** vādā ceva anuvādā ca. “**Vādānupātā**”tipi pāṭho, vādānupavattiyoti attho. **Pujjāti** pūjanīyā. **Pāsaṃsāti** pasāṃsitabbā.

Puna “**ye ca kho keci**”tiādinā majjhimāya paṭipattiyā antadvayaparivattanaṃ dasseti. Tattha **bhuñjitabbāti**ādinī cattāri padāni vatthukāmasasena yojetabbāni. **Bhāvayitabbā bahulīkātabbāti** padadvayaṃ kilesakāmasasena. **Tesaṃ adhammoti** bhāvetabbo nāma dhammo siyā, kāma ca tesaṃ

bhāvetabbā icchitā, kāmehi ca veramaṇī kāmānaṃ paṭipakkho, iti sā tesam adhammo āpajjatīti adhippāyo.

Niyyāniko dhammoti saha vipassanāya ariyamaggo. **Dukkhoti** pāpaṃ nijjarāpessāmāti pavattitaṃ sarīratāpanaṃ vadati. **Sukhoti** anavajjapaccayaparibhogasukhaṃ. Etesupi vāresu vuttanayeneva adhamabhāvāpatti vattabbā. Idāni asubhasaññādimukhena subhasaññādi parivattanaṃ dassetuṃ “**yathā vā panā**”tiādi vuttaṃ. Āraddhavipassakassa kilesāsucipaggharaṇavasena tebhūmakasaṅkhārā asubhato upaṭṭhahantīti katvā vuttaṃ “**sabbasaṅkhāresu asubhānupassino viharato**”ti. “**Yaṃ yaṃ vā panā**”tiādinā paṭipakkhassa lakkhaṇaṃ vibhāveti. Tattha **ajjhāpannoti** adhiāpanno, abhiupagato pariññātoti attho.

Parivattanaḥāravibhaṅgavaṇṇanā niṭṭhitā.

10. Vevacanaḥāravibhaṅgavaṇṇanā

37. Tattha katamo vevacano hāroti vevacanaḥāravibhaṅgo. Tattha yathā vevacananiddeso hoti, taṃ dassetuṃ “**ekaṃ bhagavā dhammaṃ aññamaññehi vevacanehi niddisatī**”ti vuttaṃ. **Vevacanehīti** pariyāyasaddehīti attho. Padattho pubbe vutto eva. Kasmā pana bhagavā ekaṃ dhammaṃ anekapariyāyehi niddisatīti? Vuccate – desanākāle āyatiṅca kassaci kathaṅci tadatthapaṭibodho siyāti pariyāyavacanaṃ, tasmim̄ khāṇe vikkhittacittānaṃ aññavihitānaṃ aññena pariyāyena tadatthāvabodhanatthaṃ pariyāyavacanaṃ. Teneva padena puna vacane tadaññesaṃ tattha adhigatā siyāti mandabuddhīnaṃ punappunaṃ tadatthasallakkhaṇe asammosanatthaṃ pariyāyavacanaṃ. Anekepi atthā samānabyañjanā hontīti yā atthantaraparikappanā siyā, tassā parivajjanatthampi pariyāyavacanaṃ anaññassa vacane anekāhi tāhi tāhi saññāhi tesam tesam atthānaṃ ñāpanatthampi pariyāyavacanaṃ seyyathāpi nighaṇṭusatthe. Dhammakathikānaṃ tantiatthupanibandhanaparāvabodhanānaṃ sukhasiddhiyāpi pariyāyavacanaṃ. Attano dhammaniruttipaṭisambhidāppattiyā vibhāvanatthaṃ, veneyyānaṃ tattha bījāvāpanatthaṃ vā pariyāyavacanaṃ bhagavā niddisati.

Kim̄ bahunā yassā dhammadhātuyā suppaṭividdhattā sammāsambuddhā yathā sabbasmim̄ atthe appaṭihataññācārā, tathā sabbasmim̄ saddavohāreti ekampi atthaṃ anekehi pariyāyehi bodheti, na tattha dandhāyitattaṃ vitthāyitattaṃ atthassa. Nāpi dhammadesanāhāni, āveṇikovāyaṃ buddhadhammoti pariyāyadesanaṃ dassento “**āsā**”tiādimāha. Tattha atthaṃ dassento “**āsā nāma vuccati yā bhavissassa atthassā**”tiādimāha. Tattha **bhavissassa atthassāti** anāgatassa icchitabbassa atthassa. “**Avassaṃ āgamissatī**”tiādinā tassā pavattiyākāraṃ dasseti. Anāgatatthavisayā taṇhā **āsā**. Anāgatapaccuppannatthavisayā taṇhā **pihāti** ayametāsaṃ viseso.

Atthanipphattipaṭipālanāti yāya icchitassa atthassa nipphattim̄ paṭipāleti āgameti, yāya vā nipphannaṃ atthaṃ paṭipāleti rakkhati. Ayaṃ **abhinandanā** nāma, yathāladdhassa atthassa kelāyanā nāmāti attho. Taṃ atthanipphattim̄ sattasaṅkhāravasena vibhajitvā dassento “**piyaṃ vā ñāti**”ntiādimāha. Tattha **dhammanti** rūpādiārammaṇadhammaṃ, atiiṭṭhārammaṇaṃ abhinandati, aniṭṭhārammaṇehipi taṃ dassetuṃ “**appaṭikkūlato vā abhinandatī**”ti vuttaṃ. Paṭikkūlepi hi vipallāsavasena sattaṃ, saṅkhāraṃ vā appaṭikkūlato abhinandati.

Yāsu anekadhātūsu pavattiyā taṇhā “**anekadhātūsu sarā**”ti vuttā, tā dhātuyo vibhāgena dassetuṃ “**cakkhudhātū**”tiādi vuttaṃ. Kiñcāpi **dhātuvibhaṅgādīsu** (vibha. 172 ādayo) kāmadhātūādayo aññāpi anekadhātuyo āgatā, tāsampi ettheva samavarodhoti dassanatthaṃ aṭṭhārasevettha dassitā. **Keci rūpādhimuttātī**tiādi tāsū dhātūsu taṇhāya pavattidassanaṃ. Tattha yasmā pañca ajjhattikā dhātuyo satta ca viññāṇadhātuyo dhammadhātu ca dhammārammaṇeneva saṅgahitā, tasmā aṭṭhārasa dhātuyo uddisitivā chaḷeva taṇhāya pavattiṭṭhānāni vibhattānīti daṭṭhabbaṃ. Taṇhāpakkhā nekkhammassitāpi domanassupavicārā tassa anuttaresu vimokkhesu pihaṃ upaṭṭhāpayato uppajjati “**pihapaccayā domanassa**”nti vacanato, ko pana vādo gehassitesu domanassupavicāresūti imāni catuvīsati padāni

“**taṇhāpakkho**”ti vuttaṃ. Gehassitā pana upekkhā aññānupekkhatāya yathābhinivesassa paccayo hotīti “**yā cha upekkhā gehassitā, ayaṃ diṭṭhipakkho**”ti vuttaṃ.

38. Idāni tesam upavicārānaṃ taṇhāpariyāyaṃ dassento “**sāyeva patthanākārena dhammanandi**”tiādīmāha. Puna cittaṃ paññā bhagavā dhammo saṅgho sīlaṃ cāgoti imesaṃ pariyāyavacananiddhāraṇena vevacanaḥāraṃ vibhajitvā dassetuṃ “**cittaṃ mano viññāṇa**”ntiādi āradhamaṃ. Tattha “**aññampi evaṃ jātiya**”nti iminā paññā pajānaṇā vicayo pavicayo dhammavicayo sallakkhaṇā upalakkhaṇā paccupalakkhaṇā paṇḍiccaṃ kosallaṃ nepuññaṃ vebhabyā cintā upaparikkhā bhūrī medhā pariṇāyikā vipassanā sampajaññaṃ patodo paññā paññindriyaṃ paññābalaṃ paññāsattaṃ paññāpāsādo paññāloko paññāobhāso paññāpajjoto paññāratanaṃ amohoti (mahāni. 149) evamādīnampi paññāya pariyāyasaddānaṃ saṅgaho daṭṭhabbo.

Pañcindriyāni lokuttarānīti khaye ñāṇantiādīni pañcindriyāni lokuttarāni, lokuttarapaññāya vevacanaṇīti attho. **Sabbā paññā**ti itarehi vevacanehi vuttā sabbā paññā lokiyalokuttaramissikāti attho. “**Api cā**”tiādīnā imināpi pariyāyena vevacanaṃ vattabbanti dasseti. **Ādhipateyyaṭṭhenā**ti adhimokkhalakkhaṇe ādhipateyyaṭṭhena. **Yathā ca buddhānussatiyaṃ vuttanti** yathā **buddhānussatiniddese** (visuddhi. 1.123) “itipi so bhagavā”tiādīnā pāḷiyā so bhagavā itipi arahaṃ... pe... itipi bhagavāti anekehi vevacanehi bhagavā anussaritabboti vuttaṃ. Imināva nayena balanipphattigato vesārajappatto yāva dhammobbhāsapajjotakaroti, etehi pariyāyehi buddhassa bhagavato vevacanaṃ buddhānussatiyaṃ vattabbanti padaṃ āharitvā sambandho veditabbo. Etānipi katipayāni eva bhagavato vevacanaṇi. Asaṅkhyeyyā hi buddhaguṇā guṇanemittakāni ca bhagavato nāmāni. Vuttañhetam dhammasenāpatinā –

“Asaṅkhyeyyāni nāmāni, saṅghena mahesino;
Guṇena nāmamuddheyyaṃ, api nāma saḥassato”ti. (udā. aṭṭha. 53);

Dhammānussatiyaṃ “**asaṅkhata**”ntiādīsu na kenaci paccayena saṅkhatanti **asaṅkhatam**. Natthi etassa anto vināsoti **anantam**. Āsavānaṃ anārammaṇato **anāsavam**. Aviparītasabhāvattā **saccam**. Saṃsārassa paratīrabhāvato **pāram**. Nipunañāṇavisayattā **sukhumasabhāvattā ca nipuṇa**. Anupacitañāṇasambhārehi daṭṭhuṃ na sakkāti **sududdasam**. Uppādajarāhi anabbhāhatattā **ajajjaram**. Thirabhāvena **dhuvam**. Jarāmarañehi apalujjanato **apalokitam**. Maṃsacakkhunā dibbacakkhunā ca apassitabbattā **anidassanam**. Rāgādipapañcābhāvena **nippapañcam**. Kilesābhisaṅkhārānaṃ vūpasamahetutāya **santam**.

Amatahetutāya bhaṅgābhāvato ca **amatam**. Uttamaṭṭhena atappakaṭṭhena ca **pañitam**. Asivānaṃ kammakilesavipākavaṭṭānaṃ abhāvena **sivam**. Catūhi yogehi anupaddavabhāvena **khemam**. Taṇhā khīyati etthāti **taṇhakkhayo**. Katapuññehipi kadācīdeva passitabbattā **acchariyam**. Abhūtapubbattā **abbhutam**. Anantarāyattā **anītikam**. Anantarāyabhāvahetuto **anītikadhammam** (saṃ. ni. aṭṭha. 3.5.377-409).

Anibbattisabhāvattā **ajātam**. Tato eva **abhūtam**. Ubhayenāpi uppādarahitanti vuttaṃ hoti. Kenaci anupaddutattā **anupaddavam**. Na kenaci paccayena katanti **akatam**. Natthi ettha sokoti **asokam**. Sokahetuvigamena **visokam**. Kenaci anupasajjitabbattā **anupasaggam**. Anupasaggabhāvahetuto **anupasaggadhammam**.

Gambhīrañāṇagocarato **gambhīram**. Sammāpaṭipattiṃ vinā passituṃ pattuṃ asakkuṇeyyattā **duppassam**. Sabbalokaṃ uttaritvā ṭhitanti **uttaram**. Natthi etassa uttaranti **anuttaram**. Samassa sadisassa abhāvena **asamam**. Paṭibhāgābhāvena **appaṭisamam**. Uttamaṭṭhena **jeṭṭham**, pāsamsatamattā vā **jeṭṭham**. Saṃsāradukkhaṭṭitehi letabbato **leṇam**. Tato rakkhaṇato **tāṇam**. Raṇābhāvena **araṇam**. Aṅgañābhāvena **anaṅgaṇam**. Niddosatāya **akācam**. Rāgādimalāpagamena **vimalam**. Catūhi oghehi anajjhottharaṇīyato **dīpo**. Saṃsāravūpasamasukhatāya **sukham**. Pamāṇakaradhammābhāvato

appamāṇaṃ, gaṇetuṃ etassa na sakkāti ca **appamāṇaṃ**. Saṃsārasamudde anosīdanaṭṭhānatāya **patiṭṭhā**. Rāgādikiñcanābhāvena pariggahābhāvena ca **akiñcananti** evamattho daṭṭhabbo.

Saṅghānussatiyaṃ **sattānaṃ sārōti** sīlasārādisāraguṇayogato sattesu sārābhūto. **Sattānaṃ maṇḍoti** gorasesu sappimaṇḍo viya sattesu maṇḍabhūto. Sāraguṇavaseneva sattesu uddharitabbato **sattānaṃ uddhāro**. Niccalaguṇatāya **sattānaṃ esikā**. Guṇasobhāsuraḥhibhāvena **sattānaṃ pasūnaṃ surabhi** kusumanti attho.

Guṇesu uttamaṅgaṃ paññā tassā upasobhāhetutāya sīlaṃ **uttamaṅgopasobhanaṃ** vuttaṃ. Sīlesu paripūrakārino anijjhantā nāma guṇā natthīti “**nidhānañca sīlaṃ sabbadobhaggasamatikkamanaṭṭhenā**”ti vuttaṃ. Ayañca attho **ākañkheyyasuttēna** (ma. ni. 1.64 ādayo) dīpetabbo. Aparampi vuttaṃ – “ijjhanti, bhikkhave, sīlavato cetopaṇidhi visuddhattā”ti (dī. ni. 3.337; saṃ. ni. 4.352; a. ni. 8.35). **Sippanti** dhanusippaṃ. **Dhaññanti** dhanāyitabbaṃ. **Dhammavolokanāyāti** samathavipassanādidhammassa volokanabhāvena. **Volokanāṭṭhenāti** sattabhūmakādipāsāde viya sīle ṭhatvā abhiññācakkhunā lokassa voloketuṃ sakkāti vuttaṃ. **Sabbabhūmānuparivatti** ca sīlaṃ catubhūmakakusalassāpi tadanuvattanato. Sesāṃ uttānamevāti.

Vevacanaḥāravibhaṅgavaṇṇanā niṭṭhitā.

11. Paññattihāravibhaṅgavaṇṇanā

39. Tattha katamo paññattihāroti paññattihāravibhaṅgo. Tattha kā panāyaṃ paññattīti? Āha “**yā pakatikathāya desanā**”ti. Idaṃ vuttaṃ hoti – yā desanāhārādayo viya assādādiṭṭhāpattavisesaniddhāraṇaṃ akatvā bhagavato sābhāvikadharmakathāya desanā. Yā tassā paññāpanā, ayaṃ paññattihāro. Yasmā pana sā bhagavato tathā tathā veneyyasantāne yathādhīppetamatthaṃ nikkhipatīti nikkhepo. Tassa cāyaṃ hāro dukkhādisaṅkhāte bhāge pakārehi ñāpeti, asaṅkarato vā ṭhapeti, tasmā “**nikkhepapaññatti**”ti vutto. Iti pakatikathāya desanāti saṅkhepena vuttamatthaṃ vitthārena vibhajitūṃ “**kā ca pakatikathāya desanā**”ti pucchitvā “**cattāri saccāni**”tiādimāha.

Tattha **idaṃ dukkhanti ayaṃ paññattīti** kakkhaḷaphusaṇādisabhāve rūpārūpadhamme atīṭādivasena anekabhedabhinne abhinditvā pīḷanasankhataṣaṅgāpavipariṇāmaṭṭhatāṣāmaññena yā kucchitabhāvādimukhena ekajjhaṃ gahaṇassa kāraṇabhūtā paññatti, kā pana sāti? Nāmapaññattinibandhanā tājāpaññatti. “Viññattivikārasahito saddo evā”ti apare. Iminā nayena tattha tattha paññattiattho veditabbo. “**Pañcannaṃ khandhāna**”ntiādinā tassā paññattiyā upādānaṃ dasseti. **Dasannaṃ indriyānanti** aṭṭha rūpindriyāni manindriyaṃ vedanindriyanti evaṃ dasannaṃ. Anubhavasāmaññena hi vedanā ekamindriyaṃ katā, tathā saddhādayo ca maggapakkhiyāti.

Kabaḷaṃ karīyatīti **kabaḷikāro**ti vatthuvasena ayaṃ niddeso. Yāya oḷāya sattā yāpenti, tassāyetaṃ adhivacanaṃ. Sā hi oḷāṭṭhamakassa rūpassa āharaṇato **āhāro**. **Atthīti** maggena asamucchinnatāya vijjati. **Rāgoti** rañjanaṭṭhena rāgo. Nandanaṭṭhena **nandī**. Taṇhāyanaṭṭhena **taṇhā**. Sabbānetāni lobhasseva nāmāni. **Patiṭṭhitāṃ tattha viññānaṃ viruḷhanti** kammaṃ javāpetvā paṭisandhiākaḍḍhanasamatthāyā patiṭṭhitañceva viññānaṃ viruḷhañca. **Yatthāti** tebhūmakavaṭṭe bhummaṃ, sabbattha vā purimapurimāpade etaṃ bhummaṃ. **Atthi tattha saṅkhārānaṃ vuddhīti** ye imasmim vipākavaṭṭe ṭhitassa āyatim vaḍḍhanahetukā saṅkhārā, te sandhāya vuttaṃ – “**yattha atthi āyatim punabbhavābhiniḍḍatti**”ti yasmim ṭhāne āyatim punabbhavābhiniḍḍatti atthi. **Atthi tattha āyatim jātijarāmarāṇanti** yattha paṭisandhiggahaṇaṃ, tattha khandhānaṃ abhiniḍḍattilakkhaṇā jāti, paripākakalakkhaṇā jarā, bhedanalakkhaṇaṃ maraṇaṇca atthi. **Ayaṃ pabhāvapaññatti dukkhassa ca samudayassa cāti** ayaṃ yathāvuttā desanā dukkhasaccassa samudayasaccassa ca samuṭṭhānapaññatti, vipākavaṭṭassa saṅkhārānañca taṇhāpaccayaniddesatoti adhippāyo.

Natthi rāgoti aggamaggabhāvanāya samucchinnattā natthi ce rāgo. **Appatiṭṭhitam tattha viññāṇam avirulhanti** kammaṃ javāpetvā paṭisandhiākaḍḍhanasamatthatāyābhāvena appatiṭṭhitañceva avirulhañcāti vuttapaṭipakkhanayena attho veditabbo.

“**Ayaṃ pariññāpaññatti**”tiādinā ekābhisamayavaseneva maggasammādiṭṭhi catūsu ariyasaccesu pavattatīti dasseti. **Ayaṃ bhāvanāpaññatti**ti ayaṃ dvārārammaṇehi chadvārappavattanadhammaṇaṃ aniccānupassanā maggassa bhāvanāpaññatti. **Nirodhapaññatti nirodhassāti** rodhasaṅkhātāya taṇhāya maggena anavasesanirodhapaññatti. **Uppādapaññatti**ti uppanassa paññāpanā. **Okāsapaññatti**ti ṭhānassa paññāpanā. **Āhaṭṭanāpaññatti**ti nīharaṇapaññatti. **Āsāṭikānanti** gunnaṃ vaṇesu nīlamakkhikāhi ṭhapitaṇḍakā āsāṭikā nāma. Ettha yassa uppanā, tassa sattassa anayabyasanahetutāya āsāṭikā viyāti āsāṭikā, kilesā, tesam āsāṭikānaṃ. **Abhinighātapaññatti**ti samugghātapaññatti.

41. Evaṃ vaṭṭavivaṭṭamukhena sammasanaupādānakkhandhamukheneva saccesu paññattivibhāgaṃ dassetvā idāni teparivaṭṭavasena dassetuṃ “**idaṃ ‘dukkha’nti me, bhikkhave**”tiādi āradhamaṃ. Tattha dassanaṭṭhena **cakkhu**. Yathāsabhāvato jānanaṭṭhena **ñāṇam**. Paṭivijjanaṭṭhena **paññā**. Viditakaraṇaṭṭhena **vijjā**. Obhāsanaṭṭhena **āloko**. Sabbaṃ paññāvevacanameva. Ayaṃ vevacanapaññatti. **Sacchikiriyāpaññatti**ti paccakkhakarapaññatti.

Tulamātulañcāti gāthāya pacurajanānaṃ paccakkhabhāvato tulitaṃ paricchinnanti **tulam**, kāmāvacaraṃ. Na tulanti **atulam**, tulaṃ vā sadisamassa aññaṃ lokiyakammaṃ natthīti **atulam**, mahaggatakammaṃ. Kāmāvacararūpāvacarakammaṃ vā **tulam**, arūpāvacaraṃ **atulam**, appavipākaṃ vā **tulam**. Bahuvipākaṃ **atulam**. Sambhavati etenāti **sambhavam**, sambhavahetubhūtaṃ. **Bhavasāṅkhāram** punabbhavasāṅkharaṇakaṃ. **Avassajīti** vissajjesi. **Munīti** buddhamuni. **Ajjhattaratoti** niyakajjhatarato. **Samāhitoti** upacārappanāsamādhivasena samāhito. **Abhindi kavacamivāti** kavacaṃ viya bhindi. **Attasambhavanti** attani sañjātaṃ kilesaṃ. Idaṃ vuttaṃ hoti – savipākaṭṭhena sambhavaṃ bhavābhisaṅkharaṇaṭṭhena bhavasāṅkhāranti ca laddhanāmaṃ tulātulasāṅkhātaṃ lokiyakammañca ossaji, saṅgāmasīse mahāyodho kavacaṃ viya attasambhavaṃ kilesaṃca ajjhatarato samāhito hutvā abhindīti.

Atha vā **tulanti** tulayanto tīrento. **Atulañca sambhavanti** nibbānañceva sambhavañca. **Bhavasāṅkhāranti** bhavagāmikammaṃ. **Avassaji munīti** “pañcakkhandhā aniccā, tesam nirodho nibbānaṃ nicca”ntiādinā (paṭi. ma. 3.38 atthato samānaṃ) nayena tulayanto buddhamuni bhava ādīnavam nibbāne ānisaṃsañca disvā taṃ khandhānaṃ mūlabhūtaṃ bhavasāṅkhāram kammakkhayakarena ariyamaggena avassaji. Kathaṃ? Ajjhatarato. So hi vipassanāvasena **ajjhatarato** samathavasena **samāhito kavacamiva** attabhāvaṃ pariyanandhitvā ṭhitaṃ attani sambhavattā “**attasambhava**”nti laddhanāmaṃ sabbaṃ kilesajātaṃ **abhindi**, kilesābhāve kammaṃ appaṭisandhikattā avassaṭṭhaṃ nāma hoti, kilesābhāvena kammaṃ jahīti attho (dī. ni. aṭṭha. 2.169; udā. aṭṭha. 51).

Saṅkhatāsaṅkhatadhātuvinimuttassa abhiññeyyassa abhāvato vuttaṃ “**tula...pe... dhammāna**”nti. Tena dhammapaṭisambhidā vuttā hotīti āha – “**nikkhepapaññatti dhammapaṭisambhidāyā**”ti. Bhavasāṅkhāre samudayapakkhiyaṃ sandhāyāha “**pariccāgapaññatti**”ti. Dukkhasaccapakkhiyavasena “**pariññāpaññatti**”ti. Samādhānavisitṭhassa ajjhataratabhāvassa vasena “**bhāvanāpaññatti kāyagatāya satiyā**”ti vuttaṃ. Ajjhataratatāvisitṭhassa pana samādhānassa vasena “**ṭhitipaññatti cittelkaggatāyā**”ti vuttanti daṭṭhabbaṃ. **Abhinibbidāpaññatti cittassāti** āyusaṅkhārossajjanavasena cittassa abhinīharaṇapaññatti. **Upādānapaññatti**ti gahaṇapaññatti. **Sabbaññutāyāti** sammāsambuddhabhāvassa. Etena asammāsambuddhassa āyusaṅkhārossajjanaṃ natthīti dasseti. Kilesābhāvena bhagavā kammaṃ jahatīti dassento “**padālanāpaññatti avijaṇḍakosāna**”nti āha.

Yo dukkhamaddakkhi yatoniḍānanti yo āradhaviṭṭhako sabbaṃ tebhūmaṃ dukkhaṃ adakkhi passi, tañca **yatoniḍānaṃ** yaṃ hetukaṃ, tampissa kāraṇabhāvena taṇhaṃ passi. **Kāmesu so jantu kathaṃ nameyyāti** so evaṃ paṭipanno puriso savatthukāmesu kilesakāmesu yena pakārena

nameyya abhinameyya, so pakāro natthi. Kasmā? **Kāmā hi loke saṅgoti ñatvā**. Yasmā imasmim loke kāmāsadisam bandhanam natthi. Vuttañcetam bhagavatā “na tam dalham bandhanamāhu dhīrā”tiādi (dha. pa. 345; sam. ni. 1.121; netti. 106; peṭako 15), tasmā saṅkhāre āsajjanaṭṭhena saṅgoti viditvā. **Tesam satimā vinayāya sikkheti** kāyagatāsatiyogena satimā tesam kāmānam vūpasamāya tīsupi sikkhāsu appamatto sikkheyyāti attho.

Vevecanapaññattīti khandhādīnam vevecanapaññatti. Adakkhīti pana padena sambandhattā vuttam – “**dukkhassa pariññāpaññatti cā**”ti. **Paccatthikato dassanapaññattīti** anattahajananato paccatthikato dassanapaññatti. **Pāvakakappāti** jalitaaggikkhandhasadisā. **Papātauragopamāti** papātūpamāuragopamā ca.

Mohasambandhano lokoti ayam loko avijjāhetukehi saṃyojanehi bandho. **Bhabbarūpova dissattīti** vipannajjhāsayopi māyāya sāṭheyyena ca paṭicchādītasabhāvo bhabbajātīkam viya attānam dasseti. **Upadhibandhano bālo, tamasā parivāritoti** tassa pana bālassa tathā dassane sammohatamasā parivāritattā kāmaguṇesu anādīnavadassitāya kilesābhisaṅkhārehi bandhattā. Tathā bhūto cāyam bālo paṇḍitānam **assirī viya khāyati** alakkhiko eva hutvā upaṭṭhāti. Tayidaṃ sabbam bālassa sato rāgādikiñcanato. Paṇḍitassa pana paññācakkhunā passato natthi kiñcananti ayam saṅkhepattho. Mohāsīsenā vipallāsā gahitāti āha – “**desanāpaññatti vipallāsāna**”nti. **Viparītapaññattīti** viparītākārena upaṭṭhahamānassa paññāpanā.

Atthi nibbānanti samaṇabrāhmaṇānam vācāvattumattameva. Natthi nibbānanti paramatthato alabbhamānasabhāvattāti vipaṭṭipannānam micchāvādam bhañjītuṃ bhagavatā vuttam – “**atthi, bhikkhave, ajātam abhūtam akatam asaṅkhata**”nti. Tattha hetuṃ dassetuṃ “**no cetam, bhikkhave**”tiādi vuttam. Tassattho – bhikkhave, yadi asaṅkhatā dhātu na abhavissa, na idha sabbassa saṅkhatassa nissaraṇam siyā. Nibbānañhi ārammaṇam katvā pavattamānā sammādiṭṭhiādayo maggadhammā anavasesakilese samucchindanti, tato tividhassapi vaṭṭassa appavattīti.

Tatthāyamadhippāyo – yathā pariññeyyatāya sauttarānam kāmānam rūpānañca paṭipakkhabhūtam tabbidhurasabhāvam nissaraṇam paññāyati, evam taṃsabhāvānam saṅkhabhadhammānam paṭipakkhabhūtena tabbidhuratāsabhāvena nissaraṇena bhavitabbam, yañca tam nissaraṇam. Sā asaṅkhatā dhātu. Kiñca bhiyyo? Saṅkhatadhammārammaṇam vipassanāññānam. Api ca anulomaññānam kilese na samucchadavasena pajahitūṃ sakkoti. Sammutisaccārammaṇampi paṭhamajjhānādīsu ñāṇam vikkhambhanamattameva karoti, kilesānam na samucchadam, samucchadappahānakarañca ariyamaggaññānam, tassa saṅkhatadhammasammutisaccaviparītena ārammaṇena bhavitabbam, sā asaṅkhatā dhātu. Tathā nibbāna-saddo katthaci visaye aviparītattho veditabbo, upacāravuttisabbhāvato, yathā tam “sīhasaddo”ti.

Atha vā “atthi, bhikkhave, ajātam abhūtam akatam asaṅkhata”nti (udā. 73) vacanam aviparītattham, bhagavatā bhāsītattā. Yañhi bhagavatā bhāsītam, tam aviparītattham. Yathā tam “sabbe saṅkhārā aniccā, sabbe saṅkhārā dukkhā, sabbe dhammā anattā”ti (ma. ni. 1.353, 356; kathā. 753; cūḷani. ajitamānavapucchāniddeśa 4; paṭi. ma. 1.31; netti. 5; dha. pa. 277-279), evampi yuttivasena asaṅkhatāya dhātuyā paramatthato sabbhāvo veditabbo. Kiṃ vā etāya yutticintāya? Yasmā bhagavatā “atthi, bhikkhave, ajātam abhūtam akatam asaṅkhatanti (udā. 73), appaccayā dhammā asaṅkhatā dhammāti (dha. sa. dukamātikā 7-8) ca, asaṅkhatañca vo, bhikkhave, dhammam desessāmi asaṅkhatagāminiñca paṭipada”ntiādinā (sam. ni. 4.366-367, 377) ca anekehi **suttapadehi** nibbānadhātuyā paramatthato sabbhāvo desitoti. Tattha **upanayanapaññattīti** paṭipakkhato hetuupanayanassa paññāpanā. **Jotanāpaññattīti** paṭiññātassa atthassa siddhiyā pakāsanāpaññatti. Sesam sabbam suviññeyyameva.

Paññattihāravibhaṅgavaṇṇanā niṭṭhitā.

12. Otaraṇahāravibhaṅgavaṇṇanā

42. Tattha katamo otaṇaṇo hāroti otaṇaṇahāravibhaṅgo. Tattha **asekkhā vimuttīti** ayaṃ tedhātuke vītarāgatā asekkhā phalavimutti. **Tāniyevāti** tāni asekkhāyaṃ vimuttiyaṃ saddhādīni. **Ayaṃ indriyehi otaṇaṇāti** asekkhāya vimuttīyā niddhāritehi saddhādīhi indriyehi saṃvaṇṇanāya otaṇaṇā.

Pañcindriyāni vijjāti sammāsaṅkappo viya sammādiṭṭhiyā upakārakattā paññākkhandhe saddhādīni cattāri indriyāni vijjāya upakārakattā saṅgaṇhanavasena vuttāni. **Saṅkhārapariyāpannānīti** pañcasu khandhesu saṅkhārakkhandhe antogadhāni. **Ye saṅkhārā anāsavāti** taṃ saṅkhārakkhandhaṃ viśeseti, aggaphalassa adhippetattā. Tato eva ca **no bhavaṅgā. Dhammadhātusaṅgahitāti** aṭṭhārasadhātūsu dhammadhātusaṅgahitā. Yadi pi pubbe vītarāgatā asekkhā vimutti dassitā, tassā pana paṭipattidassanattaṃ “ayaṃ ahamasmīti anānupassī”ti dassanamaggo idha vuttoti imamattaṃ dassettaṃ “**ayaṃ ahamasmīti anānupassī**”tiādi vuttaṃ. Sabbhaṃ vuttanayameva.

43. Nissitassa calitanti taṇhādiṭṭhivasena kammaṃ anavaṭṭhānaṃ. **Cutūpapātoti** aparāparaṃ cavanaṃ upapataṇaṇa. Nissitapade labbhamānaṃ nissayanaṃ uddharanto āha – “**nissayo nāmā**”ti. **Taṇhānissayoti** taṇhābhīniveso. So hi taṇhācaritassa paṭiṭṭhābhāvena tathā vutto. Evaṃ **diṭṭhinissayopi** daṭṭhabbo. **Rattassa cetanāti** cetanāpadhānattā saṅkhārakkhandhadhammānaṃ cetanāsīsenā taṇhaṃ eva vadati. Tenevāha – “**ayaṃ taṇhānissayo**”ti. Yasmā pana viparītābhīniveso mohassa balavabhāve eva hoti, tasmā “**yā mūlhassa cetanā, ayaṃ diṭṭhinissayo**”ti vuttaṃ.

Evaṃ cetanāsīsenā taṇhādiṭṭhiyo vatvā idāni tattha nippariyāyena cetanaṃyeva gaṇhanto “**cetanā pana saṅkhārā**”ti āha. **Yā rattassa vedanā, ayaṃ sukhā vedanāti** sukhāya vedanāya rāgo anusetīti katvā vuttaṃ. Tathā adukkhamasukhāya vedanāya avijjā anusetīti āha – “**yā sammūlhassa vedanā, ayaṃ adukkhamasukhā vedanā**”ti. Idha vedanāsīsenā cetanā vuttā. **Taṇhāyāti** taṇhaṃ. **Diṭṭhiyāti** diṭṭhiṃ. Yathā vā sesadhammānaṃ taṇhāya nissayabhāve puggalo taṇhāya nissitoti vuccati. Evaṃ taṇhāya sesadhammānaṃ paccayabhāve puggalo taṇhāya nissitoti vuccatīti āha – “**taṇhāya anissito**”ti.

Passaddhīti darathapaṭippassambhanā. **Kāyikāti** karajakāyasannissitā. **Cetasikāti** cittasannissitā. Yasmā pana sā darathapaṭippassaddhi kāyacittānaṃ sukhe sati pākaṭā hoti, tasmā “**yaṃ kāyikaṃ sukha**”ntiādinā phalūpacārena vuttāya passaddhiyā natiabhāvassa kāraṇabhāvaṃ dassettaṃ “**passaddhakāyo**”tiādi vuttaṃ. **Soti** evaṃ vimuttacitto khīṇāsavo. **Rūpasaṅkhaye vimuttoti** rūpānaṃ saṅkhasaṅkhāte nibbāne vimutto. **Atthītipi na upetīti** sassato attā ca loko cātipi taṇhādiṭṭhiupayena na upeti na gaṇhāti. **Natthīti** asassatoti. **Atthi natthīti** ekaccaṃ sassattaṃ ekaccaṃ asassatanti. **Nevatthi no natthīti** amarāvikkhepavasena. **Gambhīro**ti uttānabhāvahetūnaṃ kilesānaṃ abhāvena gambhīro. **Nibbutoti** atthītiādinā upagamanakilesānaṃ vūpasamena parinibbuto sītībhūto.

Idhāgatīti paralokato idha āgati. **Gatīti** idhalokato paralokagamaṇaṃ. Taṃ pana punabbhavoti āha “**peccabhavo**”ti. Idha **huranti** dvārāramaṇadhammā dassitāti “**ubhayamantarenā**”ti padena dvārappavattadhamme dassento “**phassasamuditesu dhammesū**”ti āha. Tassattho – phassena saddhiṃ phassena kāraṇabhūtena ca samuditesu sambhūtesu viññāṇavedanāsaññācetanāvitakkavicārādiddhammesu. **Attānaṃ na passatīti** tesāṃ dhammānaṃ anattaabhāveneva tattha attānaṃ na passati. Virajjati virāgā vimuccatīti padehi lokuttaradhammānaṃ paṭiccasamuppādabhāvaṃ dassento tadatthatāya sīlādīnampi pariyāyena tabbhāvamāha “**lokuttaro**”tiādinā.

44. Nāmasampayuttoti nāmena missito. **Saupādisesā nibbānadhātūti** arahattaphalaṃ adhippettaṃ. Taṇca paññāpadhānanti āha – “**saupādisesā nibbānadhātu vijjāti**. Sesāṃ sabbhaṃ uttānameva.

Otaṇaṇahāravibhaṅgavaṇṇanā niṭṭhitā.

13. Sodhanahāravibhaṅgavaṇṇanā

45. Tattha katamo sodhano hāroti sodhanahāravibhaṅgo. Tattha **bhagavā padaṃ sodhetīti**

“avijjāya nivuto loko”ti (su. ni. 1039; cūḷani. ajitamāṇavapucchā 58, ajitamāṇavapucchānidessa 2) vadanto bhagavā – “kenassu nivuto loko”ti (su. ni. 1038; cūḷani. ajitamāṇavapucchā 57, ajitamāṇavapucchānidessa 1) āyasmatā ajitena pucchāvasena vuttaṃ padaṃ sodheti nāma, tadatthassa vissajjanato. **No ca ārambhanti** na tāva ārambhaṃ sodheti, ñātuṃ icchitassa atthassa apariyositattā. **Suddho ārambhoti** ñātuṃ icchitassa atthassa pabodhitattā sodhito ārambhoti attho. Aññāpakkhandānaṃ dvelhakajātānaṃ vā pucchanaḱāle pucchitānaṃ pucchāvisayo aviḱaṭṭaṃ mahāgahaṇaṃ viya mahāduggaṃ viya ca andhakāraṃ avibhūtaṃ hoti. Yādā ca bhagavatā paṇḱitehi vā bhagavato sāvakehi apade padaṃ dassentehi niḱaṭṭaṃ nigumbaṃ katvā pañhe vissajjite mahatā gandhahatthinā abhibhavivā obhaggapadālito gahanappadeso viya vigatandhakāro vibhūto upaṭṭhahamāno visodhito nāma hoti.

Sodhanahāravibhaṅgavaṇṇanā niṭṭhitā.

14. Adhiṭṭhānahāravibhaṅgavaṇṇanā

46. Tattha katamo adhiṭṭhāno hāroti adhiṭṭhānahāravibhaṅgo. Tattha **tathā dhārayitabbāti** ekattavemattatāsāṅkhātasāmaññāvisesamattato dhārayitabbā, na pana tattha kiñci vikappetabbāti adhippāyo. Avikappetabbatāya kāraṇaṃ **niddesavāraṇṇanāyaṃ** vuttameva. Taṃ taṃ phalaṃ maggaṭṭi gavesatīti **maggo**, tadatthikehi maggīyati gavesīyatīti vā **maggo**. Niratīyaṭṭhena nirassādaṭṭhena ca **nirayo**. Uddhaṃ anugantvā tirīyaṃ añcitāti tiracchānā. Tiracchānāva **tiracchānayoni**. Petatāya petti, ito pecca gatabhāvoti attho. Petti eva **pettivīsayo**. Na suranti na bhāsanti na dibbantīti asurā. Asurā eva **asurayoni**. Dibbehi rūpādīhi suṭṭhu aggāti **saggā**. Manassa ussannatāya **manussā**. Vānaṃ vuccati taṇhā, taṃ tattha natthīti **nibbānaṃ**. Nirayaṃ gacchatīti **nirayagāmī**. Sesapadesupi eseva nayo. **Asurayoniyoti** asurayoniyā hito, asurajātīnibbattanakoti attho. Saggāṃ gametīti **saggagāmiyo**. **Manussagāmīti** manussalokagāmī. **Paṭisaṅkhānirodhoti** paṭisaṅkhāya paṭipakkhabhāvanāya nirodho, paṭipakkhe vā tathā appavatte uppajjanārahassa paṭipakkhavuttīyā anuppādo. **Appaṭisaṅkhānirodhoti** saṅkhatadhammaṃ sarasanirodho, khaṇikanirodhoti attho.

47. Rūpanti ekattatā. Bhūtānaṃ upādāyāti vemattatā. Upādārūpanti ekattatā. Cakkhāyatanaṃ...pe... kabaḷīkāro āhāroti vemattatā. Tathā bhūtarūpanti ekattatā. Pathavīdhātu ...pe... vāyodhātūti vemattatā. Pathavīdhātūti ekattatā. Vīsati ākāra vemattatā. Āpodhātūti ekattatā. Dvādasa ākāra vemattatā. Tejodhātūti ekattatā. Cattāro ākāra vemattatā. Vāyodhātūti ekattatā. Cha ākāra vemattatāti imamattaṃ dassento “dvīhi ākārehi dhātuyo pariggaṇhātī**”tiādīmāha.**

Tattha **kesāti** kesā nāma upādinnaḱasarīraṭṭhakā kakkhaḷalakkhaṇā imasmiṃ sarīre pāṭiyekko pathavīdhātukoṭṭhāso. **Lomā** nāma...pe... **matthaluṅgaṃ** nāma sarīraṭṭhakaṃ kakkhaḷalakkhaṇaṃ imasmiṃ sarīre pāṭiyekko koṭṭhāsoti ayaṃ vemattatā. **Āpodhātūti**ādikoṭṭhāsesu pittādīsu eseva nayo. Ayaṃ pana vireso – **yena cāti** yena tejodhātunā kupitena. **Santappatīti** ayaṃ kāyo santappati ekāhīkajarādībhāvena usumajāto hoti. **Yena ca jīriyatīti** yena ayaṃ kāyo jarīyati. Indriyavekallataṃ balakkhayaṃ valittacapalitādīṅca pāpuṇāti. **Yena ca pariḱayhatīti** yena kupitena ayaṃ kāyo ḱayhati, so ca puggalo “ḱayhāmi ḱayhāmī”ti kandanto satadhotasappigosītacandanādīlepanaṃ tālavaṇṭavātāṅca paccāsīsati. **Yena ca asitapītakhāyitasāyitaṃ sammā pariṇāmaṃ gacchatīti** asitaṃ vā odanādi, pītaṃ vā pānakādi, khāyitaṃ vā piṭṭhakhajjakādi, sāyitaṃ vā ambapakkamadhuḱhāṇitādi sammā pariḱākaṃ gacchati, rasādībhāvena vīvekaṃ gacchati attho. Ettha ca purimā tayo tejodhātū catusamuṭṭhānā. Pacchimo kammaṃmuṭṭhānova.

Uddhaṅgamā vātāti uggārahikkārādīpavattakā uddhaṃ ārohanavātā. **Adhogamā vātāti** uccārapassāvādīnīharaṇakā adho orohanavātā. **Kucchīsayā vātāti** antānaṃ bahivātā. **Koṭṭhāsāyā vātāti** antānaṃ antovātā. **Aṅgamaṅgānusārīno vātāti** dhamanījālānusārena sakalasarīre aṅgamaṅgāni anusaṭṭaṃ samīṅjanapasāraṇādīnībbattakā vātā. **Assāsoti** antopavisananāsīkavāto. **Passāsoti** bahīnikkhamananāsīkavāto. Ettha ca purimā sabbe catusamuṭṭhānā. Assāsapassāsā cittasamuṭṭhānā eva.

Evam vematatādassanavasena vibhāgena udāhaṭā catasso dhātuyo paṭikkūlamanasikāravasena upasaṃharanto “**imehi dvācattālisāya ākārehi**”tiādimāha. Tattha **na gayhūpaganti** na gahaṇayoggaṃ. **Sabhāvabhāvatoti** sabhāvalakkhaṇato.

Evam paṭikkūlamanasikāraṃ dassetvā puna tattha sammasanacāraṃ pāḷivaseneva dassetuṃ “**tenāha bhagavā yā ceva kho panā**”tiādimāha. Taṃ sabbaṃ suviññeyyaṃ.

48. Evam saccamaggarūpadhamavasena adhiṭṭhānahāraṃ dassetvā idāni avijjāvijjādīnampi vasena taṃ dassetuṃ “**avijjāti ekattatā**”tiādi vuttaṃ. Tattha “**dukkhe aññāṇa**”ntiādisu yasmā avijjā dukkhasaccassa yāthāvasarasalakkhaṇaṃ jānituṃ paṭivijjhituṃ na deti chādetvā pariyanandhitvā tiṭṭhati, tasmā “**dukkhe aññāṇa**”nti vuccati. Tathā yasmā dukkhasamudayassa dukkhanirodhassa dukkhanirodhagāminiyā paṭipadāya yāthāvasarasalakkhaṇaṃ jānituṃ paṭivijjhituṃ na deti chādetvā pariyanandhitvā tiṭṭhati, tasmā “**dukkhanirodhagāminiyā paṭipadāya aññāṇa**”nti vuccati. **Pubbanto** atītaddhabhūtā khandhāyatanadhātuyo. **Aparanto** anāgataddhabhūtā. **Pubbantāparanto** tadubhayaṃ. **Idappaccayatā** saṅkhārādīnaṃ kāraṇāni avijjādīni. **Paṭiccasamuppannā dhammā** avijjādīhi nibbattā saṅkhārādīdhammā.

Tatthāyaṃ avijjā yasmā atītānaṃ khandhādīnaṃ yāva paṭiccasamuppannānaṃ dhammānaṃ yāthāvasarasalakkhaṇaṃ jānituṃ paṭivijjhituṃ na deti chādetvā pariyanandhitvā tiṭṭhati, tasmā “pubbante aññāṇaṃ yāva paṭiccasamuppannesu dhammesu aññāṇa”nti vuccati, evāyaṃ avijjā kiccato jātitopi kathitā. Ayañhi imāni aṭṭha ṭhānāni jānituṃ paṭivijjhituṃ na detīti kiccato kathitā. Uppajjamānāpi imesu aṭṭhasu ṭhānesu uppajjatīti jātito kathitā. Evam kiccato jātito ca kathitāpi lakkhaṇato kathite eva sukathitā hotīti lakkhaṇato dassetuṃ “**aññāṇa**”ntiādi vuttaṃ.

Tattha ñāṇaṃ atthānatthaṃ kāraṇākāraṇaṃ catusaccadhammaṃ viditaṃ pākaṭaṃ karoti. Ayaṃ pana avijjā uppajjitvā taṃ viditaṃ pākaṭaṃ kātuṃ na detīti ñāṇapaccanīkato aññāṇaṃ. Dassanantīpi paññā, sā hi taṃ ākāraṃ passati. Avijjā pana uppajjitvā passituṃ na detīti **adassanaṃ**. Abhisamayotipi paññā, sā taṃ ākāraṃ abhisameti. Avijjā pana uppajjitvā taṃ abhisametuṃ na detīti **anabhisamayo**. Anubodho sambodho paṭivedhotipi paññā, sā taṃ ākāraṃ anubujjhati sambujjhati paṭivijjhati. Avijjā pana uppajjitvā taṃ anubujjhituṃ sambujjhituṃ paṭivijjhituṃ na detīti **ananubodho asambodho appaṭivedho**. Tathā sallakkhaṇaṃ upalakkhaṇaṃ paccupalakkhaṇaṃ samapekkhaṇantīpi paññā, sā taṃ ākāraṃ sallakkhati upalakkhati paccupalakkhati samaṃ sammā ca apekkhati. Avijjā pana uppajjitvā tassa tathā kātuṃ na detīti **asallakkhaṇaṃ anupalakkhaṇaṃ apaccupalakkhaṇaṃ samapekkhaṇanti** ca vuccati.

Nāssa kiñci paccakkhakammaṃ atthi, sayañca appaccavekkhitvā katakammanti **appaccakkhakammaṃ**. Dummedhānaṃ bhāvo **dummejjhaṃ**. Bālānaṃ bhāvo **bālyaṃ**. Sampajaññanti paññā, sā atthānatthaṃ kāraṇākāraṇaṃ catusaccadhammaṃ sampajānāti. Avijjā pana uppajjitvā taṃ kāraṇaṃ pajānituṃ na detīti **asampajaññaṃ**. Mohanavasena **moho**. Pamohanavasena **pamoho**. Sammohanavasena **sammoho**. Avindiyāṃ vindati, vindiyāṃ na vindatīti **avijjā**. Vaṭṭasmiṃ ohanati otaratīti **avijjogho**. Vaṭṭasmiṃ yojetīti **avijjāyogo**. Appahīnaṭṭhena ceva punappunaṃ uppajjanato ca **avijjānusayo**. Magge pariyaṭṭhitacorā viya addhike kusalacittaṃ pariyaṭṭhāti viluppatīti **avijjāpariyaṭṭhānaṃ**. Yathā nagaradvāre palighasaṅkhātāya laṅgiyā patitāya manussānaṃ nagarappaveso pacchijjati, evameva yassa sakkāyanagare ayaṃ patitā, tassa nibbānasampāpakaṃ ñāṇagamaṇaṃ pacchijjatīti **avijjālaṅgi** nāma hoti. Akusalañca taṃ mūlañca, akusalānaṃ vā mūlanti akusalamūlaṃ. Taṃ pana na aññaṃ, idhādhippeto mohoti **moho akusalamūlanti** ayaṃ ekapadiko avijjāya atthuddhāro. **Ayaṃ vematatātī** ayaṃ avijjāya vematatā.

Vijjāti vindiyāṃ vindatīti vijjā, vijjhanatṭhena vijjā, viditakaraṇatṭhena vijjā. “**Dukkhe ñāṇa**”ntiādisu dukkhasaccassa yāthāvasarasalakkhaṇaṃ jānāti passati paṭivijjhātīti dukkhe ariyasacce visayabhūte ñāṇaṃ “**dukkhe ñāṇa**”nti vuttaṃ. Esa nayo sesesupi. **Paññāti** tassa tassa atthassa pākaṭakaraṇasaṅkhātēna paññāpanatṭhena paññā, tena tena vā aniccādīnā pakāreṇa dhamme jānātīti

paññā. Pajānanākāro **pajānanā**. Aniccādīni vicinatīti **vicayo**. Pakārehi vicinatīti **pavicayo**. Catusaccadhamme vicinatīti **dhammavicayo**. Aniccādīnaṃ sallakkhaṇavasena **sallakkhaṇā**. Tesamyeva pati pati upalakkhaṇavasena **paccupalakkhaṇā**. Paṇḍitabhāvo **paṇḍiccaṃ**. Kusalabhāvo **kosallaṃ**. Nipuṇabhāvo **nepuṇṇaṃ**. Aniccādīnaṃ vibhāvanavasena **vebhabyā**. Tesamyeva cintanavasena **cintā**. Aniccādīni upaparikkhatīti **upaparikkhā**. **Bhūrīti** pathaviyā nāmaṃ, ayampi saṇhaṭṭhena vitthataṭṭhena ca bhūrī viyāti bhūrī. Tena vuttaṃ – “bhūrī vuccati pathavī, tāya pathavisamāya vitthatāya paññāya samannāgatoti bhūripañño” ti (mahāni. 27). Api ca bhūrīti paññāyevetaṃ adhivacanaṃ. Bhūte atthe ramaṭīti **bhūrī**.

Kilese medhati hiṃsatīti **medhā**, khippaṃ gahaṇadhāraṇaṭṭhena vā **medhā**. Yassuppajjati, taṃ sattaṃ hitapaṭipattiyam sampayuttaṃ vā yāthāvalakkhaṇapaṭivedhe pariṇetīti **pariṇāyikā**. Aniccādivasena dhamme vipassatīti **vipassanā**. Sammā pakārehi aniccādīni jānātīti **sampajaññaṃ**. Uppathapaṭipanne sindhave vīthiāropanatthaṃ patodo viya uppathe dhāvanakūṭacittaṃ vīthiāropanatthaṃ vijjhatīti patodo viyāti **patodo**. Dassanalakkhaṇe indaṭṭhaṃ kāretīti indriyaṃ, paññāsankhātāṃ indriyaṃ **paññindriyaṃ**. Avijjāya na kampaṭīti **paññābalaṃ**. Kilesacchedanaṭṭhena paññāva sattaṃ **paññāsattaṃ**. Accuggataṭṭhena paññāva pāsādo **paññāpāsādo**. Ālokanaṭṭhena paññāva āloko **paññāloko**.

Obhāsanatṭhena paññāva obhāso **paññāobhāso**. Pajjotanaṭṭhena paññāva pajjoto **paññāpajjoto**. Ratikaraṇaṭṭhena ratidāyakaṭṭhena ratijanakaṭṭhena cittakataṭṭhena dullabhapātubhāvaṭṭhena atulaṭṭhena anomasattaparibhogaṭṭhena ca paññāva ratanaṃ **paññāratanaṃ**. Na tena sattā muyhanti, sayam vā ārammaṇe na muyhatīti **amoho**. Dhammavicayapadaṃ vuttatthameva. Kasmā panetaṃ puna vuttanti? Amohassa mohapaṭipakkhabhāvadīpanatthaṃ. Tenetaṃ dīpeti – yvāyaṃ amoho, so na kevalaṃ mohato añño dhammo, mohassa paṭipakkho dhammavicayasankhāto amohova idhādhippetoti. **Sammādiṭṭhīti** yāthāvaniyyānikakusaladīṭṭhi. Dhammavicayasankhāto pasattho sundaro vā bojjaṅgoti **dhammavicayasambojjaṅgo**. **Maggaṅganti** ariyamaggassa aṅgaṃ kāraṇanti maggaṅgaṃ. Ariyamaggassa antogadhattā **maggapariyāpananti**.

Asaññāsamaṇāpattīti saññāvirāgabhāvanāvasena pavattitā asaññābhavūpapattinibbattanasamaṇāpattīti. Anuppanne hi buddhe ekacce tīthāyatane pabbajitvā vāyokasiṇe parikkammaṃ katvā catutthajjhānaṃ nibbattetvā jhānā vuṭṭhāya saññāya dosaṃ passanti, saññāya sati hatthacchedādīdukkhaṇceva sabbabhayāni ca honti, “alam imāya saññāya, saññābhāvo santo” ti evaṃ saññāya dosaṃ passitvā saññāvirāgavasena catutthajjhānaṃ nibbattetvā aparihīnājjhānā kālaṃ katvā asaññāsu nibbattanti. Cittaṃ nesaṃ cuticittanirodheneva idha nivattati, rūpakkhandhamattameva tattha nibbattati.

Te yathā nāma jiyāvegukkhitto saro yattako jiyāvego, tattakameva ākāse gacchati, evamevaṃ jhānavegukkhittā upapajjitvā yattako jhānavego, tattakameva kālaṃ tiṭṭhanti. Jhānavege pana parikkhīṇe tattha rūpakkhandho antaradhāyati, idha paṭisandhisaññā uppajjati, taṃ sandhāya vuttaṃ – “asaññābhavūpapattinibbattanasamaṇāpattīti” ti. **Vibhūtasaññāsamaṇāpattīti** viññāṇaṇcāyatanasamaṇāpattīti. Sā hi paṭhamārūppaviññāṇassa paṭhamārūppasaññāyapi vibhāvanato “vibhūtasaññā” ti vuccati. Keci “vibhūtarūpasaññā” ti paṭhanti, tesam matena vibhūtarūpasamaṇāpattīti nāma sesārūppasamaṇāpattītiyo. Sesā samaṇāpattītiyo suviññeyyāva.

Nevasekkhanāsekkho jhāyīti jhānalābhī puthujjano. **Ājāniyo jhāyīti** arahā, sabbepi vā ariyapuggalā. **Assakhaluṅko jhāyīti** khaluṅkassasadiyo jhāyī. Tathā hi khaluṅko asso damathaṃ na upeti ito cito ca yathārucci dhāvati, evamevaṃ yo puthujjano abhiññālābhī, so abhiññā assādetvā “alamettāvata, katamettāvata” ti uttaridamathāya aparisaṅkanto abhiññācittavasena ito cito ca dhāvati pavattati, so “assakhaluṅko jhāyī” ti vutto. **Diṭṭhuttaro jhāyīti** jhānalābhī diṭṭhigatiko. **Paññuttaro jhāyīti** lakkhaṇūpanijjhānena jhāyī, sabbo eva vā paññādhiko jhāyī.

Saraṇo samādhīti akusalacittakaggatā, sabbopi vā sāsavo samādhī. **Araṇo samādhīti** sabbo

kusalābyākato samādhī, lokuttaro eva vā. **Savero samādhī**ti paṭighacittesu ekagatā. **Avero samādhī**ti mettācetovimutti. Anantaradukepi eseva nayo. **Sāmisō samādhī**ti lokiyasamādhī. So hi anattikkantavaṭṭāmisalokāmisatāya sāmiso. **Nirāmiso samādhī**ti lokuttaro samādhī. **Sasaṅkhāro samādhī**ti dukkhāpaṭipado dandhābhīṅṅo sukhāpaṭipado ca dandhābhīṅṅo. So hi sasaṅkhārena sappayogena cittena paccanīkadhamme kicchena kasirena niggahetvā adhigantabbo. Itaro **asaṅkhāro samādhī**. **Ekamaṣabhāvito samādhī**ti sukkhavipassakassa samādhī. **Ubhayamaṣabhāvito samādhī**ti samathayānikassa samādhī. **Ubhayato bhāvitabhāvano samādhī**ti kāyasakkhino ubhatobhāgavimuttassa ca samādhī. So hi ubhayato bhāgehi ubhayato bhāvitabhāvano.

Āgāhapaṭipadāti kāmānaṃ orohanapaṭipatti, kāmasukhānuyogoti attho. **Nijjhāmapaṭipadāti** kāmassa nijjhāpanavasena khedanavasena pavattā paṭipatti, attakilamathānuyogoti attho. **Akkhamā paṭipadāti**tiādisu padhānakaraṇakāle sītādīni asahantassa paṭipadā, tāni nakkhamatīti akkhamā. Sahantassa pana tāni khamatīti **khamā**. “Uppannaṃ kāmavitakkaṃ nādhivāsetī”tiādinā (ma. nī. 1.26; a. nī. 4.14; 6.58) nayena micchāvitakke sametīti **samā**. Manacchaṭṭhāni indriyāni dametīti **damā paṭipadā**.

Evanti iminā vuttanayena. **Yo dhammoti** yo koci jātiādīdhammo. **Yassa dhammassāti** tato aññassa jarādīdhammassa. **Samānabhāvoti** dukkhādībhāvena samānabhāvo. **Ekattatāyāti** samānatāya dukkhādībhāvānaṃ ekībhāvena. **Ekī bhavatīti** anekopi “dukkha”ntiādinā ekasaddābhīdheyyatāya ekī bhavati. Etena ekattatāya lakkhaṇamāha. **Yena yena vā pana vilakkhaṇoti** yo dhammo yassa dhammassa yena yena bhāvena visadisō. **Tena tena vemattaṃ gacchatīti** tena tena bhāvena so dhammo tassa dhammassa vemattataṃ visadisattaṃ gacchati, dukkhabhāvena samānopi jātiādīko abhinibbattīdībhāvena jarādīkassa visiṭṭhataṃ gacchatīti attho. Iminā vemattatāya lakkhaṇamāha.

Idāni tāva ekattavemattatāvisaye niyojetvā dassetuṃ “**sutte vā veyyākaraṇe vā**”tiādi vuttaṃ. Tattha **pucchitanti** pucchāvasena desitasuttavasena vuttaṃ, na pana adhiṭṭhānahārassa pucchāvisayatāya. Sesam uttānameva.

Adhiṭṭhānahāravibhaṅgavaṇṇanā niṭṭhitā.

15. Parikkhārahāravibhaṅgavaṇṇanā

49. Tattha katamo parikkhāro hāroti parikkhārahāravibhaṅgo. Tattha **yo dhammo yaṃ dhammaṃ janayati, tassa so parikkhāroti** saṅkhepato parikkhāralakkhaṇaṃ vatvā taṃ vibhāgena dassetuṃ “**kiṃlakkhaṇo**”tiādi vuttaṃ. Tattha hinoti attano phalaṃ paṭikāraṇabhāvaṃ gacchatīti **hetu**. Paṭicca etasmā phalaṃ etīti **paccayo**. Kiñcāpi hetupaccayasaddehi kāraṇameva vuccati, tathāpi tattha visesaṃ vibhāgena dassetuṃ “**asādhāraṇalakkhaṇo**”tiādi vuttaṃ. **Sabhāvo hetūti** samānabhāvo bījaṃ hetu. Nanu ca bījaṃ aṅkurādisadisam na hotīti? No na hoti, aññato hi tādisassa anuppajjanato.

“**Yathā vā panā**”tiādināpi udāharaṇantaradassanena hetupaccayānaṃ visesameva vibhāveti. Tattha **duddhanti khīraṃ. Dadhi bhavatīti** ekattanayena abhedopacārena vā vuttaṃ, na aññathā. Na hi khīraṃ dadhi hoti. Tenevāha – “**na catthi ekakālasamavadhānaṃ duddhassa ca dadhissa cā**”ti. Atha vā ghaṭe duddhaṃ pakkhittaṃ dadhi bhavati, dadhi tattha kālantare jāyati paccayantarasaṃyogena, tasmā na catthi ekakālasamavadhānaṃ duddhassa ca dadhissa ca rasakhīravipākādīhi bhinnasabhāvattā. **Evamevanti** yathā hetubhūtaṃ khīrassa phalabhūtena dadhinā na ekakālasamavadhānaṃ, evamaññassāpi hetussa phalena na ekakālasamavadhānaṃ, na tathā paccayassa, na hi paccayo ekantena phalena bhinnakālo evāti. Evampi hetupaccayānaṃ viseso vedittabboti adhippāyo.

Evam bāhiraṃ hetupaccayavibhāgaṃ dassetvā idāni ajjhattikaṃ dassetuṃ “**ayañhi saṃsāro**”tiādi vuttaṃ. Tattha “avijjā avijjāya hetū”ti vutte kiṃ ekasmiṃ cittuppāde anekā avijjā vijjantīti? Āha “**purimikā avijjā pacchimikāya avijjāya hetū**”ti. Tena ekasmiṃ kāle hetuphalānaṃ samavadhānaṃ natthīti etamevatthaṃ samattheti. Tattha “**purimikā avijjā**”tiādinā hetuphalabhūtaṃ avijjānaṃ

vibhāgaṃ dasseti. **“Bijaṅkuro viyā”**tiādinā imamatthaṃ dasseti – yathā bījaṃ ankurassa hetu hontaṃ samanantarahetutāya hetu hoti. Yaṃ pana bījato phalaṃ nibbattati, tassa bījaṃ paramparahetutāya hetu hoti. Evaṃ avijjāyapi hetubhāve daṭṭhabbanti.

Puna **“yathā vā panā”**tiādināpi hetupaccayavibhāgameva dasseti. Tattha **thālakanti** dīpakapallikā. **Anaggikanti** aggiṃ vinā. **Dīpetunti** jāletuṃ. **Iti sabhāvo hetūti** evaṃ padīpujjālanādīsu aggiādīpadīpasadisamā kāraṇaṃ sabhāvo hetu. **Parabhāvo paccayoti** tattheva kapallikāvaṭṭitelādisadiso aggitto añño sabhāvo paccayo. **Ajjhattikoti** niyakajjhattiko niyakajjhatte bhavo. **Bāhiroti** tato bahibhūto. **Janakoti** nibbattako. **Pariggāhakoti** upatthambhako. **Asādhāraṇoti** āveṇiko. **Sādhāraṇoti** aññesampi paccayuppannānaṃ samāno.

Idāni yasmā kāraṇaṃ “parikkhāro”ti vuttaṃ, kāraṇabhāvo ca phalāpekkhāya, tasmā kāraṇassa yo kāraṇabhāvo yathā ca so hoti, yañca phalaṃ yo ca tassa viseso, yo ca kāraṇaphalānaṃ sambandho, taṃ sabbaṃ vibhāvetuṃ **“avupacchedattho”**tiādi vuttaṃ. Tattha kāraṇaphalabhāvena sambandhatā **santati**. Ko ca tattha sambandho, ko kāraṇaphalabhāvo ca? So eva avupacchedattho. Yo phalabhūto aññassa akāraṇaṃ hutvā nirujjhati, so vupacchinno nāma hoti, yathā taṃ arahato cuticittaṃ. Yo pana attano anurūpassa phalassa hetu hutvā nirujjhati, so anupacchinno eva nāma hoti, hetuphalasambandhassa vijjamānattāti āha – “avupacchedattho santatiattho”ti.

Yasmā ca kāraṇato nibbattaṃ phalaṃ nāma, na anibbattaṃ, tasmā **“nibbattiattho phalattho”**ti vuttaṃ. Yasmā pana purimabhavena anantarabhavapaṭisandhānavasena pavattā upapattikkhandhā punabbhavo, tasmā vuttaṃ – **“paṭisandhiattho punabbhavattho”**ti. Tathā yassa puggalassa kilesā uppajjanti, taṃ palibundhenti sammā paṭipajjitūṃ na denti. Yāva ca maggena asamugghātītā, tāva anusenti nāma, tena vuttaṃ – **“palibodhattho pariyuṭṭhānattho, asamugghātattho anusayattho”**ti. Pariññābhīsamayavasena pariññāte na kadāci taṃ nāmarūpankurassa kāraṇaṃ hessatīti āha – **“apariññātattho viññāssa bijattho”**ti. **Yattha avupacchedo tattha santatīti** yattha rūpārūpappavattiyam yathāvutto avupacchedo, tattha santativohāro. **Yattha santati tattha nibbattīti**ādi paccayaparamparadassanaṃ hetuphalasambandhavibhāvanameva.

“Yathā vā pana cakkhuṅca paṭicca”tiādinā “sabhāvo hetū”ti vuttamevatthaṃ vibhāgena dasseti. Tattha **sannissayatāyāti** upanissayapaccayatāya. **Manasikāroti** kiriyāmanodhātu. Sā hi cakkhuvīññāssa viññānabhāvena samānajātītāya sabhāvo hetu. **Saṅkhārā viññāssa paccayo sabhāvo hetūti** puññādiabhisaṅkhārā paṭisandhiviññāssa paccayo, tattha yo sabhāvo, so hetūti. **Saṅkhārāti** cettha sabbo lokiyo kusalākusalacittuppādo adhippeto. Iminā nayena sesapadesupi attho veditabbo. **Evaṃ yo koci upanissayo sabbo so parikkhāroti** yathāvuttappabhedo yo koci paccayo, so sabbo attano phalassa parikkhāraṇato abhisaṅkhāraṇato parikkhāro. Tassa niddhāretvā kathanam parikkhāro hāroti.

Parikkhārahāravibhaṅgavaṇṇanā niṭṭhitā.

16. Samāropanahāravibhaṅgavaṇṇanā

50. Tattha katamo samāropano hāroti samāropanahāravibhaṅgo. Tattha **ekasmiṃ padaṭṭhāneti** yasmiṃ kismiñci ekasmiṃ kāraṇabhūte dhamme suttena gahite. **Yattakāni padaṭṭhānāni otarantīti** yattakāni aññesaṃ kāraṇabhūtāni tasmim dhamme samosaranti. **Sabbāni tāni samāropayitabbānīti** sabbāni tāni padaṭṭhānāni padaṭṭhānabhūtā dhammā sammā niddhāraṇavasena ānetvā desanāya āropetabbā, desanāruḷhe viya katvā kathetabbāti attho. Yathā āvaṭṭe hāre “ekamhi padaṭṭhāne, pariyesati sesakaṃ padaṭṭhāna”nti (netti. 4 niddesavāra) vacanato anekesaṃ padaṭṭhānānaṃ pariyesanā vuttā, evamidhāpi bahūnaṃ padaṭṭhānānaṃ samāropanā kātābbāti dassento **“yathā āvaṭṭe hāre”**ti āha. Na kevalam padaṭṭhānavaseneva samāropanā, atha kho vevacanabhāvanāpahānavasena samāropanā kātābbāti dassento **“tattha samāropanā catubbidhā”**tiādimāha.

Kasmā panettha padaṭṭhānavevacanāni gahitāni, nanu padaṭṭhānavevacanahāre eva ayamatto vibhāvīti? Saccametam, idha pana padaṭṭhānavevacanaggahaṇam bhāvanāpahānānam adhiṭṭhānavisayadassanattañceva tesam adhivacanavibhāgadassanattañca. Evañhi bhāvanāpahānāni suviññeyyāni honti sukarāni ca paññāpetum. **Idam padaṭṭhānanti** idam tividham sucariṭam buddhānam sāsanaṃ ovādassa visayādhiṭṭhānabhāvato padaṭṭhānam. Tattha “**kāyika**”ntiadinā tīhi sucariṭehi silādayo tayo khandhe samathavipassanā tatiyacatutthaphalāni ca niddhāretvā dasseti, tam suviññeyyameva. Vanīyatīti **vanam**, vanati, vanute iti vā **vanam**. Tattha yasmā pañca kāmagaṇā kāmataṇhāya, nimittaggāho anubyañjanaggāhassa, ajjhattikabāhirāni āyatanāni tappaṭibandhachandarāgādīnam, anusayā ca pariyuṭṭhānānam kāraṇāni honti, tasmā tamattham dassetum “**pañca kāmagaṇā**”tiādi vuttam.

51. Ayam vevacanena samāropanāti yo “rāgavirāgā cetovimutti sekkhaphalam, anāgāmiphalam, kāmādhātusamatikkamana”nti etehi pariyāyavacanehi tatiyaphalassa niddeso, tathā yo “avijjāvīrāgā paññāvimutti asekkhaphalam, aggaphalam arahattam, tedhātukasamatikkamana”nti etehi pariyāyavacanehi catutthaphalassa niddeso, yo ca “paññindriya”ntiādihi pariyāyavacanehi paññāya niddeso, ayam vevacanehi ca samāropanā.

Tasmātiha tvam, bhikkhu, kāye kāyānupassī viharāhītiādi lakkhaṇahāravibhaṅgavaṇṇanāyam vuttanayena vedītabbam. Kevalam tattha ekalakkhaṇattā avuttānampi vuttabhāvadassanavaseneva āgataṃ, idha bhāvanāsamāropanavasenehi ayameva viseso. Kāyānupassanā visesato asubhānupassanā eva kāmāragatadekatthakilesānam ekantapaṭipakkhāti asubhasaññā kabaḷīkārahārapariññāya paribandhakilesā kāmupādānam kāmāyogo abhijjhākāyagantho kāmāsavo kāmogho rāgasallam rūpadhammapariññāya paṭipakkhakilesā rūpadhammesu rāgo chandāgatigamananti etesam pāpadhammānam pahānāya samvattatīti imamattham dasseti “**kāye kāyānupassī viharanto**”tiādinā.

Tathā vedānupassanā visesato dukkhānupassanāti, sā –

“Yo sukham dukkhato adda, dukkhamaddakkhi sallato;
Adukkhamasukham santam, adakkhi nam aniccato”ti. (sam. ni. 4.253; itivu. 53) –

Ādivacanato sabbam vedanam “dukkha”nti passantī sukhasaññāya vedanāhetupariññāya paribandhakilesānam gosīlādīhi bhavasuddhi hotīti vedanāssādena pavattassa bhavupādānasāṅkhātassa silabbatupādānassa vedanāvasena “anattam me acari”tiādinayappavattassa (dī. ni. 3.340; a. ni. 9.29; 10.79; dha. sa. 1237; vibha. 909, 960) byāpādakāyaganthassa dosasallassa vedanāssādavaseneva pavattassa bhavayogabhavābhavabhavoghasāṅkhātassa bhavarāgassa bhavapariññāya paribandhakakilesānam vedanāvisayassa rāgassa dosāgatigamanassa ca pahānāya samvattatīti etamattham dasseti “**vedanāsu vedānupassī**”tiādinā.

Tathā cittānupassanā visesato aniccānupassanāti, sā cittam “anicca”nti passantī tattha yebhuyyena sattā niccasaññīnoti niccasaññāya viññāṇāhārapariññāya paribandhakilesānam niccābhīnivesapaṭipakkhato eva diṭṭhupādānam diṭṭhiyogasilabbataparāmāsakāyaganthadiṭṭhāsavadiṭṭhohhasāṅkhātāya diṭṭhiyā niccasaññānimittassa “seyyohamasmī”tiādinayappavattassa (dha. sa. 1239; vibha. 832, 866, 962) mānasallassa saññāpariññāya paṭipakkhakilesānam saññāya rāgassa diṭṭhābhīnivesassa appahīnattā uppajjanakassa bhayāgatigamanassa ca pahānāya samvattatīti imamattham dasseti “**citte cittānupassī**”tiādinā.

Tathā dhammānupassanā visesato anattasaññāti, sā saṅkhāresu attasaññāya manosañcetanāhārapariññāya paṭipakkhakilesānam sakkāyādiṭṭhiyā “idameva sacca”nti (ma. ni. 2.187, 202-203; 3.27) pavattassa micchābhīnivesassa micchābhīnivesahetukāya avijjāyogaavijjāsavaavijjoghāmosallasaṅkhātāya avijjāya saṅkhārapariññāya paribandhakilesānam saṅkhāresu rāgassa mohāgatigamanassa ca pahānāya samvattatīti imamattham dasseti “**dhammesu**

dhammānupassī viharanto’’tiādinā. Sesam uttānameva.

Samāropanahāravibhaṅgavaṇṇanā niṭṭhitā.

Niṭṭhitā ca hāravibhaṅgavaṇṇanā.

1. Desanāhārasampātavaṇṇanā

Evam suparikammakatāya bhūmiyā nānāvaṇṇāni muttapupphāni pakiranto viya susikkhitasippācariyavicāritesu surattasuvaṇṇālaṅkāresu nānāvidharaṃsijālasamujjalāni vividhāni maṇiratanāni bandhanto viya mahāpathaviṃ parivattetvā pappātaḷkojaṃ khādāpento viya yojanikamadhugaṇḍaṃ pīletvā sumadhurasam pāyento viya ca āyasmā mahākaccāno nānāsuttapadese udāharanto soḷasa hāre vibhajitvā idāni te ekasmiṃyeva sutte yojetvā dassento hārasampātavāraṃ ārabhi. Ārabhanto ca yāyaṃ niddesavāre –

52. “Soḷasa hārā paṭhamaṃ, disalocanato disā viloketvā;
Saṅkhiya aṅkusena hi, nāyehi tīhi niddise sutta’nti. –

Gāthā vuttā. Yasmā taṃ hāravibhaṅgavāro nappayojeti, vippakiṇṇavisayattā, nayavicārasa ca antaritattā. Anekehi suttapadesehi hārānaṃ vibhāgadassanameva hi hāravibhaṅgavāro. Hārasampātavāro pana taṃ payojeti, ekasmiṃyeva suttapadese soḷasa hāre yojetvāva tadanantaraṃ nayasamuṭṭhānassa kathitattā. Tasmā “soḷasa hārā paṭhama’nti gāthaṃ paccāmasitvā **“tassā niddeso kuhiṃ daṭṭhabbo, hārasampāte”**’ti āha. Tassattho – “tassā gāthāya niddeso kattha daṭṭhabbo’nti. Etena suttasu hārānaṃ yojanāyadassanaṃ hārasampātavāroti dasseti. Hārasampātapaḍaṇṇassa attho vutto eva.

Arakkhitena cittenāti cakkhudvārādīsu satiārakkhābhāvena aguttena cittena. **Micchādiṭṭhihātenā**ti sassatādimicchābhīnivesadūsitena. **Thinamiddhābhībhūtenā**ti cittassa kāyassa ca akalyatālakkaṇehi thinamiddhehi ajjhotthaṇa. **Vasaṃ mārasa gacchatī**ti kilesamārādīnaṃ yathākāmaṃ karaṇīyo hotīti ayaṃ tāva gāthāya padattho.

Pamādanti “arakkhitena cittenā’nti idaṃ padaṃ chasu dvāresu sativosaggaḷakkhaṇaṃ pamādaṃ katheti. **Taṃ maccuno padanti** taṃ pamajjanaṃ guṇamāraṇato maccusaṅkhātassa mārasa vasavattanaṭṭhānaṃ, tena “arakkhitena cittena, vasaṃ mārasa gacchatī’nti paṭhamapādaṃ catutthapādena sambandhitvā dasseti. **So vipallāsoti** yaṃ aniccassa khandhapañcakassa “nicca’nti dassanaṃ, so vipallāso vipariyesaggāho. Tenevāha – **“viparītaggāhalakkaṇo vipallāso”**ti. Sabbam vipallāsasāmaññaṃ gahetvā tassa adhiṭṭhānaṃ pucchati **“kiṃ vipallāsayaṭi”**ti. Sāmaññaṃ ca viseso adhiṭṭhānabhāvena voharīyatīti āha – **“saññaṃ cittaṃ diṭṭhimiti”**ti. Taṃ “vipallāsayaṭi’nti padena sambandhitabbaṃ. Tesu saññāvipallāso sabbamuduko, aniccādikassa visayassa micchāvasena upaṭṭhitākāraggaṇamattaṃ miḡapotakānaṃ tiṇapurisakesu purisoti uppannasaññā viya. Cittavipallāso tato balavataro, amaṇiādike visaye maṇiādiākārena upaṭṭhahante tathā sannīṭṭhānaṃ viya niccādito sannīṭṭhānamattaṃ. Diṭṭhivipallāso pana sabbabalavataro yaṃ yaṃ ārammaṇaṃ yathā yathā upaṭṭhāti, tathā tathā naṃ sassatādivasena “idameva saccam moghamāñña’nti abhinivisanto pavattati. Tattha saññāvipallāso cittavipallāsassa kāraṇaṃ, cittavipallāso diṭṭhivipallāsassa kāraṇaṃ hoti.

Idāni vipallāsānaṃ pavattiṭṭhānaṃ visayaṃ dassetuṃ **“so kuhiṃ vipallāsayaṭi, catūso attabhāvavattūsū”**ti āha. Tattha **attabhāvavattūsū**ti pañcasu upādānakkhandhesu. Te hi āhito ahaṃ māno etthāti attā, “attā’nti bhavati ettha buddhi vohāro cāti attabhāvo, so eva subhādīnaṃ vipallāsassa ca adhiṭṭhānabhāvato vattū cāti “attabhāvavattū’nti vuccati. **“Rūpaṃ attato samanupassati”**tiādinā tesam sabbavipallāsamūlabhūtāya sakkāyadiṭṭhiyā pavattiṭṭhānabhāvena attabhāvavattūtaṃ dassetvā puna vipallāsānaṃ pavattiākārena saddhiṃ visayaṃ vibhajitvā dassetuṃ **“rūpaṃ paṭhamaṃ vipallāsavattū asubhe subha”**nti vuttaṃ. Taṃ sabbam suviññeyyaṃ. Puna mūlakāraṇavasena

vipallāse vibhajitvā dassetuṃ “**dve dhammā cittassa saṃkilesā**”tiādimāha. Tattha kiñcāpi avijjārahitā taṇhā natthi, avijjā ca subhasukhasaññānampi paccayo eva, tathāpi taṇhā etāsaṃ sātisayaṃ paccayoti dassetuṃ “**taṇhānivutaṃ...pe... dukkhe sukha**”nti vuttaṃ. **Diṭṭhinivutanti** diṭṭhisīsa avijjā vuttāti avijjānivutanti attho. Kāmañcetta taṇhārahitā diṭṭhi natthi, taṇhāpi diṭṭhiyā paccayo eva. Taṇhāpi “niccaṃ attā”ti ayoniso ummujjantānaṃ tathāpavattamicchābhinivesassa moho viśesapaccayoti dassetuṃ “**diṭṭhinivutaṃ...pe... attā**”ti vuttaṃ.

Yo diṭṭhivipallāsoti “anicce niccaṃ, anattani attā”ti pavattampi vipallāsadvayaṃ sandhāyāha – “**so atītaṃ rūpaṃ...pe... atītaṃ viññānaṃ attato samanupassati**”ti. Etena aṭṭhārasavidhopi pubbantānukappikavādo pacchimānaṃ dvinnaṃ vipallāsānaṃ vasena hotīti dasseti. **Taṇhāvīpallāsoti** taṇhāmūlako vipallāso. “Asubhe subhaṃ, dukkhe sukha”nti etaṃ vipallāsadvayaṃ sandhāya vadati. **Anāgataṃ rūpaṃ abhinandatīti** anāgataṃ rūpaṃ diṭṭhābhinandanavasena abhinandatīti. **Anāgataṃ vedanaṃ, saññaṃ, saṅkhāre, viññānaṃ abhinandatīti** etthāpi eseva nayo. Etena catucattālīsavidhopi aparantānukappikavādo yebhuyyena purimānaṃ dvinnaṃ vipallāsānaṃ vasena hotīti dasseti. **Dve dhammā cittassa upakkilesāti** evaṃ paramasāvajjassa vipallāsassa mūlakāraṇanti viśesato dve dhammā cittassa upakkilesā **taṇhā ca avijjā cāti** te sarūpato dasseti. Tāhi visujjhantaṃ cittaṃ visujjhatīti paṭipakkhavasena paṭi tāsāṃ upakkilesabhāvaṃyeva vibhāveti, na hi taṇhāavijjāsu pahīnāsu koci saṃkilesadhammo na pahiyatīti. Yathā ca vipallāsānaṃ mūlakāraṇaṃ taṇhāvijjā, evaṃ sakalassāpi vaṭṭassa mūlakāraṇanti yathānusandhināva gāthaṃ niṭṭhapetuṃ “**tesa**”ntiādi vuttaṃ. Tattha **tesanti** yesaṃ arakkhitaṃ cittaṃ micchādiṭṭhihataṇca, tesaṃ. “**Avijjānīvaraṇāna**”ntiādinā māraśsa vasagamanena anādimatisaṃsāre saṃsaraṇanti dasseti.

Thinamidhābhībhūtenāti ettha “**thinaṃ nāma**”tiādinā thinamidhānaṃ sarūpaṃ dasseti. Tehi cittassa abhībhūtatā suviññeyyāvātī taṃ anāmasitvā kilesamāraggaṇeṇeva taṃnimittā abhisāṅkhāramāraḥkhandhamāramaccumārā gahitā evātī “**kilesamāraśsa ca sattaṃmāraśsa cā**”ti ca-saddena vā tesampi gahaṇaṃ katanti daṭṭhabbaṃ. **So hi nivuto saṃsārābhīmukhoti** so māraśvaśaṃ gato, tato eva nivuto kileśehī yāva na māraśbandhanaṃ chījati, tāva saṃsārābhīmukhova hoti, na viśāṅkhāraśbhīmukhoti adhippāyo. Imāni bhagavatā dve saccāni deśitāni. Kathaṃ deśitāni?

Tattha duvidhā kathā abhidhammanissitā ca suttantanissitā ca. Tāsu abhidhammanissitā nāma **arakkhitena cittenāti** rattampi cittaṃ arakkhitaṃ, duṭṭhampi cittaṃ arakkhitaṃ, mūlhampi cittaṃ arakkhitaṃ. Tattha rattāṃ cittaṃ aṭṭhannaṃ lobhasahagatacittuppādānaṃ vasena veditabbaṃ, duṭṭhaṃ cittaṃ dvinnaṃ paṭighacittuppādānaṃ vasena veditabbaṃ, mūlhaṃ cittaṃ dvinnaṃ momūhacittuppādānaṃ vasena veditabbaṃ. Yāva imesaṃ cittuppādānaṃ vasena indriyānaṃ agutti agopāyanā apālanā anāraḥkhā sativosaggo pamādo cittassa asaṃvaro, evaṃ arakkhitaṃ cittaṃ hoti. Micchādiṭṭhihataṃ nāma cittaṃ catunnaṃ diṭṭhisampayuttacittuppādānaṃ vasena veditabbaṃ, thinamidhābhībhūtaṃ nāma cittaṃ pañcannaṃ asaṅkhārikākusalacittuppādānaṃ vasena veditabbaṃ. Evaṃ sabbepi aggaḥitaggaṇeṇa dvādasa akusalacittuppādā honti. Te “katame dhammā akusalā? Yasmaṃ samaye akusalaṃ cittaṃ uppannaṃ hotī”tiādinā **cittuppādakaṇḍe** (dha. sa. 365) akusalacittuppādadesanāvasena vitthārato vattabā. **Māraśsāti** ettha pañca māra. Tesu kilesamāraśsa catunnaṃ āśavaṇaṃ catunnaṃ oghānaṃ catunnaṃ yogānaṃ catunnaṃ ganthānaṃ catunnaṃ upādānaṃ aṭṭhannaṃ nīvaraṇānaṃ dasannaṃ kilesavatthūnaṃ vasena **āśavagocchakādīsu** (dha. sa. dukamātikā 14-19, 1102) vuttanayena, tathā “jātimado gottamado ārogyamado”tiādinā **khuddakavatthuvibhaṅge** (vibha. 832) āgatānaṃ sattaṇnaṃ kilesānaṇca vasena vibhāgo vattabbo. Ayaṃ tāvettha abhidhammanissitā kathā.

Suttantanissitā (ma. ni. 1.347; a. ni. 11.17) pana **arakkhitena cittenāti** cakkhunā rūpaṃ disvā nimittaggāhī hoti anubyañjanaggāhī, yatvādhikaraṇaṃmenaṃ cakkhundriyaṃ asaṃvutaṃ viharantaṃ abhījjhādomanassā pāpakā akusalā dhammā anvāśsaveyyuṃ, tassa saṃvarāya na paṭipajjati, na rakkhati cakkhundriyaṃ, cakkhundriye na saṃvaraṃ āpajjati. Sotena ...pe... ghānena... jivhāya... kāyena... manasā...pe... manindriyena saṃvaraṃ āpajjati (ma. ni. 1.347, 411, 421; 2.419; 3.15, 75). Evaṃ arakkhitaṃ cittaṃ hoti. **Micchādiṭṭhihataṇca cāti** micchādiṭṭhihataṃ nāma cittaṃ

pubbantakappanavasena vā aparantakappanavasena vā pubbantāparantakappanavasena vā micchābhinivisantassa ayoniso ummujjantassa “sassato lokoti vā...pe... neva hoti na na hoti tathāgato paraṃ maraṇā”ti (vibha. 937; paṭi. ma. 1.140) vā yā diṭṭhi, tāya hataṃ upahataṃ. Yā ca kho “imā cattāro sassatavādā...pe... pañca paramadiṭṭhadhammanibbānavādā”ti brahmajāle (dī. ni. 1.30 ādayo) pañcattāye (ma. ni. 3.21 ādayo) ca āgatā dvāsaṭṭhi diṭṭhiyo, tāsāṃ vasena cittaṃ micchādiṭṭhihatabhāvo kathetabbo.

Thinamiddhābhībhūtenāti thinam nāma cittaṃ akammaññatā. **Middham** nāma vedanādikkhandhattayassa akammaññatā. Tathā **thinam** anussāhasaṃhananaṃ. **Middham** asattivighāto. Iti thinena middhena ca cittaṃ abhibhūtaṃ ajjhotthaṃ upaddutaṃ saṅkocanappattaṃ layāpannaṃ. **Vasaṃ mārasa gacchatīti vaso** nāma icchā lobho adhippāyo ruci ākaṅkhā āṇā āṇatti. **Māroti** pañca mārā – khandhamāro abhisāṅkhāramāro maccumāro devaputtamāro kilesamāroti. **Gacchatīti** tesāṃ vasaṃ icchaṃ...pe... āṇattim gacchatīti upagacchatīti upeti vattatīti anuvattatīti nātikkatatīti. Tena vuccatīti – “vasaṃ mārasa gacchatī”ti.

Tattha yathāvuttā akusalā dhammā, taṇhāvijjā eva vā samudayasaccaṃ. Yo so “vasaṃ mārasa gacchatī”ti vutto, so ye pañcupādānakkhandhe upādāya paññatto, te pañcakkhandhā dukkhasaccaṃ. Evaṃ bhagavatā idha dve saccāni desitāni. Tenevāha – “**dukkham samudayo ca**”ti. Tesāṃ bhagavā pariññāya ca pahānāya ca dhammaṃ desetīti vuttamevatthaṃ pākaṭataraṃ kātuṃ “**dukkhassa pariññāya samudayassa pahānāya**”ti vuttaṃ. Kathaṃ desetīti ce –

“Tasmā rakkhitacittaṃ, sammāsaṅkappagocaro;
Sammādiṭṭhim purakkhatvā, ñatvāna udayabbayaṃ;
Thinamiddhābhībhū bhikkhu, sabbā duggatiyo jahe”ti. (udā. 32) –

Gāthāya. Tassattho – yasmā arakkhitena cittaṃ vasaṃ mārasa gacchatīti, tasmā satsaṃvarena manacchaṭṭhānaṃ indriyānaṃ rakkhaṇena rakkhitacitto assa. **Sammāsaṅkappagocaroti** yasmā kāmāsaṅkappādimicchāsaṅkappagocaro tathā tathā ayoniso vikappetvā nānāvidhāni micchādassanāni gaṇhāti. Tato eva ca micchādiṭṭhihataṃ cittaṃ vasaṃ mārasa gacchatīti, tasmā yonisomanasikārena kammaṃ karonto nekkhammasaṅkappādisammāsaṅkappagocaro assa. **Sammādiṭṭhim purakkhatvāti** sammāsaṅkappagocarātāya vidhutamicchādassano kammassakatālakkaṇaṃ yathābhūtañālakkaṇaṃ sammādiṭṭhim pubbaṅgamaṃ katvā silasamādhīsu yuttappayutto. Tato eva ca **ñatvāna udayabbayaṃ** pañcasu upādānakkhandhesu samapaññāsāya ākārehi uppādaṃ nirodhaṃ ñatvā vipassanaṃ ussukkāpetvā anukkamena ariyamagge gaṇhanto aggamaggena **thinamiddhābhībhū bhikkhu sabbā duggatiyo jaheti** evaṃ sabbaso bhinnakilesatā bhikkhu khīṇāsavo yathāsambhavaṃ tividhadukkhatāyogena duggatisaṅkhātā sabbāpi gatiyo jaheyya, tāsāṃ parabhaḅge nibbāne tiṭṭheyyāti attho.

Yaṃ taṇhāya avijjāya ca pahānaṃ, ayaṃ nirodhoti pahānassa nirodhassa paccayabhāvato asaṅkhatadhātu pahānaṃ nirodhoti ca vuttā. **Imāni cattāri saccāni** purimagāthāya purimāni dve, pacchimāgāthāya pacchimāni dveti dvīhi gāthāhi bhāsītāni imāni cattāri ariyasaccāni. Tesu samudayena assādo, dukkhena ādīnava, magganirodhehi nissaraṇaṃ, sabbagatijahanaṃ phalaṃ, rakkhitacittatādiko upāyo, arakkhitacittatādinisedhanamukhena rakkhitacittatādīsu niyojanaṃ bhagavato āṇattīti. Evaṃ desanāhārapadatthā assādādayo niddhāretabbā. Tenevāha – “**niyutto desanāhārasampāto**”ti.

Desanāhārasampātavaṇṇanā niṭṭhitā.

2. Vicayahārasampātavaṇṇanā

53. Evaṃ desanāhārasampātaṃ dassetvā idāni vicayahārasampātaṃ dassento yasmā desanāhārapadatthavicayo vicayahāro, tasmā desanāhāre vipallāsahetubhāvena niddhāritāya taṇhāya

kusalādivibhāgapavicayamukhena vicayahārasampātaṃ dassetuṃ “**tattha taṇhā duvidhā**”tiādi āradhāṃ. Tattha **kusalāti** kusaladhammārammaṇā. **Kusala**-saddo cettha **bāhītikasutte** (ma. ni. 2.358 ādayo) viya anavajjatthe daṭṭhabbo. Kasmā panettha taṇhā kusalapariyāyena uddhaṭā? Heṭṭhā desanāhāre vipallāsahetubhāvena taṇhaṃ uddharitvā tassā vasena saṃkilesapakkho dassito. Vicittapaṭibhānatāya pana idhāpi taṇhāmukheneva vodānapakkhaṃ dassetuṃ kusalapariyāyena taṇhā uddhaṭā. Tattha saṃsāraṃ gametūti **saṃsāragāminī**, saṃsāranāyikāti attho. Apacayaṃ nibbānaṃ gametūti **apacayagāminī**. Kathaṃ pana taṇhā apacayagāminīti? Āha “**pahānataṇhā**”ti. Tadaṅgādippahānassa hetubhūtaṃ taṇhā. Kathaṃ pana ekantasāvajjāya taṇhāya kusalabhāvoti? Sevittabbabhāvato. Yathā taṇhā, evaṃ **mānopi duvidho kusalopi akusalopi**, na taṇhā evāti taṇhāya nidassanabhāvena māno vutto.

Tattha mānassa yathādhippetāṃ kusalādivibhāvaṃ dassetuṃ “**yaṃ mānaṃ nissāyā**”tiādimāha. Vuttañhetāṃ bhagavatā – “mānamahaṃ, devānaminda, duvidhena vadāmi sevittabbampi asevitabbampi”tiādi. **Yaṃ nekkhammassitaṃ domanassantiādi** “kusalā”ti vuttataṇhāya sarūpadassanattaṃ vuttaṃ. Tattha nekkhammassitaṃ domanassaṃ nāma –

“Tattha katamāni cha nekkhammassitāni domanassāni? Rūpānaṃtveva aniccatāṃ veditvā vipariṇāma virāgaṇirodhaṃ ‘pubbe ceva rūpā etarahi ca, sabbete rūpā aniccā dukkhā vipariṇāmadhammā’ti evametāṃ yathābhūtaṃ sammappaññāya disvā anuttaresu vimokkhesu pihaṃ upaṭṭhāpeti ‘kudāssu nāmāhaṃ tadāyatanaṃ upasampajja viharissāmi, yadariyā etarahi āyatanaṃ upasampajja viharanti’ti. Iti anuttaresu vimokkhesu pihaṃ upaṭṭhāpayato uppajjati pihā, pihāpaccayā domanassaṃ. Yaṃ evarūpaṃ domanassaṃ, idaṃ vuccati nekkhammassitaṃ domanassa”nti (ma. ni. 3.307) –

Evaṃ chasu dvāresu iṭṭhārammaṇe āpāthagate anuttaravimokkhasaṅkhātaariyaphaladhammesu pihaṃ upaṭṭhāpetvā tadadhiḡamāya aniccādivasena vipassanaṃ upaṭṭhāpetvā ussukkāpetuṃ asakkontassa “imampi pakkhaṃ imampi māsaṃ, imampi saṃvaccharaṃ, vipassanaṃ ussukkāpetvā ariyabhūmiṃ sampāpuṇiṭuṃ nāsakkhi”nti anusocato uppannaṃ domanassaṃ nekkhammasena vipassanāvasena anussativasena paṭhamajjhānādivasena paṭipattiyā hetubhāvena uppajjanato nekkhammassitaṃ domanassaṃ nāma. **Ayaṃ taṇhā kusalāti** ayaṃ “pihā”ti vuttā taṇhā kusalā. Kathaṃ? **Rāgavirāgā cetovimutti, tadārammaṇā kusalāti**. Idaṃ vuttaṃ hoti – rāgavirāgā cetovimutti, na sabhāvena kusalā, anavajjatṭhena kusalā. Taṃ uddissa pavattiyā tadārammaṇā pana taṇhā kusalārammaṇatāya kusalāti. **Avijjāvirāgā paññāvimutti** anavajjatṭhena kusalā. **Tassāti** paññāvimuttiyā. Yāya vasena “tasmā rakkhitacittassā”ti gāthāyaṃ “sabbā duggatiyo jahe”ti vuttaṃ.

Iti cirataṃ vipassanāparivāsaṃ parivasitvā dukkhāpaṭipadādandhābhīññāya adhigatāya paññāvimuttiyā vasena vicayahārasampātaṃ dassetuṃ “**tassā ko pavicayo**”tiādi āradhāṃ. Tattha yasmā paññāvimutti ariyamaggamūlikā, tasmā catutthajjhānapādaḡe ariyamaggadhamme uddisitvā tesāṃ āgamaṇapaṭipadaṃ dassetuṃ “**kattha daṭṭhabbo, catutthe jhāne**”tiādi vuttaṃ. Tattha **pāramitāyāti** ukkaṃsagatāya catutthajjhānabhāvanāya. Yehi aṭṭhahi aṅgehi samannāgataṃ catutthajjhānacittaṃ vuttaṃ, tāni aṅgāni dassetuṃ “**parisuddha**”ntiādi vuttaṃ.

Tattha upekkhāsati parīsuddhibhāvena **parisuddhaṃ**. Parisuddhattā eva **pariyodātaṃ**, pabhassaranti vuttaṃ hoti. Sukhādīnaṃ paccayaghātena vītarāgādiṅgaṇattā **anaṅgaṇaṃ**. Anaṅgaṇattā eva **vigatūpakkilesaṃ**, aṅgaṇena hi cittaṃ upakkilissati, subhāvitattā mudubhūtaṃ vasibhāvappattanti attho. Vase vattamānañhi cittaṃ “**mudū**”ti vuccati. Muduttā eva ca **kammaniyaṃ**, kammakkhaṃ kammayogganti attho. Muduñhi cittaṃ kammaniyaṃ hoti, evaṃ bhāvitāṃ muduñca hoti kammaniyañca, yathayidaṃ, bhikkhave, citta”nti (a. ni. 1.22). Etesu parisuddhabhāvādīsū ṭhitattā ṭhitaṃ. Ṭhitattāyeva āneñjappattaṃ, acalaṃ niriñjananti attho. Mudukammaññabhāvena vā attano vase ṭhitattā ṭhitaṃ. Saddhādīhi pariggahitattā āneñjappattaṃ. Saddhāpariggahitañhi cittaṃ assaddhiyena na iñjati, vīriyapariggahitaṃ kosajjena na iñjati, satipariggahitaṃ pamādena na iñjati, samādhipariggahitaṃ uddhaccena na iñjati, paññāpariggahitaṃ avijjāya na iñjati, obhāsagataṃ kilesandhakārena na iñjati. Imehi chahi dhammehi pariggahitaṃ āneñjappattaṃ hoti. Evaṃ aṭṭhaṅgasamannāgataṃ cittaṃ

abhinīhārakkhamam hoti. Abhiññāsacchikaraṇīyānam dhammānam abhiññāsacchikiriya.

Aparo nayo – catutthajjhānasamādhinā samāhitam cittam nīvaraṇadūrībhāvena **parisuddham**. Vitakkādisamatikkamena **pariyodātam**. Jhānapaṭilābhapaccanīkānam pāpakānam icchāvacarānam abhāvena **anaṅgaṇam**. **Ichhāvacarānanti** icchāya avacarānam icchāvasena otiṇṇānam pavattānam nānappakārānam kopaapaccayānanti attho. Abhijjhādīnam cittupakkilesānam vigamena **vigatūpakkilesam**. Ubhayampi cetam **anaṅgasuttavattasuttānam** (ma. ni. 1.57 ādayo; 70 ādayo) vasena veditabbaṃ. Vasippattiyā **mudubhūtam**. Iddhipādabhāvūpagamena **kammaniyaṃ**. Bhāvanāpāripūriyā paṇītabhāvūpagamena **ḥitam āneñjappattam**. Yathā āneñjabhāvappattam āneñjappattam hoti, evaṃ ḥitanti attho. Evampi aṭṭhaṅgasamannāgatam cittam abhinīhārakkhamam hoti. Abhiññāsacchikaraṇīyānam dhammānam abhiññāsacchikiriya pādakam padaṭṭhānabhūtam. Tenevāha – “**so tattha aṭṭhavidham adhiḡacchati cha abhiññā dve ca visese**”ti.

Tattha **soti** adhiḡatacatutthajjhāno yogī. **Tatthāti** tasmim catutthajjhāne adhiṭṭhānabhūte. **Aṭṭhavidham adhiḡacchati** aṭṭhavidham guṇam adhiḡacchati. Ko pana so aṭṭhavidho guṇoti? Āha “**cha abhiññā dve ca visese**”ti. Manomayiddhi vipassanāñāṇaṇca. **Tam cittanti** catutthajjhānacittam. “**Yato parisuddham, tato pariyodāta**”ntiādīnā purimaṃ purimaṃ pacchimassa pacchimassa kāraṇavacananti dasseti. **Tadubhayanti** yesam rāḡādiāṅgaṇānam abhijjhādiupakkilesānaṇca abhāvena “anaṅgaṇam vigatūpakkilesa”nti ca vuttam. Tāni āṅgaṇāni upakkilesā cāti tam ubhayaṃ. Tadubhayaṃ taṇhāsabhāvattā taṇhāya anulomanato ca **taṇhāpakkho**. **Yā ca iñjanāti** yā ca cittassa asamādānena phandaṇā. **Aṭṭhitī** anavaṭṭhānam. **Ayam diṭṭhipakkhoti** yā iñjanā aṭṭhiti ca, ayam micchābhinivesahetutāya diṭṭhipakkho.

“**Cattāri indriyāni**”tiādīnā vedanātopi catutthajjhānam vibhāveti. Evaṃ aṭṭhaṅgasamannāgatam catutthajjhānacittam upari abhiññādhiḡamāya abhinīhārakkhamam hoti. Sā ca abhinīhārakkhamatā cuddasahi ākārehi ciṇṇavasibhāvasseva hoti. So ca vasibhāvo aṭṭhasamāpattilābhino, na rūpāvacarajjhānamattalābhinoti āruppasamāpattiyā manasikāraviddhim dassento “**so uparimaṃ samāpattim santato manasikaroti**”tiādīmāha. Tattha **uparimaṃ samāpattinti** ākāśānaṇcāyatanasamāpattim. **Santato manasikaroti**ti āṅgasantatāyapi ārammaṇasantatāyapi “santā”ti manasikaroti. Yato yato hi āruppasamāpattim santato manasikaroti, tato tato rūpāvacarajjhānam avūpasantaṃ hutvā upaṭṭhāti. Tenevāha – “**tassa uparimaṃ...pe... saṇṭhahati**”ti. **Ukkaṇṭhā ca paṭiḡhasaṇṇāti** paṭiḡhasaṇṇāsaṅkhātāsu pañcaviññāṇasaṇṇāsu anabhirati saṇṭhahati. “**So sabbaso**”tiādīnā ekadesena āruppasamāpattim dasseti. **Abhiññābhinihāro rūpasāṇṇāti** rūpāvacarasaṇṇā nāmetā yāvadeva abhiññātaḡbhinihāramattaṃ, na pana arūpāvacarasamāpattiyō viya santāti adhippāyo. **Vokāro nānattasaṇṇāti** nānattasaṇṇā nāmetā nānārammaṇesu vokāro, tattha cittassa ākulappavattīti attho. **Samatikkamatīti** evaṃ tattha ādīnavadassī hutvā tā samatikkamati. **Paṭiḡhasaṇṇā cassa abbattham ḡacchati**ti assa ākāśānaṇcāyatanasamāpattim adhiḡacchantaṇṇa yogino dasapi paṭiḡhasaṇṇā viḡacchanti. Iminā paṭhamārūppasamāpattimāha.

Evaṃ samāhitassāti evaṃ iminā vuttanayena rūpāvacarajjhāne cittekaggaṭāyapi samatikkamena samāhitassa. **Samāhitassāti** āruppasamādhinā santavuttinā samāhitassa. **Obhāsoti** yo pure rūpāvacarajjhānobhāso. **Antaradhāyati**ti so rūpāvacarajjhānobhāso arūpāvacarajjhānasamāpajjanakāle viḡacchati. **Dassanaṇcāti** rūpāvacarajjhānacakkhunā dassanaṇca antaradhāyati. **So samādhīti** so yathāvutto rūpārūpasamādhī. **Chalaṅgasamannāgoti**ti upakāraaparikkhārasabhāvabhūtehi chahi āṅgehi samannāgato. **Paccavekkhitabboti** pati avekkhitabbo, punappunaṃ cintetabboti attho. Paccavekkhaṇākāram saha visayena dassetuṃ “**anabhijjhāsahagata**”ntiādi vuttam. Tattha **sabbaloketi** sabbasmim piyarūpe satarūpe sattaloke saṅkhāraloke ca. Tena kāmaccchandassa pahānamāha. Tathā “**abyāpanna**”ntiādīnā byāpādakosajjasārambhasātheyyavikkhepasammosānam pahānam. Puna tāni cha āṅgāni samathavipassanāvasena vibhājivā dassetuṃ “**yaṇca anabhijjhāsahagata**”ntiādi vuttam. Tam sabbam suviññeyaṃ.

54. Ettāvata “paññāvimuttī”ti vuttassa arahattaphalassa samādhimukhena pubbabhāgapaṭipadam dassetvā idāni arahattaphalassamādhim dassetuṃ “**so samādhī**”tiādi vuttaṃ. Tattha **so samādhī**ti yo so sammāsamādhī. Pubbe vuttassa ariyamaggasamādhissa phalabhūto samādhī **pañcavidhena vedītabbo** idāni vuccamānehi pañcahi paccavekkhaṇañānehi attano paccavekkhitabbākārasaṅkhātena pañcavidhena vedītabbo. “**Ayaṃ samādhī paccuppannasukho**”tiādīsu arahattaphalassamādhī appitappitakkhaṇe sukhattā **paccuppannasukho**. Purimo purimo pacchimassa pacchimassa samādhisukhassa paccayattā **āyatim sukhavipāko**. Kilesehi ārakattā **ariyo**. Kāmāmisavaṭṭāmisalokāmisānaṃ abhāvā **nirāmisō**. Buddhādīhi mahāpurisehi sevitattā **akāpurisasevito**. Aṅgasantatāya sabbakilesadarathasantatāya ca **santo**. Atittikaraṭṭhena **paṇīto**. Kilesapaṭippassaddhiyā laddhattā, kilesapaṭippassaddhibhāvena vā laddhattā **paṭippassaddhiladdho**. Passaddhaṃ passaddhīti hi idaṃ atthato ekaṃ. Paṭippassaddhikilesena vā arahatā laddhattāpi **paṭippassaddhiladdho**. Ekodibhāvena adhigatattā, ekodibhāvameva vā adhigatattā **ekodibhāvādhigato**. Appaṇasāsavasamādhī viya sasaṅkhārena sappayogena paccanīkadhamme niggayha kilese vāretvā anadhigatattā **nasasaṅkhāraniggayhavāritagatoti**.

Yato yato bhāgato tañca samādhim samāpajjanto, tato vā vuṭṭhahanto satīvepullappatto satova samāpajjati satova vuṭṭhahati, yathāparicchinnaḷavasena vā sato samāpajjati sato vuṭṭhahati. Tasmā yadettha “ayaṃ samādhī paccuppannasukho ceva āyatīñca sukhavipāko”ti evaṃ paccavekkhantassa paccattameva aparappaccayañānaṃ uppajjati, ayameko ākāro. Esa nayo sesesupī. Evametesam pañcannaṃ paccavekkhitabbākāraṇaṃ vasena samādhī pañcavidhena vedītabbo.

Puna “**yo ca samādhī**”tiādīnā arahattaphale samathavipassanāvībhāgaṃ dasseti. Tattha samādhisukhassa “sukha”nti adhippetattā “**yo ca samādhī paccuppannasukho, yo ca samādhī āyatim sukhavipāko, ayaṃ samatho**”ti vuttaṃ. Ariyanirāmisādībhāvo pana paññānubhāvena nipphajjati āha – “**yo ca samādhī ariyo...pe... ayaṃ vipassanā**”ti.

Evaṃ arahattaphalassamādhim vibhāgena dassetvā idāni tassa pubbabhāgapaṭipadam samādhivībhāgena dassetuṃ “**so samādhī**”ti vuttaṃ. Tattha **so samādhī**ti yo so arahattaphalassamādhissa pubbabhāgapaṭipadāyaṃ vutto rūpāvacaracattahajjhānasamādhī, so samādhī. **Pañcavidhenā**ti vakkhamānena pañcappakārena vedītabbo. “**Pītipharaṇatā**”tiādīsu pītim pharamānā uppajjati dvīsu jhānesu paññā **pītipharaṇatā** nāma. Sukhaṃ pharamānā uppajjati tīsu jhānesu paññā **sukhapharaṇatā** nāma. Paresam ceto pharamānā uppajjati cetopariyapaññā **cetopharaṇatā** nāma. Ālokapharaṇe uppajjati dibbacakkhupaññā **ālokapharaṇatā** nāma. Paccavekkhaṇañānaṃ **paccavekkhaṇānimittam** nāma. Vuttampi cetam “dvīsu jhānesu paññā pītipharaṇatā, tīsu jhānesu paññā sukhapharaṇatā, paracitte ñānaṃ cetopharaṇatā, dibbacakkhu ālokapharaṇatā, tamhā tamhā samādhimhā vuṭṭhitassa paccavekkhaṇañānaṃ paccavekkhaṇanimitta”nti (vibha. 804).

Idha samathavipassanāvībhāgaṃ dassetuṃ “**yo ca pītipharaṇo**”tiādi vuttaṃ. Ettha ca paññāsīsena desanā katāti paññāvasena saṃvaṇṇanā katā. Paññā pītipharaṇatātiādīsu samādhisahagatā evāti tattha samādhivasena samatho uddhaṭo. Tasmā pītisukhacetopharaṇatā visesato samādhivipphāravasena ijjhantīti tā “**samatho**”ti vuttā. Itarāni ñānavipphāravasenāti tāni “**vipassanā**”ti vuttāni.

55. Idāni taṃ samādhim ārammaṇavasena vibhajitvā dassetuṃ “**dasa kasiṇāyatanāni**”tiādi vuttaṃ. Tattha kasiṇajjhānasāṅkhātāni kasiṇāni ca tāni yogino sukhavisesānaṃ adhiṭṭhānabhāvato, manāyatanadhammāyatanabhāvato ca āyatanāni cāti **kasiṇāyatanāni**. **Pathavīkasiṇanti** kataparikkammaṃ pathavīmaṇḍalampi, tattha pavattaṃ uggahapaṭībhāganimittampi, tasmim nimitte uppannajjhānampi vuccati. Tesu jhānaṃ idhādhippetam. **Ākāsakasiṇanti** kasiṇugghātimākāse pavattapaṭhamāruppajjhānaṃ. **Viññānakasiṇanti** paṭhamāruppaviññānārammaṇaṃ dutiyāruppajjhānaṃ. Pathavīkasiṇādīke suddhasamathabhāvanāvasena pavattite sandhāya “**imāni atṭha kasiṇāni samatho**”ti vuttaṃ. Sesakasiṇadvayaṃ vipassanādhīṭṭhānabhāvena pavattaṃ “**vipassanā**”ti vuttaṃ.

Evanti iminā nayena. **Sabbo ariyamaggoti** sammādiṭṭhiādībhāvena abhinnoopi ariyamaggo

satipaṭṭhānādīpubbabhāgaṭipadābhedenā anekabhedabhinno niravaseso ariyamaggo. **Yena yena ākārenā**ti anabhijjhādīsu, paccuppannasukhatādīsu ca ākāresu yena yena ākārena vutto. **Tena tenā**ti tesu tesu ākāresu ye ye samathavasena, ye ca ye ca vipassanāvasena yojetuṃ sambhavanti, tena tena ākārena samathavipassanāhi ariyamaggo vicinitvā yojetabbo. **Teti** samathādhiṭṭhānavipassanādhammā. **Tīhi dhammehi saṅgahitā**ti tīhi anupassanādhammehi saṅgahitā, gaṇanaṃ gatāti attho. Katamehi tīhīti? Āha **“aniccatāya dukkhatāya anattatāyā”**ti. Aniccatāya saha caraṇato vipassanā **“aniccatā”**ti vuttā. Esa nayo sesesupi.

So samathavipassanaṃ bhāvayamāno tīṇi vimokkhamukhāni bhāvayatīti so ariyamaggādhigamāya yuttappayutto yogī kālena samathaṃ samāpajjanavasena kālena vipassanaṃ sammasanavasena vaḍḍhayamāno animittavimokkhamukhādīsankhātā tisso anupassanā brūheti. **Tayo khandhe bhāvayatī**ti tisso anupassanā uparūparivisesaṃ pāpento sīlakkhandho samādhikkhandho paññākkhandhoti ete tayo khandhe vaḍḍheti. Yasmā pana tīhi khandhehi ariyo aṭṭhaṅgiko maggo saṅgahito, tasmā **“tayo khandhe bhāvayanto ariyaṃ aṭṭhaṅgikaṃ maggaṃ bhāvayatī”**ti vuttaṃ.

Idāni yesaṃ puggalānaṃ yattha sikkhantānaṃ visesato niyyānamukhāni yesaṃca kilesānaṃ paṭipakkhabhūtāni tīṇi vimokkhamukhāni, tehi saddhiṃ tāni dassetuṃ **“rāgacarito”**tiādi vuttaṃ. Tattha **animittena vimokkhamukhenā**ti aniccānupassanāya. Sā hi niccanimittādisamuggahānena animitto, rāgādīnaṃ samucchadavimuttiyā vimokkhoti laddhanāmassa ariyamaggassa mukhabhāvato dvārabhāvato **“animittavimokkhamukha”**nti vuccati. **Adhicittasikkhāyā**ti samādhismiṃ. **Sukhavedanīyaṃ phassaṃ anupagacchantoti** sukhavedanāya hitaṃ sukhavedanākāraṇato phassaṃ taṇhāya anupagacchanto. **Sukhaṃ vedanaṃ pariḷānanto**ti **“ayaṃ sukhā vedanā vipariṇāmadīnā dukkhā”**ti pariḷānanto, savisaṃyamaṃ rāgaṃ samatikkanto. **“Rāgamalaṃ pavāhento”**tiādinā tehi pariḷāyehi rāgasseva pahānamāha. **“Dosacarito puggalo”**tiādisupi vuttanayānusārena attho veditabbo.

Paññādhikassa santatisamūhakkiccarammaṇādighanavinibbhogena saṅkhāresu attasuññatā pākātā hotīti visesato anattānupassanā paññāpadhānāti āha – **“suññatavimokkhamukhaṃ paññākkhandho”**ti. Tathā saṅkhārānaṃ sarasapabhaṅgutāya ittarakhaṇattā uppannānaṃ tattha tattheva bhijjanaṃ sammā samāhitasseva pākātaṃ hotīti visesato aniccānupassanā samādhippadhānāti āha – **“animittavimokkhamukhaṃ samādhikkhandho”**ti. Tathā sīlesu paripūrākārino khantibahulassa uppannaṃ dukkhaṃ aratīna abhibhuyya viharato saṅkhārānaṃ dukkhatā vibhūtā hotīti dukkhānupassanā sīlappadhānāti āha – **“appaṇihitavimokkhamukhaṃ sīlakkhandho”**ti. Iti tīhi vimokkhamukhehi tiṇṇaṃ khandhānaṃ saṅgahitattā vuttaṃ – **“so tīṇi vimokkhamukhāni bhāvayanto tayo khandhe bhāvayatī”**ti. Yasmā ca tīhi ca khandhehi ariyassa aṭṭhaṅgikassa maggassa saṅgahitattā tayo khandhe bhāvayanto **“ariyaṃ aṭṭhaṅgikaṃ maggaṃ bhāvayatī”**ti vuttaṃ. Tasmā tehi tassa saṅgahaṃ dassento **“yā ca sammāvācā”**tiādimāha.

Puna tiṇṇaṃ khandhānaṃ samathavipassanābhāvaṃ dassetuṃ **“sīlakkhandho”**tiādi vuttaṃ. Tattha sīlakkhandhassa khantipadhānattā, samādhissa bahūpakārattā ca samathapakkhabhājanāṃ daṭṭhabbaṃ. **Bhavaṅgānī**ti upapattibhavassa aṅgāni. **Dve padānī**ti dve pādā. Yebhuyyena hi pañcadasa caraṇadhammā sīlasamādhisaṅgahitāti. **Bhāvitakāyoti** ābhisamācārikasīlassa pāripūriyā bhāvitakāyo. Ādibrahmacariyakasīlassa pāripūriyā **bhāvitasīlo**. Atha vā **bhāvitakāyoti** indriyasamvarena bhāvitapañcadvārakāyo. **Bhāvitasīloti** avasiṭṭhasīlavasena bhāvitasīlo. Sammā kāyabhāvanāya sati accantaṃ kāyaduccaritappahānaṃ anavajjaṅga uṭṭhānaṃ sampajjati. Tathā anuttare sīle sījhamāne anavasesato micchāvācāya micchājīvaṃsa ca pahānaṃ sampajjati. Cittapaññāsu ca bhāvitāsu sammāsatisammāsamādhisammādiṭṭhisammāsankappā bhāvanāpāripūriṃ gatā eva honti taṃsabhāvattā tadubhayakāraṇattā cāti imamattaṃ dasseti **“kāye bhāviyamāne”**tiādinā.

Pañcavidhaṃ adhigamaṃ gacchatīti ariyamaggādhigamameva avatthāvisesavasena pañcadhā vibhajitvā dasseti. Ariyamaggo hi khippaṃ sakim ekacittakhaṇeneva catūsu saccesu attanā adhigantabbaṃ adhigacchatīti na tassa lokiyasamāpattiyā viya vasibhāvanākiccaṃ atthīti

khippādhigamo ca hoti. Pajahitabbānaṃ accantavimuttivasena pajahanato **vimuttādhigamo ca**. Lokiyehi mahantānaṃ sīlakkhandhādīnaṃ adhigamanabhāvato **mahādhigamo ca**. Tesaṃyeva vipulaphalānaṃ adhigamanato **vipulādhigamo ca**. Atanā kattabbassa kassaci anavasesato **anavasesādhigamo ca hotīti**. Ke panete adhigamā? Keci samathānubhāvena, keci vipassanānubhāvenāti imaṃ vibhāgaṃ dassetuṃ “**tattha samathenā**”tiādi vuttaṃ.

56. Iti mahāthero “tasmā rakkhitacittassā”ti gāthāya vasena arahattaphalavimuttimukhena vicayahārasampātaṃ niddisanto desanākusalatāya anekehi suttappadesehi tassā pubbhāgapaṭipadāya bhāvanāvīsesānaṃ bhāvanānisamsānaṃca vibhajanavasena nānappakārato vicayahāraṃ dassetvā idāni dasannaṃ tathāgatabalānaṃpi vasena taṃ dassetuṃ “**tattha yo desayati**”tiādimāha. **Ovādena sāvake na visaṃvādayati**ti attano anusitṭhiyā dhammassa savanato “sāvakā”ti laddhanāme veneyye na vippalambheti na vañceti, visaṃvādanahetūnaṃ pāpadhammānaṃ ariyamaggena bodhimūle eva suppahīnattā. **Tividhanti** tippakāraṃ, tīhi ākārehīti attho. **Idaṃ karoṭhāti** imaṃ saraṇagamaṇaṃ sīlādīnaṃ upasampajja viharatha. **Iminā upāyena karoṭhāti** anenapi vidhinā saraṇāni sodhentā sīlādīni paripūrentā sampādettha. **Idaṃ vo kurumānānanti** idaṃ saraṇagamaṇaṃ sīlādīnaṃ tumhākaṃ anutitṭhantānaṃ ditṭhadhammasamparāyanibbānānaṃ vasena hitāya sukhāya ca bhavissati, tāni sampādetthāti attho.

Evaṃ ovadanākāraṃ dassetvā yaṃ vuttaṃ – “ovādena sāvake na visaṃvādayati”ti, taṃ tathāgatabalehi vibhajitvā dassetuṃ “**so tathā ovadito**”tiādimāha. Tattha **tathāti** tena pakārena “idaṃ karoṭha, iminā upāyena karoṭhā”tiādinā vuttappakārena. **Ovaditoti** dhammadesanāya sāsito. **Anusitṭhoti** tasseva vevacanaṃ. **Tathā karontoti** yathānusiṭṭhaṃ tathā karonto. **Taṃ bhūminti** yassā bhūmiyā adhigamatthāya ovadito, taṃ dassanabhūmiṃca bhāvanābhūmiṃca. **Netam ṭhānaṃ vijjati**ti etaṃ kāraṇaṃ na vijjati. Kāraṇāñhi tiṭṭhati ettha phalaṃ tadāyattavuttitāyāti “ṭhāna”nti vuccati. Dutiyavāre **bhūminti** sīlakkhandhena pattabbaṃ sampattibhavasāṅkhātaṃ bhūmiṃ.

Idāni yasmā bhagavato catuvesārajjanipi aviparītasabhāvatāya paṭhamaphalañāṇassa visayaviseso hoti, tasmā tānipi tassa visayabhāvena dassetuṃ “**sammāsambuddhassa te sato**”tiādi vuttaṃ. Tattha **sammāsambuddhassa te satoti** ahaṃ sammāsambuddho, mayā sabbe dhammā abhisambuddhāti paṭijānanaṃ sammāsambuddhassa te sato. **Ime dhammā anabhisambuddhāti netam ṭhānaṃ vijjati**ti “ime nāma tayā dhammā anabhisambuddhā”ti koci sahadhammena sahetunā sakāraṇena vacanena, **sunakkhatto** (dī. ni. 3.1 ādayo; ma. ni. 1.146 ādayo) viya vippalapantā pana appamaṇaṃ. Tasmā sahadhammena paṭicodessatīti etaṃ kāraṇaṃ na vijjati. Esa nayo sesapadesupi. **Yassa te atthāya dhammo desitoti** rāgādīsu yassa yassa pahānatthāya asubhabhāvanādīdhammo kathito. **Takkarassāti** tathā paṭipannassa. **Visesādhigamanti** abhiññāpaṭisambhidādivisesādhigamaṃ.

Antarāyikāti antarāyakaraṇaṃ antarāyo, so sīlaṃ etesanti antarāyikā. Antarāye niyuttā, antarāyaṃ vā phalaṃ arahanti, antarāyappayojanāti vā antarāyikā. Te pana kammakilesādibhedena pañcavidhā. **Aniyyānikāti** ariyamaggavajjā sabbe dhammā.

Diṭṭhisampannoti maggadiṭṭhiyā sampanno sotāpanno ariyasāvako. **Suhatanti** ativadhitam. Idampi ekadesakathanameva. Matakapetādīdānaṃpi so na karoti eva. **Puthujjanoti** puthūnaṃ kilesābhisaṅkhārādīnaṃ jananādīhi kāraṇehi puthujjano. Vuttañhetam –

“Puthūnaṃ jananādīhi, kāraṇehi puthujjano;
Puthujjanantogadhata, puthuvāyaṃ jano itī”ti. (dī. ni. aṭṭha. 1.7; ma. ni. aṭṭha. 1.2; a. ni. aṭṭha. 1.1.51; dha. sa. aṭṭha. 1007; paṭi. ma. aṭṭha. 2.1.130);

“**Mātara**”ntiādīsu janikā **mātā**. Janako ca **pitā**. Manussabhūto khīṇāsavo **arahāti** adhippeto. Kim pana ariyasāvako aññe jīvitā voropeyyāti? Etampi aṭṭhānaṃ. Sacepi bhavantaragataṃ ariyasāvakaṃ attano ariyasāvakaḥvaṃ ajānantampi koci evaṃ vadeyya “idaṃ kunthakipillikaṃ jīvitā voropetvā

sakalacakkavālagabbhe cakkavattirajjam paṭipajjāhī’ ti, neva so nam jīvitā voropeyya. Athāpi evaṃ vadeyyuṃ – ‘‘sace imaṃ na ghāteṣṣasi, sīsaṃ te chindissāmā’’ ti, sīsamevassa chindeyyuṃ, neva so taṃ ghāteyya. Puthujjanabhāvassa pana mahāsāvajjabhāvadassanattam ariyabhāvassa ca baladīpanattam evaṃ vuttaṃ. Ayañhettha adhippāyo – sāvajjo vata puthujjanabhāvo. Yatra hi nāma mātughākādīnipi ānantariyāni karissati, mahābalova ca ariyabhāvo, yo etāni kammāni na karotīti.

Saṅgham bhindeyyāti samānasaṃvāsakaṃ samānasīmāyaṃ ṭhitam pañcahi kāraṇehi saṅgham bhindeyya. Vuttañhetam – ‘‘pañcahupāli, ākārehi saṅho bhijjati kammena uddesena voharanto anussāvanena salākaggāhenā’’ ti (pari. 458).

Tattha **kammenāti** apalokanādīsu catūsu kammesu aññatarakammena. **Uddesenāti** pañcasu pātimokkhuddesesu aññatarena uddesena. **Voharantoti** kathayanto, tāhi tāhi upapattīhi ‘‘adhammam dhammo’’ tiādīni aṭṭhārasabhedakaravatthūni dīpayanto. **Anussāvanenāti** ‘‘nanu tumhe jānātha mayham uccakulā pabbajitabhāvaṃ bahussutabhāvañca, mādiso nāma uddhammam ubbinayaṃ satthusāsanam gāheyyāti kiṃ tumhākaṃ cittampi uppādetuṃ yuttam, kimaham apāyato na bhāyāmī’’ tiādīnā nayena kaṇṇamūle vacībhedaṃ katvā anussāvanena. **Salākaggāhenāti** evaṃ anussāvetvā tesam cittam upatthambhetvā anivattidhammam katvā ‘‘gaṇhatha imaṃ salāka’’ nti salākaggāhena.

Ettha ca kammameva uddeso vā pamāṇam, vohārānussāvanasālākaggāhāpanam pana pubbabhāgo. Aṭṭhārasavatthudīpanavasena hi voharantena tattha rucijananattam anussāvetvā salākāya gāhitāyapi abhinno eva hoti saṅho. Yadā pana evaṃ cattāro vā atirekā vā salākaṃ gāhetvā āveṇikaṃ kammaṃ vā uddesam vā karontī, tadā saṅho bhinno nāma hoti. Evaṃ diṭṭhisampanno puggalo saṅgham bhindeyya saṅgharājim vā janeyyāti netam ṭhānam vijjatīti.

Duṭṭhacittoti vadhakacittena paduṭṭhacitto. **Lohitam uppādeyyāti** jīvamānakasarīre khuddakamakkhikāya pivanamattampi lohitaṃ uppādeyya. Ettāvatā hi mātughātādīni pañcānantariyakammāni dassitāni hontī. Yāni puthujjano karotī, na ariyasāvako. **Duṭṭhacittoti** vināsacittena paduṭṭhacitto. **Thūpanti** cetiyam. **Bhindeyyāti** nāseyya.

Aññaṃ satthāranti ‘‘ayaṃ me satthā satthu kiccaṃ kātuṃ samattho’’ ti bhavantarepi aññaṃ titthakaraṃ. **Apadiseyyāti** ‘‘ayaṃ me satthā’’ ti evaṃ gaṇheyyāti netam ṭhānam vijjati. **Ito bahiddhā aññaṃ dakkhiṇeyyam pariyeseyyāti** sāsanato bahiddhā aññaṃ bāhirakaṃ samaṇam vā brāhmaṇam vā ‘‘ayaṃ dakkhiṇāraho, imasmiṃ katā kārā mahapphalā bhavissantī’’ ti adhippāyena tasmim paṭipajjeyyāti attho. **Kutūhalamaṅgalena suddhim pacceyyāti** ‘‘iminā idaṃ bhavissatī’’ ti evaṃ pavattattā kutūhalasaṅkhātena diṭṭhasutamutamaṅgalena attano suddhim vodānam saddaheyya.

57. Itthī rājā cakkavattī siyāti netam ṭhānam vijjatīti yasmā itthiyā kosohitavatthaguyhādīnam abhāvena lakkhaṇāni na paripūranti, itthiratanābhāvena ca sattaratanasamaṅgitā na sampajjati. Sabbamanussānampi ca na adhiko attabhāvo hoti, tasmā ‘‘itthī...pe... vijjatī’’ ti vuttaṃ. Yasmā sakkattādīni tīṇi ṭhānāni uttamāni, itthiliṅgañca hīnaṃ, tasmā tassā sakkattādīnipi paṭisiddhāntī. Nanu ca yathā itthiliṅgam, evaṃ purisaliṅgampi brahmaloke natthi, tasmā puriso mahābrahmā siyāti na vattabbanti? No na vattabbaṃ. Kasmā? Idha purisassa tattha nibbattanato. Itthiyo hi idha jhānam bhāvetvā kālam katvā brahmapārisajjānam sahabyataṃ upapajjanti, na mahābrahmānam. Puriso pana katthaci na uppajjatīti na vattabbo. Samānepi tattha ubhayaliṅgābhāve purisasaṅṭhānāva tattha brahmāno, na itthisaṅṭhānā, tasmā suvuttametam. **Itthī tathāgatoti** ettha tiṭṭhatu tāva sabbaññuṅṅe nibbattetvā lokānam tārānasamattho buddhabhāvo, pañidhānamattampi itthiyā na sampajjati.

‘‘Manussattaṃ liṅgasampatti, hetu satthāradassanaṃ;
Pabbajjā guṇasampatti, adhikāro ca chandatā;
Aṭṭhadhammasamodhānā, abhinīhāro samijjhatī’’ ti. (bu. vaṃ. 2.59) –

Imāni hi paṇidhānasampattikāraṇāni. Iti paṇidhānamattampi sampādetuṃ asamattāyā itthiyā kuto buddhabhāvoti “**itthi tathāgato araham sammāsambuddho siyāti netam thānam vijjati**”ti vuttaṃ. Sabbākāraparipūro puññussayo sabbākāraparipūrameva attabhāvaṃ nibbatteṭṭi purisova araham hoti sammāsambuddho.

Ekissā lokadhātuyāti dasasahassilokadhātuyā, yā **jātikhettanti** vuccati. Sā hi tathāgatassa gabbhokkantikālādīsu kampati. **Āṇākhettam** pana koṭṭisatasahassacakkavāḷaṃ. Yā ekato saṃvaṭṭati ca vivaṭṭati ca, yattha ca **āṭānāṭiyaparittādīnaṃ** (dī. ni. 3.277 ādayo) āṇā pavattati. **Visayakhettassa** parimāṇaṃ natthi. Buddhānañhi “yāvatakaṃ ṇāṇaṃ tāvatakaṃ neyyaṃ, yāvatakaṃ neyyaṃ tāvatakaṃ ṇāṇaṃ, neyyapariyantikaṃ ṇāṇaṃ, ṇāṇapariyantikaṃ neyya”nti (mahāni. 69; cūḷani. mogharājamānavapucchāniddeṣa 85; paṭi. ma. 3.5) vacanato avisayo nāma natthi. Iti imesu tīsu khettesu tisso saṅgītiyo āruḷhe teṭṭake buddhavacane “thapetvā imaṃ cakkavāḷaṃ aññasmim cakkavāḷe buddhā uppajjantī”ti suttaṃ natthi, na uppajjantīti pana atthi.

Apubbam acarimanti apure apacchā ekato na uppajjanti, pure vā pacchā vā uppajjantīti vuttaṃ hoti. Tattha gabbhokkantito pubbe pureti veditabbaṃ. Tato paṭṭhāyā hi dasasahassicakkavāḷakampanena khettapariggaho kato nāma hoti, aññassa buddhassa uppattī natthi. Dhātuparinibbānato paraṃ pana pacchā, tato heṭṭhāpi aññassa buddhassa uppattī natthi, uddham na vāritā.

Kasmā pana apubbam acarimaṃ na uppajjantīti? Anacchariyattā. Acchariyamanussā hi buddhā bhagavanto. Yathāha – “ekapuggalo, bhikkhave, loke uppajjamāno uppajjati acchariyamanusso”tiādi (a. ni. 1.171). Yadi ca aneke buddhā ekato uppajjeyyūṃ, anacchariyā bhavēyyūṃ. Desanāya ca visesābhāvato. Yañhi satipaṭṭhānādibhedam dhammaṃ eko deseti, aññenapi so eva desetabbo siyā, vivādabhāvato ca. Bahūsu hi buddhesu ekato uppannesu bahūnaṃ ācariyānaṃ antevāsikā viya “amhākaṃ buddho pāsādiko”tiādinā tesam sāvakā vivadeyyūṃ. Kim vā etena kāraṇagavesanena, dhammatāvesā yaṃ ekissā lokadhātuyā dve tathāgatā ekato na uppajjantīti (mi. pa. 5.1.1).

Yathā nimbabṭjakosātakibṭjādīni madhuraṃ phalaṃ na nibbattenti, asātaṃ amadhurameva phalaṃ nibbattenti, evaṃ kāyaduccarītādīni madhuravipākaṃ na nibbattenti amadhurameva nibbattenti. Yathā ca ucchubṭjasālībṭjādīni madhuraṃ sādurasameva phalaṃ nibbattenti na asātaṃ kaṭukaṃ. Evaṃ kāyasucarītādīni madhurameva vipākaṃ nibbattenti na amadhuraṃ. Vuttampi cetam –

“Yādisaṃ vapate bījaṃ, tādisaṃ harate phalaṃ;
Kalyāṇakārī kalyāṇaṃ, pāpakārī ca pāpaka”nti. (saṃ. ni. 1.256; netti. 122);

Tasmā “**tiṇṇaṃ duccharitāna**”ntiādi vuttaṃ.

Aññataro samaṇo vā brāhmaṇo vāti yo koci pabbajjāmattena samaṇo vā jātimattena brāhmaṇo vā. Pāpiccho sambhāvanādhippāyena vimhāpanato **kuhako**. Paccayasannissitāya payuttavācāya vasena **lapako**. Paccayanibbattakanimittāvacarato **nemittako**. **Kuhanalapananemittakattam pubbaṅgamaṃ katvāti** kuhanādibhāvameva purakkhatvā santindriyo santamānaso viya caranto. **Pañca nīvaraṇeti** kāmaccchandādike pañca nīvaraṇe. **Appahāya** asamucchinditvā, **cetaso upakkileseti** nīvaraṇe. Nīvaraṇā hi cittaṃ upakkilesenti kiliṭṭhaṃ karonti vibādhenti upatāpenti ca. Tasmā “cetaso upakkilesā”ti vuccanti. **Paññāya dubbalikaraṇeti** nīvaraṇe. Nīvaraṇā hi uppajjamānā anuppannāya paññāya uppajjitum na denti. Tasmā “paññāya dubbalikaraṇā”ti vuccanti. **Anupaṭṭhitassatīti** catūsu satipaṭṭhānesu na upaṭṭhitassati. **Abhāvayitvāti** avaḍḍhayitvā. **Anuttaram sammāsambodhinti** arahattapadaṭṭhānaṃ sabbaññutaññānaṃ.

Pacchimavāre **aññataro samaṇo vā brāhmaṇo vāti** sabbaññubodhisattaṃ sandhāya vadati. Tattha **sabbadosāpagatoti** sabbehi pāramitāpaṭipakkhabhūtehi dosehi apagato. Etena paripūritapāramibhāvaṃ dasseti. Satipaṭṭhānāni vipassanā, bojjhaṅgo maggo, anuttarā sammāsambodhi arahattaṃ. Satipaṭṭhānāni

vā vipassanā, bojjaṅgā missakā, sammāsambodhi arahattameva. Sesam anantaravāre vuttapaṭipakkhato vedītabbam. **Yaṃ ettha ñāṇanti** yaṃ etasmim yathāvutte ṭhāne ca ṭhānaṃ, aṭṭhāne ca aṭṭhānanti pavattaṃ ñāṇaṃ. **Hetusoti** tassa ṭhānassa aṭṭhānassa ca hetuto. **Ṭhānasoti** taṅkhaṇe eva āvajjanasamanantaraṃ. **Anodhisoti** odhiabhāvena, kiñci anavasesetvāti attho.

Iti ṭhānāṭṭhānagatātiādīsu evaṃ ṭhānāṭṭhānabhāvaṃ gatā. **Sabbeti** khayavayavirajjananirujjhanasabhāvā saṅkhatadhammā, te eva ca sattapaññattiyā upādānabhūtā **keci saggūpagā** ye dhammacārino, **keci apāyūpagā** ye adhammacārino, **keci nibbānūpagā** ye kammakkhayakaraṃ ariyamaggaṃ paṭipannā.

58. Idāni yathāvuttamatthaṃ vivaranto “**sabbe sattā marissantī**”ti gāthādvayamāha. Tassa atthaṃ “**sabbe sattāti ariyā ca anariyā cā**”tiādīnā sayameva niddisati. Tattha **jīvitapariyanto maraṇapariyantoti** jīvitassa pariyanto nāma maraṇasaṅkhāto anto. **Yathākammaṃ gamissantīti** ettha yadetam sattānaṃ yathākammaṃ gamaṇaṃ, ayaṃ kammassakatāti attho. **Kammānaṃ phaladassāvītā ca avippavāso cāti** “puññapāpaphalūpagā”ti iminā vacanena kammānaṃ phalassa paccakkhakaritā, katūpacitānaṃ kammānaṃ attano phalassa appadānābhāvo ca dassitoti attho.

Kammameva kammantaṃ, pāpaṃ kammantaṃ etesanti **pāpakammantā**, tassa atthaṃ dassetuṃ “**apuññasaṅkhārā**”ti vuttaṃ. Apuñño saṅkhāro etesanti **apuññasaṅkhārā**. **Pāpakammantāti** vā nissakkavacanāṃ, pāpakammantahetūti attho. Tathā **puññasaṅkhārāti**ādīsipi. Puna “**nirayaṃ pāpakammantā**”tiādīnā antadvayena saddhiṃ majjhimaṃ paṭipadaṃ dasseti. Tathā “**ayaṃ saṃkilesa**”tiādīnā vaṭṭavivaṭṭavasena ādīnavassādanissaraṇavasena hetuphalavasena ca gāthāyaṃ tayo atthavikappā dassitā. Puna “**nirayaṃ pāpakammantāti ayaṃ saṃkilesa**”tiādīnā vodānavasena gāthāya atthaṃ dasseti.

59. Tena tenāti tena tena ajjhositavattunā rūpabhavaarūpabhavādinā. **Chattimsāti** kāmataṅhā tāva rūpādivisayabhedena cha, tathā bhavataṅhā vibhavataṅhā cāti aṭṭhārasa. Tā eva ajjhattikesu rūpādīsu aṭṭhārasa, bāhiresu rūpādīsu aṭṭhārasāti evaṃ chattimsa. **Yena yenāti** “subhaṃ sukha”ntiādīnā.

Vodānaṃ tividdhaṃ khandhattayavasenāti taṃ dassetuṃ “**taṅhāsaṃkilesa**”tiādi vuttaṃ. Puna “**sabbe sattā marissantī**”tiādi paṭipadāvibhāgena gāthānamatthaṃ dassetuṃ vuttaṃ. **Tattha tattha gāminīti** tattha tattheva nibbāne gāminī, nibbānassa gamanasīlāti attho.

Puna tatthatatthagāminīsabbatthagāminīnaṃ paṭipadānaṃ vibhāgaṃ dassetuṃ “**tayo rāsī**”tiādi vuttaṃ. **Yanti** yaṃ nirayādi. Taṃ taṃ ṭhānaṃ yathārahaṃ gametīti **sabbatthagāminī**. Paṭipadāsaṅkhāte apuññakamme puññakamme ca kammakkhayakaraṇakamme ca vibhāgaso bhagavato pavattanañāṇaṃ. Idaṃ sabbatthagāminī paṭipadāñāṇaṃ nāma tathāgatabalaṃ. Iminā hi ñāṇena bhagavā sabbampi paṭipadaṃ yathābhūtaṃ pajānāti.

Kathaṃ? Sakalagāmaṃvāsikesupi ekaṃ sūkaraṃ vā migam vā mārentesu sabbesaṃ cetanā parassa jīvitindriyārammaṇāva hoti, taṃ pana kammaṃ tesam āyūhanakkhaṇeyeva nānā hoti. Tesu hi eko ādarena karoti, eko “tvampi karohi”ti parehi nippīlito karoti, eko samānacchando viya hutvā appaṭibāhamāno vicarati. Tesu eko teneva kammena niraye nibbattati, eko tiracchānayoniyam, eko pettivisaye, taṃ tathāgato āyūhanakkhaṇe eva “iminā nīhārena āyūhitattā esa niraye nibbattissati, esa tiracchānayoniyam, esa pettivisaye”ti jānāti. Niraye nibbattanakampi “esa aṭṭhasu mahānirayesu nibbattissati, esa soḷasasu ussadesū”ti jānāti. Tiracchānayoniyam nibbattanakampi “esa apādako bhavissati, esa dvipādako, esa catuppādako, esa bahuppādako”ti jānāti. Pettivisaye nibbattanakampi “esa nijjhāmatāṅhiko bhavissati, esa khuppipāsiko, esa paradattūpajīvī”ti jānāti.

“Tesu ca kammesu idaṃ kammaṃ paṭisandhiṃ ākaḍḍhissati, idaṃ nākaḍḍhissati dubbalaṃ dinnāya paṭisandhiyā upadhivepakkamattaṃ bhavissati”ti jānāti. Tathā sakalagāmaṃvāsikesu ekato dānaṃ

dadamānesu sabbesampi cetanā deyyadhammārammaṇāva hoti, taṃ pana kammaṃ tesam āyūhanakkhaṇe eva nānaṃ hoti. Tesu hi keci devaloke nibbattanti, keci manussaloke, taṃ tathāgato āyūhanakkhaṇe eva “iminā nīhārena āyūhitattā esa manussaloke nibbattissati, esa devaloke” ti jānāti. Tatthapi “esa paranimmitvasavattīsu nibbattissati, esa bhummadevesu nibbattissati, esa jeṭṭhakadevarājā hutvā, esa tassa dutiyaṃ tatiyaṃ vā thānantaraṃ karonto paricārako hutvā nibbattissati” ti jānāti.

“Tesu ca kammesu idaṃ paṭisandhiṃ ākaḍḍhituṃ sakkhissati, idaṃ na sakkhissati dubbalaṃ dinnāya paṭisandhiyā upadhivepakkamattaṃ bhavissati” ti jānāti. Tathā “vipassanaṃ paṭṭhapentesu ca esa iminā nīhārena vipassanāya āraddhattā arahā bhavissati, esa anāgāmī, esa sakadāgāmī, esa sotāpanno, ekabījī kolaṃkolo sattakkhattuparamo, esa maggaṃ pattuṃ na sakkhissati lakkhaṇārammaṇikavipassanāyameva thassati, esa paccayapariggāhe, esa nāmarūpariggāhe, arūpariggāhe ca thassati, esa mahābhūtamattameva vavatthapessati, esa kiñci sallakkhetuṃ na sakkhissati” ti jānāti. “Kasiṇaparikkammaṃ karontesupi esa parikkammamatte eva thassati, esa nimittaṃ uppādetuṃ sakkhissati, na appanaṃ. Esa appanaṃpi uppādessati, esa jhānaṃ adhigamissati, na uparivisesaṃ. Esa uparivisesampi adhigamissati” ti jānāti.

Anekadhātūti anekā cakkhādayo pathavādayo ca dhātuyo etassāti anekadhātu, bahudhātūti attho. **Lokoti** khandhāyatanādiloko. **Cakkhudhātūti**ādi yāhi dhātūhi “anekadhātu” ti loko vutto, tasmaṃ sarūpato dassanaṃ. Tattha sabhāvaṭṭhena nissattaṭṭhena ca dhātu. Cakkhu eva dhātu **cakkhudhātu**. Sesapadesupi eseva nayo. **Kāmadhātūti** ettha dve kāmā kilesakāmo ca vatthukāmo ca. Kilesakāmapakkhe kāmapaṭisaṃyutto dhātu kāmadhātu, kāmavitakkassetam nāmaṃ. Vatthukāmapakkhe pana kāmāvacaradhammā kāmo uttarapadalopena, kāmo ca so dhātu cāti kāmadhātu. Byāpādaṭṭhapaṭisaṃyutto dhātu **byāpādadhātu**, byāpādaṭṭhapaṭisaṃyutto dhātu byāpādadhātu, dasaāghātavatthuvīsaṃyassa paṭighassetam nāmaṃ. Vihimsāpaṭisaṃyutto dhātu **vihimsādhātu**, vihiṃsāvitakko. Vihimsā eva vā dhātu vihiṃsādhātu, parasattavihesanassetam nāmaṃ. **Nekkhamaabyāpādaavihiṃsādhātuyo** nekkhamavitakkādayo sabbakusaladhammā mettākaraṇā cāti veditabbaṃ. **Rūpadhātūti** rūpabhavo, sabbe vā rūpadhammā. **Arūpadhātūti** arūpabhavo, arūpadhammā vā. **Nirodhadhātūti** nirodhataṇhā. **Saṅkhāradhātūti** sabbe saṅkhatadhammā. Sesam suviññeyyaṃ.

Aññaṃaññavilakkhaṇattā nānappakārā dhātuyo etasminti **nānādhātu**, loko. Tenevāha – “**aññā cakkhudhātu** yāva **aññā nibbānadhātū**” ti, yathā ca idaṃ ñānaṃ cakkhudhātuātibhedena upādinnakasaṅkhāralokassa vasena anekadhātunānādhātulokaṃ pajānāti, evaṃ anupādinnakasaṅkhāralokassapi vasena taṃ pajānāti. Paccekabuddhā hi dve ca aggasāvaka upādinnakasaṅkhāralokasseva nānattaṃ jānanti, tampi ekadeseneva, na nippadesato. Anupādinnakasaṅkhāralokassa pana nānattaṃ na jānanti. Bhagavā pana “imāya nāma dhātuyā ussannāya imassa rukkhassa khandho seto hoti, imassa kāḷo, imassa maṭṭho, imassa pharusō, imassa bahalo, imassa tanuttaco. Imāya nāma dhātuyā ussannāya imassa rukkhassa pattaṃ vaṇṇasaṅghānādivasena evarūpaṃ nāma hoti, imāya nāma dhātuyā ussannattā imassa rukkhassa pupphaṃ nīlaṃ hoti pītaṃ lohitaṃ odātaṃ sugandhaṃ duggandhaṃ, imāya nāma dhātuyā ussannāya phalaṃ khuddakaṃ mahantaṃ dīghaṃ vaṭṭaṃ susaṅghānaṃ dussaṅghānaṃ maṭṭhaṃ pharusam sugandhaṃ duggandhaṃ tittaṃ madhuraṃ kaṭukaṃ ambilaṃ kasāvaṃ hoti, imāya nāma dhātuyā ussannāya imassa rukkhassa kaṇṭako tikhiṇo hoti, atikhiṇo ujuko kuṭilo kaṇho nīlo odāto hoti” ti evaṃ anupādinnakasaṅkhāralokassapi vasena anekadhātunānādhātubhāvaṃ jānāti. Sabbaññubuddhānaṃ eva hi etaṃ balaṃ, na aññesaṃ.

60. Yaṃ yadeva dhātuntī yaṃ kiñci hīnādisabhāvaṃ. Yasmā adhimutti nāma ajjhāsayaḍḍhātu, tasmā adhimuccanaṃ ajjhāsayaṃ hīnādisabhāvena pavattanaṃ. Taṃ pana tassa taṃ taṃ adhiṭṭhahanaṃ abhinivisanaṃ hotīti āha – “**adhimuccanti, taṃ tadeva adhiṭṭhahanti abhinivisanti**” ti. Adhimuccanassa visayaṃ vibhāgena dassetuṃ “**keci rūpādhimuttā**” tiādi vuttaṃ. Taṃ suviññeyyameva. **Nānādhimuttikatāññānti** hīnādivasena nānādhimuttikatāya ñānaṃ.

Te yathādhimuttā ca bhavanti te hīnādhimuttikā paṇītādhimuttikā sattā yathā yathā adhimuttā

honti. **Taṃ taṃ kammamādānaṃ samādiyanti** adhimuttianurūpaṃ taṃ taṃ attanā samādiyitabbaṃ kattabbaṃ kammaṃ karonti, tāni kammamādānāni samuṭṭhānavasena vibhajanto “**te chabbidhaṃ kamma**”ntiādīmāha. Tattha keci lobhasena kammaṃ samādiyanti sambandhitabbaṃ. Esa nayo sesesupi. **Taṃ vibhajamānanti** taṃ samuṭṭhānavasena chabbidhaṃ puna pavattinivattivasena vibhajamānaṃ duvidhaṃ.

Yaṃ lobhasena dosavasena mohavasena ca kammaṃ karoti dasaakusalakammapathakammaṃ sandhāya vadati. Tañhi saṃkiliṭṭhatāya kālakanti **kaṇhaṃ**. Apāyesu nibbattāpanato kālakavipākanti **kaṇhavipākaṃ**. **Yaṃ saddhāvasena kammaṃ karoti** dasakusalakammapathakammaṃ. Tañhi asaṃkiliṭṭhattā paṇḍaranti **sukkaṃ**. Sagge nibbattāpanato paṇḍaravipākattā **sukkavipākaṃ**. **Yaṃ lobhasena dosavasena mohavasena saddhāvasena ca kammaṃ karoti, idaṃ kaṇhasukkanti** vomissakakammaṃ. **Kaṇhasukkavipākanti** sukhadukkhavipākaṃ. Missakakammañhi katvā akusalavalena tiracchānayanīyaṃ maṅgalatthibhāvaṃ upapanno kusalena pavatte sukhaṃ anubhavati, kusalena rājakule nibbattopi akusalena dukkhaṃ vedayati. **Yaṃ vīriyavasena paññāvasena ca kammaṃ karoti, idaṃ kammaṃ akaṇhaṃ asukkaṃ akaṇhaasukkavipākanti** kammakkhayakarā catumaggacetanā. Tañhi yadi kaṇhaṃ bhavēyya, kaṇhavipākaṃ dadeyya. Yadi sukkaṃ bhavēyya, sukkaupapattipariyāpannaṃ vipākaṃ dadeyya. Ubhayavipākassa pana appadānato akaṇhaasukkavipākanti ayamettha attho.

Kammamādāne paṭhamamā celakapaṭipadā kāmesu pātabyatā, dutiyamā tibbakilesassa assumukhassāpi rudato parisuddhabrahmacariyacaraṇam, tatiyamā kāmesu apātabyatā celakapaṭipadā, catutthamā paccaye alabhamānassāpi jhānavipassanāsukhasamaṅgino sāsanaabrahmacariyacaraṇam. **Yaṃ evam jātiyam kammamādānanti** yaṃ aññampi evamākāraṃ kammaṃ. **Iminā puggalenāti**di tasmim kammavipāke bhagavato ñāṇassa pavattanākāradassanaṃ. Tattha **upacitanti** yathā kataṃ kammaṃ phaladānasamattam hoti, tathā kataṃ upacitam. **Avipakkanti** na vipakkavipākaṃ. **Vipākāya paccupaṭṭhitanti** vipākadānāya katokāsaṃ. **Na ca bhabbo abhinibbidhā gantunti** kilesābhisaṅkhārānaṃ abhinibbijhanato abhinibbidhāsaṅkhātā ariyamaggaṃ adhigantaṃ na ca bhabbo. **Taṃ bhagavā na ovadati** taṃ vipākāvaraṇena nivutaṃ puggalaṃ bhagavā saccapaṭivedhaṃ purakkhatvā na ovadati, vāsanatthamā pana tādisānampi dhammaṃ deseti eva, ajātasattuādīnaṃ viya.

Upacitanti kātuṃ āradhaṃ. Tenevāha – “**na ca tāva pāripūriṃ gata**”nti. Tena micchattaniyamassa asamattatamā dasseti. **Purā pāripūriṃ gacchatī** pāripūriṃ phalanipphādanasamattatamā gacchati purā adhigaccheyya. Micchattaniyatātāya sajjukamā phaladhammassa abhājanabhāvaṃ nibbattayati purā. Tenevāha – “**purā veneyyattam samatikkamatī**”ti. “Purā aniyatamā samatikkamatī”tipi pāṭho, so evattho. **Asamatteti** kamme asampunṇe, te asampunṇe vā.

61. Evamā kilesantarāyamissakamā kammantarāyamā dassetvā idāni amissakamā kammantarāyamā dassetamā “**imassa ca puggalassā**”tiādi vuttamā. Tamā vuttanayameva.

Sabbesanti imasmimā balaniddese vuttānamā sabbesamā kammānamā. **Mudumajjhādhimattatā**ti mudumajjhatibbabhāvo. Kammānañhi muduādibhāvena tamāvipākānamā mudumajjhatikkhabhāvo viññāyatīti adhippāyo. **Diṭṭhadhammavedanīyanti**ādīsu diṭṭhadhamme imasmimā attabhāve veditabbaṃ phalamā **diṭṭhadhammavedanīyamā**. Upapajje anantare attabhāve veditabbaṃ phalamā **upapajjavedanīyamā**. Aparasmimā attabhāve ito aññasmimā yasimā kasmīñci attabhāve veditabbaṃ phalamā **aparāpariyavedanīyamā**. Ekajavanāvārasmiñhi sattasu cetanāsu paṭhamacetanā diṭṭhadhammavedanīyamā nāma. Pariyosānacetanā upapajjavedanīyamā nāma. Majjhe pañca cetanā aparāpariyavedanīyamā nāma. **Vipākavemattatāññanti** vipākavemattatāya vipākavisesse ñāṇamā. Imassa pana kammavipākassa gatisampatti gativipatti, upadhisampatti upadhivipatti, kālasampatti kālavipatti, payogasampatti payogavipattiyo kāraṇamā. So ca nesamā kāraṇabhāvo “atthekaccāni pāpakāni kammamādānāni gatisampatti paṭibālhāni na vipaccanti”tiādi pāḷivasena (vibha. 810) veditabbo.

62. Anantarabalaniddese vuttakammasamādānapadeneva jhānādīni saṅgahetvā dassetuṃ “**tathā samādinnānaṃ kammāna**”ntiādi vuttaṃ. Sekkhaputhujjanasantānesu pavattāni jhānādīni kammaṃ hontī. Tattha **tathā samādinnānanti** “sukkaṃ sukkavipākaṃ paccuppannasukhaṃ, āyatīṃ sukhavipāka”nti evamādippakārehi samādinnesu kammesu. **Samkilesoti** paṭipakkhadhamavasena kiliṭṭhabhāvo. **Vodānaṃ** paṭipakkhadhammehi visujjhaṇaṃ. **Vuṭṭhānaṃ** paguṇavodānaṃ bhavaṅgavuṭṭhānaṃca. **Evam samkilissatī**tiādīsu ayamevattho – iminā ākārena jhānādi samkilissati vodāyati vuṭṭhahatīti jānanaññaṇaṃ bhagavato anāvarenaññaṇaṃ, na tassa āvaraṇaṃ atthīti.

Kati jhānānītiādi jhānādayo vibhāgena dassetuṃ āradhamaṃ. **Cattāri jhānānī**ti catukkanayavasena rūpāvacarajjhānāni sandhāyāha. **Ekādasā**ti “rūpī rūpāni passatī”tiādinā (dī. ni. 2.129, 174; 3.339, 358; ma. ni. 2.248; 3.312) aṭṭhannaṃ tiṇṇaṃca suññatavimokkhādīnaṃ vasena vuttaṃ. **Aṭṭhā**ti tesu ṭhapetvā lokuttare vimokkhe aṭṭha. **Sattā**ti tesu eva nirodhasamāpattīṃ ṭhapetvā satta. **Tayoti** suttantapariyāyena suññatavimokkhādayo tayo. **Dveti** abhidhammapariyāyena animittavimokkhassāsambhavato avasesā dve. Ettha ca paṭipāṭiyā satta appitappitakkhaṇe vikkhambhanavasena paccanīkadhammehi vimuccanato, ārammaṇe adhimuccanato ca vimokkhā. Nirodhasamāpatti pana sabbaso saññāvedayitehi vimuttattā apagamavimokkho nāma. Lokuttarā ca taṃtaṃmaggaṃvājīhakilesehi samucchadavasena vimuttattā vimokkhoti ayaṃ viseso veditabbo.

Samādhīsu catukkanayapañcakanayesu paṭhamajjhānasamādhī **savitakko savicāro samādhī** nāma. Pañcakanaye dutiyajjhānasamādhī **avitakko vicāramatto samādhī** nāma. Catukkanaye pañcakanayepi sesajhānesu samādhī **avitakko avicāro samādhī** nāma.

Samāpattīsu paṭipāṭiyā aṭṭhannaṃ samāpattīnaṃ “samādhī”tipi nāmaṃ “samāpattī”tipi. Kasmā? Cittekaggaṭāsabbhāvato. Nirodhasamāpattiyā tadabhāvato na “samādhī”ti nāmaṃ. **Saññāsamāpattī**tiādi heṭṭhā vuttameva.

Hānabhāgiyo samādhīti appaguṇehi paṭhamajjhānādīhi vuṭṭhitassa saññāmanasikārānaṃ kāmādiānupakkhandanaṃ paṭhamajjhānādisamādhissa hānabhāgiyatā. “Paṭhamajjhānassa kāmāragabyāpādā samkilesa”ti vuttattā dutiyajjhānādivasena yojetabbaṃ. Kukkuṭaṃ vuccati ajaññājiḅucchanamukhena tapparamatā. **Kukkuṭajjhāyī**ti puggalādhiṭṭhānena jhānāni vuttāni, dve paṭhamadutiyajjhānānīti vuttaṃ hoti. Yo paṭhamāṃ dutiyaṃ vā jhānaṃ nibbattetvā “alamettāvātā”ti saṅkocaṃ āpajjati, uttari na vāyamati, tassa tāni jhānāni cattāripi “kukkuṭajjhānānī”ti vuccanti, taṃsamaṅgino ca kukkuṭajjhāyī. Tesu purimāni dve āsannabalavapaccatthikattā visesabhāgiyatābhāvato ca samkilesabhāvena vuttāni. Itarāni pana visesabhāgiyatābhāvepi mandapaccatthikattā vodānabhāvena vuttānīti daṭṭhabbaṃ.

Visesabhāgiyo samādhīti paguṇehi paṭhamajjhānādīhi vuṭṭhitassa saññāmanasikārānaṃ dutiyajjhānādipakkhandanaṃ, paguṇavodānaṃ bhavaṅgavuṭṭhānaṃca “vuṭṭhāna”nti vuttaṃ. Heṭṭhimaṃ heṭṭhimañhi paguṇajjhānaṃ uparimassa uparimassa padaṭṭhānaṃ hoti. Tasmā vodānampi “vuṭṭhāna”nti vuttaṃ. Bhavaṅgavasena sabbajhānehi vuṭṭhānaṃ hotīti bhavaṅgaṃca vodānaṃ vuṭṭhānaṃ. Yasmā pana vuṭṭhānavasibhāvena yathāparicchinnaḅalam samāpattito vuṭṭhānaṃ hoti, tasmā samāpattivuṭṭhānakosallaṃ idha “vuṭṭhāna”nti vuttaṃ.

63. **Tasseva samādhissā**ti tassa anantarabalaniddese jhānādiyāyehi vuttasamādhissa. **Parivārā**ti parikkhārā. **Indriyānī**ti saddhāsatipaññindriyāni. **Balānī**ti hirottappehi saddhiṃ tāniyeva. Vīriyassa visuṃ gahaṇaṃ balānaṃ bahūpakāradassanattamaṃ. Vīriyupatthambhena hi saddhādayo paṭipakkhena akampanīyā hontī. Tenevāha – “**vīriyavasena balāni bhavanti**”ti. **Tesanti** indriyānaṃ. **Mudumajjhādhimattatā**ti avisadaṃ **mudu**. Nātivisadaṃ **majjhaṃ**. Ativisadaṃ **adhimattaṃ** balavaṃ “**tikkha**”nti vuccati.

Veneyyānaṃ indriyānurūpaṃ bhagavato desanāpavattīti dassetuṃ “**tattha bhagavā**”tiādi vuttaṃ.

Tattha **saṃkhittavitthārenā**ti saṃkhittassa vitthārena. Atha vā **saṃkhittenā**ti uddiṭṭhamattena. **Samkhittavitthārenā**ti uddesena niddesena ca. **Vitthārenā**ti uddesaniddesapaṭiniddesehi. **Mudukanti** lahukaṃ apāyabhayaavaṭṭabhayādīhi santajjanavasena bhāriyaṃ akatvā. **Mudutikkhanti** nātitikkhaṃ. Saṃvegavattūhi saṃvegajananādivasena bhāriyaṃ katvā. **Samathaṃ upadisatī**ti samathaṃ adhikaṃ katvā upadisati, na tathā vipassananti adhippāyo. Na hi kevalena samathena saccappaṭivedho sambhavati. **Samathavipassananti** samadhuraṃ samathavipassanaṃ. **Vipassananti** sātisaṃ vipassanaṃ upadisati. Yasmā cettha tikkhindriyādayo ugghaṭitaññūdayova, tasmā “**tikkhindriyassa nissaraṇaṃ upadisati**”tiādi vuttaṃ. Tattha **adhipaññāsikkhāyā**ti adhipaññāsikkhaṃ.

Yaṃ ettha ñāṇanti ettha indriyānaṃ mudumajjhādhimattatāya yaṃ ñāṇaṃ, idaṃ vuccati parasattānaṃ parapuggalānaṃ indriyaparopariyattavemattatāñāṇanti sambandhitabbaṃ. Tassa ñāṇassa pavattanākāraṃ dassetuṃ “**ayaṃ imaṃ bhūmi**”ntiādi vuttaṃ. Tattha **ayaṃ imaṃ bhūmiṃ bhāvanañca gatoti** ayaṃ puggalo evamimaṃ saṃkilesavāsaṇaṃ vodānaṃ bhavaṅgañca gato gacchati gamissati ca, kālavacanicchāya abhāvato, yathā duddhanti. Imāya velāya imasmiṃ samaye imāya mudumajjhaticchabhedāya anusāsaniyā. **Evamdhātukoti** hīnādivasena evamajjhāsayo evamadhimuttiko. **Ayañcassa āsayoti** imassa puggalassa ayaṃ sassatucchedappakāro, yathābhūtañāṇanulomakhattippakāro vā āsayo. Idañhi catubbidhaṃ āsayanti ettha sattā vasantīti āsayoti vuccati. Imaṃ pana bhagavā sattānaṃ āsayāṃ jānanto tesāṃ diṭṭhigatānaṃ vipassanāñāṇakammassakataññāṇaṃ appavattikkhaṇepi jānāti eva. Vuttampi cetāṃ – “kāmaṃ sevantaññeva jānāti ‘ayaṃ puggalo kāmagaruko kāmasayo kāmadhimutto’ti. Kāmaṃ sevantaññeva jānāti ‘ayaṃ puggalo nekkhammagaruko nekkhammāsayo nekkhammadhimutto’ti. Nekkhammaṃ sevantaññeva jānāti... byāpādaṃ... abyāpādaṃ... thinamiddhaṃ... ālokasaññaṃ sevantaññeva jānāti ‘ayaṃ puggalo thinamiddhagaruko thinamiddhāsayo thinamiddhādhimutto’”ti (paṭi. ma. 1.113).

Ayaṃ anusayoti ayaṃ imassa puggalassa kāmarāgādiko appahīnoyeva anusayitakilesa. Appahīnoyeva hi thāmagato kilesa anusayo. **Parasattānanti** padhānasattānaṃ. **Parapuggalānanti** tato paresaṃ sattānaṃ, hīnasattānanti attho. Ekattameva vā etaṃ padadvayaṃ veneyyavasena dvidhā vuttaṃ. **Indriyaparopariyattavemattatāñāṇanti** parabhāvo ca aparabhāvo ca paropariyattaṃ a-kārassa okāraṃ katvā, tassa vemattatā paropariyattavemattatā. Saddhādīnaṃ indriyānaṃ paropariyattavemattatāya ñāṇaṃ indriyaparopariyattavemattatāñāṇanti padavibhāgo veditabbo.

Tattha **yanti** yaṃ anekavihitassa pubbenivāsassa anussaraṇavasena bhagavato ñāṇaṃ, idaṃ aṭṭhamāṃ tathāgatabalanti sambandho. **Anekavihitanti** anekavidhaṃ, anekehi vā pakārehi pavattitaṃ. **Pubbenivāsanti** anussarituṃ icchitaṃ attano paresaṃca samanantarātītaṃ bhavaṃ ādiṃ katvā tattha tattha nivutthasantānaṃ. **Anussaratīti** “ekampi jātiṃ dvepi jātiyo”ti evaṃ jātipaṭipāṭiyā anugantvā saratī, anudeva vā saratī, cīte abhininnāmitamatte eva saratīti attho. Bhagavato hi parikammakiccaṃ natthi, āvajjanamatteneva saratī. **Seyyathidanti** āradhappakāranidassanatthe nipāto. **Ekampi jātinti** ekampi paṭisandhimūlaṃ cutipariyosānaṃ ekabhavapariyāpannaṃ khandhasantānaṃ. Esa nayo **dvepi jātiyoti**ādīsūpi.

Anekepi saṃvaṭṭakappetiādīsū pana parihāyamāno kappo **saṃvaṭṭakappo**, vaḍḍhamāno **vivaṭṭakappoti** veditabbo. Tattha saṃvaṭṭena saṃvaṭṭatṭhāyī gahito taṃmūlattā, vivaṭṭena ca vivaṭṭatṭhāyī. Evañhi sati yāni “cattārimāni, bhikkhave, kappassa asaṅkhyeyyāni. Katamāni cattāri? Saṃvaṭṭo saṃvaṭṭatṭhāyī vivaṭṭo vivaṭṭatṭhāyī”ti (a. ni. 4.156) vuttāni, tāni sabbāni pariggahitāni honti. **Amutrāsinti**ādi saraṇākāradassanaṃ. Tattha **amutrāsinti** amumhi saṃvaṭṭakappe, amumhi bhava vā yoniyā vā gatiyā vā viññāṇatṭhitiyā vā sattāvāse vā sattanikāye vā. **Evamñāmoti** tisso vā phusso vā. **Evamgottoti** bhaggavo vā gotamo vā. **Evamvaṇṇoti** odāto vā sāmō vā. **Evamāhāroti** sālīmaṃsodanāhāro vā pavattaphalabhojano vā. **Evamsukhadukkhappaṭisaṃvedīti** anekappakārena kāyikacetāsikānaṃ sāmisanirāmisappabhedānaṃ vā sukhadukkhānaṃ paṭisaṃvedī. **Evamāyupariyantoti** evaṃ vassasataparamāyupariyanto vā caturāsītīkappasahassaparamāyupariyanto vā. **So tato cuto amutra udapādinti** so tato bhavato, sattanikāyato vā cuto puna amukasmīṃ nāma sattanikāye udapādiṃ. Atha vā

tatrāpi bhava vā sattanikāye vā ahoṣiṃ. **Evamaṇāmoti**ādi vuttatthameva.

64. Dibbenātiādīsu dibbasadisattā **dibbaṃ**. Devatānañhi sucaritakammanibbattampi pīttasemharuhirādīhi apalibuddhaṃ upakkilesavimuttattā dūrepi ārammaṇaggahaṇasamatthaṃ dibbaṃ pasādacakkhu hoti. Idampi vīriyabhāvanābalanibbattaṃ ñānacakkhu tādisamevāti dibbasadisattā dibbaṃ, dibbavīhāravasena vā paṭiladdhattā, attanā ca dibbavīhārasannissitattāpi dibbaṃ, ālokapariggahena mahājutikattāpi dibbaṃ, tirokuṭṭādigatarūpadassanena mahāgatikattāpi dibbaṃ. Taṃ sabbaṃ saddasatthānusārena veditabbaṃ. Dassanaṭṭhena **cakkhu**. Cakkhukiccakaraṇena cakkhumivātipi cakkhu. Cutūpapātadassanena diṭṭhivisuddhihetuttā **visuddhaṃ**. Yo hi cutimattameva passati, na upapātaṃ, so ucchedadiṭṭhiṃ gaṇhāti. Yo upapātamattameva passati na cutiṃ, so navasattapātubhāvadiṭṭhiṃ gaṇhāti. Yo pana tadubhayaṃ passati, so yasmā duvidhampi taṃ diṭṭhigataṃ ativattati. Tasmāssa taṃ dassanaṃ diṭṭhivisuddhihetu hoti. Tadubhayañca bhagavā passati. Tena vuttaṃ – “cutūpapātadassanena diṭṭhivisuddhihetuttā visuddha”nti.

Ekādasaupakkilesavirahato vā visuddhaṃ. Yathāha –

“So kho ahaṃ anuruddhā ‘vicikicchā cīttassa upakkilesa’ti iti viditvā vicikicchā cīttassa upakkilesaṃ pajahiṃ. ‘Amanasikāro cīttassa upakkilesa... thinamiddhaṃ... chambhitattaṃ... uppilaṃ... duṭṭhullaṃ... accāraddhavīriyaṃ... atilīnavīriyaṃ... abhijappā... nānattasaññā... atinijjhāyitattaṃ rūpānaṃ cīttassa upakkilesa’ti iti viditvā atinijjhāyitattaṃ rūpānaṃ cīttassa upakkilesaṃ pajahi”nti (ma. ni. 3.242) evamādi.

Tadevaṃ ekādasaupakkilesavirahato vā visuddhaṃ. Manussūpacāraṃ atikkamitvā rūpadassanena **atikkantamānusakaṃ**, maṃsacakkhuṃ atikkantattā vā atikkantamānusakaṃ. Tena dibbena cakkhunā visuddhena atikkantamānusakena.

Satte passatīti manusso manussaṃ maṃsacakkhunā viya satte passati oloketi. **Cavamāne upapajjamāneti** ettha cutikkhaṇe upapattikkhaṇe vā dibbacakkhunāpi daṭṭhuṃ na sakkā. Ye pana āsannacutikā idāni cavissanti, ye ca gahitapaṭisandhikā sampati nibbattā, te “cavamānā upapajjamānā”ti adhippetā. Te evarūpe cavamāne upapajjamāne. **Hīneti** mohanissandayuttattā hīnajātikulabhogādivasena hīṇite paribhūte. **Paṇītetī** amohanissandayuttattā tabbiparīte. **Suvaṇṇetī** adosanissandayuttattā iṭṭhakantamanāpavaṇṇayutte. **Dubbaṇṇetī** dosanissandayuttattā aniṭṭhākantāmanāpavaṇṇayutte abhirūpe virūpe vāti attho. **Sugatetī** sugatigate, alobhanissandayuttattā vā aḍḍhe mahaddhane. **Duggatetī** duggatigate, lobhanissandayuttattā vā dalidde appannapānabhojane. **Yathākammūpagetī** yaṃ yaṃ kammaṃ upacītaṃ, tena tena upagate. Tattha purimehi “cavamāne”tiādīhi dibbacakkhukiccaṃ vuttaṃ. Iminā pana padena yathākammūpagaññaṅkiccaṃ. Yathākammūpagaññaṅānānāgatamaññaṅāni ca dibbacakkhupādakāneva dibbacakkhunā saheva ijjhanti.

Kāyaduccaritenātiādīsu duṭṭhu caritaṃ, duṭṭhaṃ vā caritaṃ kilesapūtikattā duccaritaṃ. Kāyena duccaritaṃ, kāyato vā pavattaṃ duccaritaṃ **kāyaduccaritaṃ**. Evaṃ **vacīmanoduccaritānīpi** daṭṭhabbāni. **Samannāgatā**ti samaṅgībhūtā. **Ariyānaṃ upavādakā**ti buddhādīnaṃ ariyānaṃ, antamaso gihisotāpannānampi antimavattunā vā guṇaparidhamāsanena vā upavādakā akkosakā garahakā. **Micchādiṭṭhikā**ti viparītadassanā. **Micchādiṭṭhikammaṣamādānā**ti micchādiṭṭhihetubhūtasamādinnānāvidhakammā. Ye ca micchādiṭṭhimūlakesu kāyakammādiṣu aññepi samādapenti. Tattha vacīmanoduccaritaggaṇaṇena ariyūpavādamicchādiṭṭhīsu gahitāsupi tesāṃ puna vacanaṃ mahāsāvajjabhāvadassanattaṃ. Mahāsāvajjo hi ariyūpavādo ānantariyasadiso. Yathāha –

“Seyyathāpi, sārīputta, bhikkhu sīlasampanno samādhisampanno paññāsampanno diṭṭheva dhamme aññaṃ ārādheyya, evaṃsampaadamidaṃ, sārīputta, vadāmi taṃ vācaṃ appahāya taṃ cittaṃ appahāya taṃ diṭṭhiṃ appaṭinissajjitvā yathābhattaṃ nikkhitto evaṃ niraye”ti (ma. ni. 1.149).

Micchādīṭṭhito ca mahāsāvajjatarāṃ nāma aññaṃ natthi. Yathāha –

“Nāhaṃ, bhikkhave, aññaṃ ekadhammampi samanupassāmi evaṃ mahāsāvajjatarāṃ, yathayidaṃ, bhikkhave, micchādīṭṭhi. Micchādīṭṭhiparamāni, bhikkhave, vajjāni”’ti (a. ni. 1.310).

Kāyassa bhedāti upādinnaḥkhandhapariccāgā. **Paraṃ maraṇāti** tadanantaraṃ abhinibbattaḥkhandhaggaṇe. Atha vā **kāyassa bhedāti** jīvitindriyassa upacchedā. **Paraṃ maraṇāti** cutito uddhaṃ. **Apāyantiādi** sabbaṃ nirayavevacanaṃ. Nirayo hi saggamokkhaḥetubhūtā puññasammatā ayā apetattā, sukhānaṃ vā āyassa abhāvā apāyo. Dukkassa gati paṭisaraṇanti **duggati**, dosabahulatāya vā duṭṭhena kammaṇā nibbattā gati duggati. Vivasā nipatanti tatha dukkaṭakārinoti **vinipāto**. Natthi ettha assādasaññito ayoti **nirayo**.

Atha vā apāyaggahaṇena tiracchānayoṇiṃ dīpeti, tiracchānayoṇi hi apāyo, sugatito apetattā. Na duggati, mahesakkhānaṃ nāgarājādīnaṃ sambhavato. Duggatiggahaṇena pettivisayaṃ dīpeti, so hi apāyo ceva duggati ca sugatito apetattā, dukkassa ca gatibhūtattā. Na tu vinipāto asurasadisāṃ avinipatitattā. Petamahiddhikānañhi vimānānipi nibbattanti. Vinipātaggahaṇena asurakāyaṃ dīpeti, so hi yathāvuttenatthena apāyo ceva duggati ca sukhasamussayehi vinipātattā vinipātoti vuccati. Nirayaggahaṇena avīciādiānekappaḥkaraṃ nirayameva dīpeti. **Upapannāti** upagatā, tatha abhinibbattāti adhippāyo. Vuttavipariyāyena sukkaḥpakko veditabbo.

Ayaṃ pana viseso – ettha sugatiggahaṇena manussagatimpi saṅgaṇhāti. Saggaggahaṇena devagatiṃ eva. Tatha sundarā gatīti **sugati**. Rūpādīhi visayehi suṭṭhu aggoti **saggo**. So sabbopi lujjanapalujjanaṭṭhena **lokoti** ayaṃ vacanatto. **Amukāya kappakoṭiyaṃ upacitaṃ** tenāyaṃ etarahi, anāgate vā saggūpago apāyūpago cāti aṭṭhamanavamabalaññānakiccaṃ ekajjhaṃ katvā dassitaṃ. Tathā **kappasatasahassevātiādisupi**. Tenevāha – “**imāni bhagavato dve ñāṇāni**”’ti.

Nihato māro bodhimūleti nihato samucchinnō kilesamāro bodhirukkhamūle. **Idaṃ bhagavato dasamaṃ balanti** idaṃ kilesamārassa hananaṃ samucchindanaṃ bhagavato dasamaṃ balaṃ. Tenevāha – “**sabbāsavaparikkhayaṃ ñāṇa**”’nti. Yasmā pana yadā arahattamaggena savāsanaṃ sabbe āsavā khepitā, tadā bhagavatā sabbaññutaññāṇaṃ adhigataṃ nāma, tasmā “**yaṃ sabbaññutā pattā**”’tiādi vuttaṃ.

Ayaṃ tāvettha ācariyānaṃ samānatthakathā. Paravādī panāha – “dasabalaññaṃ nāma pāṭiekkhaṃ natthi, yasmā ‘sabbaññutā pattā viditā sabbadhammā’’ti vuttaṃ, tasmā sabbaññutaññāṇassevāyaṃ pabhedo”’ti, taṃ na tathā daṭṭhabbaṃ. Aññaṃeva hi dasabalaññaṃ, aññaṃ sabbaññutaññāṇaṃ. Dasabalaññaṇhi sakasakakiccameva jānāti, sabbaññutaññāṇaṃ tampi tato avasesampi jānāti. Dasabalaññaṇesu hi paṭhamaṃ kāraṇākāraṇameva jānāti. Dutiyāṃ kammaḥparicchedameva, tatiyaṃ dhātunānattakāraṇameva, catutthaṃ ajjhāsayaḍdhimuttameva, pañcamaṃ kammavipākantameva, chaṭṭhaṃ jhānādīhi saddhiṃ tesāṃ saṃkilesādimeva, sattaṃ indriyānaṃ tikkhamudubhāvameva, aṭṭhamaṃ pubbenivutthakhandhasantatimeva, navamaṃ sattānaṃ cutūpapātameva, dasamaṃ saccaparicchedameva. Sabbaññutaññāṇaṃ pana etehi jānitabbañca tato uttariñca pajānāti. Etesāṃ pana kiccaṃ sabbaṃ na karoti. Tañhi jhānaṃ hutvā appetaṃ na sakkoti, iddhi hutvā vikubbituṃ na sakkoti, maggo hutvā kilese khepetuṃ na sakkoti.

Apica paravādī evaṃ pucchitabbo “dasabalaññaṃ nāmetaṃ savitakkasavicāraṃ avitakkavicāramattaṃ avitakkaavicāraṃ kāmāvacaraṃ rūpāvacaraṃ arūpāvacaraṃ lokiyaṃ lokuttara”’nti. Jānanto “paṭipāṭiyā satta savitakkasavicārāni”’ti vakkhati, tato parāni dve avitakkaavicārāni, āsavakkhayaññaṃ siyā savitakkasavicāraṃ, siyā avitakkavicāramattaṃ, siyā avitakkaavicāranti. Tathā paṭipāṭiyā satta kāmāvacarāni, tato dve rūpāvacarāni, avasāne ekaṃ lokuttaranti vakkhati. Sabbaññutaññāṇaṃ pana savitakkasavicārameva kāmāvacarameva lokiyamevāti niṭṭhamettha gantabbaṃ.

Vicayahārasampātavaṇṇanā niṭṭhitā.

3. Yuttihārasampātavaṇṇanā

65. Evaṃ nānāyehi vicayahārasampātaṃ vitthāretvā idāni yuttihārasampātādīni dassetuṃ “**tattha katamo yuttihārasampāto**”tiādi āraddhaṃ. Tattha “tasmā rakkhitacittassā”ti gāthāya padattho vitthāritoyeva. **Rakkhitacittassa sammāsaṅkappagocaro bhavissatīti yujjati**ti manacchaṭṭhāni dvārāni satikavāṭeṇa pidahitvā viharantassa kāmavitakkādīnaṃ micchāsaṅkappānaṃ avasaro eva natthīti nekkhamavitakkādiko sammāsaṅkappo eva tassa gocaro pavattiṭṭhānaṃ bhavissatīti ayamattho yujjati. Yuttiyā ghaṭeti saṃsandati sametīti attho. **Sammāsaṅkappagocaro sammādiṭṭhi bhavissatīti** vuttanayena sammāsaṅkappagocaro puggalo aviparītameva vitakkato sammādiṭṭhi bhavissati. Sammādiṭṭhisāṅkhātaṃ vipassanāñāṇaṃ purakkhatvā viharanto maggañāṇeṇa pañcannaṃ khandhānaṃ udayabbayaṃ asammohato paṭivijjhissati. Tathā paṭivijjhanto ca dukkhasabhāvattā duggatisāṅkhātā sabbā bhavagatiyo jahissati, tato eva sabbāṃ vinipātabhayaṃ saṃsārabhayañca samatikkamissatīti sabbopi cāyamattho yutto evāti.

Yuttihārasampātavaṇṇanā niṭṭhitā.

4. Padaṭṭhānahārasampātavaṇṇanā

66. Sakasampattiyā viya susaṃvihitasāṅkappo bhavati. Indriyesu guttadvāratā sucaritapāripūriyā āsanna-kāraṇanti āha – “**rakkhitacittassāti tiṇṇaṃ sucaritānaṃ padaṭṭhāna**”nti. Tassattho – “rakkhitacittassā”ti idaṃ tiṇṇaṃ sucaritānaṃ padaṭṭhānavacananti. Nekkhammasāṅkappādibahulassa kāmacchandādinīvaraṇappahānaṃ sukaranti nekkhammasāṅkappādayo samathassa āsanna-kāraṇanti āha – “**sammāsaṅkappagocaroti samathassa padaṭṭhāna**”nti. Kammassakatāsammādiṭṭhiyaṃ sappaccayanāmarūpadassanasammādiṭṭhiyañca ṭhito attādhīnaṃ saṃsāradukkhaṃ passanto tadatikkamanupāyaṃ vipassanaṃ ārabhatīti sammādiṭṭhivipassanāya visesakāraṇanti āha – “**sammādiṭṭhipurekkhāroti vipassanāya padaṭṭhāna**”nti. Udayabbayadassanaṃ ussukkāpento sammattaniyāmaṃ okkamatīti taṃ paṭhamamaggādhighamassa kāraṇanti āha – “**ñatvāna udayabbayanti dassanabhūmiyā padaṭṭhāna**”nti. Ālokasaññāmanasikārādīhi thinamiddhassa abhibhavanaṃ vīriyassa āsanna-kāraṇanti āha – “**thinamiddhābhībhū bhikkhūti vīriyassa padaṭṭhāna**”nti. Yadi pi ariyamaggakkhaṇe pahānabhāvanā samānakālā ekābhīsamayassa icchitattā, tathāpi pahātabbassa pahānābhāve bhāvanāpāripūrī natthīti pahānanimittā viya katvā bhāvanā vuttā “**sabbā duggatiyo jaheti bhāvanāya padaṭṭhāna**”nti. Atha vā “sabbā duggatiyo jahe”ti idaṃ bhagavato vacanaṃ yogīnaṃ ussāhajananatthaṃ ānisāṃsakittanaṃ hotīti bhāvanāya visesakāraṇanti vuttaṃ “sabbā...pe... padaṭṭhāna”nti.

Padatṭhānahārasampātavaṇṇanā niṭṭhitā.

5. Lakkhaṇahārasampātavaṇṇanā

67. Indriyesu guttadvāratā satsaṃvaro, satibalena ca nekkhamavitakkādibahulo hotīti vuttaṃ – “**tasmā rakkhitacittassa sammāsaṅkappagocaroti idaṃ satindriya**”nti. Tassattho – “tasmā rakkhitacittassa sammāsaṅkappagocaro”ti ettha rakkhitacittatāya ca sammāsaṅkappagocaratā kāraṇūpacāreṇa idaṃ satindriyaṃ, **gahitāni bhavanti pañcindriyāni** indriyalakkhaṇeṇa vimutti-pāripācanabhāvena vā ekalakkhaṇattāti adhippāyo. **Gahito bhavatīti** ettha maggalakkhaṇeṇa gahaṇaṃ suviññeyyanti taṃ ṭhapetvā kāraṇato gahaṇaṃ dassetuṃ “**sammādiṭṭhito hi sammāsaṅkappo pabhavati**”tiādi vuttaṃ. Tato eva gahito bhavati ariyo aṭṭhaṅgiko maggoti vatvā vimuttivimuttiñāṇadassanānīpi vuttāni.

Lakkhaṇahārasampātavaṇṇanā niṭṭhitā.

6. Catubyūhahārasampātavaṇṇanā

68. Rakkhīyatīti **rakkhitam**. Idam padavasena nibbacanam. Yasmā pana atthavasena nibbacane vutte padavasena nibbacanam vuttameva hoti, tasmā “**rakkhitam paripāliyatīti esā niruttī**”ti vuttam. Tattha **iti**-saddo ādyattho, pakāre vā. Tena evamādikā evampakārā vā esā niruttīti vuttam hoti. Tasmā cintetīti **cittam**. Attano santānam cinotīti cittam, paccayehi citanti cittam, cittavicittaṭṭhena cittam, cittakaraṇaṭṭhena cittam. Sammā saṅkappetīti **sammāsaṅkappoti**ādinā nirutti veditabbā.

Ayam ettha bhagavato adhippāyoti “rakkhitacitto assā”tiādinā indriyasamvarādayo duggatipahānaṅca vadato bhagavato ettha gāthāyam adhippāyo. **Kokāliko hīti**ādi nidānaniddeso. Tattha **hi**-saddo kāraṇe. Idam vuttam hoti – yasmā **kokāliko** (sam. ni. 1.181; a. ni. 10.89; su. ni. kokālikasutta) arakkhitacittatāya aggasāvakesu cittam padosetvā padumanirayam upapanno, tasmā duggatiyo jahitukāmo rakkhitacitto assāti bhagavā satiārakkhena cetasā samannāgato sabbā duggatiyo jahatīti attho. **Suttamhi vuttam “satiyā cittam rakkhitabba”**nti desanānusandhidassanam.

Catubyūhahārasampātavaṇṇanā niṭṭhitā.

7. Āvaṭṭahārasampātavaṇṇanā

69. Nekkhammasaṅkappabahulo kasiṇavasena mettādivasena vā laddhāya cittekaggatāsaṅkhātāya cittamañjūsāya cittam ṭhapetvā samādhimyeva vā yathāladdham saṅkilesato rakkhitacitto nāma hotīti vuttam – “**tasmā rakkhitacittassa sammāsaṅkappagocaroti ayam samatho**”ti. Paññāpadhānā vipassanāti āha – “**sammādiṭṭhipurekkhāroti ayam vipassanā**”ti. Ariyamaggena dukkhasacce pariññāte udayabbayadassanam matthakappattam nāma hotīti vuttam – “**ñatvāna udayabbayanti dukkhapariññā**”ti. “Yam kiñci samudayadhammam, sabbam tam nirodhadhamma”nti hi maggañāṇassa pavattidassanāti. **Imāni cattāri saccāni**ti catusaccadhammavasena āvaṭṭanam niṭṭhapeti. Tattha purimena saccadvayaṭṭhapanena visabhāgadhammavasena, pacchimena sabhāgadhammavasena āvaṭṭananti daṭṭhabbam.

Āvaṭṭahārasampātavaṇṇanā niṭṭhitā.

8. Vibhattihārasampātavaṇṇanā

70. **Kusalapakkho kusalapakkhena niddisitabboti rakkhitacittassāti** satisamvaro, so chabbidho dvārasasena cakkhudvārasamvaro yāva manodvārasamvaroti. Sammāsaṅkappo tividho – nekkhammasaṅkappo, abyāpādasāṅkappo, avihimsāsāṅkappoti. Sammādiṭṭhi aṭṭhavidhā dukkhe ñāṇam... pe... idappaccayatāpaṭiccasamuppannesu dhammesu ñāṇanti. Udayabbayañāṇam paññāsavidham avijjāsamudayā rūpasamudayo...pe... vipariñāmalakkhaṇam passantopi viññāṅkakkhandhassa vāyam passati. Thinamidhābhivhavanam catubbidham catumaggavasena. Tattha satisamvaro lokiyalokuttaravasena duvidho. Tesu lokiyo kāmāvacarova, lokuttaro dassanabhāvanābhedato duvidho. Ekameko cettha catusatipaṭṭhānābhedato catubbidho. Esa nayo sammāsaṅkappādīsūpi.

Ayam pana viseso – sammāsaṅkappo paṭhamajjhānavasena rūpāvacarotipi nīharitabbo. Padaṭṭhānavibhāgo padaṭṭhānahārasampāte vuttanayena vattabbo. Akusalapakkhe asaṅkappo cakkhuasaṅkappo...pe... kāyaasaṅkappo, copanakāyaasaṅkappo, vācāsaṅkappo, manoasaṅkappo aṭṭhavidho. Micchāsaṅkappo kāmavitakkādivasena tividho. Aññāṇam “**dukkhe aññāṇa**”ntiādinā aṭṭhavidhā vibhattam. Sammādiṭṭhipaṭipakkhato micchādiṭṭhi dvāsaṭṭhi vidhena veditabbā. Thinamidham uppattibhūmito pañcavidhanti evam akusalapakkhe vibhatti veditabbā.

Vibhattihārasampātavaṇṇanā niṭṭhitā.

9. Parivattanahārasampātavaṇṇanā

71. Parivattanahāre āvaṭṭahāre vuttanayena samathavipassanānidhāraṇaṃ akatvā “**samathavipassanāya bhāvitāyā**”ti āha. Lokiyā cettha samathavipassanā daṭṭhabbā. **Paṭipakkhenāti** “arakkhiteṇa cittenā”ti gāthāya paṭipakkhenāti adhippāyo. Atha vā vibhattihāre niddiṭṭhassa akusalapakkhassa paṭipakkhenāti attho.

Parivattanahārasampātavaṇṇanā niṭṭhitā.

10. Vevacanaḥārasampātavaṇṇanā

72. “Mānasam hadayaṃ paṇḍaram viññāṇam viññāṇakkhandho manoviññāṇadhātū”ti (dha. sa. 6) ca cittassa vevacanaṃ. “Takko vitakko saṅkappo appanā byappanā cetaso abhiniropanā”ti ca sammāsaṅkappassa. “Paññā pajānanā vicayo pavicayo”tiādinā (dha. sa. 16) sammādiṭṭhiyā. “Thinam thiyānā thiyitattaṃ cittassa akallatā akammaññatā onāho parināho antosaṅkoco”ti thinassa. “Akallatā akammaññatā kāyālasiyam supyaṃ supyanā supitatta”nti (dha. sa. 1163) middhassa. “Bhikkhako bhikkhū”tiādinā (pārā. 45) bhikkhupadassa. “Duggati apāyo vinipāto vaṭṭadukkham saṃsāro”tiādinā duggatiyā vevacanaṃ veditabbaṃ.

Vevacanaḥārasampātavaṇṇanā niṭṭhitā.

11. Paññattihārasampātavaṇṇanā

73. Adhiṭṭhahitvā rakkhantiyā satiyā rakkhiyamānaṃ cittaṃ tassā adhiṭṭhānaṃ viya hotīti katvā vuttaṃ – “**rakkhitacittassāti padaṭṭhānapaññatti satiyā**”ti. Sesam imasmiṃ paññattihārasampāte ito paresu otaraṇasodhanahārasampātesupi apubbaṃ natthi. Heṭṭhā vuttanayameva.

Paññattihārasampātavaṇṇanā niṭṭhitā.

14. Adhiṭṭhānahārasampātavaṇṇanā

76. Adhiṭṭhānahārasampāte **sammādiṭṭhi nāma yaṃ dukkhe ñāṇantiādinā** catusaccahetuhetusamuppannapaccayapaccayuppannasāṅkhātassa visayassa vasena vemattataṃ dassetvā puna **yaṃ tattha tattha yathābhūtaṃ ñāṇadassananti** pālīpālīatthānaṃ avasiṭṭhavisayavaseneva vemattataṃ dīpeti. Tattha **yaṃ saccāgamananti** yaṃ saccato aviparītato visayassa āgamaṃ, adhigamoti attho. “Yaṃ paccāgamaṇa”ntipi pāṭho, tassa yaṃ paṭipāṭivisayassa āgamaṃ, taṃtaṃvisayādhigamoti attho. Sesamettha parikkhārasamāropanahārasampātesu yaṃ vattabbaṃ, taṃ pubbe vuttanayattā uttānameva.

Adhiṭṭhānahārasampātavaṇṇanā niṭṭhitā.

Missakahārasampātavaṇṇanā

Api cettha hārasampātaniddeso imināpi nayena veditabbo –

“Manopubbaṅgamā dhammā, manoseṭṭhā manomayā;
Manasā ce pasannena, bhāsati vā karoti vā;
Tato naṃ sukhamanveti, chāyāva anapāyinī”ti. (dha. pa. 2);

Tattha katamo **desanāhārasampāto? Manopubbaṅgamā dhammāti manoti** khandhavavattāhānena viññāṇakkhandhaṃ deseti. Āyatanavavattāhānena manāyatanam, dhātuvavattāhānena viññāṇadhātum,

indriyavavatthānena manindriyaṃ. Katame dhammā pubbaṅgamā? Cha dhammā pubbaṅgamā, kusalanāṃ kusalamūlāni, akusalanāṃ akusalamūlāni, sādhipatikānaṃ adhipati, sabbacittuppādānaṃ indriyāni. Api ca imasmiṃ sutte mano adhippeto. Yathā balaggassa rājā pubbaṅgamo, evamevaṃ dhammānaṃ mano pubbaṅgamo. Tattha tividhena mano pubbaṅgamo nekkhammachandena abyāpādachandena avihimsāchandena. Tattha alobhassa nekkhammachandena manopubbaṅgamaṃ, adosassa abyāpādachandena manopubbaṅgamaṃ, amohassa avihimsāchandena manopubbaṅgamaṃ.

Manoseṭṭhāti mano tesam dhammānaṃ seṭṭhaṃ viṣiṭṭhaṃ uttamaṃ pavaraṃ mūlaṃ pamukhaṃ pāmokkhaṃ, tena vuccati “manoseṭṭhā”ti. **Manomayā**ti manena katā, manena nimmitā, manena nibbattā, mano tesam paccayo, tena vuccati “manomayā”ti. Te pana dhammā chandasamudānitā anāvilasaṅkappasamuṭṭhānā phassasamodhānā vedanākkhandho saññākkhandho saṅkhārakkhandho. **Manasā ce pasannenā**ti yā saddhā saddahanā okappanā abhippasādo. Iti iminā pasādena upeto samupeto upagato samupagato sampanno samannāgato, tena vuccati “pasannenā”ti idaṃ manokammaṃ. **Bhāsati vā**ti vacīkammaṃ. **Karoti vā**ti kāyakammaṃ. Iti dasakusalakammāpathā dassitā.

Tatoti dasavidhassa kusalakammaṃ katattā upacitattā. **Nanti** yo so katapuñño katakusalo katabhīruttāno, taṃ puggalaṃ. **Sukhanti** duvidhaṃ sukhaṃ kāyikaṃ cetasikaṃ. **Anvetī**ti anugacchati.

Idhassu puriso appahīnānusayo saṃyojanīyesu dhammesu assādaṃ anupassati, so saṃyojanīyesu dhammesu assādaṃ anupassanto yathādiṭṭhaṃ yathāsutaṃ sampattibhavaṃ pattheti. Iccassa avijjā ca bhavataṅhā ca anubaddhā hontī, so yathādiṭṭhaṃ yathāsutaṃ sampattibhavaṃ patthento pasādanīyavattusmiṃ cittaṃ pasādeti saddahati okappeti. So pasannacitto tividhaṃ puññakiriyavattumaṃ anutiṭṭhati dānamayaṃ sīlamayaṃ bhāvanāmayam kāyena vācāya manasā. So tassa vipākaṃ paccanubhoti diṭṭheva dhamme upapajje vā aparāpare vā pariyāye. Iti kho paṇassa avijjāpaccayā saṅkhārā, saṅkhārapaccayā viññāṇaṃ, viññāṇapaccayā nāmarūpaṃ, nāmarūpapaccayā saḷāyatanaṃ, saḷāyatanapaccayā sukhavedanīyo phasso, phassapaccayā vedanāti evaṃ santaṃ taṃ sukhamanveti. Tassevaṃ vedanāya aparāparaṃ parivattamānāya uppajjati taṅhā. Taṅhāpaccayā upādānaṃ...pe... samudayo hotīti.

Tattha yaṃ mano, ye ca manopubbaṅgamā dhammā, yaṅca sukhaṃ, ime vuccanti pañcakkhandhā, te **dukkhasaccaṃ**. Tesam purimakāraṇabhūtā avijjā bhavataṅhā ca **samudayasaccaṃ**. Tesam pariññāya pahānāya bhagavā dhammaṃ deseti, dukkhassa pariññāya samudayassa pahānāya. Yena parijānāti, yena pajahati, ayaṃ **maggo**. Yattha ca maggo pavattati, ayaṃ **nirodho**. Imāni cattāri saccāni evaṃ āyatanadhātuindriyamukheṇāpi niddhāretabbāni. Tattha samudayena assādo, dukkhena ādīnava, magganīrodhehi nissaraṇaṃ, sukhassa anvayo phalaṃ, manasā pasannena kāyavacīsamīhā upāyo, manopubbaṅgamattā dhammānaṃ attano sukhakāmena pasannena manasā vacīkammaṃ kāyakammaṃca pavattetabbanti ayaṃ bhagavato āṇatti. Ayaṃ desanāhārasampāto.

Tattha katamo **vicayahārasampāto**? Mananato ārammaṇavijānanato **mano**. Mananalakkhaṇe sampayuttesu ādhipaccakaraṇato pubbaṅgamo ihābhāvato nissattanijjīvaṭṭhena **dhammā**. Gāmesu gāmaṇi viya padhānaṭṭhena mano seṭṭho etesanti **manoseṭṭhā**. Sahajātādīpaccayabhūtena manasā nibbattāti **manomayā**. Akālussiyato, ārammaṇassa okappanato ca pasannena vacīviññattivipphārato tathā sādiyanato ca **bhāsati**. Copanakāyavipphārato tathā sādiyanato ca **karoti**. Tathā pasutattā anaññattā ca “tato”ti vuttaṃ. Sukhanato sātabhāvato iṭṭhabhāvato ca “sukha”nti vuttaṃ. Katūpacitattā avipakkavipākattā ca “anvetī”ti vuttaṃ. Kāraṇāyattavuttito asaṅkantito ca “chāyāva anapāyinī”ti vuttaṃ. Ayaṃ anupadavicayato vicayahārasampāto.

Tattha katamo **yuttihārasampāto**? Manassa dhammānaṃ ādhipaccayogato pubbaṅgamatā yujjati. Tato eva tesam manassa anuvattanato dhammānaṃ manoseṭṭhatā yujjati. Sahajātādīpaccayavasena manasā nibbattattā dhammānaṃ manomayatā yujjati. Manasā pasannena samuṭṭhānānaṃ kāyavacīkammānaṃ kusalabhāvo yujjati. Yena kusalakammaṃ upacitaṃ, taṃ chāyā viya sukhaṃ

anvetīti yujjati. Ayaṃ yuttihārasampāto.

Tattha katamo **padaṭṭhāno hārasampāto**? Mano manopavicārānaṃ padaṭṭhānaṃ. Manopubbaṅgamā dhammā sabbassa kusalapakkhassa padaṭṭhānaṃ. “**Bhāsati**”ti sammāvācā, “karotī”ti sammākammanto, te sammāājīvassa padaṭṭhānaṃ. Sammāājīvo sammāvāyāmassa padaṭṭhānaṃ. Sammāvāyāmo sammāsatiyā padaṭṭhānaṃ. Sammāsati sammāsamādhissa padaṭṭhānaṃ. “Manasā pasannena”ti ettha pasādo saddhindriyaṃ, taṃ sīlassa padaṭṭhānaṃ. Sīlaṃ samādhissa padaṭṭhānaṃ. Samādhi paññāyāti yāva vimuttiñānadassanā yojetabbaṃ. Ayaṃ padaṭṭhānahārasampāto.

Tattha katamo **lakkhaṇo hārasampāto**? “Manopubbaṅgamā dhammā”ti manopubbaṅgamatāvacaṇena dhammānaṃ chandapubbaṅgamatāpi vīriyapubbaṅgamatāpi vīmaṃsāpubbaṅgamatāpi vuttā hoti ādhipateyyalakkhaṇena chandādīnaṃ manasā ekalakkhaṇattā. Tathā nesaṃ saddhādīpubbaṅgamatāpi vuttā hoti indriyalakkhaṇena saddhādīnaṃ manasā ekalakkhaṇattā. “Manasā ce pasannena”ti yathā manassa pasādasamannāgamo taṃsamuṭṭhānānaṃ kāyavacīkammānaṃ anavajjabhāvalakkhaṇaṃ. Evaṃ cittassa satiādisamannāgamopi nesaṃ anavajjabhāvalakkhaṇaṃ yonisomanasikārasamuṭṭhānabhāvena ekalakkhaṇattā. “Sukhamanveti”ti sukhānugamanavacaṇena sukhassa paccayabhūtānaṃ manāpiyarūpādīnaṃ anugamo vutto hoti tesampi kammaṃpaccayatāya ekalakkhaṇattāti. Ayaṃ lakkhaṇahārasampāto.

Tattha katamo **catubyūho hārasampāto**? “Manopubbaṅgamā”tiādīsu “mano”tiādīnaṃ padānaṃ nibbacanaṃ niruttaṃ, taṃ padatthaniddesavasena veditabbaṃ. Padattho ca vuttanayena suviññeyyova. Ye sukhena atthikā, tehi pasannena manasā kāyavacīmanokammāni pavattetabbānīti ayamettha bhagavato adhippāyo. Puññakiriyaā aññesampi pubbaṅgamā hutvā tattha tesamā sammā upanetāro imissā desanāya nidānaṃ. “Chadvārādhipatī rājā (dha. pa. aṭṭha. 2.181 erakapattanāgarājavatthu), cittānuparivattino dhammā (dha. sa. dukamātikā 62; 1205-1206), cittassa ekadhammassa, sabbeva vasamanvagū”ti (saṃ. ni. 1.62) evamādisamānayanena imissā desanāya saṃsandanaṃ desanānusandhi. Padānusandhiyo pana suviññeyyāvāti. Ayaṃ catubyūho hārasampāto.

Tattha katamo **āvaṭṭo hārasampāto**? “Manopubbaṅgamā dhammā”ti tattha yāni tīṇi kusalamūlāni, tāni aṭṭhannaṃ sammattānaṃ hetu. Ye sammattā, ayaṃ aṭṭhaṅgiko maggo. Yaṃ manosahajānāmarūpaṃ, idaṃ dukkhaṃ. Asamucchinnā purimanipphannā avijjā bhavataṇhā, ayaṃ samudayo. Yattha tesamā pahānaṃ, ayaṃ nirodhoti imāni cattāri saccāni. Ayaṃ āvaṭṭo hārasampāto.

Tattha katamo **vibhattihārasampāto**? “Manopubbaṅgamā dhammā, manasā ce pasannena, tato naṃ sukhamanveti”ti nayidaṃ yathārutavasena gahetabbaṃ. Yo hi samaṇo vā brāhmaṇo vā pañātipātimhi micchādīṭṭhike micchāpaṭipanne sakaṃ cittaṃ pasādeti, pasannena ca cittena abhūtaguṇābhithavanavasena bhāsati vā nipaccakāraṃ vāssa yaṃ karoti, na tato naṃ sukhamanveti. Dukkameva pana taṃ tato cakkamva vahato padamanveti. Iti hi idaṃ vibhajjabyākaraṇīyaṃ. Yaṃ manasā ce pasannena bhāsati vā karoti vā, tañce vacīkammaṃ kāyakammaṃca sukhavedanīyanti. Taṃ kissa hetu? Sammattagatehi sukhavedanīyaṃ micchāgatehi dukkhavedanīyanti. Kathaṃ panāyaṃ pasādo daṭṭhabbo? Nāyaṃ pasādo, pasādapatirūpako pana micchādhimokkhoti vadāmi. Ayaṃ vibhattihārasampāto.

Tattha katamo **parivattano hārasampāto**? Manopubbaṅgamātiādi. Yaṃ manasā paduṭṭhena bhāsati vā karoti vā dukkhassānugāmī. Idañhi suttaṃ etassa ujupaṭipakkho. Ayaṃ parivattano hārasampāto.

Tattha katamo **vevacano hārasampāto**? “Manopubbaṅgamā”ti mano cittaṃ manāyatanaṃ manindriyaṃ manoviññānaṃ manoviññānadhātūti pariyāyavacaṇaṃ. Pubbaṅgamā purecārino puregāminoti pariyāyavacaṇaṃ. Dhammā attā sabhāvāti pariyāyavacaṇaṃ. Seṭṭhaṃ padhānaṃ pavaranti pariyāyavacaṇaṃ. Manomayā manonibbattā manosambhūtāti pariyāyavacaṇaṃ. Pasannena saddahantena okappentenāti pariyāyavacaṇaṃ. Sukhaṃ sātamaṃ vedayitanti pariyāyavacaṇaṃ. Anveti anugacchati anubandhatūti pariyāyavacaṇaṃ. Ayaṃ vevacano hārasampāto.

Tattha katamo **paññattihārasampāto**? Manopubbaṅgamāti ayaṃ manaso kiccapaññatti. Dhammāti sabhāvapaññatti, kusalakammaṭṭhapaññatti. Manoseṭṭhāti padhānapaññatti. Manomayāti sahaṅgapaññatti. Pasannenāti saddhindriyena samannāgatapaññatti, assaddhiyassa paṭikkhepapaññatti. Bhāsati vā karoti vāti sammāvācāsammākamantānaṃ nikkhepapaññatti. Tato naṃ sukhamanvetīti kammassa phalānubandhapaññatti, kammassa avināsapaññatti. Ayaṃ paññattihārasampāto.

Tattha katamo **otaraṇo hārasampāto**? Manoti viññāṅkhandho. Dhammāti vedanāsaññāsaṅkhārakkhandhā. Bhāsati vā karoti vāti kāyavacīviññattiyo. Tāsaṃ nissayā cattāro mahābhūtāti rūpakkhandhoti ayaṃ khandhehi otaraṇo. Manoti abhisāṅkhāraviññāṅanti manoggahaṇena avijjāpaccayā saṅkhārā gahitāti. Saṅkhārapaccayā viññāṇaṃ...pe... samudayo hotīti ayaṃ paṭiccasamuppādena otaraṇoti. Ayaṃ otaraṇo hārasampāto.

Tattha katamo **sodhano hārasampāto**? Manoti ārambho neva padasuddhi, na ārambhasuddhi. Manopubbaṅgamāti padasuddhi, na ārambhasuddhi. Tathā dhammāti yāva sukhanti padasuddhi, na ārambhasuddhi. Sukhamanvetīti pana padasuddhi ceva ārambhasuddhi cāti. Ayaṃ sodhano hārasampāto.

Tattha katamo **adhiṭṭhāno hārasampāto**? Manopubbaṅgamā dhammā, manoseṭṭhā manomayāti ekattatā. Manasā ce pasannenāti vemattatā, tathā manasā ce pasannenāti ekattatā. Bhāsati vā karoti vāti vemattatā, tathā manasā ce pasannenāti ekattatā. So pasādo duvidho ajjhattaṅca byāpādavikkhambhanato, bahiddhā ca okappanato. Tathā sampattibhavahetubhūtopi vaḍḍhihetubhūtovāti ayaṃ vemattatā. Tayidaṃ suttaṃ dvīhi ākārehi adhiṭṭhātabbaṃ hetunā ca yo pasannamānaso, vipākena ca yo sukhavedanīyoti. Ayaṃ adhiṭṭhāno hārasampāto.

Tattha katamo **parikkhāro hārasampāto**? Manopubbaṅgamāti ettha manoti kusalaviññāṇaṃ. Tassa ca ñāṇasampayuttassa alobho adoso amohoti tayo sampayuttā hetū, ñāṇavippayuttassa alobho adosoti dve sampayuttā hetū. Sabbesaṃ avisesena yonisomanasikāro hetu, cattāri sampatticakkāni paccayo. Tathā saddhammassavanaṃ, tassa ca dānādivasena pavattamānassa deyyadhammādayo paccayo. Dhammāti cettā vedanādīnaṃ iṭṭhārammaṇādayo. Tathā tayo viññāṇassa, vedanādayo pasādassa, saddheyyavattukusalābhisaṅkhāro vipākasukhassa paccayoti. Ayaṃ parikkhāro hārasampāto.

Tattha katamo **samāropano hārasampāto**? Manopubbaṅgamā dhammāti manoti puññacittaṃ, taṃ tividaṃ – dānamayaṃ, sīlamayaṃ, bhāvanāmayanti. Tattha dānamayassa alobho padaṭṭhānaṃ, sīlamayassa adoso padaṭṭhānaṃ, bhāvanāmayassa amoho padaṭṭhānaṃ. Sabbesaṃ abhippasādo padaṭṭhānaṃ, “saddhājāto upasaṅkamati, upasaṅkamanto payirupāsati”’ti (ma. ni. 2.183) **suttaṃ** vitthāretabbaṃ. Kusalacittaṃ sukhassa iṭṭhavipākassa padaṭṭhānaṃ. Yonisomanasikāro kusalaṅkassa padaṭṭhānaṃ. Yoniso hi manasi karonto kusalaṅkassa adhiṭṭhāti kusalaṅkassa bhāveti, so anuppannaṃ pāpakānaṃ akusalānaṃ dhammānaṃ anuppādāya chandaṃ janeti, uppannaṃ kusalaṅkassa dhammānaṃ...pe... padahati. Tassevaṃ catūsu sammappadhānesu bhāviyamānesu cattāro satipaṭṭhānā yāva ariyo aṭṭhaṅgiko maggo bhāvanāpāripūriṃ gacchatīti ayaṃ bhāvanāya samāropanā. Sati ca bhāvanāya pahānaṅca siddhamevāti. Ayaṃ samāropano hārasampāto.

Tathā –

“Dadato puññaṃ pavaḍḍhati, saṃyamato veraṃ na cīyati;
Kusalo ca jahāti pāpakam, rāgadosamohakkhayā sa nibbuto”’ti. (dī. ni. 2.197; udā. 75; peṭako. 16);

Tattha **dadato puññaṃ pavaḍḍhatīti** dānamayaṃ puññakiriyavattu vuttaṃ. **Saṃyamato veraṃ na cīyatīti** sīlamayaṃ puññakiriyavattu vuttaṃ. **Kusalo ca jahāti pāpakanti** lobhassa ca dosassa ca mohassa ca pahānamāha. Tena bhāvanāmayam puññakiriyavattu vuttaṃ. **Rāgadosamohakkhayā sa nibbutoti** anuppādāparinibbānamāha.

Dadato puññaṃ pavaḍḍhatīti alobho kusalamūlaṃ. Saṃyamato veraṃ na cīyatīti adoso kusalamūlaṃ. Kusalo ca jahāti pāpakanti amoho kusalamūlaṃ. Rāgadosamohakkhayā sa nibbutoti tesam nissaraṇaṃ vuttaṃ.

Dadato puññaṃ pavaḍḍhatīti sīlakkhandaṃ padaṭṭhānaṃ. Saṃyamato veraṃ na cīyatīti samādhikkhandhaṃ padaṭṭhānaṃ. Kusalo ca jahāti pāpakanti paññākkhandhaṃ vimuttikkhandhaṃ padaṭṭhānaṃ. Dānena oḷārikānaṃ kilesānaṃ pahānaṃ, sīlena majjhimānaṃ, paññāya sukhumānaṃ. Rāgadosamohakkhayā sa nibbutoti katāvībhūmiṃ dasseti.

Dadato puññaṃ...pe... jahāti pāpakanti sekkhabhūmi dassitā. Rāgadosamohakkhayā sa nibbutoti aggaphalaṃ vuttaṃ.

Tathā dadato puññaṃ...pe... na cīyatīti lokiyakusalamūlaṃ vuttaṃ. Kusalo ca jahāti pāpakanti lokuttarakusalamūlaṃ vuttaṃ. Rāgadosamohakkhayā sa nibbutoti lokuttarassa kusalamūlassa phalaṃ vuttaṃ.

Dadato...pe... na cīyatīti puthujjanabhūmi dassitā. Kusalo ca jahāti pāpakanti sekkhabhūmi dassitā. Rāgadosamohakkhayā sa nibbutoti asekkhabhūmi dassitā.

Dadato ...pe... na cīyatīti saggagāminī paṭipadā vuttā. Kusalo ca jahāti pāpakanti sekkhavimutti. Rāgadosamohakkhayā sa nibbutoti asekkhavimutti vuttā.

Dadato...pe... na cīyatīti dānakathaṃ sīlakathaṃ saggakathaṃ lokiyānaṃ dhammānaṃ desanānaṃ. Kusalo ca jahāti pāpakanti loke ādīnavānupassanāya saddhiṃ sāmukkaṃsikaṃ dhammadesanānaṃ. Rāgadosamohakkhayā sa nibbutoti tassā desanāya phalaṃ.

Dadato puññaṃ pavaḍḍhatīti dhammadānaṃ āmisadānaṃ vadati. Saṃyamato veraṃ na cīyatīti pāṇātipātā veramaṇiyā sattānaṃ abhayadānaṃ vadati. Evaṃ sabbānīpi sikkhāpadāni vitthāretabbāni. Tena ca sīlasaṃyamena sīle paṭiṭṭhito cittaṃ saṃyameti, tassa samatho pāripūriṃ gacchati. Evaṃ so samathe ṭhito vipassanākosallayogato kusalo ca jahāti pāpakaṃ rāgaṃ jahāti, dosaṃ jahāti, mohaṃ jahāti, ariyamaggena sabbepi pāpake akusale dhamme jahāti. Evaṃ paṭipanno ca rāgadosamohakkhayā sa nibbutoti rāgādīnaṃ parikkhayā dvepi vimuttiyo adhigacchatīti ayaṃ suttaniddeso.

Tattha katamo **desanāhārasampāto**? Imasmimṃ sutte kiṃ desitaṃ? Dve sugatiyo devā ca manussā ca, dibbā ca pañca kāmagaṇā, mānusakā ca pañca kāmagaṇā, dibbā ca pañcupādānakkhandhā, mānusakā ca pañcupādānakkhandhā. Idaṃ vuccati dukkhaṃ ariyasaccaṃ. Tassa kāraṇabhāvena purimapurimanipphannā taṇhā samudayo ariyasaccaṃ. Tayidaṃ vuccati assādo ca ādīnavo ca. Sabbassa purimehi dvīhi padehi niddeso “dadato...pe... na cīyatī”ti. Kusalo ca jahāti pāpakanti maggo vutto. Rāgadosamohakkhayā sa nibbutoti dve nibbānadhātuyo saupādisesā ca anupādisesā ca. Idaṃ nissaraṇaṃ. Phalādīni pana yathārahaṃ veditabbānīti. Ayaṃ desanāhārasampāto.

Vicayoti “dadato puññaṃ pavaḍḍhatī”ti iminā paṭhamena padena tividhampi dānamayaṃ sīlamayaṃ bhāvanāmayayaṃ puññakiriyavattu vuttaṃ. Dasavidhassapi deyyadhammassa pariccāgo vutto. Tathā chabbidhassapi rūpādīraṃmaṇassa. “Saṃyamato veraṃ na cīyatī”ti dutiyena padena averā asapattā abyāpādā ca paṭipadā vuttā. “Kusalo ca jahāti pāpaka”nti tatiyena padena nāṇuppādo aññānānirodho sabbepi ariyo aṭṭhaṅgiko maggo sabbepi bodhipakkhiyā dhammā vuttā. “Rāgadosamohakkhayā sa nibbuto”ti rāgakkhayena rāgavirāgā cetovimutti, mohakkhayena avijjāvirāgā paññāvimutti vuttāti. Ayaṃ vicayo hārasampāto.

Yuttīti dāne ṭhito ubhayaṃ paripūreti macchariyappahānaṃ puññābhisaṇḍānaṃ atthesā yutti. Sīlasaṃyame ṭhito ubhayaṃ paripūreti upacārasamādhimṃ appanāsamādhīnaṃ atthesā yutti. Pāpake

dhamme pajahanto dukkhaṃ parijānāti, nirodhaṃ sacchikaroti, maggaṃ bhāvetīti atthesā yutti. Rāgadosamohesu sabbaso parikkhīṇesu anupādisesāya nibbānadhātuyā parinibbāyatīti atthesā yuttīti. Ayaṃ yuttihārasampāto.

Padaṭṭhānanti dadato puññaṃ pavaḍḍhatīti cāgādhiṭṭhānassa padaṭṭhānaṃ. Saṃyamato veraṃ na cīyatīti saccādhīṭṭhānassa padaṭṭhānaṃ. Kusalo ca jahāti pāpakanti paññādhiṭṭhānassa padaṭṭhānaṃ. Rāgadosamohakkhayā sa nibbutoti upasamādhiṭṭhānassa padaṭṭhānanti. Ayaṃ padaṭṭhāno hārasampāto.

Lakkhaṇoti “dadato” ti etena peyyavajjaṃ atthacariyaṃ samānattatā ca dassitāti veditabbā saṅgahavatthubhāvena ekalakkhaṇattā. “Saṃyamato” ti etena khantimettāavihimsānuddayādayo dassitāti veditabbā verānuppādanalakkhaṇena ekalakkhaṇattā. “Veraṃ na cīyati” ti etena hirīottappaappicchatāsantuṭṭhitādayo dassitā verāvaḍḍhanena ekalakkhaṇattā. Tathā ahirīkānottappādayo acetabbabhāvena ekalakkhaṇattā. “Kusalo” ti etena kosalladīpanena sammāsaṅkappādayo dassitā maggaṅgādibhāvena ekalakkhaṇattā. “Jahāti pāpaka” nti etena pariññābhisamayādayopi dassitā abhisamayalakkhaṇena ekalakkhaṇattā. “Rāgadosamohakkhayā” ti etena avasiṭṭhakilesādīnampi khayā dassitā khepetabbabhāvena ekalakkhaṇattāti ayaṃ lakkhaṇo.

Catubyūhoti dadatoti gāthāyaṃ bhagavato ko adhippāyo? Ye mahābhogataṃ patthayissanti, te dānaṃ dassanti dāliddiyappahānāya. Ye averataṃ icchanti, te pañca verāni pajahissanti. Ye kusaladhammehi chandakāmā, te aṭṭhaṅgikaṃ maggaṃ bhāvēssanti. Ye nibbāyitukāmā, te rāgadosamohaṃ pajahissanti ayamettha bhagavato adhippāyo. Evaṃ nibbacananidānasandhayo vattabbāti. Ayaṃ catubyūho.

Āvaṭṭoti yañca adadato macchariyaṃ, yañca asaṃyamato veraṃ, yañca akusalassa pāpassa appahānaṃ, ayaṃ paṭipakkhaniddesena samudayo. Tassa alobhena ca adosena ca amohena ca dānādīhi pahānaṃ, imāni tīni kusalamūlāni. Tesam paccayo aṭṭha sammattāni, ayaṃ maggo. Yo rāgadosamohānaṃ khayō, ayaṃ nirodhoti. Ayaṃ āvaṭṭo.

Vibhattīti dadato puññaṃ pavaḍḍhatīti ekaṃsena yo bhayahetu deti, rāgahetu deti, āmisakiñcikkahetu deti, na tassa puññaṃ vaḍḍhati. Yañca daṇḍadānaṃ satthadānaṃ paraviheṭhanatthaṃ apuññaṃ assa pavaḍḍhati. Yaṃ pana kusalena cittaṃ anukampanto vā apacāyamāno vā annaṃ deti, pānaṃ vatthaṃ yānaṃ mālāgandhavilepanaṃ seyyāvasathaṃ padīpeyyaṃ deti, sabbasattānaṃ vā abhayadānaṃ deti, mettacitto hitajjhāsayo nissaraṇasaññī dhammaṃ deseti. Saṃyamato veraṃ na cīyatīti ekaṃsena abhayūparatassa cīyati, kiṃkāraṇaṃ? Yaṃ asamatto, bhayūparato diṭṭhadhammikassa bhāyati “mā maṃ rājāno gahetvā hatthaṃ vā chindeyyuṃ...pe... jīvantampi sūle uttāseyyu” nti, tena saṃyamena averaṃ cīyati. Yo pana evaṃ samāno veraṃ na cīyati. Yo pana evaṃ samādiyati, pānātipātassa pāpako vipāko diṭṭhe ceva dhamme abhisamparāye ca, evaṃ sabbassa akusalassa, so tato āramati, iminā saṃyamena veraṃ na cīyati. Saṃyamo nāma sīlaṃ. Taṃ catubbidhaṃ cetanā sīlaṃ, cetasikaṃ sīlaṃ, saṃvaro sīlaṃ, avītikkamo sīlanti. Kusalo ca jahāti pāpakanti pāpapahāyakā sattattiṃsa bodhipakkhiyā dhammā vattabbāti. Ayaṃ vibhatti.

Parivattanoti dadato puññaṃ pavaḍḍhati, adadatopi puññaṃ pavaḍḍhati, na dānamayikaṃ. Saṃyamato veraṃ na cīyati asaṃyamatoṃ veraṃ na cīyati, yaṃ dānena paṭisaṅkhānabalena bhāvanābalena. Kusalo ca jahāti pāpakaṃ, akusalo pana na jahāti. Rāgadosamohakkhayā sa nibbuto, tesam aparikkhayā natthi nibbutīti. Ayaṃ parivattano.

Vevacanoti dadato puññaṃ pavaḍḍhati. Pariccāgato kusalaṃ upacīyati. Anumodatopi puññaṃ pavaḍḍhati cittappasādatopi veyyāvaccakiriyaṃ. Saṃyamatoṃ sīlasaṃvarato soraccato. Veraṃ na cīyatīti pāpaṃ na vaḍḍhati, akusalaṃ na vaḍḍhati. Kusaloṃ paṇḍito nipuṇo medhāvī parikkhako. Jahātīti samucchindati samugghāṭeti. Ayaṃ vevacano.

Paññattī dadato puññaṃ pavaḍḍhatīti lobhassa paṭinissaggapaññatti, alobhassa nikkhepapaññatti. Saṃyamato veraṃ na cīyatīti dosassa vikkhambhanapaññatti, adosassa nikkhepapaññatti. Kusalo ca jahāti pāpakanti mohassa samugghātapaññatti, amohassa bhāvanāpaññatti. Rāgadosamohassa pahānapaññatti, alobhādosāmohassa bhāvanāpaññatti. Rāgadosamohakkhayā sa nibbutoti kilesānaṃ paṭippassaddhipaññatti, nibbānassa sacchikiriyapaññattīti. Ayaṃ paññatti.

Otaṇoti dadato puññaṃ pavaḍḍhatīti dānaṃ nāma saddhādīhi indriyehi hotīti ayaṃ indriyehi otaṇo. Saṃyamato veraṃ na cīyatīti saṃyamo nāma sīlakkhandhoti ayaṃ khandhehi otaṇo. Kusalo ca jahāti pāpakanti pāpappahānaṃ nāma tīhi vimokkhehi hoti. Tesam upāyabhūtāni tīṇi vimokkhamukhānīti ayaṃ vimokkhamukhehi otaṇo. Rāgadosamohakkhayā sa nibbutoti vimuttikkhandho. So ca dhammadhātu dhammāyatanañcāti ayaṃ dhātūhi ca āyatanehi ca otaṇoti. Ayaṃ otaṇo.

Sodhanoti dadatotiādikā padasuddhi, no ārambhasuddhi. Rāgadosamohakkhayā sa nibbutoti ayaṃ padasuddhi ca ārambhasuddhi cāti. Ayaṃ sodhano.

Adhiṭṭhānoti dadatoti ayaṃ ekattatā, cāgo pariccāgo dhammadānaṃ āmisadānaṃ abhayadānaṃ, aṭṭha dānāni vitthāretabbāni. Ayaṃ vemattatā. Saṃyamoti ayaṃ ekattatā. Pātimokkhasaṃvaro satisaṃvaroti ayaṃ vemattatā. Kusalo ca jahāti pāpakanti ayaṃ ekattatā. Sakkāyadhiṭṭhiṃ pajahati vicikiccham pajahatītiādikā ayaṃ vemattatā. Rāgadosamohakkhayā sa nibbutoti ayaṃ ekattatā. Saupādisesā nibbānadhātu anupādisesā nibbānadhātūti ayaṃ vemattatāti. Ayaṃ adhiṭṭhāno.

Parikkhāroti dānassa pāmojjaṃ paccayo. Alobho hetu, saṃyamassa hirottappādayo paccayo. Yonisomanasikāro adoso ca hetu, pāpappahānassa samādhī yathābhūtañānadassanañca paccayo. Tisso anupassanā hetu, nibbutiyā maggasammādiṭṭhi hetu, sammāsaṅkappādayo paccayoti. Ayaṃ parikkhāro.

Samāropano hārasampātoti dadato puññaṃ pavaḍḍhatīti dānamayaṃ puññakiriyavatthu, taṃ sīlassa padaṭṭhānaṃ. Saṃyamato veraṃ na cīyatīti sīlamayaṃ puññakiriyavatthu, taṃ samādhissa padaṭṭhānaṃ. Sīlena hi jhānenapi rāgādīkilesā na cīyanti. Yepissa tappaccayā uppajjeyyūṃ āsavā vighātāpariḷāhā, tepissa na honti. Kusalo ca jahāti pāpakanti pahānapariññā, taṃ bhāvanāmayam puññakiriyavatthu. Rāgadosamohakkhayā sa nibbutoti rāgassapi khayā dosassapi khayā mohassapi khayā. Tattha rāgoti yo rāgo sārāgo cetaso sārājanā lobho lubbhanā lubbhitattam abhijjhā lobho akusalamūlam. Dosoti yo doso dussanā dussitattam byāpādo cetaso byāpājanā doso akusalamūlam. Mohoti yaṃ aññānaṃ adassanaṃ anabhisamayo asamboḍho appaṭivedho dummejjham bālyam asampajāññaṃ moho akusalamūlam. Iti imesaṃ rāgādīnaṃ khayō nirodho paṭinissaggo nibbuti nibbāyanā parinibbānaṃ saupādisesā nibbānadhātu anupādisesā nibbānadhātūti. Ayaṃ samāropano hārasampāto.

Missakahārasampātavaṇṇanā niṭṭhitā.

Nayasamuṭṭhānavāraṇṇanā

79. Evaṃ nānāsuttavasena ekasuttavasena ca hāravīcāraṃ dassetvā idāni nayavīcāraṃ dassetuṃ “**tattha katamaṃ nayasamuṭṭhāna**”ntiādi āradḍham. Kasmā panettha yathā “tattha katamo desanāhāro, assādādīnavatāti gāthā. Ayaṃ desanāhāro kiṃ desayati” tiādinā hāraniddeso āradḍho, evaṃ “tattha katamo nandiyāvaṭṭo, taṇhañca avijjampi cāti gāthā, ayaṃ nandiyāvaṭṭo kiṃ nayati” tiādinā anārabhitvā samuṭṭhānamukhena āradḍhanti? Vuccate – hāranayānaṃ visayabhedato. Yathā hi hārā byañjanamukhena suttassa atthasaṃvaṇṇanā, na evaṃ nayā. Nayā pana nānāsuttato niddhāritehi taṇhāvijjādīhi mūlapadehi catusaccayojanāya nayato anubujjhiyamāno dukkhādiattho. So hi maggaññaṃ nayati sampāpetīti **nayo**. Paṭivijjhantānaṃ pana ugghaṭitaññuādīnaṃ tiṇṇaṃ veneyyānaṃ vasena mūlapadavibhāgato tidhā vibhattā. Ekameko cettha yato neti, yañca neti, tesam saṃkilesavodānaṃ vibhāgato dvisaṅgaho catuchaatṭhadiso cāti bhinno hāranayānaṃ visayo. Tathā hi vuttaṃ – “hārā byañjanavīcayo, suttassa nayā tayo ca suttattho”ti (netti. saṅgahavāra). Evaṃ visiṭṭhavisayatā

hāranayānaṃ hārehi aññathā naye niddisanto “tattha katamaṃ nayasamuṭṭhāna”ntiādimāha.

Tatthāyaṃ vacanatto – samuṭṭhahanti etenāti **samuṭṭhānaṃ**. Ke samuṭṭhahanti? Nayā. Nayānaṃ samuṭṭhānaṃ **nayasamuṭṭhānaṃ**. Kiṃ pana taṃ? Taṃtaṃmūlapadehi catusaccayojanā. Sā hi nandiyāvaṭṭādīnaṃ nayānaṃ uppattiṭṭhānatāya samuṭṭhānaṃ bhūmīti ca vuccati. Tathā ca vakkhati – “ayaṃ vuccati nandiyāvaṭṭassa nayassa bhūmī”ti (netti. 81). **Pubbā koṭi na paññāyati avijjāya ca bhavataṇhāya cātiādi** nandiyāvaṭṭassa nayassa bhūmidassanaṃ. Tattha **pubbā koṭi na paññāyati** asukassa nāma buddhassa bhagavato, asukassa vā cakkavattino kāle avijjā bhavataṇhā ca uppanā. Tato pubbe nāhosīti evaṃ avijjābhavataṇhānaṃ na kāci purimā mariyādā upalabbhati. Kasmā? Anamataggattā saṃsārassa. Vuttañhetam – “anamataggoyam, bhikkhave, saṃsāro, pubbā koṭi na paññāyati”ti (saṃ. ni. 2.124; kathā. 75) vitthāro. **Tatthāti** avijjābhavataṇhāsu. Yadi pi avijjāya saṃyojanabhāvo, taṇhāya ca nīvaraṇabhāvo **pāliyaṃ** vutto, tathāpi avijjāya paṭicchādītādīnavehi bhavehi taṇhā saṃyojetīti imassa atthassa dassanattam **“avijjānīvaraṇam taṇhāsaṃyojana”**nti vuttam.

Avijjāsamyuttāti avijjāya missitā, avijjāya vā abhinivesavattūsu baddhā. **Avijjāpakkhena vicarantīti** avijjāpakkhena avijjāsahāyena dvādasavidhena vipallāsenā abhinivesavattūbhūte ārammaṇe pavattanti. **Te vuccanti diṭṭhacaritāti** te avijjābhūtibhūtā rūpādīni niccādito abhinivisantā diṭṭhacaritāti vuccanti, diṭṭhacaritā nāmāti attho. **Taṇhāpakkhenāti** aṭṭhasatataṇhāvicaritena. Diṭṭhivicarite taṇhāvicarite ca paṭipattiyā vibhajitvā dassetuṃ “diṭṭhacaritā”tiādi vuttam. Tattha **attakilamathānuyoganti** attano kāyassa kilissanapayogaṃ attaparitāpanapaṭipattim. **Kāmasukhallikānuyoganti** kāmasukhassa allīyanapayogaṃ kāmesu pātabyatam.

Yadi pi bāhirakā “dukkham taṇhā”ti ca jānanti “idaṃ dukkham, ettakaṃ dukkha”nti, “ayaṃ taṇhā, ayaṃ tassā virāgo”ti pariññeyyapahātābbabhāvena pana na jānanti, iti pavattipavattihetumattampi na jānanti. Kā pana kathā nivattinivattihetūsūti āha – “**ito bahiddhā natthi saccavattāna**”ntiādi. Tattha **saccappakāsanāti** saccadesanā. **Samathavipassanākosallanti** samathavipassanāsu bhāvanākosallaṃ, tāsū uggahaparipucchāsavanamanasikāraṃkosallaṃ vā. Vipassanādiṭṭhānañcetta samatham adhippetam. **Upasamasukhappattīti** kilesānaṃ vūpasamasukhādhiḡamo. **Viparītacetāti** micchābhini viṭṭhacetā. **Natthi sukhena sukhanti** yaṃ anavajjapaccayaparibhogasukhena kāyama cittaṃca paṭippassaddhadaratham katvā ariyehi pattabbaṃ upasamasukham, taṃ paṭikkhipati. **Dukkhenāti** kāyakhedanadukkhena.

So lokaṃ vaḍḍhayatīti so kāme paṭisevento attabhāvasaṅkhātama lokaṃ vaḍḍheti pīneti. Puttanattuparamparāya vā saṃsārassa anupacchedanato sattalokaṃ vaḍḍheti. **Bahuṃ puññaṃ pasavatīti** attano pañcahi kāmaguṇehi santappanena puttamukhadassanena ca bahuṃ puññaṃ uppādeti. Abhinivesassa nātidalhatāya **evamaññāni**. Dalhatāya **evandiṭṭhi dukkhena sukham patthayamānā** **attakilamathānuyogamanuyuttā** kāmesu puññañāni kāmasukhallikānuyogamanuyuttā ca **viharantīti** yojetabbaṃ.

Tadabhiññā santāti tathāsaññino samānā. **Rogameva vaḍḍhayantīti** attabhāvarogameva kilesarogameva vā aparāparaṃ vaḍḍhenti. **Gaṇḍasallesupi** eseva nayo. **Rogaḡbhittunnāti** yathāvuttarogabyādhitā. **Gaṇḍapaṭipīlitāti** yathāvuttargaṇḍabādhitā. **Sallānuviddhāti** yathāvuttasallena anupaviṭṭhā. **Ummujjanimujjāntīti** upapajjanacavanāni. **Ugghātanigghātanti** uccāvacaḡbhāvaṃ. **Rogaḡgaṇḍasallabhesajjanti** yathāvuttarogaḡditikicchanam, samathavipassanaṃ sandhāya vadati. Tenevāha – “**samathavipassanā roganigghātakabhesajja**”nti. Tattha **roganigghātakanti** rogavūpasamaṃ. “**Samkilesa dukkha**”ntiādinā saccāni tesam pariññeyyādibhāvena katheti.

Tattha samkilesa dukkhanti attakilamathānuyogakāmasukhallikānuyogasaṃkilesavanto, tehi vā saṃkilissamāno rūpārūpakāyo dukkham ariyasaccaṃ. **Tadabhisāṅgo taṇhāti** tattha abhisāṅgo āsaṅgoti laddhanāmā taṇhā.

80. Idāni diṭṭhacaritatanḥācaritānaṃ sakkāyadiṭṭhidassane pavattibhedam dassetum “**diṭṭhacaritā**”tiādi vuttaṃ. Tattha diṭṭhacaritā rūpaṃ attato upagacchantīti **diṭṭhacaritā** diṭṭhābhinivesassa balavabhāvato rūpaṃ “attā”ti gaṇhanti. Tesāñhi attābhiniveso balavā, na tathā attaniyābhiniveso. Esa nayo **vedanantiādīsupi**. **Taṇhācaritā rūpavantaṃ attānanti** taṇhācaritā taṇhābhinivesassa balavabhāvato rūpaṃ attano kiñcanapalibodhabhāve ṭhapetvā avasesaṃ vedanādim “attā”ti gaṇhanti. **Attani vā rūpanti** attādhāraṃ vā rūpaṃ. **Rūpasmim vā attānanti** rūpādhāraṃ vā attānaṃ. **Vedanāvanta**tiādīsupi ese va nayo. Etesāñhi attaniyābhiniveso balavā, na tathā attābhiniveso. Tasmā yathā laddhaṃ attaniyanti kappetvā tadaññaṃ “attā”ti gaṇhanti. **Ayaṃ vuccati vīsativatthukā sakkāyadiṭṭhīti** ayaṃ pañcasu upādānakkhandhesu ekekasmim catunnaṃ catunnaṃ gāhānaṃ vasena vīsativatthukā sati vijjamāne khandhapañcakasaṅkhāte kāye, satī vā vijjamānā tattha diṭṭhīti sakkāyadiṭṭhīti.

Lokuttarā sammādiṭṭhīti paṭhamamaggasammādiṭṭhīti. **Anvāyikāti** sammādiṭṭhiyā anugāmino. Yadā sammādiṭṭhīti sakkāyadiṭṭhiyā pajahanavasena pavattā, tadā tassā anuṇaḥbhāvena pavattamānakāti attho. Ke pana teti? Āha “**sammāsaṅkappo**”tiādi. “**Te tayo khandhā**”tiādinā ariyamaggato khandhamukhena samathavipassanā niddhāreti. “**Tattha sakkāyo**”tiādi catusaccaniddhāraṇaṃ. Taṃ sabbaṃ suviññeyyameva.

Puna “**tattha ye rūpaṃ attato upagacchantī**”tiādinā sakkāyadassanamukhena ucchedādiantadvayaṃ, majjhimañca paṭipadaṃ niddhāreti. Tattha **ime vuccanti ucchedavādinoti** ime rūpādiḥ pañcakkhandhe attato upagacchantā rūpādīnaṃ aniccabhāvato ucchijjati attā vinassati na hoti paraṃ maraṇāti evaṃ abhinivisanato “ucchedavādino”ti vuccanti. **Ime vuccanti sassatavādinoti** ime “rūpavantaṃ vā attāna”ntiādinā rūpādivinimutto añño koci attāti upagacchantā “so nicco dhuvo sassato”ti abhinivisanato “sassatavādino”ti vuccanti. “**Ucchedasassatavādā ubho antā, ayaṃ saṃsārapavattī**”tiādi saccaniddhāraṇaṃ, taṃ suviññeyyaṃ.

Ucchedasassataṃ samāsato vīsativatthukā sakkāyadiṭṭhīti attā ucchijjati attā niccoti ca ādippavattanato ucchedasassatadassanaṃ saṅkhepato vīsativatthukā sakkāyadiṭṭhīti eva hoti. Sabbopi hi attavādo sakkāyadiṭṭhiantogadho evāti. **Vitthārato dvāsaṭṭhi diṭṭhigatānīti** ucchedasassatadassanaṃ vitthārena **brahmajāle** (dī. ni. 1.28 ādayo) āgatāni dvāsaṭṭhi diṭṭhigatāni. **Tesanti** evaṃ saṅkhepavitthāravantaṃ ucchedasassatadassanānaṃ. **Paṭipakkhoti** pahāyakapaṭipakkho. **Tecattālīsaṃ bodhipakkhiyā dhammāti** aniccasaññā dukkhasaññā anattasaññā pahānasaññā virāgasaññā nirohasaññā cattāro satipaṭṭhānā...pe... ariyo aṭṭhaṅgiko maggoti ete tecattālīsaṃ bodhipakkhiyā dhammā.

Evaṃ vipassanāvasena paṭipakkaṃ dassetvā puna samathavasena dassetum “**aṭṭha vimokkhā dasa ca kaṣiṇāyatanānī**”ti vuttaṃ. **Dvāsaṭṭhi diṭṭhigatāni mohajālanti** dvāsaṭṭhi diṭṭhigatāni mohajālahetukattā mohajālañca. **Anādiānidhanappavattanti** purimāya koṭiyā abhāvato anādi. Asati paṭipakkhādhigame santānavasena anupacchedena pavattanato anidhanappavattaṃ. Yasmā pana mohajālahetukāni diṭṭhigatāni mohajāle padālite padālitāni honti, tasmā vuttaṃ – “**tecattālīsaṃ bodhipakkhiyā dhammā ñāṇavajiraṃ mohajālappadālana**”nti.

Tattha **ñāṇavajiranti** vajirūpamaññaṃ. Aṭṭha samāpattiyo samāpajjitvā tejetvā tikkhasabhāvaṃ āpāditaṃ vipassanāññaṃ maggaññañca ñāṇavajiraṃ. Idameva hi ñāṇaṃ bhagavato pavattaṃ “mahāvajirañña”nti vuccati. Taṃ pana sasambhāraṃ katvā dassento “tecattālīsaṃ bodhipakkhiyā dhammā”ti āha. **Mohajālappadālanti** pubbabhāge vikkhambhanavasena maggakkhaṇe samucchedavasena avijjābhavatanḥānaṃ padālanānaṃ. Atītādiḥ bhedabhinnesu rūpādīsu sakaattabhāvādīsu ca saṃsibbanavasena pavattanato jālaṃ bhavatanḥā. Tassā hi taṇhā jālinī sibbinī jālanti ca adhivacananti. Evaṃ attakilamathānuyogakāmasukhallikānuyogadiṭṭhitanḥābhinivesasassatucchedānaṃ niddhāraṇavasena mohajālapariyāyavisesato avijjātanḥā vibhajitvā yathānusandhinā saṃkilesapakkhaṃ nigamento “**tena vuccati pubbā koṭi na paññāyati avijjāya ca bhavatanḥāya cā**”ti āha.

81. “Tattha diṭṭhīcarito”tiādinā vodānapakkhaṃ dasseti. Tattha **sallekhānusantatavuttī**ti anupaddutasallekhavutti. Kasmā? Yasmā **sallekhe tibbagāra**vo. Diṭṭhīcarito hi tapojigucchādinā anupāyēnapi yebhuyyena kilesānaṃ sallekhanādhīppāyena carati, tasmā so sāsane pabbajito dhutadhamavasena sallekhapaṭipadaṃ pūreti. **Sikkhānusantatavuttī**ti acchiddacatupārisuddhisīlavutti. Diṭṭhīyā savisaye paññāsadisī pavattīti so visujjhamāno paññādhiko hotīti āha – **“diṭṭhīcarito sammattaniyāmaṃ okkamanto dhammānusārī bhavati”**ti. Taṇhāvasena micchāvimokkha hotīti taṇhācarito visujjhamāno saddhādhikova hoti, tasmā vuttaṃ – **“taṇhācarito sammattaniyāmaṃ okkamanto saddhānusārī bhavati”**ti. **Diṭṭhīcarito sukhāya paṭipadāyāti**tiādi paṭipadānidde so heṭṭhā **desanāhāravibhaṅge** (netti. 5 ādayo) āgato eva, atthopi tattha sabbappakārato vutto eva.

Apubbapadesu pana **viveciyamānoti** vimociyamāno. **Paṭinissaratīti** niyyāti vimuccatīti attho. **Dandhañca dhammaṃ ājānātīti** taṇhācaritassa mandapaññassa vasena vuttaṃ. Tikkhapañño pana khippaṃ dhammaṃ ājānātīti. **“Sattāpi duvidhā”**tiādinā indriyavibhāgena puna paṭipadāvibhāgaṃ dasseti, taṃ suviññeyyaṃ.

“Ye hi keci”tiādinā tāsamaṃ paṭipadānaṃ niyyāne tīsupi kālesu ekantikabhāvaṃ dasseti. Tattha **imāhi eva catūhi paṭipadāhīti** imāhi eva catūhi paṭipadāhi, tabbinimuttāya aññāya paṭipadāya abhāvato. **Catukkamagganti** paṭipadācatukkaṃ, paṭipadā hi maggoti. Atha vā **catukkamagganti** nandiyāvaṭṭassa catuddisāsaṅkhātamaṃ maggaṃ. Tā pana catasso disā disālocananaye āgamissanti. Kimatthaṃ pana catukkamaggaṃ paññāpentīti āha **“abudhajanasevitāyā”**tiādi. Tattha **abudhajanasevitāyāti** apaṇḍitajanasevitāya. **Bālakantāyāti** bālajanakāmitāya. **Rattavāsiniyāti** rattesu rāgābhībhūtesu vasatīti rattavāsini, tassā. **Nandiyāti** tatra tatrābhīnandanatṭhena nandīsāsaṅkhātāya. **Avatṭanattanti** samucchindanattamaṃ. **Ayamaṃ vuccati nandiyāvaṭṭassa nayassa bhūmīti** ayamaṃ taṇhāvijjānaṃ vasena saṃkilesapakkhe dve disā samathavipassanānaṃ vasena vodānapakkhepi dve disā catusaccayojanā nandiyāvaṭṭassa nayassa samuṭṭhānatāya bhūmīti.

82. Evaṃ nandiyāvaṭṭassa nayassa bhūmiṃ niddisitvā idāni tassa disābhūdadhamme niddisāntena yasmā cassa disābhūdadhammesu vuttessu disālocananayo vuttoyeva hoti, tasmā **“veyyākaraṇesu hi ye kusalākusalā”**ti disālocanalakkhaṇaṃ ekadesena paccāmasitvā **“te duvidhā upaparikkhitabbā”**tiādi āradhamaṃ. Tattha **teti** disābhūdadhammā. **Duvidhāti** “ime saṃkilesadhammā, ime vodānadhammā”ti evaṃ duvidhena. **Upaparikkhitabbāti** upapattito parito ikkhitabbā, dhammayuttito taṃtaṃdisābhāvena pekkhitabbā ālocitabbāti attho.

Yamaṃ pakāraṃ sandhāya **“duvidhā upaparikkhitabbā”**ti vuttaṃ, taṃ dasseti **“lokavaṭṭānusārī ca lokavivaṭṭānusārī cā”**ti. Tassattho – loko eva vaṭṭamaṃ lokavaṭṭamaṃ. Lokavaṭṭabhāvena anusarati pavattatīti lokavaṭṭānusārī, saṃkilesadhammoti attho. Lokassa, lokato vā vivaṭṭamaṃ lokavivaṭṭamaṃ, nibbānaṃ. Taṃ anusarati anulomanavasena gacchatīti lokavivaṭṭānusārī, vodānadhammoti attho. Tenevāha – **“vaṭṭamaṃ nāma saṃsāro, vivaṭṭamaṃ nibbāna”**nti.

Tamaṃ kathaṃ daṭṭhabbanti taṃ kathaṃ kena pakārena daṭṭhabbanti ce? **Upacayena**. Yathā kataṃ kammaṃ phaladānasamatthaṃ hoti, tathā kataṃ upacitanti vuccati. Evaṃ upacitabhāve kammaṃ nāma hoti, vipākavaṭṭassa kāraṇaṃ hotīti attho. Sabbepi kilesā catūhi vipallāsehi niddisitabbā, dasannampi kilesānaṃ vipallāsahetubhāvato. **Te kattha daṭṭhabbāti** te pana vipallāsā kattha passitabbāti āha – **“dasa vatthuke kilesapuñje”**ti. Dasavidhakāraṇe kilesasamūhēti attho. Tattha kilesāpi kilesavatthu, kilesānaṃ paccayadhammāpi kilesavatthu. Tesu kāraṇabhāvena purimasiddhā kilesā parato paresamaṃ kilesānaṃ paccayabhāvato kilesāpi kilesavatthu. Ayonisomanasikāro, ayonisomanasikāraparikkhatā ca dhammā kilesuppattihetubhāvato kilesappaccayāpi kilesavatthūti daṭṭhabbamaṃ.

Cattāro āhārāti ettha āhārasīsenā tabbisayā kilesāpi adhippetā. **Catasso viññāpaṭṭhitīyoti** etthāpi eseva nayo. **“Paṭhame āhāre”**tiādinā dasavatthuke kilesapuñje purimaṃ purimaṃ pacchimassa pacchimassa kāraṇanti dasseti. Tattha **paṭhame āhāreti** visayabhūte paṭhame āhāre paṭhamaṃ vipallāso

pavattatīti attho. Sesāhāresupi eseva nayo. **Paṭhame vipallāseti** paṭhame vipallāse appahīne sati **paṭhamam upādānam** pavattatīti attho. Sesapadesupi eseva nayo. Yaṃ panettha vattabbaṃ, taṃ niddeseveva kathayissāma.

83. Idāni dasavatthukaṃ kilesapuñjaṃ taṇhāvijjāvasena dve koṭṭhāse karonto “**yo ca kabaḷikāro āhāro**”tiādimāha. Tatha kabaḷikārāhāraṃ phassāhārañca aparijānantassa taṇhācaritassa yathākkamaṃ kāyavedanāsu tibbo chandarāgo hoti, iti upakkilesassa chandarāgassa hetubhāvato yo ca kabaḷikāro āhāro, yo ca phasso āhāro, **ime taṇhācaritassa puggalassa upakkilesāti** vuttā. Tathā manosañcetanāhāraṃ viññānāhārañca aparijānanto diṭṭhicarito tesu attasaññī niccasaññī ca hotīti vuttanayeneva te diṭṭhicaritassa puggalassa upakkilesāti vuttā. Tathā purimakā dve vipallāsā purimakāni eva ca dve dveupādānayogaganthāsavaoghasallaviññānāṭṭhitiagatigamanāni taṇhāpadhānattā taṇhāsabhāvattā taṇhāvisayattā ca taṇhācaritassa upakkilesāti vuttā. Pacchimakāni pana tāni diṭṭhipadhānattā diṭṭhisabhāvattā diṭṭhivisayattā ca diṭṭhicaritassa upakkilesāti vuttāti daṭṭhabbā.

84. Kabaḷikāre āhāre “asubhe subha”nti vipallāsoti catūsu āhāresu kabaḷikāre āhāre catūsu ca vipallāsesu “asubhe subha”nti vipallāso daṭṭhabbo kabaḷikārāhārassa asubhasabhāvattā asubhasamuṭṭhānattā ca. Tathā phassāhārassa dukkhasabhāvattā dukkhapaccayattā ca visesato tatha “dukkhe sukha”nti vipallāso. Tathā yebhuyyena sattā viññāṇe niccasaññīno, saṅkhāresu ca attasaññīno, cetanāpadhānā ca saṅkhārāti vuttaṃ – “**viññāṇe āhāre...pe... attāti vipallāso**”ti. **Paṭhame vipallāse ṭhito kāme upādiyati** “asubhe subha”nti vipariyesaggāhī kilesakāmena vatthukāme daḷhaṃ gaṇhāti. **Idaṃ vuccati kāmupādānanti** yaṃ tathā kāmānaṃ gahaṇaṃ, idaṃ vuccati kāmupādānaṃ. “Dukkhe sukha”nti vipariyesaggāhī “sīlabbatehi anāgate bhavavisuddhīti taṃ nibbutisukha”nti daḷhaṃ gaṇhāti. “Anicce nicca”nti vipariyesaggāhī “sabbe bhavā niccā dhuvā sassatā avipariṇāmadhammā”ti saṃsārābhinandinim bhavadiṭṭhim daḷhaṃ gaṇhāti. “Anattani attā”ti vipariyesaggāhī “asati attani kassidaṃ kammaphalaṃ, tasmā so karoti, so paṭisaṃvedetī”ti attadiṭṭhim daḷhaṃ gaṇhātīti imamattamaṃ dasseti “**dutiye vipallāse ṭhito**”tiādinā.

Ayaṃ vuccati kāmāyogoti yena kāmāgasaṅkhātena kāmupādānena vatthukāmehi saha satto saṃyojīyati, ayaṃ kāmāro “kāmāyogo”ti vuccati. **Ayaṃ vuccati bhavāyogoti** yato sīlabbatupādānasāṅkhātena bhavupādānena bhavena saha satto saṃyojīyati, ayaṃ bhavarāgo “bhavāyogo”ti vuccati. **Ayaṃ vuccati diṭṭhiyogoti** yāya ahetukadiṭṭhiādisāṅkhātāya pāpikāya diṭṭhiyā, sakkāyadiṭṭhiādivasiṭṭhadiṭṭhiyā ca satto dukkhena saha saṃyojīyati, ayaṃ pāpikā diṭṭhi “diṭṭhiyogo”ti vuccati. **Ayaṃ vuccati avijjāyogoti** yāya attavādupādānena sakalavaṭṭadukkhena ca saha satto saṃyojīyati, ayaṃ avijjā “avijjāyogo”ti vuccati.

Yasmā pana kāmāyogādayo abhijjhākāyaganthādīnaṃ paccayā honti, tasmā “**paṭhame yoge ṭhito abhijjhāya kāyaṃ ganthati**”tiādi vuttaṃ. Tatha **abhijjhāya kāyaṃ ganthati**ti parābhijjhāyanalakkhaṇāya abhijjhāya nāmākāyaṃ ganthati ghaṭṭetīti attho. Tathā bhavapatthanāya appahīnattā bhavadiṭṭhibhavarāgavasena āghātavattāsu sattā cittāni padūsentīti āha – “**dutiye yoge ṭhito byāpādena kāyaṃ ganthati**”ti. Tathā diṭṭhivasena avijjāvasena ca sīlabbatehi sujjhati, idameva saccam moghamaññanti ca abhinivisatīti āha – “**tatiye...pe... idamsaccābhinivesena kāyaṃ ganthati**”ti.

Tassāti tassa abhijjhādīhi samannāgatassa puggalassa. **Evam ganthitāti** evam abhijjhāyanādivasena nāmākāyaṃ ganthitvā ṭhitā. **Āsavantīti** āsavabhāvena pavattanti. **Kuto ca vuccati āsavantīti** kuto pana hetuto te kilesā āsavantīti āsavahetuṃ pucchati. Yasmā pana kilesā kusalappavattim nivāretvā cittaṃ pariādāya tiṭṭhantā, maggena asamucchinnā eva vā āsavānaṃ uppattihetu honti, tasmā “**anusayato vā pariyaṭṭhānato vā**”ti vuttaṃ. **Abhijjhākāyaganthena kāmāsavoti** abhijjhākāyaganthena siddhena kāmāgāsabhāvattā kāmāsavo siddho hoti. Katthacideva visaye domanassito tappatipakkhe visaye tabbisayabahule ca bhava patthetīti āha – “**byāpādakāyaganthena bhavāsavo**”ti. **Parāmāsakāyaganthena diṭṭhāsavoti** sīlabbataparāmāsakāyaganthena siddhena taṃsabhāvattā aparāparaṃ vā diṭṭhiyo ganthentassa diṭṭhāsavo siddho hoti. **Idamsaccābhinivesakāyaganthena**

avijjāsavoti “idameva saccam moghamañña”nti abhinivisantassa ayonisomanasikārato anekehi akusalehi dhammehi saddhim avijjāsavo uppajjati, sabbesaṃ vā akusaladhammaṃ avijjāpubbaṅgamattā idaṃsaccābhinivesakāyaganthena siddhena tassa hetubhūto avijjāsavo siddho hoti.

Yasmā pana āsavā eva paribuddhā vaṭṭasmiṃ ohananti osādentīti “oghā”ti vuccanti, tasmā vuttam – “**tassa ime cattāro āsavā**”tiādi.

Anusayasahagatāti anusayabhāvaṃ appaṭikkhipitvā gatā pavattā, anusayabhūtā vā. **Ajjhāsayanti** cittaṃ. **Anupaviṭṭhāti** ogālhā. **Hadayaṃ āhacca tiṭṭhanti**ti cittaṃ abbhantarasaṅkhātāṃ hadayaṃ āhantvā tiṭṭhanti. Tathā hi vuttam **aṭṭhasāliniyam** (dha. sa. aṭṭha. 5) “abbhantarattṭhena hadaya”nti. **Tena vuccanti sallāti** yasmā ajjhāsayaṃ anupaviṭṭhā hadayaṃ āhacca tiṭṭhanti, tena vuccanti “sallā”ti. Pīḷājananaṃ duruddharaṇatā ca sallatṭho. “Eso me attā”ti gahaṇamukhena “eso hamasmī”ti gahaṇam hotīti diṭṭhiṃ nissāyapi mānaṃ jappentīti āha “**diṭṭhohena mānasallo**”ti.

Pariyādinnanti aññassa okāsaṃ adatvā samantato gahitaṃ. **Catūsu dhammesu saṅghahatīti** ārammaṇapaccayatāya ārammaṇabhūtesu catūsu dhammesu paṭiṭṭhahati. Tāni sarūpato dasseti “**rūpe vedanāya saññāya saṅkhāresū**”ti. **Nandūpasecanenāti** lobhasahagatassa sampayuttā nandī sahajātakoṭiyā, itarassa upanissayakoṭiyā upasecananti nandūpasecanaṃ, tena nandūpasecanena. Kena pana taṃ nandūpasecananti āha – “**rāgasallena nandūpasecanena viññāṇenā**”ti.

Tattha **rāgasallenāti** rāgasallena hetubhūtena nandūpasecanena viññāṇenāti itthambhūtalakkhaṇa karaṇavacanaṃ. **Rūpūpagā viññāṇaṭṭhiti**ti rūpameva ārammaṇakaraṇavasena upagantabbato, viññāṇassa paṭiṭṭhābhāvato ca rūpūpagā viññāṇaṭṭhiti. Tiṭṭhati etthāti ṭhiti. Pañcavokārabhavasmiñhi abhisāṅkhāraviññāṇaṃ rūpakkhandhaṃ nissāya tiṭṭhati. **Dosasallenāti** sahajātena dosasallena. Yadā vedanūpagā viññāṇaṭṭhiti vuccati, tadā upanissayakoṭiyāva nandiyā upasittam viññāṇaṃ daṭṭhabbaṃ. Vedanāpi domanassavedanāva. Yadā ca upanissayapaccayabhūtena dosasallena vedanūpagā viññāṇaṭṭhiti vuccati, tadā sahajātakoṭiyā, upanissayakoṭiyā vā nandiyā upasittam viññāṇaṃ daṭṭhabbaṃ. Vedanā pana tissopi tissannaṃ vedanānaṃ ārammaṇūpanissayabhāvato. Tattha paṭhamanayo domanassārammaṇassa abhisāṅkhāraviññāṇassa vasena vutto. Dutiyō sabbavedanārammaṇassa vasenāpi daṭṭhabbaṃ.

Mānasallenāti mānasallena sahajātena, upanissayabhūtena vā. **Mohasallenāti** etthāpi ese va nayo. Ettha ca anādimitasamsāre itthipurisā rūpābhīramāti rāgasallavasena paṭhamā viññāṇaṭṭhiti yojitā. Sabbāyapi vedanāya dukkhaṇariyāyasabbhāvato dukkhāya ca doso anusetīti dosasallavasena dutiyā, saññāvasena “seyyohamasmī”ti maññanā hotīti mānasallavasena tatiyā, saṅkhāresu samūhaghaṇaṃ dubbiniḃbhoganti mohasallavasena catutthī viññāṇaṭṭhiti yojitāti daṭṭhabbā.

Upatthaddhanti olubbhārammaṇabhūtāhi viññāṇaṭṭhitihi upatthambhitaṃ. **Taṅca kammanti** yaṃ “cetanā cetāsika”nti pubbe (netti. 82) vuttam. **Ime ca kilesāti** ime ca dasavatthukā kilesā. Sesam suviññeyyameva.

85. Idāni āhārādayo nayānaṃ saṃkilesapakkhe disābhāvena vavatthapetuṃ “**imā catasso disā**”tiādi āraddhaṃ, taṃ uttānameva. Puna **kabalīkāro āhāroti**tiādi āhārādīsuyeva yassa puggalassa upakkilesā, taṃ vibhajitvā dassetuṃ āraddhaṃ. Tattha **dasannaṃ suttānanti** ekadesesu samudāyavohārena vuttam. Samudāyesu hi pavattā samaññā avayavesupī dissati, “yathā paṭo daḍḍho, samuddo diṭṭho”ti ca. **Eko atthoti** ekassa atthassa nipphādanato vuttam. **Byañjanaṃ nānanti** ettha byañjanaggahaṇena byañjanatthopi gahitoti daṭṭhabbaṃ. Dasahipi suttapadehi savatthukā taṅhā vuttā. Taṅhā ca rāgaritāṃ puggalaṃ khippaṃ dūsetīti āha – “**ime rāgaritassa puggalassa upakkilesā**”ti. Yathā ca paṭhamadisābhāvena vuttadhammā rāgaritassa upakkilesā, evaṃ dutiyadisābhāvena vuttadhammā dosacaritassa. Tatiyacatutthadisābhāvena vuttadhammā yathākkamaṃ diṭṭhicaritassa mandassa tikkhassa ca upakkilesā vuttā. Tesam upakkilesabhāvo vuttanayānusārena veditabbo.

Āhāravipallāsādayo yadipi sabbehi tīhi vimokkhamukhehi pubbabhāge yathārahaṃ pariññeyyā pahātabbā ca. Yassa pana dukkhānupassanā purime āhāradvaye dukkhākārena bahulaṃ pavattati, tassa vasena yo ca kabaḷikāro āhāro, yo ca phasso āhāro, ime appaṇihitena vimokkhamukhena pariññāṃ gacchantīti vuttaṃ. Esa nayo sesesu. Evañcetam, na aññathā. Na hi ariyamaggānaṃ viya pahātabbesu vimokkhamukhānaṃ pariññeyyapahātabbesu koci niyamo sambhavati. **Iti sabbe lokavaṭṭānusārino dhammā niyyanti, te lokā tīhi vimokkhamukhehīti** nigamaṃ. Tassattho – iti evaṃ vuttappakārā sabbe āhārādayo lokasaṅkhātavaṭṭānusārino dhammā te lokabhūtā vaṭṭato niyyanti aniccānupassanādīhi tīhi vimokkhamukhehīti.

86. Evaṃ saṃkilesapakkhe disābhūtadhamme niddisitvā idāni vodānapakkhe disābhūtadhamme dassetuṃ “**catasso paṭipadā**”tiādi vuttaṃ. Tattha dibbabrahmaariyaāneñjavihāroti **cattāro vihārā**. Mānappahānaālayasamugghātaavijjāpahānabhavūpasamā **cattāro acchariyā abbhutā dhammā**. Saccādhīṭṭhānādīni **cattāri adhiṭṭhānāni**. Chandasamādhibhāvanādayo **catasso samādhībhāvanā**. Indriyasamvaro tapasaṅkhāto puññadhammo bojjaṅgabhāvanā sabbūpadhipaṭinissaggasaṅkhātāṃ nibbānañcāti **cattāro sukhabhāgiyā dhammā** veditabbāti.

Paṭhamā paṭipadātiādi paṭipadāsatiṭṭhānādīnaṃ abhedasandassanaṃ. Yadi evaṃ kasmā viṣuṃ gahaṇaṃ katanti? Dasavatthukassa kilesapuñjassa paṭipakkhabhāvadassanatthaṃ paṭipadādisakaniddeso. Tathā hi vakkhati – “cattāro āhārā tesam paṭipakkho catasso paṭipadā”tiādi (netti. 87). Kiñcāpi catūsu satipaṭṭhānesu “idaṃ nāma satipaṭṭhānaṃ imāya eva paṭipadāya ijjaṭi”ti niyamo natthi, tathāpi paṭhamāya paṭipadāya paṭhamam satipaṭṭhānaṃ sambhavatīti sambhavavasena evaṃ vuttaṃ – “**paṭhamā paṭipadā, paṭhamam satipaṭṭhāna**”nti. Yasmā pana āhāravipallāsādīnaṃ viya paṭipadāsatiṭṭhānādīnaṃ atthato nānattaṃ natthi. Satipaṭṭhānāniyeva hi tathā tathā paṭipajjamānāni dukkhāpaṭipadādandhabhiññādīnāmakāni honti, tasmā yathā saṃkilesapakkhe “paṭhame āhāre paṭhamo vipallāso”tiādīnā adhikaraṇabheda vuttaṃ, evaṃ adhikaraṇabhedaṃ akatvā “paṭhamā paṭipadā, paṭhamam satipaṭṭhāna”ntiādi vuttaṃ. Sesesupi ese va nayo.

Andhassa pabbatārohanaṃ viya kadācīdeva uppajjanakaṃ **acchariyaṃ**, accharāyoggaṃ acchariyanti porāṇā. Abhūtapubbaṃ bhūtanti **abbhutaṃ**. Ubhayampetaṃ vimhayāvahassa addivacanaṃ. Na hi mānappahānādito aññaṃ durabhisambhavataṃ vimhanīyañca upalabbhatīti adhiṭṭṭhāti etena, ettha vā adhiṭṭhānamattameva vā tanti **adhiṭṭhānaṃ**. Saccāñca taṃ adhiṭṭhānañca, saccassa vā adhiṭṭhānaṃ, saccam adhiṭṭhānaṃ etassāti vā **saccādhīṭṭhānaṃ**. Sesesupi ese va nayo. Samādhi eva bhāvetabbatāya **samādhībhāvanā**. Sukhaṃ bhajatiṭi **sukhabhāgiyo**, sukhabhāgassa vā sukhaḥkoṭṭhāsassa hitoti sukhabhāgiyo. Ekassapi sattassa asubhabhāvanādayo viya ekadese avattitvā anavaśesapariyādānato natthi etissā pamāṇanti **appamaññā**.

Paṭhamā paṭipadā bhāvitā bahulikatā paṭhamam satipaṭṭhānaṃ paripūretīti paṭhamāya paṭipadāya bhāvanābahulīkāro paṭhamassa satipaṭṭhānassa bhāvanāparipūrīti attho. Sesapadesupi ese va nayo. Yathā hi ariyamagge bhāvite satipaṭṭhānādayo bodhipakkhiyadhammā sabbe pi bhāvitā eva honti, evaṃsampaḍamidaṃ daṭṭhabbaṃ.

Kāyānupassanāya kāmarāgassa ujuvipaccanīkabhāvato “**paṭhamo satipaṭṭhāno bhāvito bahulikato kāmapaṭipakkham paṭhamam jhānaṃ paripūretī**”ti vuttaṃ. Tathā pīṭipāṭisaṃvedanādīvasena pavattamānaṃ dutiyaṃ satipaṭṭhānaṃ, sappītikassa dutiyajjhānassa cittassa abhippamodanavasena pavattamānaṃ tatiyaṃ satipaṭṭhānaṃ ukkaṃsagatasukhassa tatiyajjhānassa aniccavirāgādīvasena pavattiyā saṅkhāresu upekkhakaṃ catutthaṃ satipaṭṭhānaṃ upekkhāsatiṭṭhānāsiddhibhāvato catutthajjhānassa paripūriyā saṃvattati.

Yasmā pana rūpāvacarapaṭhamajjhānaṃ rūpāvacarasamāpattīnaṃ, dutiyajjhānaṃ byāpādavittakādīdūrībhāvena brahmavīhārānaṃ, tatiyajjhānaṃ pīṭivirāgena sukkena vipassanāya adhiṭṭhānabhūtaṃ ariyavīhārānaṃ, catutthajjhānaṃ upekkhāsatiṭṭhānāsiddhiāneñjappattaṃ

āneñjavihārānaṃ viśesato paccayo hoti, tasmā “**paṭhamam jhānam bhāvitam bahulikatam paṭhamam vihāram paripūreti**”tiādi vuttam. Iti yo yassa viśesapaccayo, so taṃ paripūretīti vuttoti daṭṭhabbam.

87. Idāni paṭipadādayo vodānapakkhe disābhāvena vavatthapetum “**tattha imā catasso disā**”tiādi vuttam. Taṃ suviññeyyameva. Puna “**paṭhamā paṭipadā**”tiādi paṭipadācatukkādīsu yena yassa puggalassa vodānaṃ, taṃ vibhajitvā dassetum āraddham. Taṃ heṭṭhā vuttanayameva. Yadi pi tīsu vimokkhamukhesu “idaṃ nāma vimokkhamukhaṃ imāya eva paṭipadāya ijjhātī”ti niyamo natthi. Yesam pana puggalānaṃ purimāhi dvīhi paṭipadāhi appañhitena vimokkhamukhena ariyamaggādhigamo. Tathā yassa tatiyāya paṭipadāya suññatavimokkhamukhena, yassa ca catutthāya paṭipadāya animittavimokkhamukhena ariyamaggādhigamo, tesam puggalānaṃ vasena ayam paṭipadāvimokkhamukhasaṃsandana. Satipaṭṭhānādīhi vimokkhamukhasaṃsandanaṃyapi ese va nayo.

Tesam vikkīḷitanti tesam asantāsanajavaparakkamādiviśesayogena sīhānaṃ buddhānaṃ paccakabuddhānaṃ buddhasāvakaṇaṇca vikkīḷitaṃ viharānaṃ. Yadi daṃ āhārādīkilesavattusamatikkamanamukhena sapaśasantaṇe paṭipadādisampādana. Idāni āhārādīnaṃ paṭipadādīhi yena samatikkamaṇaṃ, taṃ nesaṃ paṭipakkhabhāvaṃ dassento “**cattāro āhārā tesam paṭipakkho catasso paṭipadā**”tiādimāha. Tattha tesam paṭipakkhabhāvo pahātabbabhāvo pahāyakabhāvo ca āhāraviññāṇaṭṭhitīnaṇcettha pahātabbabhāvo tappaṭibandhachandarāgavasena daṭṭhabbo. Tattha “**vikkīḷitaṃ bhāvanā sacchikiriya cā**”tiādi tassāyaṃ saṅkhepattho – **tesam vikkīḷitanti** ettha yadetaṃ vikkīḷitaṃ nāma bhāvetabbānaṃ bodhipakkhiyadhamānaṃ bhāvanā, sacchikātabbānaṃ phalaṇibbānaṃ sacchikiriya ca. Tathā pahātabbassa dasavattukassa kilesapuñjassa tadaṅgādivasena pahānaṃ byantikiriya anavasesananti. Idāni taṃ saṅkhepena dassento “**indriyādhiṭṭhānaṃ vikkīḷitaṃ vipariyāsānadhiṭṭhāna**”nti āha.

Indriyādhiṭṭhānanti indriyānaṃ pavattanaṃ bhāvanā sacchikiriya ca. **Vipariyāsānadhiṭṭhānanti** vipallāsānaṃ apavattanaṃ pahānaṃ anuppādanaṃ. **Indriyāni saddhammagocaroti** indriyāni cettha saddhammassa gocarabhūṭāni pavattihetūti adhippetāni saddhindriyādīnīti attho. **Vipariyāsā kilesagocaroti** vipallāsā saṃkilesapakkhassa pavattiṭṭhānaṃ pavattihetūti. **Ayam vuccati sīhavikkīḷitassa nayassa bhūmīti** yāyaṃ “cattāro āhārā”tiādinā saṃkilesapakkhe dasannaṃ catukkānaṃ, “catasso paṭipadā”tiādinā vodānapakkhepi dasannaṃ catukkānaṃ taṇhācaritādīnaṃ upakkilesavodānavibhāvanāmukhena niddhāraṇā, ayam sīhavikkīḷitassa nayassa bhūmī nāma.

88. Idāni ugghaṭitaññuā dipuggalattayavasena tipukkhalanayassa bhūmiṃ vibhāvetukāmo yasmā pana nayānaṃ aññamaññānuppavesassa icchitattā sīhavikkīḷitanayato tipukkhalanayo niggacchati, tasmā paṭipadāvibhāgato cattāro puggale sīhavikkīḷitanayassa bhūmiṃ niddisītvā tato eva ugghaṭitaññuā dipuggalattaye niddhāretum “**tattha ye dukkhāya paṭipadāyā**”tiādi āraddham. Tattha **ime dve puggalāti** ime purimānaṃ dvinnaṃ paṭipadānaṃ vasena dve puggalā. Esa nayo itaratthāpi. Puna “**tattha ye dukkhāya paṭipadāyā**”tiādi yathāvuttapuggalacatukkato ugghaṭitaññuā dipuggalattayaṃ niddhāretum vuttam. Tattha **yo sādharmaṇyāti** dukkhāpaṭipadāya khippābhīññāya, sukhāpaṭipadāya dandhābhīññāya ca niyyātīti sambandho. Kathaṃ pana paṭipadādvayaṃ ekassa sambhavatīti? Nayidamevaṃ daṭṭhabbam. Ekassa puggalassa ekasmiṃ dve paṭipadā sambhavatīti. Yathāvuttāsu pana dvīsu paṭipadāsu yo yāya kāyaci niyyāti, ayam vipañcitanāññūti ayamettha adhippāyo. Yasmā pana **aṭṭhasāliniyam** (dha. sa. aṭṭha. 350) paṭipadā calati na calatīti vicāraṇayaṃ “calatī”ti vuttam, tasmā ekassapi puggalassa jhānantaramaggantaresu paṭipadābhedo icchitovātī.

“**Tattha bhagavā**”tiādinā desanāvibhāgehipi tameva puggalavibhāgaṃ vibhāveti. Taṃ heṭṭhā vuttanayameva. Tattha **adhicittanti** adhicittasikkhaṇcāti **ca**-saddo luttaniddiṭṭho. Tena adhicittasikkhaṇca adhipaññāsikkhaṇca vipañcitanāññussa paññapetīti attho. **Adhisīlanti** etthāpi ese va nayo. Adhisīlasikkhaṃ adhicittasikkhaṃ adhipaññāsikkhaṇcāti yojetabbam.

Cattāri hutvā tīṇi bhavantīti līngavipallāsena vuttaṃ, cattāro puggalā hutvā tayo puggalā hontīti attho.

Ayaṃ saṃkilesoti ayaṃ akusalamūlādīdvādasattikasaṅgaho saṃkilissati etenāti saṃkilesoti katvā. **Idaṃ vodānanti** etthāpi eseva nayo.

Tīṇi hutvā dve bhavantīti nandiyāvaṭṭanayassa disābhūtaḍḍhammadassanattamaṃ vuttaṃ. Tenevāha – “**taṇhā ca avijjā cā**”tiādi, taṃ sabbaṃ suviññeyyameva.

Kasmā panettha nayānaṃ uddesānukkamena niddeso na katoti? Nayānaṃ nayehi sambhavadassanattamaṃ. Paṭhamanayato hi puggalādhiṭṭhānavasena tatiyanayassa, tatiyanayato ca dutiyanayassa sambhavoti imassa visesassa dassanattamaṃ paṭhamanayānantaraṃ tatiyanayo, tatiyanayānantaraṃca dutiyanayo niddiṭṭho. Dhammādhiṭṭhānavasena pana tatiyanayato dutiyanayo, dutiyanayato paṭhamanayopi sambhavatīti imassa visesassa dassanattamaṃ ante “**taṇhā ca avijjā cā**”tiādinā paṭhamanayassa bhūmi dassitā. Teneva hi “cattāri hutvā tīṇi bhavanti, tīṇi hutvā dve bhavanti”ti vuttaṃ. Yadi evaṃ “dve hutvā cattāri bhavanti, dve hutvā tīṇi bhavanti, tīṇi hutvā cattāri bhavanti”ti ayampi nayo vattabbo siyāti? Saccametamaṃ, ayaṃ pana nayo atthato dassito evāti katvā na vutto. Yasmā tiṇṇaṃ atthanayānaṃ aññaṃaññaṃ anuppaveso icchito, sati ca anuppaveso tato viniggaṃopi sambhavati evāti. Ayaṃca attho **peṭakopadesena** vibhāvetabbo.

Tatthāyaṃ ādito paṭṭhāya vibhāvanā – cattāro puggalā taṇhācarito duvidho mudindriyo tikkhindriyo ca. Tathā diṭṭhacaritoti. Tattha taṇhācarito mudindriyo dukkhāya paṭipadāya dandhābhiññāya niyyāti, tikkhindriyo dukkhāya paṭipadāya khippābhiññāya niyyāti, diṭṭhacarito pana mudindriyo sukhāya paṭipadāya dandhābhiññāya niyyāti, tikkhindriyo sukhāya paṭipadāya khippābhiññāya niyyāti. Iti imāsu paṭipadāsu yathārahaṃ ṭhitehi taṇhācaritadiṭṭhacaritehi cattāro āhārā tappaṭibandhachandarāgappahānena pahātabbā. Cattāro satipaṭṭhāne bhāvetvā cattāro vipallāsā daṭṭhabbāti sabbo yathāvuttanayo anugattabbo.

Tatthāyaṃ pāli – tattha ye diṭṭhacaritā sattā, te kāmesu dosadiṭṭhī, na ca ye kāmesu anusayā samūhatā, te attakilamathānuyogamanuyuttā viharanti. Tesamaṃ satthā vā dhammaṃ deseti aññataro vā garuṭṭhāniyo sabrahmacārī “kāmehi natthi attho”ti, te ca pubbeyeva kāmehi anattikā, iti kāme appakasirena paṇinissajjanti, te cetasikena dukkhena anajjhositā. Tena vuccati “sukhā paṭipadā”ti. Ye pana taṇhācaritā sattā, te kāmesu ajjhositā, tesamaṃ satthā vā dhammaṃ deseti aññataro vā bhikkhu “kāmehi natthi attho”ti, te piyarūpaṃ dukkhena paṇinissajjanti. Tena vuccati “dukkhā paṭipadā”ti. Iti ime sabbe sattā dvīsu paṭipadāsu samosaraṇaṃ gacchanti dukkhāyaṃca sukhāyaṃca.

Tattha ye diṭṭhacaritā sattā, te dvidhā tikkhindriyā ca mudindriyā ca. Tattha ye diṭṭhacaritā sattā tikkhindriyā, te sukhena paṇinissajjanti, khippāṃca abhisamenti. Tena vuccati – “sukhā paṭipadā khippābhiññā”ti. Tattha ye diṭṭhacaritā sattā mudindriyā paṭhamamaṃ tikkhindriyaṃ upādāya dandhataraṃ abhisamenti, te sukhena paṇinissajjanti, dandhaṃca abhisamenti. Tena vuccati – “sukhā paṭipadā dandhābhiññā”ti. Tattha taṇhācaritā sattā duvidhā tikkhindriyā ca mudindriyā ca. Tattha ye taṇhācaritā sattā tikkhindriyā, te dukkhena paṇinissajjanti, khippāṃca abhisamenti. Tena vuccati – “dukkhā paṭipadā khippābhiññā”ti. Tattha ye taṇhācaritā sattā mudindriyā paṭhamamaṃ tikkhindriyaṃ upādāya dandhataraṃ abhisamenti, te dukkhena paṇinissajjanti, dandhaṃca abhisamenti. Tena vuccati – “dukkhā paṭipadā dandhābhiññā”ti. Imā catasso paṭipadāyo apañcamā acaṭṭhā. Ye hi keci nibbutā nibbāyanti nibbāyissanti vā imāhi catūhi paṭipadāhi anaññāhi, ayaṃ paṭipadā catukkamaḍḍhena kilese niddisati. Yā catukkamaḍḍhena ariyadhammesu niddisatā, ayaṃ vuccati sihāvikkīṭito nāma nayo.

Tatrima cattāro āhārā, cattāro vipallāsā upādānā yogā ganthā āsavā oghā sallā viññāṇaṭṭhitiyo agatigamanānīti evaṃ imāni sabbāni dasa padāni. Ayaṃ suttassa saṃsandanā.

Cattāro āhārā, tattha yo ca kabalīkāro āhāro, yo ca phasso āhāro, ime taṇhācaritena pahātabbā. Tattha

yo ca manosañcetanāhāro, yo ca viññāṇāhāro, ime diṭṭhicaritena pahātabbā.

Tattha paṭhamo āhāro paṭhamo vipallāso, dutiyo āhāro dutiyo vipallāso, tatiyo āhāro tatiyo vipallāso, catuttho āhāro catuttho vipallāso, ime cattāro vipallāsā apañcamā achaṭṭhā. Idañca pamāṇā cattāro āhārā.

Tattha paṭhame vipallāse ṭhito kāme upādiyati, idaṃ kāmupādānaṃ. Dutie vipallāse ṭhito anāgataṃ bhavaṃ upādiyati, idaṃ sīlabbatupādānaṃ. Tatie vipallāse ṭhito viparītadiṭṭhiṃ upādiyati, idaṃ diṭṭhupādānaṃ. Catutthe vipallāse ṭhito khandhe attato upādiyati, idaṃ attavādupādānaṃ.

Tattha kāmupādāne ṭhito kāme abhijjhāya ganthati, ayaṃ abhijjhākāyagantho. Sīlabbatupādāne ṭhito byāpādaṃ ganthati, ayaṃ byāpādakāyagantho. Diṭṭhupādāne ṭhito parāmāsaṃ ganthati, ayaṃ parāmāsakāyagantho. Attavādupādāne ṭhito papañcento ganthati, ayaṃ idaṃsaccābhinivesakāyagantho.

Tassa ganthaganthitā kilesā āsavanti. Kiṃ pana vuccati āsavantīti? Vippaṭisārā. Ye vippaṭisārā, te anusayā. Tattha abhijjhākāyaganthena kāmāsavo, byāpādakāyaganthena bhavāsavo, parāmāsakāyaganthena diṭṭhāsavo, idaṃsaccābhinivesakāyaganthena avijjāsavo.

Te cattāro āsavā vepullaṃ gatā oghā honti, tena vuccanti “oghā”ti. Tattha kāmāsavo kāmogho, bhavāsavo bhavogho, avijjāsavo avijjogho, diṭṭhāsavo diṭṭhogho.

Te cattāro oghā āsayamanupaviṭṭhā anusayasahagatā vuccanti sallāti hadayamāhacca tiṭṭhanti. Tattha kāmogho rāgasallaṃ, bhavogho dosasallaṃ, avijjogho mohasallaṃ, diṭṭhogho diṭṭhisallaṃ.

Imehi catūhi sallehi pariyaḍinnaṃ viññāṇaṃ catūsu dhammesu tiṭṭhati rūpe vedanāya saññāya saṅkhāresu. Imā catasso viññāṇaṭṭhitiyo. Tattha rāgasallena nandūpasecanaṃ rūpūpagaṃ viññāṇaṃ tiṭṭhati. Dosasallena vedanūpagaṃ. Mohasallena saññūpagaṃ. Diṭṭhisallena nandūpasecanaṃ saṅkhārūpagaṃ viññāṇaṃ tiṭṭhati.

Catūhi viññāṇaṭṭhitīhi catubbidhaṃ agatiṃ gacchanti chandā dosā bhayā mohā. Rāgena chandā agatiṃ gacchati, dosena dosā agatiṃ gacchati, mohena mohā agatiṃ gacchati, diṭṭhiyā bhayā agatiṃ gacchati, iti imāni ca kammāni ime ca kilesā ayaṃ saṃsārahetu.

Tatthimā catasso disā kabaḷīkāro āhāro “asubhe subha”nti vipallāso kāmupādānaṃ kāmāyogo abhijjhākāyagantho kāmāsavo kāmogho rāgasallaṃ rūpūpagā viññāṇaṭṭhiti chandā agatigamaṃ, ayaṃ paṭhamā disā.

Phasso āhāro “dukkhe sukha”nti vipallāso sīlabbatupādānaṃ bhavāyogo byāpādakāyagantho bhavāsavo bhavogho dosasallaṃ vedanūpagā viññāṇaṭṭhiti dosā agatigamaṃ, ayaṃ dutiyā disā.

Manosañcetanāhāro “anattani attā”nti vipallāso diṭṭhupādānaṃ diṭṭhiyogo parāmāsakāyagantho diṭṭhāsavo diṭṭhogho diṭṭhisallaṃ saññūpagā viññāṇaṭṭhiti bhayā agatigamaṃ, ayaṃ tatiyā disā.

Viññāṇāhāro “anicce nicca”nti vipallāso attavādupādānaṃ avijjāyogo idaṃsaccābhinivesokāyagantho avijjāsavo avijjogho mohasallaṃ saṅkhārūpagā viññāṇaṭṭhiti mohā agatigamaṃ, ayaṃ catutthī disā. Iti imesaṃ dasannaṃ suttānaṃ paṭhamena padena paṭhamāya disāya ālokaṃ, dutiyena padena dutiyāya disāya, tatiyena padena tatiyāya disāya, catutthena padena catutthiyā disāya ālokaṃ, ayaṃ vuccati disā ālokanā. Iminā nayena sabbe kilesā catūsu padesu pakkhipitabbā. Ayaṃ akusalapakkho.

Catasso paṭipadā, cattāri jhānāni, cattāro satipaṭṭhānā, cattāro viharā dibbo brahmā ariyo āneñjo, cattāro sammappadhānā, cattāro acchariyā abbhutā dhammā, cattāro adhiṭṭhānā, cattāro samādhayo

chandasamādhi vīriyasamādhi cittasamādhi vīmaṃsāsamādhi, cattāro dhammā sukhabhāgiyā nāññatra bojjaṅgā nāññatra tapasā nāññatra indriyaśamvarā nāññatra sabbanissaggā, cattāri appamāṇāni.

Tattha dukkhā paṭipadā dandhābhiññā bhāviyamānā bahulīkariyamānā paṭhamam jhānam paripūreti, paṭhamam jhānam paripuṇṇam paṭhamam satipaṭṭhānam paripūreti, paṭhamam satipaṭṭhānam paripuṇṇam paṭhamam vihāram paripūreti, paṭhamo vihāro paripuṇṇo paṭhamam sammappadhānam paripūreti, paṭhamam sammappadhānam paripuṇṇam paṭhamam acchariyam abbhutam dhammam paripūreti, paṭhamo acchariyo abbhuto dhammo paripuṇṇo paṭhamam adhiṭṭhānam paripūreti, paṭhamam adhiṭṭhānam paripuṇṇam chandasamādhiṃ paripūreti, chandasamādhi paripuṇṇo indriyaśamvaram paripūreti, indriyaśamvaro paripuṇṇo paṭhamam appamāṇam paripūreti. Evaṃ yāva sabbanissaggā catuttham appamāṇam paripūreti.

Tattha paṭhamā ca paṭipadā paṭhamañca jhānam paṭhamañca satipaṭṭhānam dibbo ca vihāro paṭhamañca sammappadhānam paṭhamo ca acchariyo abbhuto dhammo saccādhīṭṭhānañca chandasamādhi ca indriyaśamvaro ca mettā ca appamāṇam. Ayaṃ paṭhamā disā.

Dutiya ca paṭipadā khippābhiññā dutiyañca jhānam dutiyañca satipaṭṭhānam brahmā ca vihāro dutiyañca sammappadhānam dutiyo ca acchariyo abbhuto dhammo cāgādhīṭṭhānañca cittasamādhi ca tapo ca karuṇā ca appamāṇam. Ayaṃ dutiyā disā.

Tatiya ca paṭipadā dandhābhiññā tatiyañca jhānam tatiyañca satipaṭṭhānam ariyo ca vihāro tatiyañca sammappadhānam tatiyo ca acchariyo abbhuto dhammo saccādhīṭṭhānañca vīriyasamādhi ca bojjaṅgā ca muditā ca appamāṇam. Ayaṃ tatiyā disā.

Catutthī ca paṭipadā khippābhiññā catutthañca jhānam catutthañca satipaṭṭhānam āneṇjo ca vihāro catutthañca sammappadhānam catuttho ca acchariyo abbhuto dhammo upasamādhiṭṭhānañca vīmaṃsāsamādhi ca sabbanissaggo ca upekkhā ca appamāṇam. Ayaṃ catutthī disā. Imāsam catunnam disānam yā ālokanā, ayaṃ vuccati disālocano nāma nayo.

Tatthāyaṃ yojanā – cattāro ca āhārā, catasso ca paṭipadā, cattāro ca vipallāsā, cattāro ca satipaṭṭhānā, cattāri ca upādānāni, cattāri ca jhānāni, cattāro ca yogā, cattāro ca vihārā, cattāro ca ganthā, cattāro ca sammappadhānā, cattāro ca āsavā, cattāro ca acchariyā abbhutā dhammā, cattāro ca oghā, cattāri ca adhiṭṭhānāni, cattāri ca sallāni, cattāro ca samādhayo, catasso ca viññāṇaṭṭhitiyo, cattāro ca sukhabhāgiyā dhammā, cattāri ca agatigamanāni cattāri ca appamāṇāni. Iti kusalākusalānam pakkhapaṭipakkhavasena yojanā. Ayaṃ sīhavikkīṭṭe disālocano nayo.

Tassa cattāri sāmāññaphalāni pariyoṣānam, tattha paṭhamāya disāya sotāpattiphalaṃ pariyoṣānam, dutiyāya sakadāgāmiṃphalaṃ, tatiyāya anāgāmiṃphalaṃ, catutthiyā arahattaphalaṃ pariyoṣānanti.

Tattha katamo **tipukkkhalanayo**? Paṭipadāvibhāgena catūsu puggalesu yo sukhāya paṭipadāya khippābhiññāya niyyāti, ayaṃ **ugghaṭitaññū**. Yo sukhāya vā paṭipadāya, dandhābhiññāya, dukkhāya vā paṭipadāya khippābhiññāya niyyāti, ayaṃ **vipañcitaññū**. Yo dukkhāya paṭipadāya dandhābhiññāya niyyāti, ayaṃ **neyyo**. Iti cattāro hutvā tayo honti. Tattha ugghaṭitaññussa samathapubbaṅgamā vipassanā sappāyā. Neyyassa vipassanāpubbaṅgamo samatho, vipañcitaññussa samathavipassanā yuganaddhā. Ugghaṭitaññussa mudukā desanā, neyyassa tikkhā desanā, vipañcitaññussa tikkhamudukā desanā.

Ugghaṭitaññussa adhipaññāsikkhā, vipañcitaññussa adhicitasikkhā ca adhipaññāsikkhā ca, neyyassa adhisīlasikkhā ca adhicitasikkhā ca adhipaññāsikkhā ca. Iti imesaṃ puggalānam catūhi paṭipadāhi niyyānam.

Tatthāyaṃ saṃkilesapakkho, tīṇi akusalamūlāni, tayo phassā, tisso vedanā, tayo upavicārā, tayo

kilesā, tayo vitakkā, tayo pariḷāhā, tīṇi saṅkhatalakkhaṇāni, tisso dukkhatā.

Tīṇi akusalamūlānīti lobho akusalamūlaṃ, doso akusalamūlaṃ, moho akusalamūlaṃ. **Tayo phassā**ti sukhavedanīyo phasso, dukkhavedanīyo phasso, adukkhamasukhavedanīyo phasso. **Tisso vedanā**ti sukhā vedanā, dukkhā vedanā, adukkhamasukhā vedanā. **Tayo upavicārā**ti somanassūpavicāro, domanassūpavicāro, upekkhūpavicāro. **Tayo kilesā**ti lobho, doso, moho. **Tayo vitakkā**ti kāmavitakko, byāpādavitakko, vihiṃsāvitakko. **Tayo pariḷāhā**ti rāgajo, dosajo, mohajo. **Tīṇi saṅkhatalakkhaṇānī**ti uppādo, ṭhiti, vayo. **Tisso dukkhatā**ti dukkhadukkhatā, vipariṇāmadukkhatā, saṅkhāradukkhatā.

Tattha lobho akusalamūlaṃ manāpikena ārammaṇena samuṭṭhahati. Tadeva manāpikārammaṇaṃ paṭicca uppajjati sukhavedanīyo phasso, sukhavedanīyaṃ phassaṃ paṭicca uppajjati sukhā vedanā, sukhaṃ vedanaṃ paṭicca uppajjati somanassūpavicāro, somanassūpavicāraṃ paṭicca uppajjati rāgo, rāgaṃ paṭicca uppajjati kāmavitakko, kāmavitakkaṃ paṭicca uppajjati rāgajo pariḷāho, rāgajaṃ pariḷāhaṃ paṭicca uppajjati uppādo saṅkhatalakkhaṇaṃ, uppādaṃ saṅkhatalakkhaṇaṃ paṭicca uppajjati vipariṇāmadukkhatā.

Doso akusalamūlaṃ amanāpikena ārammaṇena samuṭṭhahati. Tadeva amanāpikārammaṇaṃ paṭicca uppajjati dukkhavedanīyo phasso, dukkhavedanīyaṃ phassaṃ paṭicca uppajjati dukkhā vedanā, dukkhaṃ vedanaṃ paṭicca uppajjati domanassūpavicāro, domanassūpavicāraṃ paṭicca uppajjati doso, dosaṃ paṭicca uppajjati byāpādavitakko, byāpādavitakkaṃ paṭicca uppajjati dosajo pariḷāho, dosajaṃ pariḷāhaṃ paṭicca uppajjati ṭhitassa aññathattaṃ saṅkhatalakkhaṇaṃ, ṭhitassa aññathattaṃ saṅkhatalakkhaṇaṃ paṭicca uppajjati dukkhadukkhatā.

Moho akusalamūlaṃ upekkhāṭhāniyaṃ ārammaṇena samuṭṭhahati. Tadeva upekkhāṭhāniyaṃ ārammaṇaṃ paṭicca uppajjati adukkhamasukhavedanīyo phasso, adukkhamasukhavedanīyaṃ phassaṃ paṭicca uppajjati adukkhamasukhā vedanā, adukkhamasukhaṃ vedanaṃ paṭicca uppajjati upekkhūpavicāro, upekkhūpavicāraṃ paṭicca uppajjati moho, mohajaṃ paṭicca uppajjati vihiṃsāvitakko, vihiṃsāvitakkaṃ paṭicca uppajjati mohajo pariḷāho, mohajaṃ pariḷāhaṃ paṭicca uppajjati vayo saṅkhatalakkhaṇaṃ, vayaṃ saṅkhatalakkhaṇaṃ paṭicca uppajjati saṅkhāradukkhatā. Iti ayaṃ tīhi ākārehi kilesānaṃ niddeso. Yo koci akusalapakkho, sabbo so tīsu akusalamūlesu samosarāṭīti.

Tattha katamo kusalapakkho? **Tīṇi kusalamūlāni** alobho, adoso, amoho. **Tisso paññā** sutamayī, cintāmayī, bhāvanāmayī. **Tayo samādhī** savitakkasavicāro, avitakkavicāramatto, avitakkaavicāro. **Tisso sikkhā** adhisīlasikkhā, adhicitasikkhā, adhipaññāsikkhā. **Tīṇi nimittāni** samathanimittaṃ, paggahanimittaṃ, upekkhānimittaṃ. **Tayo vitakkā** nekkhamavitakko, abyāpādavitakko, avihiṃsāvitakko. **Tīṇi indriyāni** anaññātaññassāmītindriyaṃ, aññindriyaṃ, aññātāvindriyaṃ. **Tayo upavicārā** nekkhamūpavicāro, abyāpādūpavicāro, avihiṃsūpavicāro **tisso esanā** kāmesanā, bhavesanā, brahmacariyesanā. **Tayo khandhā** silakkhandho, samādhikkhandho, paññākkhandho.

Tattha alobho kusalamūlaṃ sutamayipaññaṃ paripūreti. Sutamayi paññā paripuṇṇā savitakkasavicāraṃ samādhim paripūreti, savitakkasavicāro samādhī paripuṇṇo adhisīlasikkhaṃ paripūreti, adhisīlasikkhā paripuṇṇā samathanimittaṃ paripūreti, samathanimittaṃ paripuṇṇaṃ nekkhamavitakkaṃ paripūreti, nekkhamavitakko paripuṇṇo anaññātaññassāmītindriyaṃ paripūreti, anaññātaññassāmītindriyaṃ paripuṇṇaṃ nekkhamasitūpavicāraṃ paripūreti, nekkhamūpavicāraṃ paripuṇṇo kāmesanaṃ pajahati. Kāmesanappahānaṃ silakkhandhaṃ paripūreti.

Adoso kusalamūlaṃ cintāmayipaññaṃ paripūreti, cintāmayipaññā paripuṇṇā avitakkavicāramattaṃ samādhim paripūreti, avitakkavicāramatto samādhī paripuṇṇo adhicitasikkhaṃ paripūreti, adhicitasikkhā paripuṇṇā upekkhānimittaṃ paripūreti, upekkhānimittaṃ paripuṇṇaṃ abyāpādavitakkaṃ paripūreti, abyāpādavitakko paripuṇṇo aññindriyaṃ paripūreti, aññindriyaṃ paripuṇṇaṃ abyāpādūpavicāraṃ paripūreti, abyāpādūpavicāro paripuṇṇo bhavesanaṃ pajahati, bhavesanappahānaṃ

samādhikkhandham paripūreti.

Amoho kusalamūlam bhāvanāmayipaṇṇam paripūreti, bhāvanāmayipaṇṇā paripuṇṇā avitakkaavicāram samādhiṃ paripūreti, avitakkaavicāro samādhi paripuṇṇo adhipaṇṇāsikkham paripūreti, adhipaṇṇāsikkhā paripuṇṇā paggahanimittam paripūreti, paggahanimittam paripuṇṇam avihimsāvitakkaṃ paripūreti, avihimsāvitakko paripuṇṇo aññātāvindriyam paripūreti, aññātāvindriyam paripuṇṇam avihimsūpavicāram paripūreti, avihimsūpavicāro paripuṇṇo brahmacariyesanam paripūreti, brahmacariyesanā paripuṇṇā paṇṇākkhandham paripūreti.

Iti ime tayo dhammā akusalapakkhikā kusalapakkhikā ca tikaniddesehi niddiṭṭhā tipukkhalanayassa disā nāma. Tassa pariyoṣānam **tayo vimokkhā** appaṇihito suññato animitto, ayam tipukkhalo nāma dutiyo nayo.

Tattha ye ime tayo puggalā ugghaṭitaṇṇū vipaṇcitaṇṇū neyyoti imesaṃ tiṇṇam puggalānam dve puggalā sukhāya paṭipadāya khippābhiṇṇāya, sukhāya paṭipadāya dandhābhiṇṇāya ca niyyanti, dveyeva puggalā dukkhāya paṭipadāya khippābhiṇṇāya, dukkhāya paṭipadāya dandhābhiṇṇāya ca niyyanti, ime cattāro. Te visesena dve honti diṭṭhacarito ca taṇhācarito ca. Ime cattāro hutvā tayo honti, tayo hutvā dve honti. Ivesaṃ dvinnam puggalānam ayam saṃkilesa – avijjā ca taṇhā ca ahirīkaṇca anottappaṇca asati ca asampajaṇṇaṇca nīvaraṇāni ca saṃyojanāni ca ajjhosānaṇca abhiniveso ca ahaṃkāro ca mamaṃkāro ca assaddhiyaṇca dovacassatā ca kosajjaṇca ayonisomanasikāro ca vicikicchā ca avijjā ca asaddhammassavanaṇca asamāpatti ca.

Tattha avijjā ca ahirīkaṇca asati ca nīvaraṇāni ca ajjhosānaṇca ahaṃkāro ca assaddhiyaṇca kosajjaṇca vicikicchā ca asaddhammassavanaṇca, ayam ekā disā.

Taṇhā ca anottappaṇca asampajaṇṇaṇca saṃyojanāni ca abhiniveso ca mamaṃkāro ca dovacassatā ca ayonisomanasikāro ca avijjā ca asamāpatti ca, ayam dutiyā disā. Dasannaṃ dukānaṃ dasa padāni paṭhamā disāti kātābbāni. Saṃkhittena attham ṇāpenti paṭipakkhe kaṇhapakkhassa dasannaṃ dukānaṃ dasa padāni dutiyakāni, ayam dutiyā disā.

Tattha katamo kusalapakkho? Samatho ca vipassanā ca vijjā ca caraṇaṇca sati ca sampajaṇṇaṇca hirī ca ottappaṇca ahaṃkārapahānaṇca mamaṃkārapahānaṇca sammāvāyāmo ca yonisomanasikāro ca sammāsati ca sammāsamādhi ca paṇṇā ca nibbidā ca samāpatti ca saddhammassavanaṇca somanassaṇca dhammānudhammapaṭipatti ca.

Dasannaṃ dukānaṃ samathādīni somanassapariyoṣānāni paṭhamāni dasa padāni paṭhamā disā, vipassanādīni dhammānudhammapaṭipattipariyoṣānāni dutiyāni dasa padāni dutiyā disā. Iti akusalapakkhe kusalapakkhe ca nandiyāvaṭṭassa nayassa catasso disā.

Tāsu kusalapakkhe samathādīhi akusalapakkhe taṇhādayo pahānaṃ gacchanti, tesam pahānā rāgavirāgā cetovimutti, kusalapakkhe vipassanādīhi akusalapakkhe avijjādayo pahānaṃ gacchanti, tesam pahānā avijjāvirāgā paṇṇāvimutti. Iti imā dve vimuttiyo nandiyāvaṭṭanaye pariyoṣānam.

Tattha taṇhā avijjā samatho vipassanāti cattāri padāni, tesu aṭṭhārasa mūlapadāni samosaranti. Kathaṃ? Samatho ca alobho ca adoso ca asubhasaṇṇā ca dukkhasaṇṇā cāti imāni paṇca padāni samatham bhajanti, vipassanā ca amoho ca aniccasaṇṇā ca anattasaṇṇā cāti imāni cattāri padāni vipassanam bhajanti. Evaṃ nava padāni kusalāni dvīsu padesu samosaranti. Taṇhā ca lobho ca doso ca subhasaṇṇā ca sukhasaṇṇā cāti imāni paṇca padāni taṇham bhajanti, avijjā ca moho ca niccasaṇṇā ca attasaṇṇā cāti imāni cattāri padāni avijjam bhajanti. Evaṃ nava padāni akusalāni dvīsu padesu samosaranti. Iti tipukkhalo ca sīhavikkīṭito ca nandiyāvaṭṭanayam anuppavisanti.

Kathaṃ tipukkhale naye itare dve nayā anuppavisanti? Vipassanā ca amoho ca aniccaaññā ca anattasaññā cāti imāni cattāri padāni amoho, samatho ca alobho ca asubhasaññā ca dukkhasaññā cāti imāni cattāri padāni alobho, adoso adoso eva. Evaṃ nava padāni kusalāni tīsu padesu samosaranti. Taṇhā ca lobho ca subhasaññā ca sukhasaññā cāti imāni cattāri padāni lobho, avijjā ca moho ca niccasaññā ca attasaññā cāti imāni cattāri padāni moho, doso doso eva. Evaṃ nava padāni akusalāni tīsu padesu samosaranti. Iti tipukkhale naye itare dve nayā anuppavisanti.

Kathaṃ catūsu padesu aṭṭhārasa mūlapadāni samosaranti? Taṇhā ca subhasaññā ca, ayaṃ paṭhamo vipallāso. Lobho ca sukhasaññā ca, ayaṃ dutiyo vipallāso. Avijjā ca niccasaññā ca, ayaṃ tatiyo vipallāso. Moho ca attasaññā ca, ayaṃ catuttho vipallāso. Iti nava padāni akusalāni catūsu padesu samosaranti. Samatho ca asubhasaññā ca paṭhamam satipaṭṭhānaṃ, alobho ca dukkhasaññā ca dutiyam satipaṭṭhānaṃ, vipassanā ca aniccaaññā ca tatiyam satipaṭṭhānaṃ, amoho ca anattasaññā ca catuttham satipaṭṭhānaṃ. Iti nava padāni kusalāni catūsu padesu samosaranti. Evaṃ sīhavikkīṭānaye itare dve nayā anuppavisanti. Tiṇṇaṅhi nayānaṃ yā bhūmiyo gocaro, so ekekaṃ nayaṃ anuppavisati. Tasmā ekekassa nayassa akusale vā dhamme viññāte kusale vā paṭipakkho anvesitabbo. Paṭipakkham anvesitvā so nayo niddisitabbo. Tamhi naye niddiṭṭhe yathā ekamhi naye itaresam nayānaṃ mūlapadāni anuppaviṭṭhāni, tato tato nīharitvā niddisitabbāni. Eekasmiṅhi naye aṭṭhārasa mūlapadāni anuppaviṭṭhāni.

Tattha eekasmiṃ dhamme viññāte sabbe dhammā viññātā honti. Imesaṃ tiṇṇaṃ nayānaṃ sīhavikkīṭitassa nayassa cattāri phalāni pariyosānaṃ paṭhamāya disāya paṭhamam phalaṃ, dutiyāya disāya dutiyam phalaṃ, tatiyāya disāya tatiyam phalaṃ, catutthāya disāya catuttham phalaṃ pariyosānaṃ.

Tipukkhalassa nayassa tayo vimokkhā pariyosānaṃ paṭhamāya disāya appaṇihito, dutiyāya suññato, tatiyāya animitto vimokkho pariyosānaṃ.

Nandiyāvaṭṭassa nayassa dve vimuttiyo pariyosānaṃ paṭhamāya disāya taṇhāviraḅā cetovimutti, dutiyāya disāya avijjāviraḅā paññāvimutti pariyosānaṃ. Imesu tīsu navesu yā aṭṭhārasannaṃ padānaṃ ālocanā, ayaṃ disālocano nayo. Yā āloketvā kusalapakkhe akusalapakkhe ca “ayaṃ dhammo imaṃ dhammaṃ bhajati”ti jānantena sammā yojanā, ayaṃ **anikuso nayoti** ime pañca nayā.

Nayasamuṭṭhānavāraṇṇanā niṭṭhitā.

Sāsanapaṭṭhānavāraṇṇanā

89. Evaṃ sabbathā nayasamuṭṭhānaṃ vibhajitvā idāni sāsanapaṭṭhānaṃ vibhajanto yasmā saṅgahavārādīsu mūlapadeheva paṭṭhānaṃ saṅgahetvā sarūpato na dassitaṃ, tasmā yathā mūlapadehi paṭṭhānaṃ niddhāretabbaṃ, evaṃ paṭṭhānatopi mūlapadāni niddhāretabbānīti dassanattamaṃ “**aṭṭhārasa mūlapadā kuhim daṭṭhabbā? Sāsanapaṭṭhāne**”ti āha. Mūlapadasāsanapaṭṭhānānaṅhi aññamaññaṅgaho pubbe dassito evāti. Atha **sāsanapaṭṭhānanti** ko vacanatto? Sāsanassa paṭṭhānanti sāsanapaṭṭhānaṃ, sāsanam desanā, tassā veneyyajjhāsayanurūpaṃ tesam hitasukhanipphādanattamaṃ pakārehi ṭhānaṃ pavatti sāsanapaṭṭhānaṃ. Idha pana tassa tathābhāvadīpanam “sāsanapaṭṭhāna”nti veditabbaṃ. Atha vā sāsanam adhisīlasikkhādayo. Tesam pavattanupāyabhāvato patiṭṭhahanti etehīti paṭṭhānāni, saṃkilesādiddhammā. Tesam pavedanato tadupacārena suttāni paṭṭhānāni. Tesam pana samūhabhāvato ayaṃ pakaraṇappadeso paṭṭhānaṃ nāma.

Aparo nayo – kenatṭhena paṭṭhānaṃ? Paṭṭhitatṭhena gamanattṭhena attho. “Ye te goṭṭhā paṭṭhitagāvo”ti (ma. ni. 1.156) āgataṭṭhānasmīṅhi yena paṭṭhānena te “goṭṭhā paṭṭhitagāvo”ti vuttā, tam atthato gamanaṃ hoti. Iti nātivitthāritanayesu hāranayesu anissaṅgagamanassa desanāññassa saṃkilesabhāgiyādilokiyādibhedesu tadubhayavomissakabhedesu ca vitthāritanayalābhato nissaṅgavasena pavattagamanattā te saṃkilesabhāgiyādayo lokiyādayo ca visum visum vomissā ca

adhikaraṇavasena paṭṭhānaṃ nāma. Tesam pakāsanato ayaṃ pakaraṇappadeso paṭṭhānanti veditabbaṃ.

“**Samkilesabhāgiya**”ntiādīsu samkilissati etenāti samkilesa. Samkilesabhāge samkilesakoṭṭhāse pavattaṃ **samkilesabhāgiyaṃ**. Vāsanā puññabhāvanā, vāsanābhāge pavattaṃ **vāsanābhāgiyaṃ**, vāsanā bhajāpetīti vā vāsanābhāgiyaṃ. Nibbijhanaṃ lobhakkhandhādīnaṃ padālanāṃ nibbedho. Nibbedhabhāge pavattaṃ, nibbedhaṃ bhajāpetīti vā **nibbedhabhāgiyaṃ**. Pariniṭṭhitasikkhādhammā asekkhā, asekkhabhāve pavattaṃ, asekkhe bhajāpetīti vā **asekkhabhāgiyaṃ**. Tesu yatha taṇhādisamkilesa vibhatta, idaṃ samkilesabhāgiyaṃ. Yatha dānādipuññakiriyavattu vibhattaṃ, idaṃ vāsanābhāgiyaṃ. Yatha sekkhā sīlakkhandhādayo vibhattā, idaṃ nibbedhabhāgiyaṃ. Yatha pana asekkhā sīlakkhandhādayo vibhattā, idaṃ asekkhabhāgiyaṃ. Itarāni tesam vomissakanayavasena vuttāni.

Tāni pana cha dukā cattāro tikā ekaṃ catukkaṃ aparampi ekaṃ catukkanti dvādasa honti. Tesu cattāro dukā dve ca tikā uddhaṭā, itare na uddhaṭā, anuddharaṇe kāraṇaṃ natthi. Iminā nayena tepi gahetuṃ sakkāti pāliyaṃ samkhittāti daṭṭhabbaṃ. Tathā hi vakkhati – “imāni cattāri suttāni, sādharmaṇāni katāni aṭṭha bhavanti”tiādi. Tattha yasmā katthaci sutte taṇhāsamkilesova niddisīyati, katthaci diṭṭhisamkilesova, katthaci duccharitasamkilesova niddisīyati, tasmā samkilesabhāgiyaṃ suttaṃ tidhā vibhajitvā uddiṭṭhaṃ “**taṇhāsamkilesabhāgiyaṃ sutta**”ntiādinā. Tathā vodānaṃ nāma samkilesa sati hotīti vodānabhāgiyaṃ suttaṃ samkilesavibhāgena tidhāva uddiṭṭhaṃ “**taṇhāvodānabhāgiyaṃ sutta**”ntiādinā. Taṃ pana atthato vāsanābhāgiyādi eva hoti. Ayaṅca nayo kesuci potthakesu natthi.

“**Tattha samkilesa tividho**”tiādi samkilesapaṭipakkhato samathādiniddhāraṇavasena vāsanābhāgiyādisuttānaṃ visayadassanattaṃ āraddhaṃ. Tattha **yadi āsatti uppajjati bhavesūti** bhavesu chandarāgaṃ pajahituṃ asakkontassa yadi bhavapatthanā uppajjati. **Evam sāyanti** evamassa puggalassa ayaṃ samathavipassanābhāvanāmayam puññakiriyavattu bhavati pujjabhavaphalanibbattanato. **Tatrūpapattiyā samvattatīti** tatra tatra bhava upapattiyā samvattati. **Imāni cattāri suttānīti** imāni samkilesabhāgiyādīni cattāri suttāni. **Sādharmaṇāni katānīti** samkilesabhāgiyaṅca vāsanābhāgiyaṅca, samkilesabhāgiyaṅca nibbedhabhāgiyaṅca, samkilesabhāgiyaṅca asekkhabhāgiyaṅca, vāsanābhāgiyaṅca nibbedhabhāgiyaṅcāti evaṃ padantarasaṃyojanavasena missitāni katāni. **Aṭṭha bhavanti** purimāni cattāri imāni cattārīti evaṃ aṭṭha bhavanti.

Tāniyeva aṭṭha suttāni sādharmaṇāni katāni soḷasa bhavanti tāniyeva yathāvuttāni aṭṭha suttāni vāsanābhāgiyaṅca asekkhabhāgiyaṅca nibbedhabhāgiyaṅca, asekkhabhāgiyaṅca samkilesabhāgiyaṅca vāsanābhāgiyaṅca, nibbedhabhāgiyaṅca samkilesabhāgiyaṅca vāsanābhāgiyaṅca, asekkhabhāgiyaṅca samkilesabhāgiyaṅca nibbedhabhāgiyaṅca, asekkhabhāgiyaṅca vāsanābhāgiyaṅca nibbedhabhāgiyaṅca, asekkhabhāgiyaṅca samkilesabhāgiyaṅca vāsanābhāgiyaṅca, nibbedhabhāgiyaṅca asekkhabhāgiyaṅca nevasamkilesabhāgiyaṅca, navāsanābhāgiyaṅca nanibbedhabhāgiyaṅca na asekkhabhāgiyaṅcāti evaṃ sādharmaṇāni katāni purimāni aṭṭha imāni aṭṭhāti soḷasa bhavanti. Tesu cattāro ekakā, cha dukā, cattāro tikā, eko catukko, apāropi eko catukkoti ayampi vibhāgo veditabbo. Tatthāpi dve dukā, dve tikā, dve catukkā ca pāliyaṃ anāgatāti veditabbā.

Idāni imassa paṭṭhānassa sakalasāsanasaṅgahitabhāvaṃ vibhāvetuṃ “**imehi soḷasahi suttehi bhinnehi navavidhaṃ suttaṃ bhinnaṃ bhavati**”ti vuttaṃ. Tassattho – imehi samkilesabhāgiyādīhi soḷasahi suttehi paṭṭhānanayena vibhattehi suttageyyādinavavidhaṃ pariyattisāsanasaṅkhātaṃ suttaṃ bhinnaṃ soḷasadhā vibhattaṃ hoti. Iminā soḷasavidhena paṭṭhānena asaṅgahito pariyattisāsanassa padeso natthīti adhippāyo. Kathaṃ pana samkilesabhāgiyādibhāvo gahetabboti? Āha “**gāthāya gāthā anuminitabbā**”tiādi. Tattha **gāthāya gāthā anuminitabbāti** ayaṃ gāthā viya gāthā samkilesabhāgiyāti vā vāsanābhāgiyāti vā nibbedhabhāgiyāti vā asekkhabhāgiyāti vā anuminitabbā, anu anu minitvā takketvā jānitabbāti attho. Sesapadesupi eseva nayo. Ettha ca gāthāveyyākaraṇavinimuttā sabbā pariyatti “suttanā”tipadena saṅgahitāti daṭṭhabbā.

90. Idāni saṃkilesabhāgiyādīni suttāni yathānididdiṭṭhāni udāharaṇavasena vibhāvetuṃ **“tattha katamaṃ saṃkilesabhāgiyaṃ sutta”**ntiādi āradhama. Tattha **“kāmandhā jālasañchannā”**ti gāthāya attho heṭṭhā vuttoyeva. Yathā imassa, evaṃ ito parānampi heṭṭhā vuttatthānaṃ uttānapadānaṃca atthaṃ na vaṇṇayissāma.

Agatigamanānīti kāyādīhi ayuttagamanāni, akattabbakaraṇānīti attho. **Chandāti** chandahetu icchāpaccayā. **Agatiṃ gacchatī**ti agantabbaṃ gatiṃ gacchati, akattabbaṃ karotīti attho. **Dhammanti** sādhuṇaṃ ariyānaṃ dhammaṃ. **Ativattatī**ti atimadditvā vītikkamati. **Nihiyatī**ti hāyati. **Yasoti** kitti ca parivāro ca.

“Manopubbaṅgamā dhammā”ti gāthāyaṃ **manoti** yadipi kāmāvacarakusalādibhedama sabbampi catubhūmakacittaṃ mano, imasmiṃ pana ṭhāne **cakkhupālattherassa** (dha. pa. 1-2; theragā. 95) purimajātiyaṃ vejjabhūtaṃ uppannavasena niyamiyamānaṃ paṭighasampayuttacittameva labbhati. So mano pubbaṅgamo etesanti **manopubbaṅgamā**, manasā paṭhamagāminā samannāgatāti attho. **Dhammā**ti nissattanijjīvaṭṭhena dhammā, te pana vedanādayo tayo arūpino khandhā. Ete hi manopubbaṅgamā. Kathaṃ panetehi saddhiṃ ekasmiṃ vatthusmiṃ ekasmiṃca ārammaṇe ekakkhaṇe uppajjamāno mano pubbaṅgamo nāma hotīti? Uppādapaccayaṭṭhena. Yathā hi bahūsu ekato gāmaghātādikkammāni karontesu “ko etesaṃ pubbaṅgamo”ti vutte yo tesama paccayo hoti, yaṃ yaṃ nissāya te taṃ kammaṃ karonti, so datto vā mitto vā tesama pubbaṅgamoti vuccati, evaṃsampaadamidaṃ datṭhabbaṃ. Iti uppādapaccayaṭṭhena mano pubbaṅgamo etesanti manopubbaṅgamā. Na hi te mane anuppajjante uppajjituṃ sakkuṇanti, mano pana ekaccesu cetasikesu anuppajjantesupi uppajjati eva.

Adhipativasena mano seṭṭho etesanti **manoseṭṭhā**. Yathā hi corādīnaṃ corajeṭṭhakādayo adhipatino seṭṭhā, tathā tesampi mano seṭṭho. Yathā pana dāruādīhi nipphannāni bhaṇḍāni dārumayādīni nāma honti, tathā etepi manato nipphannattā **manomayā** nāma. **Paduṭṭhenā**ti abhijjhādīhi dosehi paduṭṭhena dūsitena bhāsati vā karoti vā. So hi bhāsanto catubbidhaṃ vacīduccaritameva bhāsati, karontopi tividhaṃ kāyaduccaritameva karoti, abhāsanto akaronto tehi abhijjhādīhi paduṭṭhamanatāya tividhaṃ manoduccaritaṃ pūreti. Evamassa dasa akusalakammamāthā pāripūriṃ gacchanti. **Tato naṃ dukkhamanvetī**ti tato tividhaduccaritato taṃ puggalaṃ dukkhaṃ anveti duccharitānubhāvena catūsu apāyesu dukkhaṃ anugacchati. Yathā kiṃ? **Cakkaṃva vahato padanti**, yathā nāma sakaṭaṃ vahato balībaddassa padaṃ paharantaṃ cakkaṃ anugacchati, evaṃ naṃ puggalaṃ dukkhamanugacchatīti.

“Middhī yadā hotī”ti gāthāyaṃ **middhī**ti thinamidhābhībhūto. **Mahagghasoti** mahābhōjano āharahatthakaalamasātakatratvaṭṭakakākamāsakabhuttavamitakānaṃ aññataro viya. **Niddāyitā**ti supanasīlo. **Samparivattasāyī**ti seyyasukhapassasukhānaṃ anuyuñjanavasena samparivattakasayanasīlo. **Nivāpapuṭṭhoti** kuṇḍakādīnā sūkarabhāttena puṭṭho. Gharasūkarō hi bālakālato paṭṭhāya posiyamāno thūlasarīrakāle gehato bahi nikkhamituṃ alabhanto heṭṭhāmañcādisu samparivattitvā samparivattitvā assasanto passasanto sayateva. Idaṃ vuttaṃ hoti – yadā puriso middhī ca hoti mahagghaso ca, nivāpapuṭṭho mahāvarāho viya aññena iriyāpathena yāpetuṃ asakkonto niddāsīlo samparivattasāyī, tadā so “aniccaṃ dukkhaṃ anattā”ti tīṇi lakkhaṇāni manasi kātuṃ na sakkoti. Tesama amanasikārā mandapañño punappunaṃ gabbhaṃ upeti, gabbhavāsato na parimuccatīti.

“Ayasāva mala”nti gāthāyaṃ **ayasā**ti ayato. **Samuṭṭhitanti** jātaṃ. **Tatuṭṭhāyati** tato uṭṭhahitvā. **Atidhona**cārinanti dhonā vuccati cattāro paccaye idamatthitāya alametenāti paccavekkhitvā paribhuñjanapaññā, taṃ atikkamitvā caranto atidhonacārī nāma. Idaṃ vuttaṃ hoti – yathā ayato malaṃ samuṭṭhāya yato taṃ samuṭṭhitaṃ, tameva khādati vināseti, evamevaṃ cattāro paccaye appaccavekkhitvā paribhuñjantaṃ atidhonacāriṇaṃ sāni kammāni attano santāne uṭṭhitattā attano santakāneva tāni kammāni duggatiṃ nayantīti.

“Coro yathā”ti gāthāyaṃ **coro yathā sandhimukhe gahītoti** yathā coro gharasandhiṃ chinditvā gehama pavisanto gharasandhimukhe eva rājapurisehi gahito. **Sakammunā haññati bajjhate** cāti tena

attanā katakammena kasābhītālanādinā haññati ceva addubandhanādinā bajjhati ca. **Evam ayam pecca pajā paratthā**ti evampi ayam pāpakārini pajā ito cavitvā paraloke. **Sakammunā haññati bajjhate cāti** attanāva katena pāpakammena nirayādīsu nānappakārehi kammakāraṇādīhi haññati ceva paribajjhati cāti.

“**Sukhakāmānī**”ti gāthāyaṃ **yo daṇḍena vihiṃsatī**ti yo puggalo daṇḍena vā leḍḍuādīhi vā vibādhati. **Pecca so na labhe sukhanti** so puggalo paraloke manussasukhaṃ vā dibbasukhaṃ vā na labhati, nibbānasukhe pana vattabbameva natthi.

Gunnaṃ ce taramānānanti gāvīsu mahoghaṃ tarantīsu. **Jimhaṃ gacchati puṅgavoti** yadi yūthapati usabho kuṭīlaṃ gacchati. **Sabbā tā jimhaṃ gacchantī**ti sabbāpi tā gāvīyo kuṭīlameva gacchantī. Kasmā? **Nette jimhaṃ gate satī**ti nettari kuṭīlaṃ gate sati, nettassa kuṭīlaṃ gatattāti attho. So hi tāsam paccayiko upaddavaharo ca.

“**Evameva**”nti gāthāyaṃ yathā cetam, evamevaṃ yo manussesu padhānasammato, yadi so adhammacārī siyā. Ye tassa anujīvīno, sabbepi adhammikāva honti. Sāmisampadā hi pakatisampadaṃ sampādeti. Yasmā ca etadeva, tasmā **sabbaṃ raṭṭhaṃ dukkhaṃ seti, rājā ce hoti adhammiko**. **Sukiccharūpā vatāti** suṭṭhu kicchāpannarūpā vata. **Upadhīsūti** kāmagaṇūpadhīsu. **Rattāti** rāgābhībhūtā. **Kaṭukanti** dukkhaṃ.

Kukkuccajanakeneva pattavaṭṭippabhavassa upacchinnattā phaluppatti kadaliyā parābhavāya hotīti āha – “**phalaṃ ve kadaliṃ hantī**”ti. Tathā phalapariyosānattā osadhīnaṃ “phalaṃ veḷuṃ phalaṃ naḷa”nti vuttaṃ. Vaḷavāya kucchimiṃ gadrabhassa jātā assatarī nāma, sā gabbhaṃ gaṇhitvā kāle sampatte vijāyituṃ na sakkoti. Pādehi bhūmiṃ paharantī tiṭṭhati, athassa cattāro pāde catūsu khāṇukesu bandhitvā kucchiṃ phāletvā potakaṃ nīharanti, sā tattheva marati. Tena vuttaṃ – “**gabbho assatariṃ yathā**”ti. Idaṃ vuttaṃ hoti – yathā attano phalaṃ kadaliveḷunaḷepi vināseti, gabbho ca assatariṃ, evaṃ attano kammaphalabhūto sakkāro asappurisaṃ vināsetīti.

Kodhamakkhagarūti kujjhanalakkaṇaṃ kodhaṃ, paraṅgaṇamakkaṇalakkaṇaṃ makkhañca gaṇaṃ katvā uddhaṃ katvā ukkhipitvā caranto. **Sukhetteti** sukhettepi. **Pūtibījaṃvāti** pūtibhāvaṃ gataṃ bījaṃ viya. Chakaṇarasādiparibhāvanasukkhāpanasukhasayādīni akaraṇena bījadosaduṭṭhanti attho.

91. Cetasāti attano cittaena. **Cetoti** tassa puggalassa cittaṃ. **Pariccāti** paricchinditvā. **Iriyatīti** pavattati. **Yathābhatanti** yathā kiñci āharitvā ṭhapitaṃ.

Mākatthāti mā akattha. **Na pamutyatthīti** pamokkha natthi. **Upeccāpīti** sañciccāpi, buddhipubbenāpīti attho.

“**Adhammenā**”ti vatvāpi “**musāvādenā**”ti vacanaṃ musāvādassa mahāsāvajjabhāvadassanattamaṃ. Tenevāha – “ekaṃ dhammaṃ atītassā”tiādi (dha. pa. 176), tathā “evam parittaṃ kho, rāhula, tesam sāmāññaṃ, yesam natthi sampajānamusāvāde lajjā”tiādi (ma. ni. 2.108). **Taṃ kathaṃ nu bhavissatīti** taṃ dhaṇaṃ kena nu pakārena tesam bhavissati. Adhammena tesam sambhatattā tesu naciraṭṭhitikaṃ hotīti attho. **Antarāyā su bhavissantīti** adhammiyavohārādito rājantarāyādayo bhavissantīti. **Sūti** nipātamattaṃ. **Sambhatassa vinassatīti** imassa sambhataṃ sajjitaṃ vinassati. **Sagganti** sugatiṃ. Sā hi rūpādīhi sobhanehi aggoti saggoti adhippetā. **Ettāvātāti** diṭṭhadhammikasamparāyikānaṃ atthānaṃ hāniyā. **Hatāti** vinaṭṭhā.

Vivaṭṭateti nivattati. **Lobhā khaṇati attānanti** lobhahetu apuññāni karonto kāyavisamādiyogena attānaṃ khaṇati nāma. **Mittehi jīratīti** mittabhāvehi hāyati.

Carantīti catūhi iriyāpathehi akusalameva karontā vicaranti. **Bālāti** idhalokatthaṃ paralokatthañca

ajānantā idha bālā nāma. **Dummedhāti** nippaññā. Na hi paññāya duṭṭhattaṃ nāma atthi. **Amittenevāti** amittabhūtena viya verinā viya hutvā. **Kaṭukapphalanti** tikhiṇaphalaṃ, dukkaphalanti attho. **Na taṃ kammaṃ kataṃ sādhu, yaṃ katvā anutappaṭṭi** yaṃ kammaṃ nirayādīsu nibbattanasamatthaṃ dukkhuḍayaṃ katvā anussarītānussaritakkhaṇe anutappaṭṭi anusocati, taṃ kataṃ na sādhu na sundaraṃ na bhaddakaṃ. **Yassa assumukhoti** yassa assūhi tintamukho rodanto vipākaṃ paṭisevati anubhoti.

Dukkaranti vattapaṭivattapūraṇādivasena ābhisamācārikasīlassa kātuṃ asakkuṇeyyatāya dukkaraṃ. Samādānato paṭṭhāya khaṇḍaṃ akatvā visesato ādibrahmacariyakassa carimakacittam paṭetabbatāya **duttitikkhaṃ**, sīlasaṃvarādayo vā aparikkhate katvā sampādetuṃ asakkuṇeyyatāya dukkaraṃ. Adhivāsetabbānaṃ pana dussahanato khantisamvaraṃvasena duttitikkhaṃ. **Abyattenāti** mandapaññaena. **Sāmaññanti** samaṇabhāvo. **Tatthāti** tassa sāmaññaassa. **Sambādhāti** dunnivatthaduppārutamātugāmādisammaddā. **Yatthāti** sīlasaṃvarādīnaṃ paribandhabhūtesu sambādhasaṅkhātesu visabhāgārammaṇādīsu. Atha vā dukkarantipadassa atthaṃ dassetuṃ duttitikkhanti vuttaṃ. **Duttitikkhanti** dukkhamam duradhivāsiyaṃ. **Abyattenāti** bālena. **Sāmaññanti** samaṇadhammo. Idaṃ vuttaṃ hoti – yaṃ paṇḍitā kulaputtā dasapi vassāni vīsati...pe... satṭhipi vassāni dantebhi dantamādhāya jivhāya tāluṃ āhacca cetasā cittaṃ abhiniggaṇhitvā ekāsaṇaṃ ekabhattaṃ paṭisevamānā āpāṇakoṭikaṃ brahmacariyaṃ carantā sāmaññaṃ karonti, taṃ bālā abyattā kātuṃ na sakkontīti. **Bahūhi tattha sambādhāti** tasmim sāmaññasāṅkhāte ariyamagge bahū sambādhā, maggādhigamāya paṭipannassa bahū pariṣsayāti attho.

Appameyyaṃ paminantoti appameyyaṃ khīṇāsavapuggalaṃ ‘‘ettakasīlo ayaṃ ettakasamādhī ettakapañño’’ti evaṃ minanto. **Kodha vidvā vikappayeti** ko idha vidvā medhāvī vikappeyya, khīṇāsavova khīṇāsavaṃ minanto vikappeyyāti dīpeti. **Nivutaṃ maññeti** yo pana puthujjano minetuṃ ārabhati, taṃ nivutaṃ avakujjapaññaṃ maññāmi. **Akissavanti** kissavā vuccati pañña, nippaññanti attho.

Kuṭhārīti attacchedakaṭṭhena kuṭhārisadisī pharusavācā. **Chindatīti** kusalamūlasaṅkhāte mūleyeva nikantati. **Visaṃ halāhalaṃ ivāti** halāhalasaṅkhātaṃ visaṃ iva. **Evaṃ viraddhaṃ pātetīti** viraddhaṃ aparaddhaṃ khalitapuggalaṃ evaṃ apāyesu vinipātetī. **Vācā dubbhāsītā yathāti** yathā vācā ariyūpavādanavasena dubbhāsītā.

92. Nindiyanti nindanīyaṃ. **Taṃ vā nindati yo pasamsiyoti** yo guṇavisiṭṭhatāya pasamsāraho puggalo, taṃ vā so pāpicchatādīni āropetvā garahati. **Vicinātīti** upacināti. **Kalinti** aparādhaṃ. **Ayaṃ kalīti** ayaṃ aparādho. **Akkhesūti** jūtakilānakkhesu. **Sabbassāpi sahāpi attanāti** sabbena attano dhanenāpi attanāpi saddhiṃ. **Sugatesūti** sobhanagamanattā, sundaraṃ ṭhānaṃ gatattā, sammā gatattā, sammā ca gadattā sugatasāṅkhātesu buddhādīsu. **Manam padosayeti** yo manam padoseyya, tassa ayaṃ manopadoso eva mahattaro kalīti vuttaṃ hoti. Kasmā? Yasmā **sataṃ sahasānaṃ...pe... pāpakanti**. Tattha **sataṃ sahasānanti** nirabbudagaṇanāya sataśahaṃsaṃ. **Chattimsatīti** aparāni chattimsati nirabbudāni. **Pañca cāti** abbudagaṇanāya pañca ca abbudāni. Tasmā vassagaṇanāya ettako so kālo, yaṃ kālam ariyagarahivācam manañca pañidhāya pāpakaṃ nirayaṃ upeti, tattha paccatīti vuttaṃ hoti. Idañca saṅkhepena padumaniraye āyuppamaṇaṃ, vitthārena pana parato āgamissati.

Lobhaguṇeti ‘‘guṇo’’ti bālehi diṭṭhattā, anekakkhattuṃ pavattitattā ca lobhoyeva lobhaguṇo, tasmim lobhaguṇe, taṇhāyāti attho. **Anuyuttoti** anu anu yutto. **Avadaññūti** avacanaññū, buddhānampi ovādassa aggahaṇato. **Maccharīti** pañcavidhamacchariyena maccharī. **Pesuniyaṃ anuyuttoti** pesuniyasmim anuyutto aggasāvakaṇaṃ bhedanena. Kokālikañhi mīyamānaṃ ovaḍantena āyasmatā mahāmoggallānena bhāsītā imā gāthāti. **Mukhaduggāti** mukhavisama. **Vibhūtāti** vigatabhūta alikavādi. **Anariyāti** asappurisa. **Bhūnahūti** bhūtihanaka attano buddhivināsaka. **Purisantāti** purisādhama. **Kalīti** alakkhipurisa. **Avajātakaputtāti** buddhassa bhagavato avajātaputta. **Mā bahubhānidha nerayikosīti** idāni bahubhāni mā hohi, nerayiko asi jāto. **Rajamākirasīti** kilesarajaṃ attani pakkhipasi. **Santeti** samitakilese khīṇāsave. **Kibbisakārīti** pāpakāri. **Papatanti** narakam.

Idaṃ saṃkilesabhāgiyanti idaṃ taṇhādīnaṃ sabhāvabhedato avatthābhedato ca anekabhedakaṃ dassetuṃ anekehi suttapadehi udāharaṇavasena dassitaṃ saṃkilesabhāgiyaṃ suttanti veditabbaṃ.

Pasannenāti kammakammaphalādīni saddahantena.

93. Iddhanti hatthūpagasīsūpagādialaṅkārehi maṇikanakādīhi ca samiddhaṃ. **Phīṭanti** telamadhuphāṇitādīhi ca dhanadhaññādīhi ca vipulaṃ. **Ākiṇṇamanussanti** nirantaramanussaṃ. **Sambādhabyūhanti** byūhā vuccanti anibbidharacchāyo. Yesu pavīṭṭhamaggeneva niggacchanti, te sambādhā byūhakā etthāti sambādhabyūhaṃ. Imināpi tassa nagarassa ghanavāsameva dīpeti. **Bhantenāti** damathaṃ anupagatena, ito cito ca paribbhamantena vā. **Apāpakanti** alāmakāṃ. **Aveccappasādenāti** acalappasādena, saccappaṭivedhato āgatena pasādena.

Pecca so labhateti yo bhūte daṇḍena na hiṃsati, so puggalo paraloke manussabhūto manussasukhaṃ devabhūto dibbasukhaṃ ubhayaṃ atikkanto nibbānasukhaṃ labhatīti attho.

94. Cārikaṃ pakkamissatīti janapadacārikaṃ gamissati. Kasmā pana bhagavā janapadacārikaṃ caratīti? Sattahi kāraṇehi buddhā bhagavanto janapadacārikaṃ caranti – desantaragātānaṃ veneyyānaṃ vinayanattaṃ, tatra ṭhitānaṃ ussukkasamuppādanāṃ, bhāvakānaṃ ekasmiṃ ṭhāne nibaddhavāsapariharaṇaṃ attano ca tattha anāsaṅgadassanaṃ, sambuddhavasitaṭṭhānatāya desānaṃ cetiyabhāvasampādanāṃ, bahūnaṃ sattānaṃ dassanūpasāṅkamaṇādīhi puññoghappasavanaṃ, avuṭṭhiādiupaddavūpasamaṇācāti imehi sattahi kāraṇehi buddhā bhagavanto janapadacārikaṃ carantīti veditabbaṃ.

Isidattapurāṇāti isidatto ca purāṇo ca, tesu isidatto sakadāgāmī. **Purāṇo sotāpanno. Sāketeti** “sāketo”ti laddhanāme attano bhogagāmake. **Magge purisaṃ ṭhapesunti** tesāṃ kira gāmadvārena bhagavato gamanamaggo, tasmā “sace bhagavā amhākaṃ suttānaṃ vā pamattānaṃ vā gaccheyya, atha passituṃ na labheyyāma”ti maggamajjhe purisaṃ ṭhapesuṃ. **Anubandhiṃsūti** na dūratova, piṭṭhito piṭṭhito anubandhiṃsu. Bhagavā hi sakaṭamaggassa majjhe jaṅghamaggena agamāsi, itare ubhosu passesu anugacchantā agamaṃsu. **Maggā okkammāti** buddhā hi kenaci saddhiṃ gacchantāva paṭisanthāraṃ karonti kenaci saddhiṃ ṭhitā kenaci saddhiṃ divasabhāgampi nisinnā, tasmā bhagavā cintesi – “ime mayhaṃ sāsane vallabhā āgataphalā, imehi saddhiṃ nisīditvā divasabhāgaṃ paṭisanthāraṃ karissāmī”ti. Maggato okkamitvā yenaññataraṃ rukkhamūlaṃ tenupasaṅkami. **Paññatte āsane nisīdīti** te kira chattupāhanakattaraṇāpādabbhañjanatelāni ceva aṭṭhavidhañca pānakaṃ sarabhāpādapallānkañca gāhāpetvā āgamaṃsu. Atha naṃ pallaṅkaṃ paññāpetvā adamaṃsu. Satthā tattha nisīdi. **Ekamantaṃ nisīdiṃsūti** “chattupāhanādīni bhikkhusaṅghassa dethā”ti vatvā bhagavantaṃ vanditvā ekamantaṃ nisīdiṃsu.

Sāvattiyā kosalesu cārikaṃ pakkamissatītiadi sabbaṃ majjhimadesavaseneva vuttaṃ. Kasmā? Niyatāciṇṇattā. Bhagavato hi cārikacaraṇaṃ majjhimadeseyeva. Sacepi paccantadesa gacchati, majjhimadeseyeva aruṇaṃ utthāpetīti niyatāciṇṇaṃ, tasmā majjhimadesavaseneva vuttaṃ. **Kāsīsūti** kāsiraṭṭhato. Tathā **magadhesūti** magadharatṭhato. **Āsanne no bhagavā bhavissatīti** ettha na kevalaṃ āsannattā eva tesāṃ somanassaṃ hoti, atha kho “idāni dānaṃ dātuṃ gandhamālādīpūjaṃ kātuṃ dhammaṃ sotuṃ pañhaṃ pucchituṃ labhissāmā”ti nesaṃ somanassaṃ hoti.

Tasmātiha thapatayo sambādho gharāvāsoti thapatayo yasmā tumhākaṃ mayi dūrībhūte anappakaṃ domanassaṃ āsanne anappakaṃ somanassaṃ hoti, tasmāpi veditabbametāṃ “sambādho gharāvāso”ti. Gharāvāsassa hi dosena tumhākaṃ evaṃ hoti. Sace pana gharāvāsaṃ pahāya pabbajitā assatha, evaṃ vo mayā saddhiṃyeva gacchantānañca āgacchantānañca taṃ na bhavēyyāti imamatthaṃ dīpento evamāha. Tattha sakiñcanaṃ apalibodhaṭṭhena sambādhatā veditabbā. Mahāghare vasantassāpi hi sakiñcanaṃ apalibodhaṭṭhena gharāvāso sambādhova. **Rajopathoti** rāgādirajānaṃ āgamanapatho, āgamaṇaṭṭhānanti attho. **Abbhokāso pabbajjāti** pabbajjā pana akiñcanaṃ apalibodhaṭṭhena abbhokāso.

Caturatanikepi hi gabbhe dvinnam bhikkhūnam pallaṅkena pallaṅkam ghaṭṭetvā nisinnānampi akiñcanāpalibodhatṭhena pabbajjā abbhokāso nāma hoti. **Alaṅca pana vo thapatayo appamādāyāti** evaṃ sambādhagharāvāse vasantānaṃ tumhākaṃ appamādameva kātuṃ yuttanti attho.

Nāgāti hatthino. **Opavayhāti** rañño ārohanayoggā. **Ekam purato ekam pacchato nisīdāpemāti** te kira dvepi janā sabbālaṅkārapaṭimaṇḍitā dvīsu nāgesu tā itthiyo evaṃ nisīdāpetvā rañño nāgaṃ majjhe katvā ubhosu passesu gacchanti, tasmā evamāhaṃsu. **Nāgopi rakkhitabboti** yathā kiñci visesitaṃ na karoti, evaṃ rakkhitabbo hoti. **Tāpi bhaginiyoti** yathā pamādaṃ nāpajjanti, evaṃ rakkhitabbā honti. **Attāpīti** sitakathitavikkhepitādīni akarontehi attāpi rakkhitabbo hoti. Evaṃ karonto hi “sāmidubbhako eso”ti niggaḥetabbo hoti.

Tasmātiha thapatayoti yasmā tumhe rājā niccaṃ rājabhaṇḍaṃ paṭicchāpeti, tasmāpi sambādho gharāvāso rajopatho. Yasmā pana paṃsukūlikaṃ bhikkhuṃ evaṃ paṭicchāpento natthi, tasmā abbhokāso pabbajjā, evaṃ sabbatthāpi. Alaṅca kho thapatayo appamādāya, appamādameva karoṭhāti dasseti.

Muttacāgoti vissaṭṭhacāgo. **Payatapāṇīti** āgatāgatānaṃ dānatthāya dhotahattho. **Vosaggaratoti** vosaggasaṅkhāte cāge rato. **Yācayogoti** yācitabbayutto. “Yājayogo”tipi pāṭho, dānayuttoti attho. **Dānasamvibhāgaratoti** etena appamattakampi kiñci labhitvā tatopi samvibhāge rato. **Appaṭivibhattanti** “idaṃ amhākaṃ bhavissati, idaṃ ayyāna”nti evaṃ akatavibhāgaṃ, sabbam dātabbameva hutvā ṭhitanti attho. **Imehi kho thapatayo catūhi dhammehi samannāgato ariyasāvako sotāpanno hotīti** sotāpanno imehi dhammehi samannāgato hotīti attho. Etena sotāpannena imesaṃ catunnaṃ dhammānaṃ ekantato labbhamānataṃ dasseti.

Evaṃ tesam thapatīnaṃ imehi catūhi dhammehi samannāgataṃ pariyāyena dassetvā idāni nipariyāyena taṃ dassetuṃ “**tumhe kho thapatayo**”tiādi vuttaṃ.

95. Sahassaṃ kappakoṭiyoti sahassaṃ attabhāvā ahesunti attho. “Asīti kappakoṭiyo”tipi pāṭho, asītiyukappakoṭiyo ahesunti attho. Kattha pana te ahesunti? Āha “**deve ceva manusse cā**”ti, devesu ceva manussesu cāti attho. **Samviruḷhamhīti** samantato pallavaggahaṇena viruḷhe. **Alabhiṃhanti** alabhiṃ ahaṃ. **Ajja tiṃsaṃ tato kappāti** tato kappato ajja sampati ayaṃ kappo tiṃsatimo. **Tassā saññāya vāsanāti** tassa buddhagatāya saññāya vāsanato.

Tañhānighātakoti tañhāya samucchadako. **Vaṭṭasakoti** pupphamayakaṇṇiko. **Sabbapupphehilaṅkatoti** nānāpupphehi alaṅkato. **Lapanantarāti** uttarādharoṭṭhānaṃ antarato. **Okkāti** pabhā. **Muddhanantaradhāyathāti** muddhani antaradhāyatha. **Kaṅkham vitarāti** vimatiṃ vinodehi. **Yassa taṃ sabbadhammesu, sadā nīṇaṃ pavattatīti** tanti nipātamattaṃ. Yassa sabbadhammesu ākaṅkappaṭibaddhattā sadā nīṇaṃ pavattatī. So sabbaññū bhagavā **theraṃ ānandaṃ etadabravīti** sambandho. **Rājā raṭṭhe bhavissatīti** sabbasmim raṭṭhe rājā bhavissati. **Carimanti** carimabhavaṃ. **Sacchikatvāti** paccakkham katvā. **Dhammatanti** catusaccadhammaṃ, paccakabodhiṃ vā.

96. Suvannaṃ chadanam nāvanti ubhosu passesu suvaṇṇālaṅkārehi paṭimaṇḍitavasena chāditaṃ suvaṇṇanāvaṃ. **Pañhaṃ puṭṭhā viyākāsi, sakkassa iti me sutanti** yathā sā devatā pañhaṃ puṭṭhā sakkassa byākāsi, evaṃ mayāpi sutanti āyasmā mahāmoggallāno attanā yathāsutaṃ taṃ bhagavato vadati.

Paṃsuthūpesūti sarīradhātuṃ abbhantare ṭhapetvā paṃsūhi katathūpesu. Evañhi te bhagavantaṃ uddissakatā nāma honti, tenevāha – “**uddissakatesu dasabaladharāna**”nti.

97. Devaputtasarīravaṇṇāti devaputtasarīrasadisavaṇṇā. **Subhagasaṅṭhitīti** sobhagayuttasaṅṭhānā. **Uḷāraṃ vata taṃ āsīti** taṃ mayā kataṃ puññaṃ uḷāraṃ vata ahosi. **Yāhanti yā** ahaṃ. **Satasahassaṃ kappe, mudito thūpaṃ apūjesīti** thūpaṃ pūjetvā satasahassaṃ āyukappe ahaṃ

muditoti attho. **Anāgantuna vinipātanti** apāyupapattiṃ anupagantvā. **Yaṃ cakkhanti** yaṃ paññācakkhum. **Pañihitanti** ṭhapitaṃ. **Vimuttacittamhīti** vimuttacitto amhi. **Vidhūtalatoti** vidhūtataṅhālato, samucchinnataṅhoti attho.

98. Sāmākapatthodanamattanti sāmākatiṅānaṃ nāḷikodanamattaṃ. **Akhileti** pañcannaṃ cetokhilānaṃ abhāvena akhile. **Tasmiṅca okappayi dhammamuttamanti** tasmim paccekabuddhe uttamadhammaṃ paccekabodhiṃ “uttamadhammena nāma imasmim bhavitabba”nti saddahiṃ. **“Tasmiṅca dhamme pañidhesim mānasa”**nti iminā paṭiladdhadhammaṃ ahampi sacchikareyyanti cittaṃ pañidahim. **Bhave kudāsupi ca mā apekkhavāti** katthaci bhave apekkhavā mā bhaveyyanti ca pañidhesim mānasanti sambandho.

Kurūsūti uttarakurūsu. **Dīghāyukesūti** tesam vassasahassāyukatāya vuttaṃ. **Amamesūti** apariggahesu. **Pāṇīsūti** sattesu. **Ahīnagāmīsūti** yathāladdhasampattīhi yāvatāyukaṃ aparihīnasabhāvesu. **Tidasopapajjathāti** tāvatimso hutvā upapajjim, tidase vā tāvatimsabhavane upapajjim. **Visiṭṭhakāyūpagatoti** visiṭṭhakāyesu nānāvāṇṇakāyesu upagato. **Yasassisūti** parivāravantesu. **Hitāhitāsihīti** kusalākusale vītivattīhi. **Paccakkhaṃ khvimanti** paccakkhaṃ kho imaṃ vacananti adhippāyo.

Sakāsīti so akāsi. **Balimābhihārīti** pūjābaliṃ abhihari. **Patitassa ekanti** tassa hatthato ekapupphaṃ patitaṃ.

Upariṭṭhanti upari vehāse ṭhitaṃ. **Ariṭṭhanti** ariṭṭhaṃ nāma paccekasambuddhaṃ. **Ajjhattaṅca bahiddhā cāti** ajjhattavisayā ca bahiddhavisayā ca. **Ye me vijjimsūti** ye me pubbe vijjamānā ahesuṃ. **Jātimaṇasamsāro, natthi dāni punabbhavoti** punappunaṃ jāyanamīyanabhūto samsāro punabbhavoti ca vuccati, so ca dāni natthīti attho.

Idaṃ vāsanābhāgiyaṃ suttanti idaṃ vāsanābhāgapuññavibhāvanānaṃ nānāsuttapadānaṃ udāharaṇavasena dassitaṃ vāsanābhāgiyaṃ suttanti veditabbaṃ.

99. “Uddhaṃ adho...pe... apunabbhavāyā”ti idaṃ nibbedhabhāgiyaṃ suttanti vuttaṃ oghataraṇassa ariyamaggakiccattā. **Na cetanā karaṇīyāti** na cittaṃ uppādetabbaṃ. **Dhammatāti** dhammasabhāvo.

100. Yadā haveti yasmim have kāle. **Pātubhavantīti** uppajjanti. **Dhammāti** anulomapaccayākārapaṭivedhasādhaṃ bodhipakkhiyadhammā. **Pātubhavantīti** vā pakāsenti, abhisamayavasena pākāṭa honti. **Dhammāti** catuvariyasaccadhammā. **Ātāpo** vuccati kilesasantāpanaṭṭhena vīriyaṃ. **Ātāpinoti** sammappadhānavīriyavato. **Jhāyatoti** ārammaṇūpanijjhānalakkhaṇena lakkhaṇūpanijjhānalakkhaṇena ca jhānena jhāyantassa. **Brāhmaṇassāti** bāhitapāpassa khīṇāsavassa. **Athassa kaṅkhā vapayanti sabbāti** athassa evaṃ pātubhūdadhammassa yā tā “ko nu kho, bhante, phusatīti? No kallo pañhoti bhagavā avocā”tiādinā (saṃ. ni. 2.12) nayena “katamaṃ nu kho, bhante, jarāmaṇaṃ, kassa panidaṃ jarāmaṇanti? No kallo pañhoti bhagavā avocā”tiādinā (saṃ. ni. 2.35) ca nayena paccayākārakaṅkhā vuttā. Yā ca paccayākārasseva appaṭividdhattā “ahosiṃ nu kho ahamatītamaddhāna”ntiādikā (ma. ni. 1.18; saṃ. ni. 2.20) soḷasakaṅkhā “buddhe kaṅkhati dhamme kaṅkhati”tiādikā (dha. sa. 1008) aṭṭha ca kaṅkhā āgatā, tā sabbā vapayanti apagacchanti nirujjhanti, kasmā? **Yato pajānāti sahetudhammaṃ**, yasmā avijjādikena hetunā sahetukaṃ imaṃ saṅkhārādīm kevalaṃ dukkhakkhandhadhammaṃ pajānāti aññāsi paṭivijjhanti.

Yato khayam paccayānaṃ avedīhi yasmā paccayānaṃ khayasaṅkhātaṃ nibbānaṃ avedi aññāsi paṭivijjhi, tasmā yadāssa ātāpino jhāyato brāhmaṇassa vuttappakārā dhammā pātubhavanti. Athassa yā nibbānassa aviditattā kaṅkhā uppajjeyyūṃ, sabbāpi tā kaṅkhā vapayantīti.

Āraññanti āraññakaṃ. **Aññātuñchena yāpentanti** kulesu aññāto niccanavoyeva hutvā uñchena piṇḍacariyāya yāpentam. Atha vā abhilakkhitesu issarajanagehesu kaṭukabhaṇḍasambhāraṃ sugandhabhojanaṃ pariyasantassa uñchanam ñātuñchanam nāma, gharapaṭipāṭiyā pana dvāre ṭhitena laddhamissakabhojanaṃ aññātuñchanam nāma. Iḍam idha adhippetam. Tena yāpentam. **Kāmesu anapekkhinanti** vatthukāmakilesakāmesu nirapekkham.

Chetvāti vadhitvā. **Sukham setīti** kodhapariḷāhena aparidayhamānattā sukham sayati. **Na socatīti** kodhavināsenā vīnaṭṭhadomanassattā na socatī. **Visamūlassatīti** dukkhavipākassa. **Madhuraggassatīti** yaṃ akkuṭṭhassa paccakkosivā pahaṭassa paṭippaharivā sukham uppajjati, tam sandhāya so “madhuraggo”ti vutto. Imasmiñhi ṭhāne pariyosānam “agga”nti vuttam. **Ariyāti** buddhādayo.

Haneti haneyya. **Uppatitanti** asamuggahāṭitam avikkhambhituppannavasena samudācāruppannavasena samudācarantam. **Vinodayeti** attano santānato nīhareyya.

101. Sattiyāti desanāsīsametaṃ, ekatodhārādīnā satthenāti attho. **Omaṭṭhoti** pahaṭo. Cattāro hi pahārā omaṭṭho ummaṭṭho maṭṭho vīmaṭṭhoti. Tattha upari ṭhatvā adhomukham dinnappahāro **omaṭṭho** nāma, adho ṭhatvā uddham mukham dinnappahāro **ummaṭṭho** nāma, aggaḷasūci viya vinivijjhivā kato **maṭṭho** nāma, seso sabbopi **vīmaṭṭho** nāma. Imasmiṃ pana ṭhāne omaṭṭho gahito. So hi sabbadāruṇo duruddharaṇasallo duttikiccho antodoso antopubbalohito ca hoti. Pubbalohitam anikkhamitvā vaṇamukham pariyonandhitvā tiṭṭhati. Pubbalohitam nīharitukāmehi mañcena saddhiṃ bandhitvā adhosiro kātabbo hoti, maraṇam vā maraṇamattam vā dukkham pāpuṇāti. **Paribbajeti** vihareyya.

Imāya gāthāya kiṃ kathitam? Yathā sattiyā omaṭṭhapurisō sallubbāhanavaṇatikicchānānam atthāya vīriyam ārabhati payogaṃ karoti parakkamati. Yathā ca dayhamāne matthake ādittasiro tassa nibbāpanatthāya vīriyam ārabhati payogaṃ karoti parakkamati, evamevaṃ bhikkhu kāmarāgappahānāya sato appamatto hutvā vihareyya bhagavāti kathesi.

Evam devatāya kathite atha bhagavā cintesi – “imāya devatāya upamā dāḷham katvā ānītā, attham pana parittakam gahetvā ṭhitā. Punappunam kathenti pi hi eṣā kāmarāgassa vikkhambhanappahānameva katheyya, yāva ca kāmarāgo maggena na samuggahāṭiyati, tāva anubandhova hoti”ti tameva upamaṃ gahetvā paṭhamamaggavasena devatāya vinivaṭṭetvā dassento “**sattiyā viya omaṭṭho**”ti dutiyagāthamāha. Tassattho purimanayānusārena vedītabbo.

Lokāmisanti kāmaguṇo. **Santipekkhoti** sabbasaṅkhārūpasamaṃ nibbānam apekkhamāno. **Paññavāti** pañnavanto. **Pahitattoti** nibbānam patipesitacitto. **Virato kāmasaññāyāti** yāya kāyaci sabbato kāmasaññāya catutthamaggasampayuttāya samucchadaviratiyā virato. “Viratto”ti pi pāṭho. Kāmasaññāyāti pana bhummavacanam hoti. **Sagāthāvagge** (saṃ. ni. 1.96) “kāmasaññāsū”ti pāṭho. Catūhi maggehi dasannampi saṃyojanānam atītattā **sabbasaṃyojanātīto**. Catutthamaggeneva vā uddhambhāgiyasamyojanātīto tatra tatrābhīnandanato nandisaṅkhātāya taṇhāya tiṇṇaṅca bhavānam parikkhīṇattā **nandibhavaparikkhīṇo**. So tādiso khīṇāsavo bhikkhu **gambhīre** saṃsāraṇṇave **na sīdati**.

Saddahānoti yena pubbabhāge kāyasucaritādībhedenā, aparabhāge ca sattattīmsabodhipakkhiyabhedenā dhammena arahanto buddhapacceka buddhabuddhasāvakā nibbānam pattā. Tam saddahāno arahatam dhammam nibbānappattiyā lokiyalokuttarapaññam labhati, taṅca kho na saddhāmatkenaeva. Yasmā pana saddhājāto upasaṅkamati, upasaṅkamanto payirupāsati, payirupāsanto sotam odahati, odahitasoto dhammam suṇāti, tasmā upasaṅkamanato paṭṭhāya yāva dhammassavanena **sussūsam labhate pañnam**.

Kiṃ vuttam hoti? Tam dhammam saddahitvā pi ācariyupajjhāye kālena kālam upasaṅkamitvā pi vattakaraṇena payirupāsivā yadā payirupāsānāya ārādhitacittā kiñci vattukāmā honti. Atha adhigatāya sotukāmatāya sotam odahitvā suṇanto labhatīti evam sussūsampi ca satiavippavāsena appamatto

subhāsītadubbhāsitaññūtāya vicakkhaṇo eva labhati, na itaro. Tenāha – “**appamatto vicakkhaṇo**”ti.

Patirūpakārī desakālādīni ahāpetvā lokiyassa lokuttarassa dhammassa patirūpaṃ adhigamūpāyaṃ karotīti patirūpakārī. **Dhuravāti** cetasikavīriyavasena anikkhittadhuro. **Uṭṭhātāti** kāyikavīriyavasena uṭṭhānasampanno asithilaparakkamo. **Vindate dhananti** lokiyalokuttaradhanam adhigacchati. **Saccenāti** vacīsaccena paramatthasaccena ca. Buddhapaccekabuddhaariyasāvakā nibbutiṃ pāpuṇantā kittimpi pāpuṇantiyeva. **Dadanti** paresaṃ yaṃ kiñci icchitaṃ patthitaṃ dento **mittāni ganthati** sampādeti karotīti attho. Duddadaṃ vā dadanto ganthati, dānamukhena cattāripi saṅgahavatthūni gahitānīti veditabbāni. Tehi mittāni karonti. **Asmā lokā paraṃ lokam, sa ve pecca na socatīti** yassa puggalassa ime saddhādayo dhammā vijjanti, so imasmā lokā paraṃ lokam gantvā na socati, sokakāraṇaṃ tassa natthīti attho.

“Yassete caturo dhammā, saddhassa ghamesino;
Saccaṃ dhammo dhiti cāgo, sa ve pecca na socatī”ti. (saṃ. ni. 1.246; su. ni. 190) –

Gāthaṃ avasesaṃ katvā udāhaṭaṃ. **Ālavakasutte** hi imā gāthā ālavakena “kathaṃ su labhate pañña”ntiādīnā (saṃ. ni. 1.246; su. ni. 187) puṭṭhena bhagavatā bhāsītāti.

Yena kenaci vaṇṇenāti yena kenaci kāraṇena, pakārena vā. **Samvāsoti** ekasmiṃ ṭhāne sahavāso samāgamo. **Tanti** tathā samāgataṃ anukampitabbaṃ purisaṃ. **Manasā ce pasannenāti** karuṇāsamussāhitena pasādena pasannena manasā. **Na tena hoti saṃyuttoti** tena yathāvuttena anusāsanena kāmacchandādīnaṃ saṃyojanavasena saṃyutto nāma na hoti. **Yānukampā anuddayāti** yā ariyamaggasampāpanavasena karuṇāyanā, mettāyanā cāti attho.

102. Rāgo ca doso cāti rāgadosā heṭṭhā vuttanayāva. **Kutonidānāti** kiṃnidānā kiṃhetukā. Paccattavacanassa hi ayaṃ to-ādeso, samāse cassa lopābhāvo veditabbo. **Aratī ratī lomahaṃso kutojāti** yāyaṃ pantesu senāsanesu, adhikusalesu ca dhammesu arati ukkaṇṭhitā, yā ca pañcasu kāmaguṇesu rati abhiratī āsatti kīlanādi, yo ca lomahaṃsasamuṭṭhānato lomahaṃsasaṅkhāto cittutrāso, ime tayo dhammā kuto jātā kuto nibbattāti pucchā. **Kuto samuṭṭhāyāti** kuto uppajjitvā. **Manoti** kusalacittaṃ. **Vitakkāti** kāmavitakkādayo. **Kumārakā dhaṅkamivosajantīti** yathā kumārakā kīlantā kākaṃ suttana pāde bandhitvā osajanti khipanti, evaṃ kusalamanam akusalavitakkā kuto samuṭṭhāya osajantīti pucchā.

Rāgo cāti dutiyagāthā tassā vissajjanaṃ. Tattha **itoti** attabhāvaṃ sandhāyāha. Attabhāvanidānā hi rāgadosā, arati rati lomahaṃsā ca attabhāvato jātā. Kāmavitakkādayo attabhāvato eva samuṭṭhāya kusalamanam osajanti. Tena tadaññaṃ pakatiādikāraṇam paṭikkhipanto āha – “**itonidānā ito samuṭṭhāyā**”ti. Purimagāthāya vuttanayenetha saddasiddhi veditabbā.

Idāni yvāyaṃ “itonidānā”tiādīsu attabhāvanidānā attabhāvato jātā attabhāvato samuṭṭhāyāti attho vutto, taṃ sādiento āha – “**snehajā attasambhūtā**”ti. Ete hi rāgādayo vitakkapariyosānā taṇhāsnehena jātā. Tathā jāyantā ca pañcupādānakkhandhabhede attabhāvasaṅkhāte attani sambhūtā. Tenāha – “snehajā attasambhūtā”ti. Idāni tadatthajotikaṃ upamaṃ dasseti “**nigrodhasseva khandhajā**”ti. Tattha **khandhajāti** khandhesu jātā pārōhā. Idaṃ vuttaṃ hoti – yathā nigrodhassa khandhajasaṅkhātā pārōhā āporasasaṅkhāte snehe sati jāyanti, jāyantā ca tasmimyeva nigrodhe tesu tesu sākappadesesu sambhavanti, evaṃ ete rāgādayo ajjhattaṃ taṇhāsnehe sati jāyanti, jāyantā ca tasmimyeva attabhāve tesu tesu cakkhādippadesesu iṭṭhārammaṇesu sambhavanti. Tena vuttaṃ – “snehajā attasambhūtā”ti. **Puthu visattā kāmesūti** yasmā rāgopi pañcakāmaguṇikādivasena, dosopi āghātavatthuādivasena aratiādayopi tassa tassa bhedassa vasenāti sabbathā sabbepime kilesā puthu anekappakārā hutvā vatthudvārārammaṇādivasena tesu tesu kāmesu tathā tathā visattā laggā saṃsibbitvā ṭhitā. Kimiva? **Māluvāva vitatā vane** yathā vane vitatā māluvā tesu tesu rukkhasākappasākḥādībhedesu visattā hoti laggā saṃsibbitvā ṭhitā, evaṃ ete kilesā dhammā, tasmā ettha puthupabhedesu vatthukāmesu visattaṃ

kilesagahanam.

Ye nam pajānanti yatonidānam, te nam vinodenti suṇohi yakkha. Tassattho – ye sattā nam kilesagahanam “itonidānam esa uppajjati” ti jānanti, te nam taṇhāsinehasinehite attabhāve uppajjati nītvā tam taṇhāsineham ādināvānupassanādibhāvanāñāṇagginā visosentā vinodenti pajahanti, evaṃ amhākaṃ bhāsitaṃ suṇohi yakkhāti. **Te duttaram oghamimam taranti, atinṇapubbam apunabbhavāyāti** ye hi saṃkilesagahanam vinodenti, te ekantena maggaṃ bhāventi. Na hi maggabhāvanam vinā kilesavinodanam atthi. Evaṃ maggaṃ bhāventā te pakatiñāṇena duttaram kāmoghādiṃ catubbidham ogham iminā dighena addhunā supinantenapi atinṇapubbam anatikkantapubbam apunabbhavāya nibbānāya taranti.

Dukkaram bhagavāti eko kira devaputto pubbayogāvacaro bahalakilesatāya sappayogena kilese vikkhambhento samaṇadhammam katvā pubbahetumandatāya ariyabhūmiṃ appatvāva kālam katvā devaloke nibbatto, so tathāgataṃ upasaṅkamitvā dukkarabhāvam ārocento evamāha. Tattha **dukkaranti** dasapi vassāni...pe... satṭhipi vassāni ekantaparisuddhassa samaṇadhammassa karaṇam nāmetam dukkaram. **Sekkhāti** satta sekkhā. **Sīlasamāhitāti** sīlena samāhitā samupetā. **Ṭhitattāti** patiṭṭhitasabhāvā. Evaṃ pucchitapañham vissajjitvā uparipañham samuṭṭhāpanattham “**anagāriyupetassā**” tiādimāha. Tattha **anagāriyupetassāti** anagāriyam niggehabhāvam upagatassa, pabbajitassāti attho. **Tuṭṭhīti** catupaccayasantoso.

Bhāvanāyāti cittavūpasamabhāvanāya. **Te chetvā maccuno jālanti** ye rattindivam indriyūpasame ratā, te dussamādahaṃ cittaṃ samādahanti. Ye samāhitacittā, te catupaccayasantosam pūrentā na kilamanti. Ye santuṭṭhā, te sīlam pūrentā na kilamanti. Ye sīle patiṭṭhitā satta sekkhā, te ariyā maccuno jālasaṅkhātam kilesajālam chinditvā gacchanti.

Duggamoti saccametam, bhante, ye indriyūpasame ratā, te dussamādahaṃ cittaṃ samādahanti. Ye samāhitacittā, te catupaccayasantosam pūrentā na kilamanti. Ye santuṭṭhā, te sīlam pūrentā na kilamanti. Ye sīle paramaggāhino satta sekkhā, te **ariyā** maccuno jālasaṅkhātam kilesajālam chinditvā **gacchanti**. Kiṃ na gamissanti, ayaṃ pana duggamo “**bhagavā visamo maggo**” ti āha. Tattha kiñcāpi ariyamaggo neva duggamo na visamo, pubbabhāgapaṭipadāya panassa bahū parissayā honti, tasmā evaṃ vutto. **Avamsirāti** ñāṇasirena adhosirā hutvā **papatanti**. Ariyamaggaṃ ārohitum asamatthatāya eva te **magge** papatantīti vuccanti. **Ariyānam samo maggoti** sveva maggo ariyānam samo hoti. **Visame samāti** visamepi sattakāye samā eva.

103. Idañhi tam jetavananti anāthapiṇḍiko devaputto jetavanassa ceva buddhādīnaṃ vaṇṇabhaṇanattam āgantvā evamāha. **Isaṅghanisevanti** bhikkhusaṅghanivesitam. Evaṃ paṭhamagāthāya jetavanassa vaṇṇam kathetvā idāni ariyamaggassa vaṇṇam kathento “**kammaṃ vijjā**” tiādimāha. Tattha **kammanti** maggacetanā. **Vijjāti** maggapaññā. **Dhammoti** samādhi, samādhipakkhikā vā dhammā. **Sīlam jīvitamuttamanti** sīle patiṭṭhitassa jīvitaṅca uttamanti dasseti. Atha vā **vijjāti** diṭṭhisāṅkappā. **Dhammoti** vāyāmasatisamādhayo. **Sīlanti** vācākamantājīvā. **Jīvitamuttamanti** etasmiṃ sīle patiṭṭhitassa jīvitam nāma uttamanti. “**Etena maccā sujjhanti**” ti etena aṭṭhaṅgikena maggena sattā visujjhanti.

Tasmāti yasmā maggena sujjhanti, na gottadhanehi, tasmā. **Yoniso vicine dhammanti** upāyena bodhipakkhiyadhammam vicineyya. **Evaṃ tattha visujjhanti** evaṃ tasmim ariyamagge visujjhanti. Atha vā **yoniso vicine dhammanti** upāyena ariyasaccadhammam vicineyya. **Evaṃ tattha visujjhanti** evaṃ tesu catūsu ariyasaccesu visujjhanti. Idāni sārīputtattherassa vaṇṇam kathento “**sārīputtovā**” tiādimāha. Tattha **sārīputtovāti** avadhāraṇavacanam, etehi paññādīhi sārīputtova seyyoti vadati. **Upasamenāti** kilesavūpasamena. **Pāraṅgoti** nibbānam gato, yo koci nibbānapatto bhikkhu, na tādiso. **Etāvaparamo siyā**, na therā uttaritaro nāma sāvako atthīti vadati.

Atītanti atīte pañcakkhandhe. **Nānvāgameyyāti** tañhādītthīhi nānugaccheyya. **Nappaṭikañkheti** tañhādītthīhi na pattheyya. **Yadatītanti** idamettha kāraṇavacanam. Yasmā yaṃ atītam, **taṃ pahīnam** niruddham atthaṅgam, tasmā taṃ nānugaccheyya. Yasmā ca yaṃ tattha **anāgamam**, taṃ **appattam** ajātam anibbattam, tasmā tampi na pattheyya. **Tattha tattahāti** paccuppannampi dhammam yattha yattheva so uppanno, tattha tattheva naṃ aniccānupassanādīhi sattahi anupassanāhi **vipassati**, araññādīsu vā tattha tattha vipassati. **Asaṃhīram asaṃkuppanti** idaṃ vipassanāpaṭivipassanādassanattam vuttam. Vipassanā hi rāgādīhi na saṃhirati na kuppātīti asaṃhīrā asaṃkuppā, taṃ **anubrūhaye** vaḍḍheyya paṭivipasseyyāti vuttam hoti. Atha vā nibbānam rāgādīhi na saṃhirati na kuppātīti **asaṃhīram asaṃkuppam**, taṃ **vidvā** paṇḍito bhikkhu **anubrūhaye**, punappunam tadārammaṇam phalasaṃpattim appento vaḍḍheyyāti attho.

Tassa pana anubrūhanassa atthāya **ajjeva kiccamaṭappanti** kilesānam ātāpanaparitāpanena “ātappa”nti laddhanāmaṃ vīriyaṃ ajjeva kātabbam. **Ko jaññā maraṇam suveti** sve jīvitam vā maraṇam vā ko jānāti. Ajjeva dānam dassāmi, sīlam vā rakkhissāmi, aññataram vā pana kusalam karissāmi, “ajja tāva papañco atthi, sve vā punadivase vā jānissāmi”ti cittaṃ anuppādetvā “ajjeva karissāmi”ti evaṃ vīriyaṃ kātabbanti dasseti. **Mahāsenenāti** ahivicchikavisasatthādīni hi anekāni maraṇakāraṇāni tassa senāti tāya mahatiyā senāya vasena mahāsenena evarūpena maccunā saddhim “katipāham tāva āgamehi, yāvāham buddhapūjādīm attano avassayaṃ kammaṃ karomī”ti evaṃ mittasanthavākārasaṅkhāto vā “idaṃ satam vā sahasam vā gahetvā katipāham āgamehi”ti evaṃ lañjānuppādānasaṅkhāto vā “iminā balarāsinaṃ paṭibāhissāmi”ti evaṃ balarāsisaṅkhāto vā **saṅgaro** natthi. Saṅgaroti hi mittakaraṇalañjādānabalarāsisaṅkaḍḍhanānam nāmaṃ, tasmā ayamatto vutto. **Atanditanti** analasaṃ utthāhakaṃ. Evaṃ paṭipannattā bhaddo ekaratto assāti **bhaddekaratto**. **Itīti** evaṃ paṭipannaṃ puggalam “bhaddekaratto aya”nti rāgādisantatāya **santo buddhamuni ācikkhati**.

Cakkhunā paññāya cāti cakkhunā ca paññāya ca. Cakkhubhūtāya vā paññāya. **Satiyā paññāya cāti** satiyā ca paññāya ca, sativisiṭṭhāya vā paññāya. **Kāyenāti** nāmakāyena.

Dibbacakkhu suvisuddhanti dibbam cakkhu suvisuddham, yaṃ sacchikarotīti adhippāyo. **Pubbenivāsāti** purimāsu jāṭisu nivutthakkhandhā. **Iddhividhāti** iddhikoṭṭhāsā. **Nirodhoti** nibbānam. Sesam suviññeyyameva.

104. Yassa selūpamaṃ cittanti ekaghanam selam viya pakativātehi lokadhammavātehi akampanīyato yassa cittaṃ selūpamaṃ. Tenāha – “**ṭhitam nānupakampati**”ti. **Rajanīyesūti** lābhādīsu. **Kopaneyyati** alābhādike. **Kuto nam dukkhamessatīti** taṃ evaṃ bhāvitacittaṃ vītikantalokadhammaṃ uttamaṃ purisaṃ lokadhammahetukam dukkham nānugamissati.

Yo brāhmaṇoti bāhitapāpadhammatāya brāhmaṇo, na diṭṭhamaṅgalikatāya huṃhuñkārasāvādīpāpadhammayutto hutvā kevalam jātimattena brāhmaṇoti paṭijānāti. So brāhmaṇo bāhitapāpadhammatā huṃhuñkārapāhānena **nihuṃhuṅko**. Rāgādikasāvābhāvena **nikkabhāvo**. Sīlasamvarena saṃyatacittatāya **yatto**. Catumaggañānasaṅkhātehi vedehi antam nibbānam, vedānam vā antam gatattā **vedantagū**. Maggabrahmacariyassa vusitattā **vūsitabrahmacariyo**. **Dhammena so brahmavādam vadeyyāti** so “brāhmaṇo aha”nti etaṃ vādam vadeyya. **Yassa** sakalalokasannivāse **kuhiñci** ekārammaṇepi rāgussado dosussado mohussado mānussado diṭṭhussadoti ime **ussadā natthīti** attho.

Na gādhātīti na paṭiṭṭhahati. **Sukkāti** sukkasaṅkhātā gahā. Yadi candimasūriyādīnam pabhā tattha natthi, tamo eva ca siyāti āsaṅkamāne sandhāyāha “**tamo tattha na vijjati**”ti. **Yadā ca attanāvedīti**ādīsu evaṃvidham nibbānam attapaccakkhena ñāṇena yadā vindati, **atha** rūpārūpadhammato sukhadukkhato ca vippamutto hotīti.

Sakesu dhammesūti sakaattabhāvasaṅkhātesu upādānakkhandhesu. Yebhuyyena hi ajjhattam

vipassanābhīniveso hotīti. **Etam pisācanti** ajakalāpaka, etam tayā vuttam pisācam kilesapisācaṇa. **Pakkulanti** tayā kataṃ akkulam pakkulakaraṇaṇa. **Ativattatīti** atikkamati.

Nābhīnandati āyantinti purāṇadutiyaikaṃ āgacchanti aññaṃ vā na abhīnandati cittaṇa na sampācchati. Tameva **pakkamanti na socati**. **Sāṅgā sāṅgāmajim muttanti** pañcavidhāpi sāṅgato muttam sāṅgāmajim bhikkhum.

Bahvetthāti bahu ettha **nhāyati jano**, na tena so suddho nāma hotīti adhippāyo.

Jātibalam nisedhanti jātibalassa nisedhakam. **Sahāyā vatāti** samathavipassanābhāvanāya saha ayanavasena sahāyā vata. Kālena kālam sappāyadhammassa savanavasena cirarattam sameti samāgamo etesanti **cirarattasametika**. **Sithilamārabbhāti** sithilam vīriyam katvā.

105. Tatra kho, bhikkhave, ko visesoti satthu sāvakassa ca pañcasveva upādānakkhandhesu nibbidādayoti pubbhāgapaṭipattiyam anupādāvimuttiyaṇa heṭṭhā upari ca visesābhāvam dasseti. Vuttañhetam – “natthi vimuttiyā nānatta”nti (a. ni. 5.31; kathā. 355 atthato samānam). Tattha visesābhāvam paccāmasati “tatra ko viseso”ti. **Adhippayāsoti** adhipkapayogo. **Nānākaraṇanti** ca visesoyeva vutto.

Ayam kho, bhikkhave, visesoti bhikkhave, yadipi sāvakassa satthu ca vimuttiyam viseso natthi, sayambhuññaṇena pana savāsanasabbakilese khetvā sammāsambodhim abhisambujjhivā anuppanassa ariyamaggassa parasantāne uppādanādisakalasabbaññugūṇasamāyogo. Ayam sammāsambuddhassa paññāvimuttato visesoti. Tattha **anuppanassāti** avattamānassa. Ariyamaggañhi kassapasammāsambuddho uppādesi. Antarā añño satthā uppādetā nāma nāhosi, tasmā ayam bhagavā anuppanassa **magga uppādetā** nāma. **Asañjātassāti** tasseva vevacanam. **Anakkhātassāti** akathitassa. Maggam jānātīti **maggaññū**. Maggam viditam pākaṭam akāsīti **maggaividū**. Magge ca amagge ca kovidoti **maggakovido**. **Magganugāti** maggam anugacchantā. **Pacchāsamannāgatāti** aham paṭhamam samannāgato, sāvakā pacchā samannāgatā.

106. “Nīce kule paccājāto”tiādīnā (a. ni. 4.85; pu. pa. 168) tamena yuttoti **tamo**. Kāyaduccaritādīhi puna nirayatamupagamanato **tamaparāyaṇo**. Iti ubhayenapi khandhatamova kathito hoti. “Aḍḍhe kule paccājāto”tiādīnā (a. ni. 4.85; pu. pa. 168) jotinā yuttoti **joti**, ālokabhūtoti vuttam hoti. Kāyasucaritādīhi puna saggūpapattibhavūpagamanato **jotiparāyaṇo**. Iminā nayena itarepi dve veditabbā.

Na tam dalham bandhanamāhu dhīrāti ettha **dhīrāti** buddhādayo paṇḍitapurisā. Yam saṅkhalikasaṅkhātam ayena nibbattam **āyasam** addubandhanasaṅkhātam dārumayaṇa pabbajatiṇehi rajjum katvā katarajjubandhanaṇa, tam asiādīhi chinditum sakkuṇeyyatāya “thira”nti na vadantīti attho. **Sārattarattāti** rattā hutvā rattā. Balavarāgarattāti attho. **Maṇikuṇḍalesūti** maṇīsu ca kuṇḍalesu ca, maṇicittesu vā kuṇḍalesu. **Etam dalhanti** ye maṇikuṇḍalesu sārattarattā, tesu yo rāgo, yā ca puttadāresu apekkhā taṇhā, etam kilesamayam bandhanam paṇḍitapurisā “dalha”nti vadanti.

Ohārinanti ākaḍḍhitvā catūsu apāyesu pātanato avaharati heṭṭhā haratīti ohāriṇam. **Sithilanti** bandhanaṭṭhāne chaviādīni akopetvā bandhanabhāvampi ajānāpetvā jalapathathalathādīsū kammam kātum detīti sithilam. **Duppamuṇcanti** lobhavasena hi ekavārampi uppanam kilesabandhanam daṭṭhaṭṭhānato kacchapo viya dummocayam hotīti duppamuṇcam. **Etampi chetvānāti** etam dalhampi kilesabandhanam ṇāṇakhaggena chinditvā **anapekkhino** hutvā **kāmasukham pahāya paribbajanti** pakkamanti pabbajanti cāti attho.

107. Cetetīti akusalacetanāvasena ceteti. **Pakappetīti** tameva akusalacetanam kāyavacīkammabhāvam pāpanavasena kappeti. **Anusetīti** rāgādiānusayova santāne appahīnabhāvena anuseti. **Ārammaṇametaṃ hoti viññāṇassa thitīyāti** yadetam cetanam pakappanam anusayanaṇa, etam

abhisāṅkhāravīññāṇassa t̥hitiyā pavattiyā paccayo hotīti attho. **Ārammaṇe sati patiṭṭhā viññāṇassa hotīti** yathāvuttapaccaye sati abhisāṅkhāravīññāṇassa kammaṃ javāpetvā paṭisandhiākaḍḍhanasamatthātasampādanato patiṭṭhā hoti. **Āyatim punabbhavābhinibbatti hotīti** āyatim punabbhavasāṅkhātā viññāṇādīnaṃ abhinibbatti hoti.

“**No ce, bhikkhave, ceteti**”tiādinā akusalakammameva paṭikkhipati. Ayañhettha saṅkhepattho, yadipi kadāci yonisomanasikārā akusalacetanā nappavattati, anusayā pana appahīnāti, te kusalassa abhisāṅkhāravīññāṇassa patiṭṭhā honti yevāti. Sati ca abhisāṅkhāravīññāṇe āyatim punabbhavābhinibbatti hotīti vattum vaṭṭatiyeva. Tatiyavāro vuttapaṭipakkhanayena veditabbo.

108. “Neso, bhikkhave, ariyassa vinaye samuddo”tiādi yadi duppūraṇaṭṭhena saṃsīdanaṭṭhena duratikkamaṇaṭṭhena sāgaro “samuddo”ti vucceyya, tato satabhāgenapi saḥassabhāgenapi cakkhuādisveva ayaṃ nayo labbhatīti dassetuṃ vuttaṃ. Tenāha – “**cakkhu, bhikkhave, purisassa samuddo, tassa rūpamayo vego**”ti, rūpesu sattānaṃ āviñchanato rūpāyatanaṃveva vego cakkhussa vegoti attho.

Yo taṃ rūpamayaṃ vegam sahatīti yo bhikkhu saha visayena cakkhum aniccato dukkhato anattato sammasanto tattha ca nibbindanto virajjanto tappaṭibaddhato kilesajālato vimuccanto abhibhavati. **Ayaṃ vuccati, bhikkhave, atari cakkhusamuddanti** ayaṃ bhikkhu cakkhusāṅkhātāṃ samuddaṃ tiṇṇoti vuccati.

Aparo nayo – cakkhu, bhikkhave, ariyassa vinaye samuddoti yadipi duppūraṇaṭṭhena yadi vā samudanaṭṭhena samuddo, cakkhumeva samuddo. Tassa hi pathavito yāva akaniṭṭhabrahmalokā nīlādiārammaṇaṃ samosarantaṃ paripuṇṇabhāvaṃ kātuṃ na sakkoti. Evaṃ duppūraṇaṭṭhenaṃ samuddo. Cakkhu ca tesu tesu nīlādiārammaṇesu samudeti asaṃvutaṃ hutvā osaramānaṃ kilesupattiyā kāraṇabhāvena sadosabhāvena gacchatīti samudanaṭṭhenaṃ samuddo. Tathā cakkhum taṇhāsotādīnaṃ uppattidvārātāya tehi santānassa samudanaṭṭhena temanaṭṭhena samuddo. **Tassa rūpamayo vegoti** samuddassa appamāṇo ūmimayo vego viya tassāpi cakkhusamuddassa samosarantassa nīlādibhedassa ārammaṇassa vasena appameyyo rūpamayo vego veditabbo. **Yo taṃ rūpamayaṃ vegam sahatīti** yo taṃ cakkhusamudde samosarantaṃ rūpamayaṃ vegam manāpe rūpe rāgaṃ, amanāpe dosaṃ, asamapekkhane mohanti evaṃ rāgādikilese anuppādentō upekkhakabhāvena sahati.

Saūmintiādīsu kilesaūmīhi saūmiṃ. Kilesavaṭṭhehi **sāvaṭṭaṃ.** Kilesagahehi **sagahaṃ.** Kilesarakkhasēhi **sarakkhasaṃ.** Kodhupāyāsassa vā vasena **saūmiṃ.** Kāmaguṇavasena **sāvaṭṭaṃ.** Mātugāmasena **sagahaṃ sarakkhasaṃ.** Vuttañhettaṃ – “ūmibhayanti kho, bhikkhave, kodhupāyāsassettaṃ adhivacanaṃ (itivu. 109; ma. ni. 2.162; a. ni. 4.122). Tathā āvaṭṭanti kho, bhikkhave, pañcannaṃ kāmagaṇaṃ adhivacanaṃ (itivu. 109; ma. ni. 2.164; a. ni. 4.122). Gaharakkhasoti kho, bhikkhave, mātugāmassettaṃ adhivacanaṃ”nti (itivu. 109). Sesadvāresupi eseva nayo.

Saūmibhayaṃ duttaraṃ accatarīti aniccatādiūmibhayena sabhayaṃ duratikkamaṃ atikkami. **Lokantaḡūti** saṃsāralokassa antaṃ gato. **Pāragatoti vuccatīti** nibbānaṃ gatoti kathīyati.

Baḷisāti sattānaṃ anattahetutāya baḷisā viya baḷisā. **Anayāyāti** anattāya. **Byābādhāyāti** dukkhāya. **Iṭṭhāti** pariyaṭṭhā vā apariyaṭṭhā vā sukhārammaṇatāya iṭṭhā. Kāmaṇīyaṭṭhena **kantā.** Manassa vaḍḍhanaṭṭhena **manāpā.** Piyasabhāvatāya **piyarūpā.** Kilesakāmasahitattā **kāmūpasamhitā.** Rāgajanaṭṭhena cittassa rañjanato **rajanīyā.** **Tañceti** taṃ rūpārammaṇaṃ, nīlādivasena anekabhedabhinnampi hi rūpāyatanaṃ rūpārammaṇabhāvena cakkhuviññeyyabhāvena ca ekavidhataṃ nātivattatīti taṃsabhāvasāmaññaṃ gahetvā “tañce”ti vuttaṃ. **Abhinandatīti** abhinandanabhūtāya sappītikataṇhāya abhimukho nandati. **Abhivadatīti** “aho sukhaṃ, aho sukha”nti vadāpentiyā taṇhāyanavasena abhivadati. **Ajjhosāya tiṭṭhatīti** gilitvā pariniṭṭhapetvā tiṭṭhati. **Ayaṃ vuccati, bhikkhave, bhikkhu gilitabaḷiso mārassāti** ayaṃ, bhikkhu, kilesamārassa baḷisabhūtaṃ rūpaṇaṃ

gilitvā thitoti vuccati. Sesavāresupi iminā nayena attho veditabbo. **Abhedīti** bhindi. **Paribhedīti** sabbabhāgena bhindi. Sesam uttānameva.

109. Ayam loko santāpajātoti ayam sattaloko jātasantāpo ñātibyasanādivasena uppannasokasantāpo ca rāgādivasena uppannapariḷāhasantāpo cāti attho. **Phassaparetoti** anekehi dukkhaphassehi abhibhūto. **Rodaṃ vadati attatoti** taṃ taṃ attanā phuṭṭhaṃ dukkhaṃ abhāvitakāyatāya adhivāsetuṃ asakkonto “aho dukkhaṃ, īdisaṃ dukkhaṃ mayhaṃ sattunopi mā hotū”tiādinā vilapanto vadati. Kasmā? **Yena yena hi maññanti, tato taṃ hoti aññathā**, yasmā ete sattā yena yena pakārena attano dukkhassa paṭikāraṃ maññanti āsīsanti, taṃ dukkhaṃ tato aññena pakārena tikicchitabbaṃ hoti. Yena vā pakārena attano vaḍḍhiṃ maññanti, tato aññathā avaḍḍhi eva pana hoti. Evaṃ aññathābhāvitam icchāvighātaṃ eva pāpuṇāti. Ayam **bhavasatto** kāmādibhavesu satto **sattaloko**, tathāpi **bhavamevābhinandati**, na tatha nibbindati. **Yadabhinandati taṃ bhayanti** yaṃ kāmādibhavaṃ abhinandati, taṃ jarāmarañādiyanekabyasanānubandhattā ativiya bhayānakaṭṭhena **bhayaṃ**. **Yassa bhāyatīti** yato jarāmarañādito bhāyati, **taṃ** dukkhassa adhiṭṭhānabhāvato dukkhadukkhatāya ca **dukkhanti**.

Bhavavippahānāyāti bhavassa pajahanatthāya. **Khoti** avadhāraṇatthe nipāto. Idaṃ vuttaṃ hoti – ekanteneva kāmādibhavassa samudayappahānena pahānatthaṃ idaṃ mayā adhigataṃ **maggabrahmacariyaṃ vussatīti**.

Evaṃ ariyassa maggassa ekamseneva niyyānikabhāvaṃ dassetvā idāni aññamaggassa niyyānikabhāvaṃ paṭikkhipanto “**ye hi keci**”tiādimāha. Tatha **bhavenāti** rūpabhavena vā arūpabhavena vā. **Bhavassāti** saṃsārasa. **Vippamokkhanti** bhavato vimuttiṃ, saṃsārasuddhinti attho. Kiñcāpi te samaṇabrāhmaṇā tatha nibbānasaññino, bhavagāmikamma pana rūpārūpajjhānena, taṃnibbattena ca upapattibhavena bhavavisuddhiṃ vadantā bhavena bhavavippamokkhaṃ vadanti nāma. Tenāha – “**sabbe te avippamuttā bhavasmāti vadāmī**”ti. Atha vā **bhavenāti** bhavadiṭṭhiyā, bhavati tiṭṭhati sassatanti hi pavattanato sassatadiṭṭhi “bhavadiṭṭhi”ti vuccati. Bhavadiṭṭhi eva uttarapadalopena “bhavo”ti vuttā bhavataṇhātiādīsu viya. Bhavadiṭṭhivasena hi idhekacce bhavavisesaṃyeva bhavavippamokkhaṃ maññanti. Yathā taṃ **bako brahmā** āha – “idaṃ niccaṃ, idaṃ dhuvaṃ, idaṃ sassataṃ, idaṃ avipariṇāmadhamma”nti (ma. ni. 1.501; saṃ. ni. 1.175). **Vibhavenāti** ucchedadiṭṭhiyā. Vibhavati vinassati ucchiṭṭatīti hi pavattanato ucchedadiṭṭhi vuttanayena “vibhavo”ti vuccati. **Bhavassa nissaraṇamāhamsūti** saṃsārasuddhiṃ vadiṃsu. Ucchedadiṭṭhivasena hi idhekacce saṃsārasuddhiṃ vadanti. Tathā hi vuttaṃ –

“Yato kho, bho, ayam attā rūpī cātumahābhūtikō...pe... nevasaññānāsaññāyatanaṃ upasampajja viharati. Ettāvatā kho, bho, ayam attā sammā samucchinnō hotī”ti (dī. ni. 1.91).

Anissaṭṭāti anikkhantā. Tatha kāraṇamāha – “**upadhiñhi paṭicca dukkhamidaṃ sambhotī**”ti. Tatha **upadhinti** khandhādiupadhiṃ. Kiṃ vuttaṃ hoti? Yattha ime diṭṭhigatikā nibbānasaññino, tatha khandhūpadhikilesūpadhiabhisāṅkhārūpadhayo adhigatā ñātā. Kuto tassa dukkhanissaraṇatāti. Yaṃ pana paramatthato dukkhanissaraṇaṃ, taṃ dassetuṃ “**sabbupādānakkhayā natthi dukkhassa sambhavo**”ti vuttaṃ.

Lokamimaṃ passāti bhagavā attano cittaṃ ālapati. **Puthūti** visuṃ visuṃ. **Avijjāya paretanti** mohena abhibhūtaṃ. **Bhūtanti** khandhapañcakaṃ. **Bhūtaratanti** itthī purise, puriso itthiyāti evaṃ aññamaññaṃ sattesu rataṃ, tato eva **bhavā aparimuttā**. **Ye hi keci bhavāti** ittarakhaṇā vā dīghāyukā vā sātavanto vā asātavanto vā bhavā. **Sabbadhīti** uddhaṃ adho tiriyanti sabbattha. **Sabbatthatāyāti** sabbabhāvena. **Sabbe te bhavāti**ādīsu “sabbepi bhavā aniccā”tiādinā vipassanāsahitāya maggapaññāya aviparītaṃ **passato bhavataṇhāpi pahiyati** nirujjhati, **vibhavaṃ** ucchedampi **nābhinandati** na pattheti, tassa sabba **taṇhānaṃ** anavasesato maggena nirujjhanato **nibbānaṃ** nibbuti hoti. **Tassa** evaṃ **nibbutassa bhikkhuno anupādā** kilesābhisāṅkhārānaṃ anupādānato aggahaṇato **punabbhavo na hoti**.

Evambhūtena ca **abhibhūto** pañcavidhopi **māro** vijito assa anena mārena saṅgāmo, sabbepi bhava samatikkanto iṭṭhāniṭṭhādīsu tādilakkhaṇappattoti.

Anusotagāmī andhaputhujjano **paṭisotagāmī** kalyāṇaputhujjano. **Ṭhitatto** sekkho. Itaro asekkho.

110. Abhijātikoti jātiyo. **Kaṇhābhijātikoti** kaṇhe nīce kule jāto. **Kaṇhaṃ dhammaṃ abhijāyatīti** kālakaṃ dasavidhaṃ dussīladhammaṃ pasavati karoti, so taṃ abhijāyitvā niraye nibbattati. **Sukkaṃ dhammanti** “ahaṃ pubbepi puññānaṃ akatattā nīce kule nibbatto, idāni puññaṃ karissāmi”ti puññasāṅkhātaṃ sukkaṃ paṇḍaraṃ dhammaṃ abhijāyati, so tena sagge nibbattati. **Akaṇhaṃ asukkaṃ nibbānanti** nibbānañhi sace kaṇhaṃ bhavēyya, kaṇhavipākaṃ dadeyya. Sukkaṃ, sukkavipākaṃ dadeyya. Dvinnampi appadānato pana “akaṇhaṃ asukka”nti vuttaṃ. **Nibbānanti** cettha arahattaṃ adhippettaṃ. Tañhi kilesanibbānante jātattā nibbānaṃ nāma. Taṃ esa abhijāyati pasavati karoti. **Sukkābhijātikoti** sukke ucce kule jāto. Sesam vuttanayeneva veditabbaṃ. “**Kaṇhaṃ kaṇhavipāka**”ntiādikassa kammacatukkassa attho heṭṭhā hārasampātavāre vibhatto eva.

111. Mānusattanti manussabhāvaṃ, manussayoninti attho. **Dveti** kiccaṃ akiccameva cāti dve. Kiccāni tveva kattabbāni, na cākkiccaṃ kiñci kattabbanti dasseti. **Sukiccanti**ādi “kicca”nti vuttānaṃ tesam sarūpadassanaṃ.

Padhānānti uttamāni visiṭṭhāni. Purimasmiṃ **pabbajitesūti** visaye bhumbaṃ. Dutiye adhikaraṇe. Tattha **nibbānanti** arahattaṃ adhippettaṃ. Kasmā panettha āmisapariccāgo arahattena samadhuro niddiṭṭhoti? Dakkhiṇeyyesu dakkhiṇāya mahapphalabhāvadassanatthaṃ. **Yena yena vā pana vatthunāti** ucchedādivatthunā. **Ajjhositāti** bhavataṇhādivasena ajjhositā. Dutiye **yena yena vā pana vatthunāti** amarāvikkhepavatthuādīnā.

Iminā asubhena kammavipākenāti asubhassa kāyaduccaritādikammassa vipākattā asubhena asivena kammavipākena. **Idaṃ bālalakkhaṇaṃ nibbattatīti** purimasmiṃ bhava ducarasamaṅgitāya bālo ayaṃ bhavatīti upalakkhaṇaṃ jāyati. **Idaṃ saṃkilesabhāgiyaṃ suttanti** idaṃ evaṃ pavattaṃ saṃkilesabhāgiyaṃ nāma suttaṃ.

Iminā subhenāti ettha vuttanayānusārena attho veditabbo. Tattha **mahāpurisalakkhaṇanti** paṇḍitalakkhaṇaṃ. **Kilesabhūmihīti** kilesaṭṭhānehi kilesāvattāhi vā. **Sānusayassa pariyaṭṭhānaṃ jāyatīti** appahīnānusayassa paccayasamāyoge rāgādayo pariyaṭṭhānavasena pavattanti. **Pariyaṭṭhito saṃyujjati**ti yo rāgādīhi pariyaṭṭhitacitto, so kāmarāgādīhi saṃyujjati nāma. **Saṃyujjanto upādiyati**ti yo kāmarāgasamyojanādīhi saṃyutto, so kāmupādānādīni akusalakammāni ca upādiyati. Sesam sabbattha uttānameva.

112. Evaṃ soḷasavidhena sāsanapaṭṭhānaṃ nānāsuttehi udāharaṇavasena vibhajitvā idāni aṭṭhavīsatividhena sāsanapaṭṭhānaṃ dassentena yasmā ayampi paṭṭhānavibhāgo mūlapadehi saṅgahito, na imassāpi tehi asaṅgahito padeso atthi, tasmā mūlapadaṃ vibhajitabbatañca dassetuṃ “**tattha katame aṭṭhārasa mūlapadā**”ti pucchāya vasena mūlapadāni uddharitvā “**lokiyaṃ lokuttara**”ntiādīnā navatikā, thavo cāti aṭṭhavīsatividhaṃ sāsanapaṭṭhānaṃ uddiṭṭhaṃ. Tattha **lokiyanti** loke niyutto, loke vā vidito lokiyo. Idha pana lokiyo attho yasmim sutte vutto, taṃ suttaṃ lokiyaṃ. Tathā **lokuttaraṃ**. Yasmim pana sutte padesena lokiyo, padesena lokuttaro vutto, taṃ **lokiyañca lokuttarañca**. Yañca satte adhiṭṭhāya sattapaññattimukhena desitaṃ, taṃ **sattādhiṭṭhānaṃ**. Dhammasaseneva desitaṃ **dhammādhiṭṭhānaṃ**. Ubhayavasena desitaṃ **sattādhiṭṭhānañca dhammādhiṭṭhānañca**. Iminā nayena sabbapadesu attho veditabbo. Buddhādīnaṃ pana guṇābhittavanavasena pavattaṃ suttaṃ **thavo** nāma.

Tattha **sajjukhīranti** taṅkhaṇaṃyeva dhenuyā thanehi nikkhantaṃ abbhunhakhīraṃ. **Muccatīti** pariṇamati. Idaṃ vuttaṃ hoti – yathā dhenuyā thanato nikkhantaṃ khīraṃ taṅkhaṇaṃyeva **na muccati** na pariṇamati na dadhibhāvaṃ gacchati, takkādiambilasamāyogato pana parato kālantarena pakatiṃ jahati

dadhibhāvaṃ pāpuṇāti, evamevaṃ pāpakammampi kiriyakkhaṇeyeva na vipaccati. Yadi vipacceyya, nānāgatīnaṃ sabhāvaṭṭhānaṃ siyā, na koci pāpakammaṃ kātuṃ visaheyya. Yāva pana kusalābhiniḃbattakkhandhā caranti, tāva taṃ te rakkhanti, tesam bhedā apāyesu nibbattāpanavasena vipaccati. Vipaccamānañca **ḍahantaṃ bālamaveti**, kiṃ viya? **Bharmacchannova pāvako**. Yathā hi chārikāya paṭicchanno vītaccitaṅgāro akkantopi chārikāya paṭicchannattā na tāva ḍahati, chārikaṃ pana tāpetvā cammādīni ḍahanavasena yāva matthaluṅgā ḍahanto gacchati, evamevaṃ pāpakammampi yena kataṃ, taṃ bālaṃ dutiye vā tatiye vā attabhāve nirayādīsu nibbattaṃ ḍahantaṃ anugacchatīti.

Yassindriyānīti tatthāyaṃ saṅkhepattho – yassa bhikkhuno chekena sārathinā sudantā assā viya cha **indriyāni samathaṃ** dantabhāvaṃ nibbisevanabhāvaṃ **gatāni**, tassa navavidhaṃ mānaṃ pahāya ṭhitattā **pahīnamānassa** catunnaṃ āsavānaṃ abhāvena **anāsavassa** tādiḃbhāve ṭhitassa tathārūpassa **devāpi pihayanti**, manussāpi dassanañca āgamanañca patthentiyevāti. **Āhāre satīti** āhārapaṭibaddhe chandarāge appahīne sati.

113. Sabbā disā anuparigamma cetasāti parito dasapi disā cittena anugantvā. **Nevajjhagāti** neva adhigaccheyya. **Piyataranti** atisayena piyaṃ. **Attanāti** attato. **Evaṃ piyo puthu attā paresanti** evaṃ kassacipi attanā piyatarassa anupalabbhanavasena visuṃ visuṃ paresaṃ sattānaṃ attā piyo. Yasmā ca etadeva, tasmā **na hiṃse paraṃ attakāmo** attano sukhakāmoti.

Bhūtāti jātā nibbattā. **Bhavissantīti** nibbattissanti. **Bhūtāti** vā khīṇāsavā. Te hi pahīnabhavattā bhūtā eva. **Gamissantīti** paralokaṃ gamissantīti. Khīṇāsavā pana anupādisesaṃ nibbānaṃ.

Piyo ca hotīti suparisuddhāya sīlasampattiyā, suparisuddhāya ca diṭṭhisampattiyā samannāgato piyo piyāyitabbo hoti. Vuttañhetam –

“Sīladassanasampannaṃ, dhammaṭṭhaṃ saccavādinam;
Attano kammakubbānaṃ, taṃ jano kurute piya’’nti. (dha. pa. 217);

Pāsānacchattaṃ viya garukātabbatāya **garu**. Uttarimanussadhammavasena sambhāvetabbatāya **bhāvanīyo**. Sīlaguṇena vā piyagaruādiḃbhāvā veditabbā. Tathā hi vuttaṃ – “ākaṅkheyya ce, bhikkhave, bhikkhu ‘sābrahmacārīnaṃ piyo ca assaṃ manāpo ca garu ca bhāvanīyo cā’ti, sīlesvevassa paripūrakārī’’ti (ma. ni. 1.65).

Vattāti “kālena vakkhāmī’’tiādiḃpañcadhamme attanī upaṭṭhāpetvā sābrahmacārīnaṃ ullumpanabhāve ṭhatvā vattā. **Vacanakkhamoti** sābrahmacārīni yena kenaci vuccamāno subbaco hutvā padakkhiṇaggaḃhitāya tesam vacanaṃ khamatīti vacanakkhamo. **Vattāti** vā dhammakathāvasena vacanasīlo. **Vacanakkhamoti** dhammaṃ saṃvaṇṇento parehi asaṃhīro hutvā tesam pucchāvacanakkhamatāya vacanakkhamo. **Gambhīrañca kathaṃ kattāti** saccapaṭiccasamuppādādiṃ, aññaṃ vā gambhīrakathaṃ kattā. **Na caṭṭhāne niyojakoti** dhammavinayādiṃ adhammāvinayādivasena avatvā dhammavinayādivaseneva dīpanato na ca aṭṭhāne niyojako.

Mātaraṃ pitaraṃ hantvāti ettha “taṇhā janeti purisa’’nti (saṃ. ni. 1.55-57) vacanato tīsu bhavesu sattānaṃ janānato taṇhā **mātā** nāma. “Ahaṃ asukassa nāma rañño, rājamahāmatassa vā putto’’ti pitaraṃ nissāya asmimānassa uppajjanato asmimāno **pitā** nāma. Loko viya rājānaṃ yasmā sabbadiṭṭhigatāni dve sassatucchedadiṭṭhiyo bhajanti, tasmā sassatucchedadiṭṭhiyo dve khattiyā **rājāno** nāma. Dvādasāyatānāni vitthataṭṭhena raṭṭhasadisattā **raṭṭhaṃ** nāma. Āyasādhako āyuttakapuriso viya taṃnissito nandirāgo **anucaro** nāma.

Anīghoti niddukkho. **Brāhmaṇoti** khīṇāsavo. Etena hi taṇhādayo arahattamaggaññāsīnā hatā bhāhitā. **Yātīti** so brāhmaṇo niddukkho hutvā yātīti.

Kāyeti karajakāye. **Cittanti** pādakajjhānacittam. **Samodahatīti** pakkhipati. Yadā dissamānena kāyena gantukāmo hoti, tadā kāyagatikam pādakajjhānacittam adhiṭṭhahatīti attho. **Cittepi kāyam samodahatīti** yadā sīgham gantukāmo hoti, tadā pādakajjhānacitte kāyam pakkhipati, cittagatikam kāyam adhiṭṭhahatīti attho. **Kāye sukhasaññaṅca lahusaññaṅca okkamitvāti** “seyyathāpi nāma balavā puriso samīñjitam vā bāham pasāreyya, pasāritam vā bāham samīñjeyyā”ti vuttanayena (mahāva. 8, 137; dī. ni. 2.66; ma. ni. 1.282; 2.338; saṃ. ni. 1.172) iddhimā kāye sukhasaññaṅca lahusaññaṅca okkamitvā paresam dissamānena kāyena āramarāmaṇeyyakādīni pekkhamāno cittaḥkhaṇeneva icchitaṭṭhānam gacchati.

114. Yam tam lokuttaram ñāṇanti sabbam lokam uttarivā abhibhavivā ṭhitattā vuttam, na pana lokuttarabhūmikattā. **Sabbakāle pavattatīti** āvajjanapaṭibaddhavuttittā vuttam, na satatam samitam pavattatīti. Na hi sabbaññutaññānam bhagavato sabbasmiṃyeva kāle uppajjatīti sakkā vattunti.

Kittayissāmi te santinti sabbakilesavūpasamahetutāya santim nibbānam dassessāmi. **Diṭṭhe dhammeti** diṭṭhe dukkhādidhamme, imasmim eva vā attabhāve. **Anītiḥanti** itihāsāti evam na itikirāya pavattam, attapaccakkhanti attho. **Yam viditvā sato caranti** “sabbe saṅkhārā aniccā”tiādinā (dha. pa. 277; theragā. 676; netti. 5) nayena sato hutvā caranto ariyamaggena yam santim viditvā. **Tare loke visattikanti** saṅkhāraloke visappanato visattikasaṅkhātānam taṇham tare tareyya samatikkameyyāti attho.

Tañcāham abhinandāmīti tam vuttappakāram santijotakam tumhākam vacanam aham patthayāmi, tam eva vā **santim uttamam** abhinandāmīti dhotako vadati. **Uddham adho tiriyañcāpi majjheti** ettha **uddhanti** anāgataṃ upari ca. **Adhoti** atītam heṭṭhā ca. **Tiriyañcāpi majjheti** paccuppannam parito ca. **Etam viditvā saṅgotīti** etam anāgatādiṃ saṅgajananaṭṭhānanti ñatvā. **Bhavābhavāyāti** khuddakānañceva mahantānañca bhavānam atthāya, sassatucchedāya vā.

Ariyasaccānanti ariyabhāvakarānam saccānam. **Ananubodhāti** abujjhanena ajānanena. **Appaṭivedhāti** appaṭivijjhanena. **Sandhāvīti** bhavato bhavassa gamanena sandhāvītam. **Saṃsaritanti** punappunam gamanavasena saṃsaritam. **Mamañceva tumhākañcāti** mayā ceva tumhehi ca. Atha vā **sandhāvītam saṃsaritanti** sandhāvanam saṃsaraṇam mamañceva tumhākañca ahoṣīti attho. **Bhavanettīti** bhavābhavam nayanamasatthā taṇhārajju. **Saṃsitanti** saṃsaritam. **Samūhatāti** suṭṭhu hatā chinnā appavattikatā.

Sabbe saṅkhārā aniccāti paccayehi saṅkharīyantīti “saṅkhārā”ti laddhanāmā pañcakkhandhā. Ādiantavantato aniccantikato tāvakālikato khaṇaparittato ca na niccāti **aniccā**. **Yadā paññāya passatīti** yadā vipassanāpaññāya passati. **Atha** imasmim vaṭṭadukkhe **nibbindati**, nibbindanto dukkharipajānanādivasena saccāni paṭivijjhati. **Esa maggo visuddhiyāti** yvāyam vuttanayena saccappaṭivedho, esa visuddhatthāya maggo. **Sabbe saṅkhārā dukkhāti** sabbe saṅkhārā abhiṇhasampaṭipīḷanaṭṭhena khayaṭṭhena ca dukkhāti. Sesam vuttanayameva. **Sabbe dhammā anattāti** sabbepi tebhūmakadhammā parato tucchato suññato asārato avasavattanato ca anattāti. Sesam purimasadisameva.

Seyyoti visiṭṭho uttamo. **Sadisoti** samāno. **Hīnoti** lāmako. Omānopi hi attano avaṅkaraṇamukhenapi saṃpagaṇhanavaseneva pavattati. Tena vuttam “**hīnohamasmī**”ti. **Kimaññatra yathābhūtaṃ adassanāti** sarasapabhaṅgutāya ekanteneva anavaṭṭhitasabhāvehi rūpadhammehi seyyādivasena attano ukkhipanassa tesam yathābhūtam adassanam aññānam vinā kiṃ aññam kāraṇam siyā, aññam kiñci kāraṇam tassa natthīti attho. **Vedanādīsipi** eseva nayo. Vuttavipariyāyena sukkapakkho veditabbo.

115. Ye ariyasaccāni vibhāvayantīti dukkhādīni ariyasaccāni paññāobhāsena saccappaṭicchādakakilesandhakāram vidhametvā attano pakāsāni pākātāni karonti. **Gambhīrapaññenāti** appameyyapaññatāya sadevakassapi lokassa ñāṇena alabbhaneyyapaṭiṭṭhapaññena sabbaññunāti vuttam hoti. **Sudesitānīti** saṅkhepavittārādīhi tehi tehi nayehi suṭṭhu desitāni. **Kiñcāpi te honti bhusam**

pamattāti te vibhāvitaariyasaccā puggalā kāmaṃ devarajjacakkavattirajjādipamādaṭṭhānaṃ āgamma bhusaṃ pamattā honti, tathāpi sotāpattimaggañāṇena abhisankhāraṇāṇassa nirodhena ṭhapetvā satta bhava anamatagge saṃsāre ye uppajjeyyūṃ nāmañca rūpañca, tesam niruddhattā **na aṭṭhamam bhavam ādiyanti**, sattamabhaveyeva pana vipassanaṃ ārabhitvā arahattaṃ pāpuṇantīti attho.

Yathindakhiloti ettha **yathāti** upamāvacanaṃ. **Indakhiloti** nagaradvārathirakaraṇatthaṃ ummārabbhantare aṭṭha vā dasa vā hatthe pathaviṃ khaṇitvā ākoṭitassa sārādārumayassa thambhassetam adhivacanaṃ. **Pathavissito siyāti** gambhīranemitāya anto pavisitvā bhūminissito siyā bhaveyya. **Catubbi vātehīti** catūhi disāhi āgatavātehi. **Asampakampiyoti** kompetuṃ vā cāletuṃ vā asakkuṇeyyo. **Tathūpamaṃ...pe... passatīti** yo cattāri ariyasaccāni paññāya ajjhogāhetvā passati, taṃ sappurisaṃ uttamaपुरisaṃ tathā dassanato sabbatitthiyavādavātehi asampakampiyatāya tathūpamaṃ yathāvuttaindakhilūpamaṃ vadāmīti attho.

Sotāpattiyaṅgehīti ariyasotāpajjanassa aṅgabhūtehi. **Ariyasāvako**ti ariyassa buddhassa bhagavato saddhammassavanante jātattā ariyasāvako. **Khīṇanirayomhīti** khīṇanirayo amhi. **Khīṇāpāyaduggativinipātoti** idaṃ nirayādīnaṃyeva vevacanasena vuttaṃ. Nirayādayo hi vaḍḍhisankhātato ayato apettā apāyā. Dukkassa gati paṭisaraṇanti **duggatiyo**. Dukkaṭakārino vivasā ettha nipatantīti **vinipātā**. Sotaṃ ariyamaggaṃ ādito patto adhigatoti **sotāpanno**. Akuppadhammatāya maggaphalānaṃ puthujjanabhāvasankhāte virūpe na nipatanasabhāvoti **avinipātadhammo**. Tato eva dhammaniyāmena niyatatāya **niyato**. Uparimaggattayasankhātā sambodhi avassaṃ pattabbatāya assa paraṃ ayaṇaṃ gati paṭisaraṇanti **sambodhiparāyaṇo**.

Niviṭṭhātīdīni padāni aññamaññavevacanāneva. **Sahadhammiyāti** sabrahmacārino. **Ariyakantehīti** ariyānaṃ kantehi piyehi manāpehi. Pañca sīlāni hi ariyasāvakaṇaṃ kantāni honti, bhavantarepi avijahanato. Tāni sandhāyetaṃ vuttaṃ. Sabbopi panettha saṃvaro labbhatiyeva. **Sotāpannohamasmīti** idaṃ desanāsīsameva. Sakadāgāmiādayopi “sakadāgāmīhamasmī”tiādīnā nayena byākarontiyeva. Yato sabbesampi sikkhāpadāvirodhena yuttaṭṭhāne byākaraṇaṃ anuññātamevāti.

Yassindriyānīti yassa ariyapuggalassa saddhādīni indriyāni. **Subhāvitānīti** ariyamaggabhāvanāvasena suṭṭhu bhāvitāni. **Ajjhattaṃ bahiddhā cāti** orambhāgiyānaṃ uddhambhāgiyānañca saṃyojanānaṃ pajahanavasena. Tenāha “**sabbaloke**”ti. **Nibbijjhāti** nibbijjhivā paṭivijjhivā.

Dhammapadānīti dhammakotṭhāsāni. **Anabhijjhā dhammapadaṃ** nāma alobho vā alobhasīsena adhigatajhanavipassanāmaggaphalanibbānāni vā dasaasubhavasena vā adhigatajhanādīni **anabhijjhā dhammapadaṃ**. Catubrahmavihārasena adhigatāni **abyāpādo dhammapadaṃ**. Dasānussatiāhārepaṭikkūlasaññāvasena adhigatāni **sammāsati dhammapadaṃ**. Dasakasiṇānāpānavasena adhigatāni **sammāsamādhi dhammapadaṃ**.

Pañca chindeti heṭṭhā apāyupapattisaṃvattanikāni pañca orambhāgiyasamyojanāni pāde baddharajjuṃ viya puriso satthena heṭṭhā maggattayena chindeyya. **Pañca jaheti** uparidevalokasampāpakāni pañca uddhambhāgiyasamyojanāni puriso gīvāya baddharajjuṃ viya arahattamaggena jahēyya chindeyyevāti attho. **Pañca cattari bhāvayeti** uddhambhāgiyasamyojanānaṃ pahānatthāya saddhādīni pañcindriyāni uttari bhāveyya. Pañca saṅgātigoti evaṃ sante pañcanaṃ rāgadosamohamānadiṭṭhisāṅgānaṃ atikkamanena pañcasāṅgātigo hutvā **bhikkhu “oghatiṇṇo”ti vuccati**, nittiṇṇacaturgohoti vuccatīti attho.

Anaññātaṃ appaṭividdhaṃ catusaccadhammaṃ, amatapadaṃyeva vā ñassāmi jānissāmīti paṭipannassa paṭhamamaggaṭṭhassa indriyanti **aññātaññassāmīti indriyaṃ**. Paṭhamamaggañāṇaṃhi taṃpubbabhāgavasena evaṃ vuttaṃ. Ājānāti paṭhamamaggena ñātamariyādaṃ anatikkamitvā jānātīti añño, tassa indriyanti **aññindriyaṃ**, heṭṭhā tīsu phalesu, upari tīsu maggesu ca ñāṇassetam adhivacanaṃ.

Aññātāvino catūsu saccesu niṭṭhitakiccassa arahato indriyanti **aññātāvindriyaṃ**,
aggaphalaññānassetam adhivacanaṃ. **Anabhisametassāti** appaṭiveddhassa. **Abhisamayāyāti** paṭivedhāya.

116. Bālalakkhaṇānīti bālassa upalakkhaṇakāraṇāni. **Bālanimittānīti** “bālo aya”nti gahetuṃ
nimittāni kāraṇāni. **Bālāpadānānīti** bālassa porāṇāni viruḷhāni kammāni. “**Duccintitacintī**”tiādīsu
duccintitaṃ abhijjhaṃ byāpādaṃ micchādassanañca cintetīti **duccintitacintī**. Dubbhāsitaṃ musāvādādiṃ
bhāsatīti **dubbhāsitabhāsī**. Dukkaṭaṃ pāṇātipātādikammaṃ karotīti **dukkaṭakammakārī**.
Vuttavipariyāyena sukkapakkho veditabbo.

Bhiyyoti uparūpari. **Pakujjheyyunti** virujjheyyuṃ. “Pakuppeyyu”ntipi pāṭho. **Bhusenāti** daḷhena.
Daṇḍenāti daṇḍadānena. **Dhīroti** paṇḍito sappaññajātiko. **Nisedhayeti** paṭibāheyya. Puna kiñci kātuṃ
vattuṃ vā asamatthaṃ kareyyāti attho.

Paranti paccatthikaṃ. **Yo sato upasammatīti** yo satimā hutvā upasammati, tassa
upasamaṃyevāhaṃ bālassa paṭisedhanaṃ maññāmīti attho.

Vajjanti dosaṃ. **Yadā naṃ maññatīti** yasmā naṃ maññati. **Ajjhāruhatīti** ajjhottharati. **Gova**
bhiyyo palāyinati yathā goyūthe tāvadeva dve gāvo yujjhante gogaṇo olokento tiṭṭhati yāva na eko
palāyati, yadā pana palāyati, atha taṃ palāyīnaṃ sabbo gogaṇo bhiyyo ajjhottharati, evaṃ **dummedho**
khamantaṃ bhiyyo ajjhottharatīti attho.

Sadatthaparamāti sakatthaparamā. **Khantiyā bhiyyo na vijjatīti** tesu sakatthaparamesu atthesu
khantito uttaritaro añño attho na vijjati. **Tamāhu paramaṃ khantinti** yo balavā titikkhati, tassa taṃ
khantiṃ paramaṃ āhu. **Bālabalaṃ** nāma aññāṇabalaṃ. **Taṃ yassa balaṃ, abalameva** taṃ, na taṃ
balanti **āhu** kathenti dīpenti. **Dhammaguttassāti** dhammena rakkhitassa dhammaṃ vā rakkhantassa.
Paṭivattāti paṭippharivā vattā, paṭipparivā vā yaṃ vā taṃ vā vadeyyāsi. Dhammaṭṭhaṃ pana cāletuṃ
samattho nāma natthi. **Tasseva tena pāpiyoti** tena kodhena tasseva puggalassa pāpaṃ hoti. Katarassāti?
Yo kuddhaṃ paṭikujjhati, tassa. Tattha **kuddhanti** sampadāne upayogavacanaṃ, kuddhassāti attho.
Tikicchantānanti ekavacane bahuvacanaṃ, tikicchantanti attho. **Janā maññantīti** evarūpaṃ **attano ca**
parassa cāti ubhinnaṃ atthaṃ tikicchantaṃ nipphādentam puggalaṃ “bālo aya”nti
andhabālaputhujjanā evaṃ maññanti. **Ye dhammassa akovidāti** ye catusaccadhamme akovidā acchekā,
te evaṃ maññantīti attho.

117. Pattanti adhigataṃ etarahi anubhuyyamaṇaṃ kāmūpakaraṇaṃ **pattabbanti** tadeva anāgate
adhigantabbaṃ anubhavitabbaṃ, **ubhayametam rajānukinṇanti** tadubhayampi rāgarajādīhi avakinṇaṃ.
Āturassāti rāgādikilesāturassa. **Anusikkhatoti** kilesabahulapuggale anusikkhato. **Ye ca sikkhāsārāti** ye
yathāsamaḍḍinaṃ sīlavatādisaṅkhātaṃ sikkhaṃ sārato gahetvā ṭhitā. Tenāha – “**sīlaṃ vataṃ jīvitaṃ**
brahmacariya”nti. Tattha yaṃ “na karomī”ti oramati, taṃ **sīlaṃ**. Yaṃ vesabhojanakiccacaraṇādi, taṃ
vataṃ. **Jīvanti** ājīvo. **Brahmacariyanti** methunavirati. **Upaṭṭhānasārāti** etesaṃ sīlādīnaṃ
anuṭṭhānasārā. Etehi eva saṃsārasuddhīti tāni sārato gahetvā ṭhitāti attho.

Iccete ubho antāti iti sīlabbataparāmāsamukhena attakilamathānuyogo, kāmesu
anavajjasāññitāmukhena kāmasukhallikānuyogo cāti ete ubho antā. Te ca kho yathākkamaṃ āyatiṃ
pattabbe, etarahi patte ca rāgarajādiokiṇṇe kāmaguṇe allīnehi kilesāturānaṃ anusikkhantehi, sayañca
kilesātureheva paṭipajjitabbā, tato eva ca te **kaṭasivaḍḍhanā** aparāparaṃ jarāmarañehi sivathikāya
vaḍḍhanasīlā ekanteneva kaṭasiṃ vaḍḍhenti, sayam vaḍḍhantā pare ca antadvaye samādapentā
vaḍḍhāpentī cāti attho.

Ubho ante anabhiññāyāti yathāvutte ubho ante ajānitvā. **Olīyanti eketi** “sassato attā ca loko cā”ti
olīyanatanhābhinivesavasena avalīyanti ekacce. **Atidhāvanti eketi** ekacce – “ucchijjati vinassati attā ca
loko cā”ti atidhāvanābhinivesavasena atikkamanti.

Na **amaññimsu** tesañca tañhādimaññānānaṃ pahīnattā. Tato eva anupādāparinibbānato tividhampi **vaṭṭaṃ tesam paññāpanāya natthīti**.

Jaññāti jāneyya. **Samyujeti** samyojeyya. **Mānusanti** manussānaṃ idanti mānusaṃ, manussabhavapariyāpannaṃ. **Kiñhi tassa sakaṃ hotīti** tassa maccumukhaṃ pavisantassa sattassa kiṃ aññaṃ sakaṃ nāma aññatra kalyāṇakammato. Kammassakā hi sattā. Tenāha – “**tasmā kareyya kalyāṇa**”ntiādi. Tattha **samparāyikanti** samparāyaphalanibbattaṃ.

118. Ime dhammāti ime kusalā vā akusalā vā dhammā. **Evamgahitāti** evaṃ samādinnaṃ uppāditā. **Idaṃ phalanti** idaṃ iṭṭhavipākaṃ aniṭṭhavipākañca phalaṃ. **Ayamattthoti** ayam vuddhi, ayam hānīti attho. **Aññampi evamjātiyanti** ekamsabyākaraṇīyaṃ vadati.

Ākañkhato na jāneyyunti tattha yena hetunā bhagavato yā ākañkhā, sā aññesaṃ avisayoti āha – “**kintaṃ bhagavā ākañkhatīti. Idaṃ avisajjanīya**”nti.

Ettakoti etaparimāṇo. **Sīlakkhandheti** sīlakkhandhahetu. “Sīlakkhandhenā”tipi pāṭho. Sesapadesupi eseva nayo. **Iriyāyanti** kāyavacīsamācāre. **Pabhāveti** ānubhāve. **Hitesitāyanti** mettāya. **Iddhiyanti** iddhividhāya. Ettakā buddhaguṇā, te ca paccekaṃ evaṃpabhāvā. Tathā maggaphalanibbānāni evamānubhāvāni. Ariyasaṅgho evaṃvidhaguṇehi yuttoti.

Tiṇṇaṃ ratanānaṃ mahānubhāvātā na sabbathā aññesaṃ visayo, bhagavato eva visayoti āha – “**buddhavisayo avisajjanīyo**”ti. Tena yo aññopi attho buddhavisayo, so avisajjanīyoti dasseti. Vuttañhetam bhagavatā – “buddhavisayo acinteyyo na cintetabbo, yaṃ cinto ummādassa vighātassa bhāgī assā”ti (a. ni. 4.77). **Katamā pubbā koṭīti avisajjanīyanti** “katamā pubbā koṭī”ti kenaci kataṃ pucchanaṃ avisajjanīyaṃ. Kasmā? Saṃsārassa purimāya koṭiyā abhāvato. Tenevāha – “purimā, bhikkhave, koṭi na paññāyatī”ti (a. ni. 10.61). Tattha **na paññāyatīti** na dissati, na upalabbhatīti attho. Na paññāyatīti aññassa nāṇavisayo na hotīti pana attham sandhāya “**na paññāyatīti sāvakanam nāṇavekallenā**”tiādi vuttaṃ. Tattha **attūpanāyikāti** attā upanetabbo etissāti attūpanāyikā. **Natthi buddhānaṃ bhagavantānaṃ avijānanāti** etena purimāya koṭiyā abhāvato eva na paññāyati, na tattha nāṇassa paṭighātoti dasseti.

Yaṃ pana atthi, taṃ aññesaṃ appameyyampi bhagavato na appameyyanti bhagavato sabbattha appaṭihataññānataṃ dassetuṃ “**yathā bhagavā kokālikaṃ bhikkhuṃ ārabbhā**”tiādimāha. Tattha **aññataraṃ bhikkhanti** nāmagottena apākaṭaṃ. “Kīva dīghaṃ nu kho, bhante, padume niraye āyuppamaṇa”nti pañhaṃ pucchitvā nisinnaṃ ekaṃ bhikkhuṃ evamāhāti. Etthāyaṃ pāṭhaseso – dīghaṃ kho, bhikkhu, padume niraye āyuppamaṇaṃ, taṃ na sukaraṃ sañkhātuṃ “**ettakāni vassāni**”ti vā “**ettakāni vassasatāni**”ti vā “**ettakāni vassasahassāni**”ti vā “**ettakāni vassasatasahassāni**”ti vāti. Sakkā pana, bhante, upamā kātunti. “Sakkā bhikkhū”ti bhagavā avoca. Seyyathāpi, bhikkhu, vīsatickhāriko kosalako tilavāho. Tato puriso vassasatassa vassasatassa accayena ekamekaṃ tilaṃ uddhareyya. Khippataraṃ kho so, bhikkhu, vīsatickhāriko kosalako tilavāho iminā upakkamena parikkhayaṃ pariādānaṃ gaccheyya, na tveva eko abbudo nirayo. Seyyathāpi, bhikkhu, vīsati abbudā nirayā, evameko nirabbudo nirayotiādi (saṃ. ni. 1.181; a. ni. 10.89; su. ni. kokālikasutta).

Tattha **vīsatickhārikoti** māgadhakena patthena cattāro patthā kosalaraṭṭhe eko pattho hoti. Tena patthena cattāro patthā āḷhakaṃ, cattāri āḷhakāni doṇaṃ, catudonā mānikā, catumānikā khārī. Tāya khārīyā vīsatickhāriko tilavāho. **Tilavāhoti** tilasakaṭaṃ. **Abbudo nirayoti** abbudo nāma eko paccekanirayo natthi, avīcimhi eva pana abbudagaṇānāya paccanokāso “**abbudo nirayo**”ti vutto. Esa nayo **nirabbudā**ḍisupi.

Tattha vassagaṇānāpi evaṃ veditabbā – yathā hi satamaṃsahasassāni **koṭi** hoti. Evaṃ satamaṃsahasassakoṭīyo **pakoṭi** nāma. Satamaṃsahasassapakoṭīyo **koṭipakoṭi** nāma.

Satamsatasahassakoṭipakoṭiyo **nahutaṃ**. Satamsatasahassanahutāni **ninnahutaṃ**. Satamsatasahassāni ninnahutāni eko **abbudo**. Tato vīsatiḡuṇo **nirabbudo**. Esa nayo sabbattha. Ayañca gaṇaṇā aparicitānaṃ dukkarāti vuttaṃ – ‘taṃ na sukaraṃ saṅkhātu’nti. Keci pana ‘tatta tatta paridevanānattena kammakāraṇānānattenapi imāni nāmāni laddhāni’ti vadanti. Apare ‘sītanarakā ete’ti. **Cittaṃ āghātetvāti** cittaṃ padūsetvā.

119. Kathaṃ jinoti pakārapucchā. **Kena jinoti** kāraṇapucchā. Kena kāraṇena kena hetunā kāya paṭipattiyā jinoti pucchati. **Kathanti** pana kena pakārena kiṃ atītānaṃ, udāhu anāgatānaṃ paccuppanānaṃ kilesānaṃ pahānena jinoti pucchati, tasmā taṃ ‘**visajjanīya**’nti vuttaṃ. **Katamo jinoti** kiṃ rūpaṃ jino, udāhu vedanā saññā saṅkhārā viññāṇaṃ jino. Rūpādivinimutto vā añño jino, yo ‘attā’ti vuccatīti imamattaṃ sandhāyāha ‘**avisajjanīya**’nti. **Kittakoti** pamāṇato kiṃparimāṇo.

Atthi tathāgatoti atthi satto. Yvāyamāyasmā ‘evaṃnāmo evaṃgotto’ti pañcakkhandhe upādāya paññapīyati, tassa puggalassa adhippetattā vuttaṃ ‘**visajjanīya**’nti. **Rūpaṃ tathāgatoti** rūpaṃ attāti sakkāyadiṭṭhivasena pucchati katvā vuttaṃ ‘**avisajjanīya**’nti. Iminā nayena sabbapadesu attho veditabbo.

120. Bālaṃ pīṭhasamāruḷhantiādīni sāmīatthe upayogavacanāni. **Kāyena duccharitānīti** kāyena duṭṭhu katāni. **Olabbhanti** avalambanti avatthariyanti. Sesapadadvayaṃ tasseva vevacanāṃ. Olambanādiākārena hi tāni upaṭṭhahanti, tasmā evaṃ vuttaṃ. **Mahatanti** mahantānaṃ. **Pathaviyaṃ olabantīti** pathavitale pattharanti. Sesapadadvayaṃ tasseva vevacanāṃ. Pattharaṇākāroyeva hesa. **Tatra, bhikkhave, bālassāti** tasmim upaṭṭhahanākāre bālassa evaṃ hoti.

Lābhā vo, bhikkhaveti bhikkhave, ye ime tumhehi paṭiladdhā manussattasaddhāpaṭilābhādayo, lābhā vo tumhākaṃ lābhā eva. **Suladdhanti** yampidaṃ pabbajitvā catupārisuddhisīlādisampādanāṃ laddhaṃ, tampi suladdhaṃ. **Khaṇo vo paṭiladdhoti** aṭṭhaakkhaṇavajjito navamoyaṃ khaṇo paṭiladdho maggabrahmacariyavāsāya. ‘**Diṭṭhā mayā**’tiādīnā ekadesanidassanena aṭṭha akkhaṇe vibhāveti.

121. Yaṃ yaṃ duggatiṃ yo gacchati. So naṃ adhammoti yo adhammo tena **carito**, so naṃ adhammacāriṃ puggalaṃ. **Hanāti**ti bādhati.

Appesakkhatāti appānubhāvatā. **Dubbaṇṇatāti** virūpatā bībhacchatā. **Duppaññatāti** nippaññatā ahetukapaṭisandhivasena eḷamūgatā.

122. Vācānurakkhīti catunnaṃ vacīduccaritānaṃ parivajjanena vācānurakkhī. Abhijjhādīnaṃ anuppādanena manasā suṭṭhu **saṃvuto**. Pāṇātipātādayo pajahanto **kāyena ca akusalaṃ na kayirā, ete tayo kamma pathe visodhaye**. Evaṃ visodhento hi sīlakkhandhādīnaṃ esakehi buddhādīhi isīhi **paveditaṃ** ariyaṃ aṭṭhaṅgikaṃ **maggam** ārādheyyāti. **Dukkaṭanti kāyena vācāya manasā** ca dukkaṭaṃ sāvajjaṃ dukkhudrayaṃ duggatisaṃvattaniyaṃ kammaṃ **yassa natthi. Saṃvutaṃ tīhi ṭhānehīti** etehi tīhi kāraṇehi kāyaduccharitādīnaṃ pavesanivāraṇato pihitaṃ, **taṃ ahaṃ ‘brāhmaṇa**’nti vadāmīti.

Accantadussīlyanti ekantadussīlabhāvo. Gihī vāpi jātito paṭṭhāya dasa akusalakamma pathe karonto, pabbajito vāpi upasampannadivasato paṭṭhāya garukāpattim āpajjamāno accantadussīlo nāma. Idha pana yo dvīsu tīsu attabhāvesu dussīlo, tassa gatiyā āgataṃ dussīlabhāvaṃ sandhāyetaṃ vuttaṃ. Dussīlabhāvoti cettha dussīlassa cha dvārāni nissāya uppanā taṇhā veditabbā. **Māluvā sālami vottaṃ**anti yassa puggalassa taṃ taṇhāsaṅkhātaṃ dussīyaṃ. Yathā nāma māluvā sālami otthataṃ deve vassante pattehi udakaṃ paṭicchitvā saṃbhañjanavasena sabbatthakameva pariyanandhati, evaṃ attabhāvaṃ otthataṃ pariyanandhitvā ṭhitaṃ **so** māluvāya saṃbhañjitvā bhūmiyaṃ pātiyamāno rukkho viya tāya dussīlyasaṅkhātāya taṇhāya saṃbhañjitvā apāyesu pātiyamāno, **yathā naṃ** anattakāmo **diso icchati, tathā attānaṃ karoti** nāmāti attho.

“**Attanā hi kata**”nti gāthāya ayaṃ saṅkhepattho – yathā pāsāṇamayam pāsāṇasambhavam **vajiram** tameva **asmamayam maṇim** attano utthānaṭṭhānasāṅkhātam pāsāṇamaṇim khāyitvā chiddāchiddam khaṇḍākhaṇḍam katvā aparibhogam karoti, evamevaṃ **attanā katam** attani jātam **attasambhavam pāpam dummedham** nippaññam puggalam catūsu apāyesu **abhimatthati** kantati viddhamsetīti.

Niseviyāti katvā. **Garahāti** gārayhā. **Bālamatīti** mandabuddhino. **Khayā ca kammassāti** kammakkhayakaraññena kamma khepanato. **Vimuttacetasoti** samucchadavimuttiyā paṭippassaddhivimuttiyā ca vimuttacitto. **Nibbanti te jotirivindhanakkhayāti** yathā nāma anupādāno jātavedo nibbāyati, evamevaṃ abhisāṅkhārassa viññāṇassa anavasesakkhayā nibbāyati.

123. “Yathāpi bhamaro”ti gāthāyam **bhamaroti** yā kāci madhukarajāti. **Pupphanti** pupphārāme caranto pupphañca tassa **vaṇṇaṇca gandhaṇca aheṭṭhayam** aheṭṭhayanto avināsento caratīti attho. Evaṃ caritvā ca **paleti rasamādāyāti** yāvadattham rasam pivitvā aparampi madhukaraṇatthāya rasam gahetvā ḍeti. So ekam vanagahanam ajjhogāhetvā rukkhasusirādīsu tam rajamissakam rasam ṭhapetvā anupubbena madhurarasam madhum karoti, na tassa pupphārāme caritapaccayā puppham vā tassa vaṇṇo vā gandho vā vinassati, atha kho puppham pākatikameva hoti. **Evaṃ gāme munī caretī** evam sekkho asekkho vā anagāriyamuni kulapaṭipāṭiyā gāme bhikkham gaṇhanto careyyāti attho. Na hi tassa gāme caraṇapaccayā saddhāhāni vā bhogahāni vā hoti, saddhāpi bhogāpi pākatikāva honti. Evaṃ caritvā ca pana gāmato nikkhamitvā bahigāme udakaphāsukaṭṭhāne saṅghāṭim paññapetvā nisinno akkhabhañjana- (mi. pa. 6.1.2) vaṇalepanaputtamaṃsūpamavasena (mi. pa. 6.1.2; sam. ni. 2.63) paccavekkhanto piṇḍapātam paribhuñjitvā tathārūpam vanasaṇḍam anupavisitvā ajjhattikakammaṭṭhānam sammasanto maggaphalāni hatthagatāneva karoti. Asekkhamuni pana diṭṭhadhammasukhavihāramanuyuñjati. Ayamassa bhamarena madhukarena sarikkhatā. Khīṇāsavo panettha adhippetoti.

Pātimokkhasamvarasamvuto viharatīti yo nam pāti rakkhati, tam mokkheti moceti apāyikādīhi dukkhehīti pātimokkho. So eva kāyikavācasikassa vītikkamassa samvaraṇato pidahanato samvaro. Tena pātimokkhasamvarena samvuto samannāgato hutvā sabbiriyāpathesu carati. **Ācāragocarasampannoti** ācārena ca gocarena ca sampanno. **Aṇumattesūti** appamattakesu. **Vajjesūti** akusaladhammesu. **Bhayadassāvīti** bhayam dassī. **Samādāya sikkhati sikkhāpadesūti** sikkhāpadesu yaṃ kiñci sikkhitabbaṃ, tam sabbaṃ sammā ādiyitvā sikkhati.

Kāyakammavacīkammaena samannāgato, kusalena parisuddhājīvoti ettha ācāragocaraggahaṇeneva kusale kāyakamme vacīkamme ca gahitepi yasmā idam ājīvapārisuddhisīlam na ākāśādīsu uppajjati, kāyavacīdvāresu eva pana uppajjati, tasmā tassa uppattidvāradassanattham “kāyavacīkammaena samannāgato, kusalenā”ti vuttaṃ. Yasmā pana tena samannāgato, tasmā parisuddhājīvo, ājīvapārisuddhipi sīlamevāti dassanattham etaṃ vuttaṃ. Vuttañhetam – “katame ca thapati kusalā sīlā? Kusalam kāyakammaṃ kusalam vacīkammaṃ, parisuddham ājīvampi kho aham thapati sīlasmim vadāmi”ti (ma. ni. 2.265). **Āraddhavīriyoti** yassa kāyikam cetasañca vīriyam āraddham hoti, so “āraddhavīriyo”ti vuccati. Tattha yo gaṇasaṅgaṇikam vinodetvā catūsu iriyāpathesu aṭṭhaārambhavatthavasena ekako hoti, tassa kāyikam vīriyam āraddham nāma hoti. Yo cittasaṅgaṇikam vinodetvā aṭṭhasamāpattivasena ekako hoti, gamanādīsu uppannakilesam uppannaṭṭhāneyeva niggaṇhitvā jhānam nibbatteti, tassa cetasaṅgaṇikam vīriyam āraddham nāma hoti. Evaṃ āraddhavīriyo. **Thānavāti** ṭhitimā. **Daḷhaparakkamoti** thiraparakkamo. **Anikkhattadhuro...pe... sacchikiriyāyāti** samkilesadhammānam pahānattham vodānadhammānam sampādanattham, paccakkhakarāṇatthañca dhuram anikkhipitvā vīriyam usukkāpento viharati. **Pañnavāti** pañcannaṃ khandhānam udayabbayapariggāhikāya paññāya samannāgato. Tenāha “**udayatthagāminiyā**”ti.

Natthi puttasaṃam pemanti mātāpitāro virūpepi attano puttake suvaṇṇabimbakam viya maññanti mālaguḷe viya sīsādīsu katvā pariharamānā. Tehi uhaditāpi omuttitāpi gandhavilepanam paṭicchantā viya somanassam āpajjanti. Tenāha – “natthi puttasaṃam pema”nti. Puttapemena samam pemam nāma natthīti vuttaṃ hoti. **Gosamitanti** gohi samam godhanasadisam aññaṃ **dhanam** nāma **natthi**.

Sūriyasamā ābhāti sūriyābhāya samā aññā **ābhā** nāma **natthi**. **Samuddaparamā**ti ye keci aññe sarā nāma, sabbe te samuddaparamā. Samuddo tesam uttamo, samuddasadisam aññam udakam nidānam nāma natthi bhagavāti vadati.

Yasmā pana attapemena samam pemaṃ natthi. Mātāpitaro hi chaḍḍetvāpi puttadhītaro aposetvā attānameva posenti. Dhaññena ca **samam dhanam** nāma **natthi**. Tathārūpe hi kāle hiraññasuvaṇṇādīnīpi gomahiṃsādīnīpi dhaññaggahaṇattham dhaññasāmikānameva santikaṃ gahetvā gacchanti. Paññāya ca **samā ābhā** nāma **natthi**. Sūriyādayo hi ekadesamyeva obhāsenti, paccuppannameva ca tamam vinodenti, paññā pana dasasahassimpī lokadhātuṃ ekapajjotaṃ kātuṃ sakkoti, atītamśādīpaṭicchādakañca tamam vidhamati. Meghavuṭṭhiyā ca samo saro nāma natthi. Nadī vā hi hotu taḷākādīni vā, vuṭṭhisamo saro nāma natthi. Meghavuṭṭhiyā hi pacchinnāya mahāsamudde aṅgulipabbatemanamattampi udakam na hoti, vuṭṭhiyā pana pavattamānāya yāva ābhassarabhavanāpi ekodakam hoti. Tasmā bhagavā devatāvacaṇam paṭikkhipanavasena paṭigātham vadanto “**natthi attasamam pema**”ntiādīmāha.

124. Kimsūda bhītāti kiṃ nu bhītā. **Maggo canekāyatano pavuttoti** aṭṭhatimsārammaṇavasena anekehi kāraṇehi maggo kathito, evaṃ sante kissa bhītā hutvā ayam janatā dvāsaṭṭhi diṭṭhiyo aggahesīti vadati. **Bhūripaṇṇā**ti bahupañña ussannaṇaṇa. **Paralokaṃ na bhāyati** imasmā lokā paralokaṃ gacchanto na bhāyeyya.

Paṇidhāyāti ṭhapetvā. **Gharamāvasantoti** anāthapiṇḍikādayo viya bahvannapāne ghare vasanto. **Samvibhāgī**ti accharāya gahitampi nakhena phāletvā parassa datvāva bhuñjanasīlo. **Vadaññū**ti yācakānam yācanavasena vuttavacanaññū, vacanīyo vā. Ettha ca **vācanti** cattāri vacīsucaritāni gahitāni. **Mananti** tīṇi manosucaritāni. **Kāyenā**ti tīṇi kāyasucaritāni. Ime dasa kusalakammamathā pubbasuddhiaṅgam nāma. “**Bahvannapānam gharamāvasanto**”ti iminā yaññaupakkharo gahito. **Saddhoti** ekaṃ aṅgam, **mudū**ti ekaṃ, **samvibhāgī**ti ekaṃ, **vadaññū**ti ekanti imāni cattāri aṅgāni sandhāya “**etesu dhammesu ṭhito catūsū**”ti āha.

Aparo nayo – “vāca”ntiādīni tīṇi aṅgāni, “bahvannapāna”nti iminā yaññaupakkharova gahito, “saddho mudu samvibhāgī vadaññū”ti ekaṃ aṅgam.

Aparo dukanayo nāma hoti – “vācam manañcā”ti ekaṃ aṅgam, “kāyena pāpāni akubbamāno bahvannapānam gharamāvasanto”ti ekaṃ, “saddho mudū”ti ekaṃ, “samvibhāgī vadaññū”ti ekanti etesu catūsū dhammesu ṭhito dhamme ṭhito nāma hoti. So ito **paralokaṃ gacchantona** bhāyati.

Kāyasamācārampītiādī pātimokkhasamvaradassanam. Tattha **duvidhenā**ti dvividhena, dvīhi koṭṭhāsehīti attho. **Jaññā**ti jāneyya. Sīlakathā ca nāmesā kammamathavasena vā paṇṇattivasena vā kathetabbā. Tattha kammamathavasena tāva kathentena asevitabbakāyasamācāro pāṇātipātādinnādānamicchācārehi kathetabbo. Paṇṇattivasena kāyadvāre paññattasikkhāpadavīttikamavasena. Sevītabbakāyasamācāro pāṇātipātādiveramaṇīhi ceva kāyadvāre paññattasikkhāpadaavīttikamena ca kathetabbo.

Asevitabbavacīsamācāro musāvādādivacīduccaritena ceva vacīdvāre paññattasikkhāpadavīttikamena ca kathetabbo. Sevītabbavacīsamācāro musāvādādiveramaṇīhi ceva vacīdvāre paññattasikkhāpadaavīttikamena ca kathetabbo.

Pariyesanā pana kāyavācāhi pariyesanā eva, sā kāyavacīsamācārāggahaṇena gahitāpi yasmā ājīvaṭṭhamakasīlam nāma etasmiṃyeva dvāradvāye uppajjati, na ākāse, tasmā ājīvaṭṭhamakasīladassanattham viṣuṃ vuttā. Tattha nasevitabbapariyesanā anariyapariyesanāya kathetabbā, sevītabbapariyesanā ariyapariyesanāya. Vuttañhetam – “katamā ca, bhikkhave, anariyapariyesanā? Idha, bhikkhave, ekacco attanā jātidhammo samāno jātidhammaṃyeva pariyesatī”tiādī (ma. ni. 1.274). Tathā “katamā ca, bhikkhave, ariyapariyesanā? Idha, bhikkhave, ekacco

attanā jātidhammo samāno jātidhamme ādīnavam veditvā ajātam anuttaram yogakkhemam nibbānam pariyesati”tiādi (ma. ni. 1.275).

170. Maggānaṭṭhaṅgikoti jaṅghamaggādayo vā hontu dvāsaṭṭhidiṭṭhigatamaggā vā, sabbesampi maggānaṃ sammādiṭṭhiādīhi aṭṭhahi aṅgehi micchādiṭṭhiādīnaṃ aṭṭhannaṃ pāpadhammānaṃ pahānakaro nirodham ārammaṇaṃ katvā catūsupi saccesu dukkhaparijānanādikiccaṃ sādhayamāno aṭṭhaṅgiko maggo **seṭṭho** uttamo. **Saccānaṃ caturo padāti** “saccaṃ bhaṇe na kujjheyā”ti (dha. pa. 224) āgataṃ vacīsaccaṃ vā hotu, “sacco brāhmaṇo, sacco khattiyo”tiādibhedam sammutisaccaṃ vā, “idameva saccam moghamañña”nti (ma. ni. 3.331; udā. 54; mahāni. 20) diṭṭhisaccaṃ vā, “ekañhi saccam na dutiyamatthi”ti (su. ni. 890; mahāni. 119) vuttaṃ paramatthasaccaṃ vā hotu. Sabbesampi imesaṃ saccānaṃ parijānitabbaṭṭhena pahātabbaṭṭhena sacchikātabbaṭṭhena bhāvetabbaṭṭhena ekapaṭivedhaṭṭhena tathapaṭivedhaṭṭhena ca “dukkham ariyasacca”ntiādayo (mahāva. 14; dī. ni. 2.387; ma. ni. 1.120) caturo padā seṭṭhā nāma. **Virāgo seṭṭho dhammānanti** “yāvatā, bhikkhave, dhammā saṅkhatā vā asaṅkhatā vā, virāgo tesam dhammānaṃ aggamakkhāyati”ti (a. ni. 4.34; 5.32; itivu. 90) vacanato nibbānasaṅkhāto virāgo sabbadhammānaṃ seṭṭho. **Dvipadānaṃ ca cakkhumāti** sabbesampi devamanussādibhedānaṃ dvipadānaṃ pañcahi cakkhūhi cakkhumā bhagavāva seṭṭhoti.

Aggānīti uttamāni. **Yāvatāti** yattakā. **Apadāti** nippadā ahimacchādayo. **Dvipadāti** manussapakkhijātādayo. **Catuppadāti** hatthiassādayo. **Bahuppadāti** satapadiādayo. **Rūpinoti** kāmāvacararūpāvacarasattā. **Asaññinoti** asaññībhava nibbattasattā. **Nevasaññīnāsaññinoti** bhavagge nibbattasattā. **Aggamakkhāyati** guṇehi aggo uttamo seṭṭho akkhāyati.

Asaṅkhatānanti nibbānameva vuttaṃ. **Virāgoti**ādīni ca nibbānasseva nāmāni. Tañhi āgamma sabbe kilesā virajjanti, sabbe rāgamadādayo madā nimmadā honti abhāvaṃ gacchanti, sabbā pipāsā vinayaṃ upenti, sabbe ālayā samugghātaṃ gacchanti, vaṭṭāni upacchijjanti, taṅhā khīyati, sabbapariḷāhā vūpasammanti, vaṭṭadukkaṃ nirujjhati nibbāyati. Tasmā taṃ etāni nāmāni labhatīti.

Dhammo ca kusalakkhatoti tassa satthuno dhammo ca kusalo anavajjo, anavajjattā eva paṭipakkhehi rāgādīhi kilesehi sabbatitthiyavādehi ca aparikkhato. **Tāni tīṇi visissareti** etāni tīṇi ratanāni loke sabbaratanehi visissanti guṇavasena sabbalokaṃ atisentīti attho.

Samaṇapadumasañcayo gaṇoti padumasadisānaṃ ariyasamaṇānaṃ samūhasaṅkhāto gaṇo. Padumanti hi paripuṇṇasatapatassa saroruhassa nāmaṃ. Ariyapuggalā ca sabbathāpi paripuṇṇaguṇāti padumasadisā vuttā. **Vidūnaṃ sakkatoti** vidūhi paṇḍitehi sakkato. **Naravaradamakoti** naravaro ca purisānaṃ damako nāyako cāti attho. **Lokassa uttarīti** lokassa upari ṭhitāni, sabbaloke uttamānīti attho.

Nirupadāhoti rāgapariḷāhādīhi anupadāho. **Saccanāmoti** avitathanāmo yathābhuccaguṇehi āgatanāmo. **Sabbābhībhūti** sabbalokaṃ attano guṇehi abhibhavivā ṭhito. **Saccadhammoti** vaṭṭato ekantanissaraṇabhāvena avitatho saha pariyattiyā navavidhopi lokuttaradhammo, tato eva **natthañño tassa uttarīti** tassa uttari adhikaguṇo añño ca dhammo natthīti attho. **Ariyasaṅghova niccaṃ** sabbakālaṃ vidūhi sabbapaṇḍitehi **pūjito**.

“**Ekāyana**”nti gāthāya **ekāyananti** ekaṃ maggaṃ. Maggassa hi –

“Maggo pantho patho pajjo, añjasam vaṭumāyanaṃ;
Nāvā uttarasetu ca, kullo ca bhisi saṅgamo”ti. (cūḷani. pārāyanatthutīgāthānidessa 101) –

Bahūni nāmāni, svāyaṃ idha ayananāmena vutto. Tasmā ekāyananti ekamaggaṃ, na dvedhāpathabhūtanti attho. Atha vā ekena ayitabbanti **ekāyanaṃ**. Gaṇasaṅgaṇikaṃ pahāya vivekaṭṭhena pavivittena paṭipajjitabbanti attho. Ayanti vā etenāti ayano, saṃsārato nibbānaṃ gacchantīti attho. Ekassa vā sabbasattaseṭṭhassa bhagavato ayanoti ekāyano. Kiñcāpi hi tena aññepi ayanti, tathāpi bhagavatova so

ayano, tena uppāditattā. Yathāha – “so hi, brāhmaṇa, bhagavā anuppannessa maggassa uppādetā”’tiādi (ma. ni. 3.79). Ayatīti vā ayano, gacchati pavattatīti attho. Ekasmiṃ imasmiṃyeva dhammavinaye ayano, na aññatthāti ekāyano. Yathāha – “imasmiṃ kho, subhadda, dhammavinaye ariyo aṭṭhaṅgiko maggo upalabbhatī”’ti (dī. ni. 2.214). Api ca pubbhāge nānāmukhabhāvanāya pavattopi aparabhāge ekaṃ nibbānameva ayati gacchatīti ekāyano, taṃ ekāyanaṃ.

Jātikhayantadassīti jātiyā khayasaṅkhāto anto jātikhayanto. Jātiyā accantakhayanto nibbānaṃ, taṃ passīti jātikhayantadassī. “Maggam pajānāti hitānukampī”’tipi pāṭho. Tassattho – vuttapakāraṃ ekāyanasaṅkhātaṃ maggam sayambhuññaṇena bhagavā pajānāti, jānanto ca tena tena hitena satte anukampatīti. Idāni tassa maggassa ekāyanabhāvaṃ, tīsupi kālesu ekantaniyyānatañca vibhāvetuṃ “**etena maggena tariṃsu pubbe, tarissanti ye ca taranti ogha**”’nti āha. Tassattho – ye atītamaddhānaṃ kāmoghādicatubbidham ogham tariṃsu, ye taṃ anāgatamaddhānaṃ tarissanti, etarahi ca taranti, te sabbe eteneva maggena, na aññenāti. **Visuddhipekkhāti** caturghanittharaṇena accantavisuddhiṃ nibbānaṃ apekkhantā, parinibbāyitukāmāti attho.

Evam duvidhampi sāsanaṭṭhānaṃ nānāsuttapadāni udāharantena vibhajitvā idāni saṃkilesabhāgiyādīhi saṃsanditvā dassetuṃ puna “**lokiyam sutta**”’ntiādi āradham. Tattha **dassanabhāgiyena ca bhāvanābhāgiyena cāti** nibbedhabhāgiyena. Nibbedhabhāgiyameva hi dassanabhāgiyaṃ bhāvanābhāgiyanti dvidhā bhinditvā dassitaṃ. **Lokiyañca lokuttarañcāti** lokiyam lokuttarañca suttaṃ, saṃkilesabhāgiyādīhi dassanabhāgiyādīhi cāti ubhayehi niddisatibbanti adhippāyo. **Yasmiṃ suttetiādi** niddisanākāraddassanaṃ. Tattha **saṃkilesabhāgiyanti** saṃkilesakoṭṭhāsasahitaṃ, saṃkilesatthadīpananti attho. Esa nayo sesesupi.

Evam lokiyattikassa saṃkilesabhāgiyādīhi catūhi padehi saṃsandanaṃ dassetvā iminā nayena sesatikānaṃ sesapadānañca saṃsandanaṃ suviññeyyanti taṃ anuddharitvā saṃkilesabhāgiyādīnaṃ samatikkamanaṃ dassetuṃ “**vāsanābhāgiyam sutta**”’ntiādi vuttaṃ. Tattha yadipi saṃkilesabhāgiyam suttaṃ, vāsanābhāgiyañca suttaṃ lokiyameva. Tathāpi lokuttarasuttāni viya lokiyasuttānaṃ vāsanābhāgiyam suttaṃ saṃkilesabhāgiyassa samatikkamāya hotīti imamatthaṃ dassetuṃ “**vāsanābhāgiyam suttaṃ saṃkilesabhāgiyassa suttassa nigghātāyā**”’ti vuttaṃ. Tattha **nigghātāyāti** pahānāya. Suttasīsenā cettha suttattho gahitoti daṭṭhabbamaṃ. Yasmā ca vodānadhammā viya saṃkilesadhammānaṃ dassanabhūmisamatikkamaneneva bhāvanābhūmi adhigantabbā, tasmā “**bhāvanābhāgiyam suttaṃ dassanabhāgiyassa suttassa paṭinissaggāyā**”’ti vuttaṃ. Yasmā pana asekkhadhammesu uppannesu maggabhāvanākkiccaṃ nāma natthi. Jhānabhāvanāpi diṭṭhadhammasukhavihāratthā eva hoti, tasmā “**asekkhabhāgiyam suttaṃ bhāvanābhāgiyassa suttassa paṭinissaggāyā, asekkhabhāgiyam suttaṃ diṭṭhadhammasukhavihāratthā**”’nti ca vuttaṃ.

Idāni tikapadeheva saṃsanditvā dassetuṃ “**lokuttara**”’ntiādi vuttaṃ. **Ekabījīnāti**ādīsu yo sotāpanno hutvā ekameva attabhāvaṃ janetvā arahattaṃ pāpuṇāti, ayaṃ **ekabījī** nāma. Yathāha –

“Katamo ca puggalo ekabījī? Idhekacco puggalo tiṇṇaṃ saṃyojanānaṃ parikkhayā sotāpanno hoti avinipātadhammo niyato sambodhiparāyaṇo. So ekaṃyeva mānusaṃ bhavaṃ nibbattetvā dukkhassantaṃ karoti. Ayaṃ vuccati puggalo ekabījī”’ti (pu. pa. 33).

Yo pana dve vā tīṇi vā kulāni sandhāvitvā saṃsaritvā dukkhassantaṃ karoti, ayaṃ **kolaṃkolo** nāma. Yathāha –

“Katamo ca puggalo kolaṃkolo? Idhekacco puggalo tiṇṇaṃ...pe... parāyaṇo. So dve vā tīṇi vā kulāni sandhāvitvā saṃsaritvā dukkhassantaṃ karoti. Ayaṃ vuccati puggalo kolaṃkolo”’ti (pu. pa. 32).

Tattha **kulānīti** bhava. **Dve vā tīṇi vāti** idamettha desanāmattameva. Yāva chaṭṭhabhavā

samsarantopi kolaṃkolo hoti eva.

Yo pana satta bhava samsarivā dukkhassantaṃ karoti, ayaṃ **sattakkhattuparamo** nāma. Yathāha –

“Katamo ca puggalo sattakkhattuparamo? Idhekacco...pe... parāyaṇo. So sattakkhattuṃ deve ceva mānuse ca sandhāvitvā samsarivā dukkhassantaṃ karoti. Ayaṃ vuccati puggalo sattakkhattuparamo”ti (pu. pa. 31).

Ko pana tesam etaṃ pabhedam niyametīti? Keci tāva “pubbahetu niyametī”ti vadanti. Keci “paṭhamamaggo”, keci “upari tayo maggā”. Keci “tiṇṇaṃ maggānaṃ vipassanā”ti. Tattha pubbahetu niyametīti vāde paṭhamamaggassa upanissayo kato nāma hoti. Upari tayo maggā nirupanissayā uppannāti āpajjati. Paṭhamamaggo niyametīti vāde upari tiṇṇaṃ maggānaṃ niratthakatā āpajjati. Upari tayo maggā niyamentīti vāde “paṭhamamagge anuppanne eva upari tayo maggā uppannā”ti āpajjati. Vipassanā niyametīti vādo pana yujjati. Sace hi upari tiṇṇaṃ maggānaṃ vipassanā balavatī hoti, ekabījī nāma hoti. Tato mandatarā kolaṃkolo. Tato mandatarā sattakkhattuparamoti. Ettha ca yo manussesu eva sattakkhattuṃ samsarivā arahattaṃ pāpuṇāti, yo ca devesuyeva sattakkhattuṃ samsarivā arahattaṃ pāpuṇāti, ime na idhādhippetā. Yo pana kālena devesu, kālena manussesūti vomissakanayena samsarivā arahattaṃ pāpuṇāti, so idhādhippeto. Tasmā “sattakkhattuparamo”ti idaṃ idhatthakavokinnaṃvaṭṭajjhāsayaṃ vasena vedittabbaṃ. Vaṭṭajjhāsayaṃ hi ādito paṭṭhāya cha devaloke sodhetvā akaniṭṭhe tthatvā parinibbāyissati.

Tattha yo saddhaṃ dhuraṃ katvā sotāpattimaggaṃ nibbatteti, so maggakkhaṇe **saddhānusārī** nāma hoti. Phalakkhaṇe pana saddhāvimutto nāma hutvā vuttanayena ekabījīādibhedo hoti. Yo pana paññaṃ dhuraṃ katvā sotāpattimaggaṃ nibbatteti, so maggakkhaṇe **dhammānusārī** nāma. Phalakkhaṇe pana diṭṭhippatto nāma hutvā ekabījīādibhedo hoti. Idañca aṭṭhannaṃ vimokkhānaṃ alābhino vasena vuttaṃ. Lābhī pana phalakkhaṇe kāyasakkhī nāma hoti. Tattha ye saddhāvimuttadiṭṭhippattakāyasakkhināmakā tayo sotāpannā, te ekabījīādīhi tīheva saṅgahetvā vuttaṃ – “**pañcahi puggalehi niddisittabbaṃ ekabījīnā...pe... dhammānusārīnā**”ti, evaṃ pañcahi.

Dvādasahi puggalehīti sakadāgāmimaggaṭṭho, sakadāgāmī, anāgāmimaggaṭṭho, abhedena anāgāmī, antarāparinibbāyīdayo pañca, saddhāvimuttadiṭṭhippattakāyasakkhino tayoti bhedena aṭṭhāti, evaṃ dvādasahi. Tattha hi yo avihādīsu tattha tattha āyuvemajjhaṃ appatvā parinibbāyati, ayaṃ **antarāparinibbāyī**. Yo pana āyuvemajjhaṃ atikkamitvā arahattaṃ pāpuṇāti, ayaṃ **upahaccaparinibbāyī**. Tathā yo avihādīsu upapanno asaṅkhārena appayogena arahattaṃ adhigacchati, ayaṃ **asaṅkhāraparinibbāyī**. Yo pana sasaṅkhārena sappayogena arahattaṃ adhigacchati, ayaṃ **sasaṅkhāraparinibbāyī**. Uddhaṃ uparūpari brahmaloke upapattisoto etassāti **uddhaṃsoto**. Paṭisandhivasena akaniṭṭhe gacchatīti **akaniṭṭhagāmī**.

Tattha atthi uddhaṃsoto akaniṭṭhagāmī atthi uddhaṃsoto na akaniṭṭhagāmī, atthi na uddhaṃsoto akaniṭṭhagāmī atthi na uddhaṃsoto na akaniṭṭhagāmīti. Tattha yo idha anāgāmiphalaṃ patvā avihādīsu nibbatta tattha yāvātāyukaṃ tthatvā uparūpari nibbattitvā akaniṭṭhaṃ pāpuṇāti, ayaṃ **uddhaṃsoto akaniṭṭhagāmī** nāma. Yo pana avihādīsu nibbatta tattheva aparinibbāyitvā akaniṭṭhampi appatvā uparūpari brahmaloke parinibbāyati, ayaṃ **uddhaṃsoto na akaniṭṭhagāmī** nāma. Yo ito cavitvā akaniṭṭheyeva nibbattati, ayaṃ **na uddhaṃsoto akaniṭṭhagāmī** nāma. Yo pana avihādīsu catūsu aññatarasmiṃ nibbattitvā tattheva parinibbāyati, ayaṃ **na uddhaṃsoto na akaniṭṭhagāmī** nāma. Saddhāvimuttādayo vuttavibhāgāyeva.

Navahi puggalehīti ettha aṭṭhannaṃ vimokkhānaṃ alābhī arahā **paññāvimutto** nāma. Tesam pana lābhī vikkhambhanasamucchedavimokkhavasena ubhohi bhāgehi rūpakāyanāmakāyasāṅkhātato ubhato bhāgato vimuttattā **ubhatobhāgavimutto** nāma. **Samāsīnāti** ettha tividho samāsī – iriyāpathasamāsī, rogasamāsī, jīvitasamāsīti.

Tatra yo tñānādīsu iriyāpathesu yeneva iriyāpathena samannāgato hutvā vipassanaṃ ārabhati, teneva iriyāpathena arahattaṃ patvā parinibbāyati, ayaṃ **iriyāpathasamasī** nāma. Yo pana ekaṃ rogaṃ patvā antoroge eva vipassanaṃ paṭṭhapetvā arahattaṃ patvā teneva rogena parinibbāyati, ayaṃ **rogasamasī** nāma. Palibodhasīsaṃ taṇhā, bandhanasīsaṃ māno, parāmāsasīsaṃ diṭṭhi, vikkhepasīsaṃ uddhaccaṃ, kilesasīsaṃ avijjā, adhimokkhasīsaṃ saddhā, paggahasīsaṃ vīriyaṃ, upaṭṭhānasīsaṃ sati, avikkhepasīsaṃ samādhī, dassanasīsaṃ paññā, pavattasīsaṃ jīvitindriyaṃ, gocarasīsaṃ vimokkha, saṅkhārasīsaṃ nirodhoti terasasu sīsesu kilesasīsaṃ avijjaṃ arahattamaggo pariyādiyati, pavattasīsaṃ jīvitindriyaṃ cuticittaṃ pariyādiyati. Tattha avijjāpariyādāyakaṃ cittaṃ jīvitindriyaṃ pariyādātuṃ na sakkoti. Jīvitindriyapariyādāyakaṃ avijjaṃ pariyādātuṃ na sakkoti. Aññaṃ avijjāpariyādāyakaṃ cittaṃ, aññaṃ jīvitindriyapariyādāyakaṃ. Yassa cetāṃ sīsadvayaṃ samaṃ pariyādānaṃ gacchati, so **jīvitasamasī** nāma.

Kathaṃ panidaṃ samaṃ hotīti? Vārasamatāya. Yasmiñhi vāre maggavutṭhānaṃ hoti, sotāpattimagge pañca paccavekkhaṇāni, sakadāgāmimagge pañca, anāgāmimagge pañca, arahattamagge cattārīti ekūnavīsatiṃ paccavekkhaṇāṇe patiṭṭhāya bhavaṅgaṃ otaritvā parinibbāyato imāya vārasamatāya idaṃ ubhayaśisapariyādānampi samaṃ hoti nāma. Tenāyaṃ puggalo ‘‘jīvitasamasī’’ti vuccati, ayameva idhādhippeto. Evaṃ suññatavimuttādayo tayo saddhāvimutto paññāvimutto ubhatobhāgavimutto samasīti satta sāvakā arahanto, paccekabuddho, sammāsambuddhoti imehi navahi puggalehi asekkhabhāgiyaṃ suttaṃ niddisitabbaṃ.

Rāgacaritoti rāgasahitaṃ caritaṃ etassāti rāgacarito. Rāgena vā carito pavattito rāgacarito, rāgajjhāsayo rāgādhikoti attho. Esa nayo sesesupī. **Rāgamukhe** tñitoti rāgapariyutṭhāne tñito, pariyutṭhitarāgoti attho. Sesapadesupī eseva nayo.

Vāsanābhāgiyaṃ suttanti lokiyaṃ sattādhiṭṭhānaṃ vāsanābhāgiyaṃ suttaṃ. Lokaṃ sattādhiṭṭhānaṃ saṅkilesabhāgiyañhi suttaṃ rāgacaritehi puggalehi niddiṭṭhaṃ. Tattha ‘‘lokiyaṃ, sattādhiṭṭhāna’’nti padadvayaṃ anuvattamānaṃ katvā vuttaṃ ‘‘vāsanābhāgiya’’nti. **Sīlavantehī** sīlavantādīhi puggalehi. **Pakatisīlanti**tiādi yehi samannāgatā, te puggalā. Tesāṃ dassanena puggalānaṃ upalakkhaṇaṃ. Atha vā dhammādhiṭṭhānaṃ pakatisīlādivasena, sattādhiṭṭhānaṃ pakatisīlavantādivasena veditabbanti imassa nayassa dassanatthaṃ ‘‘sīlavantehi niddisitabba’’nti vatvā ‘‘pakatisīla’’ntiādi vuttaṃ. Taṃ pakatisīlādivaṇaṃ pañcannaṃ eva gahaṇaṃ nidassanamattaṃ, pattidānaabbhanumodanadhammassavanadesanādiṭṭhijukammādivaṇampi cettha sambhavato. Tesampi vā ettheva saṅgahetvā dassanatthaṃ ‘‘pañcā’’ti vuttaṃ.

Tattha **pakatisīlanti** sampattaviratisīlaṃ. **Cittappasādoti** kammaphalasaddhā ratanattayasaddhā ca. **Ñāṇaṃ paññāya niddisitabbanti** yasmim sutte paññā āgatā, taṃ suttaṃ ñāṇanti niddisitabbaṃ. Na kevalaṃ paññāpariyāyeneva, atha kho paññindriyādiyāyēnapi yattha paññā āgatā, taṃ suttaṃ ñāṇanti niddisitabbanti dassetuṃ ‘‘paññindriyēnā’’tiādi vuttaṃ. Tassattho – heṭṭhā vutto eva. **Yaṃ vā panāti**tiādisu yaṃ vā aññaṃ kiñci paññāya adhivacanaṃ. Sabbaṃ taṃ yattha katthaci sutte āgataṃ, taṃ suttaṃ ñāṇanti niddisitabbanti attho.

Ajjhattikabāhirehīti yasmim sutte ajjhantikāni āyatanāni, bāhirāni ca āyatanāni āgatāni, taṃ suttaṃ tehi āyatanehi ñāṇaṃ ñeyyanti niddisitabbaṃ. **Paññāpi ārammaṇabhūtā** ñeyyanti ñeyyato visum katvā paññā vuttā. Tathā hi paññā ñāṇantarassa ārammaṇanti katthaci sutte ñeyyabhāvenapi vuccati. **Yaṃ kiñci ārammaṇabhūtanti** yaṃ kiñci ñāṇassa visayabhūtaṃ rūpādi. **Ajjhattikaṃ vā bāhiraṃ vāti vā** saddena oḷārikādiṃ saṅgaṇhāti. **Sabbaṃ taṃ saṅkhatena asaṅkhatena cāti** sabbaṃ taṃ yathāsambhavaṃ saṅkhatabhāvena asaṅkhatabhāvena ca ñeyyanti niddisitabbaṃ. Ñeyyadhammasena hi ñeyyasuttaṃ ñeyyanti vuccatīti.

Yaṃ vā pana kiñci bhagavā aññataravacanaṃ bhāsatiti lokiyalokuttarādisuttasu ekasmim sutte dve. Tesu yaṃ vā pana kiñci aññataravacanaṃ ekasseva kathaṃ bhāsati niddisati. **Sabbaṃ taṃ**

yathāniddiṭṭhaṃ dhārayitabbanti taṃ yathā sabbaṃ suttaṃ lokiyādīsu yadi aññataravasena, atha ubhayavasena yathā yathā niddiṭṭhaṃ, tathā tathā gahetabbaṃ, taṃ taṃ padhānabhāvena niddisitabbanti attho.

Kilesasahitaññeva kammaṃ vipākassa hetu, na itaranti vuttaṃ “**duvidho hetu yañca kammaṃ ye ca kilesā**”ti. **Samudayo kilesā**ti ettha “samudayo”ti etena samudayapakkhiyā vuttā. “Kilesā”ti ca kilesavanto, saṃkiliṭṭhāti attho. **Yaṃ dissatīti** yaṃ yaṃ dissati. **Tāsu tāsu bhūmīsūti** puthujjanabhūmiādīsu. **Kappiyānulomenāti** kappiyena ca kappiyānulomena ca. Tatha kappiyaṃ pāliyaṃ sarūpato vuttaṃ, kappiyānulomaṃ mahāpadesavasena nayato dassitaṃ. **Paṭikkhittakāraṇenāti** yena kāraṇena bhagavatā yaṃ paṭikkhittaṃ, tena kāraṇena taṃ niddisitabbaṃ. Ekantena sarāgādisaṃvattanameva hi bhagavatā paṭikkhittaṃ, taṃ sarāgāya saṃvattanādikāraṇena niddisitabbaṃ. **Dhammassāti** asaṅkhatadhammassa. **Ariyadhammānanti** maggaphaladhammānaṃ. Sesam suviññeyyameva.

Ettha ca yathā saṃkilesabhāgiyādīnaṃ aññamaññaṃ saṃsaggato anekavidho paṭṭhānabhedo icchito, evaṃ lokiyasattādhīṭṭhānādisaṃsaggatopi anekavidho paṭṭhānabhedo sambhavati. Pāliyaṃ pana ubhayatthāpi ekadesadassanavasena āgatattā nayadassananti veditaṃ. Sakkā hi iminā nayena viññunā te niddhāretunti. Yathā ca saṃkilesabhāgiyādīnaṃ lokiyādīnañca visuṃ visuṃ saṃsaggabhedavasena ayaṃ paṭṭhānabhedo anekavidho labbhati, evaṃ ubhayesampi saṃsaggavasena ayaṃ nayo yathārahaṃ labbhateva. Labbhati hi lokiyaṃ suttaṃ kiñci saṃkilesabhāgiyaṃ, kiñci vāsanābhāgiyaṃ. Tathā lokuttaraṃ suttaṃ kiñci nibbedhabhāgiyaṃ, kiñci asekkhabhāgiyanti. Sesesupi eseva nayo.

Evaṃ soḷasavidhe paṭṭhāne aṭṭhavīsatividhaṃ paṭṭhānaṃ pakkhipitvā, aṭṭhavīsatividhe ca paṭṭhāne soḷasavidhaṃ pakkhipitvā yathārahaṃ dukatikādibhedena sambhavato paṭṭhānavibhāgo veditaṃ, so ca kho tīsu piṭakesu labbhamānassa suttapadassa vasena. Yasmā pana tāni tāni suttapadāni udāharaṇavasena niddhāretvā imasmiṃ atthe vitthāriyamāne atipapañco hoti, atibhāriyā ca nettisaṃvaṇṇanā, sakkā ca iminā nayena viññunā ayamattho viññātuṃ, tasmā na taṃ vitthārayimha. Teneva hi pāliyaṃ aññamaññaṃsaṃsaggavasena paṭṭhānavibhāgo ekadeseneva dassito, na nippadesatoti.

Sāsanapaṭṭhānavāraṇṇanā niṭṭhitā.

Nigamanakathā

Ettāvatā ca –

Hāre naye ca paṭṭhāne, suvisuddhavinicchayaṃ;
Vibhajanto navaṅgassa, sāsanassatthavaṇṇanaṃ.

Nettipakaraṇaṃ dhīro, gambhīraṃ nipuṇaṅca yaṃ;
Adesayi mahāthero, **mahākaccāyano** vasī.

Saddhammāvataratṭhāne, paṭṭhane nāgasavhaye;
Dhammāsokamahārāja-vihāre vasatā mayā.

Ciraṭṭhitatthaṃ yā tassa, āraddhā **atthavaṇṇanā**;
Udāharaṇasuttānaṃ, lakkhaṇānañca sabbaso.

Atthaṃ pakāsayantī sā, anākulavinicchayā;
Samattā sattavīsāya, pāliyā bhāṇavārato.

Iti taṃ saṅkharontena, yaṃ taṃ adhigataṃ mayā;

Puññaṃ tassānubhāvena, lokanāthassa sāsanaṃ.

Ogāhetvā visuddhāya, sīlādipaṭipattiyā;
Sabbepi dehino hontu, vimuttirasabhāgino.

Ciraṃ tiṭṭhatu lokasmiṃ, sammāsambuddhasāsanaṃ;
Tasmiṃ sagāravā niccaṃ, hontu sabbepi pāṇino.

Sammā vassatu kālena, devopi jagatīpati;
Saddhammanirato lokaṃ, dhammeneva pasāsatūti.

Iti badaratitthavihāravāsinā ācariyadhammapālena katā

Nettippakaraṇassa atthasaṃvaṇṇanā samattāti.

Nettippakaraṇa-aṭṭhakathā niṭṭhitā.